

Atre **Jejus nhỹ hã mẽ ahkre ho mẽ pa xwỳnhjaja kot tanhmã amnhĩ nhĩpêx to ho pa hã mẽ harênh**

Rukre na pre kagàja nhĩpêx. Na pre kêp tôô nẽ hkwỳjê kane ho pa. Nẽ Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nẽ hamaxpêr nẽ hkràmnhwỳ Teopre mã kagàja nhĩpêx nẽ hwỳr kumẽ. Nẽ kagàja kamã Jejus nhỹ hã mẽ ahkre ho mẽ pa xwỳnh maatiijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nẽ Ijaew nhõ patrejaja nẽ mẽ hkwỳ pê Parijew nhõ xwỳnhjaja nẽ mẽ hkwỳ pê Satusew nhõ xwỳnhjaja kot Tĩrtũm kapêr ã kagà htũm kamã harênh nẽ mar nẽ hkôt amnhĩ nhĩpêx tã Tĩrtũm Kra Jejus kôt amnhĩ nhĩpêx kêt ã mẽ harê. Mẽ kot kêp Tĩrtũm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nẽ. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ uràk nẽ kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nẽ tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nẽ Jejus kaga hkêt nẽ. Mẽ kot mẽ hipêx kati htã na prem arĩ Tĩrtũm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nẽ kapit 1 kamã wesik 8 japêr nẽ kamã harê. Hãmri nhũm Rukre ã mẽ kot amnhĩ nhĩpêx anhỹrja piitã hã kagà nẽ Teopre hwỳr kumẽ. Nẽ kãm mẽ harênh o:

Tĩrtũm Karõ jarẽnh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awỳr kagà nhĩpêx nẽ kumẽ. Nà wam ixte awỳr kagà nhĩpêx nẽ mẽnhta kamã na pa pre amã Jejus kot tanhmã amnhĩ nhĩpêx to hã harẽ nẽ hã kagà. Kot tanhmã amnhĩ nhĩpêx to ho pa nẽ tanhmã mẽ ahkre hto ho paja krax rũm pa pre piitã hã kagà hpa nẽ awỳr kumẽ. ²⁻⁴ Kormã akupỹm kaxkwa hwỳr àpir xwỳj ri na pre ỹ hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupĩ nhũm amnhĩ xà htỳx kãm hamak rax kãm ty. Hãmri nhũm Tĩrtũm akupỹm ho htĩr. Nom nhũm ma akupỹm kaxkwa hwỳr àpir kurê kumrêx kêt nẽ. Na pre xatã mẽ kot ỹ hã mẽ ahkre ho mẽ pa xwỳnh maatijê hwỳr hapôj nhũm mẽ akupỹm htĩr kãm omu. Na pre hte nhỹri mẽ hwỳr hapôj nẽ tanhmã mẽ ahkre hto nẽ mẽ kãm:

—Na pre Tĩrtũm mẽ ato hkra nẽ tãm mẽ ate amnhĩ nhĩpêx o apa kaxyw mẽ axunhwỳ.

Anhỹr o mẽ ahkre hã arĩgro ho 40. Hãmri nẽ kormã mẽ kamã pa ri axte tanhmã mẽ kãm kapêr to. Tĩrtũm Karõ nhỹ hã mẽ kãm kapêr nẽ mẽ kãm:

—E kêr ka mẽ krĩ ja kamã ri apa nẽ tokyx ma nhỹhỹm apa hkêt nẽ. Kê Inhĩpêxà Tĩrtũm mẽ awỳr amnhĩ Karõ rẽ mãn. Ra ixte mẽ amã harẽnh xà hkôt koja mẽ awỳr kurê nhũm mẽ awỳr wrỳ nẽ mẽ akarõ mã agjê ka mẽ rĩ kormã anhrà nẽ ma nhỹhỹm krĩ hkôt ri mẽ kãm kapêr jarẽnh o ri mẽ hkôt apa.

⁵ —Juãw Paxis na pre hte Tĩrtũm mã gôx kãm mẽ hkrã kumrãr o pa. Tã koja Tĩrtũm tokyx mẽ awỳr

amnhĩ Karõ rě. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurẽ. Koja hã apkati grêre nhũm mẽ awỳr kurẽ nhũm ixpãnhã mẽ awỳr wrỳ nẽ mẽ amã agjê nẽ mẽ akamã mẽ akôt pa ho pa. Ka mẽ rĩ kormã Jerujarẽ rũm ajapôj nẽ ma mẽ kãm Tĩrtũm kapěr jarěnh o ri mẽ hkôt apa. Anẽ.

*Jejus akupỹm kaxkwa hwỳr àpir ã harěnh
Makre 16.19; Rukre 24.50*

⁶ Tã nhũm mẽ axte akuprõ. Jejus nẽ ỹ hã mẽ ahkre ho mẽ pa xwỳnh maatijaja nhũm mẽ hixêt pẽ Oriwêhti nhĩmõk ã axte axpẽn wỳr akuprõ. Hãmri nhũm mẽ amnhĩ tã Jejus kukja nẽ kãm:

—Kwa Pahihti mẽ inhmã mẽmoj jarẽ. Xà kot kaj tokyx apẽ Tĩrtũm kot mẽ ixwỳr aměnh xwỳnh ã amnhĩ jarẽ nẽ Rõm nhõ xwỳnhjê nẽ mẽ pahpẽ Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anẽ.

⁷ Hãmri nhũm mẽ kãm:

—Nà Inhĩpêexà pix na ã mẽmoj kot anhỹrja kukamã àhpumunh. Tapxipix na kot mẽmoj tanhmã ho hã arĩgro nẽ mẽmoj tanhmã ho hã mytwrỳ pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarěnh ma? ⁸ Nà kot paj âm mẽ amã mẽmoj to pyxire nẽ hkukamã harẽ. Koja Tĩrtũm tokyx mẽ awỳr amnhĩ Karõ rě nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkôt anhgrà nẽ ma mẽ kãm ixkapěr jarěnh o ri mẽ hkôt apa. Jar Jerujarẽ kamã nẽ pika pẽ Jutej kôt nẽ nhãm pika pẽ Samar kamã nẽ pika piitã hkôt mẽ kãm ijarěnh o ri mẽ hkôt apa. ã mẽ ate

amnhĩ nhĩpêx anhỹr pix kukamã kot paj mẽ amã harẽ. Anẽ.

⁹ Nhũm pre ã Jejus mẽ kãm kapêr anẽ hãmri nẽ mẽ kêp kànhmã àpir o tẽ nẽ mẽ noo mã ma kaxkwa hwỳr àpir o tẽ nẽ kakrãm axà nẽ mẽ kêp akunok.

¹⁰ Hãmri nhũm mẽ tee ri hapêr o kuhê rãhã nhũm mēhõ myja wa axkrut nẽ mẽ hwỳr wrỳ nẽ mẽ kutã wa xa. Wa ê hakaj nẽ wa xa. ¹¹ Hãmri nẽ mẽ kãm:

—Pa Garirej nhõ xwỳnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupỹm amnhĩ wỳr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nẽ. Koja nhỹrmã man akupỹn mẽ awỳr wrỳ. Te mẽ arũm kaxkwa hwỳr àpirja pyrà nẽ akupỹn mẽ awỳr wrỳ ka mẽ omu. Anẽ.

Akupỹm Jerujarẽ hwỳr mẽ mrar ã mẽ harẽnh

Rukre 24.52

¹² Tã nhũm Jejus nhỹ hã mẽ ahkre ho mẽ pa xwỳnh maatijaja wa kuma nẽ awjanã nẽ ma akupỹm krĩm mra. Hixêr pê Oriwêhti rũm ma akupỹm Jerujarẽ hwỳr mra. Wỳr jawỳ nhũm mẽ akupỹm hpôx tokyx anẽ. ¹³ Hãmri nẽ akupỹm kỳx pê ixkreja wỳr api nẽ agjê. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pê Apew kraja nẽ

Simãw Jerox nẽ

Jut pê Xiakre hkraja.

Mẽ piitã Jejus nhỹ hã mẽ ahkre ho mẽ pa xwỳnh maatijsa na pre mẽ. ¹⁴ Nẽ mãnẽn mẽ hkôt mẽ hkwỳjsa. Jejus katorxà Marir nẽ Jejus tỗjsa nẽ Jejus kot tanhmã mẽn ho mex to xwỳnh kwỳjsa nhũm prem kỳx pẽ ixkreja wỳr Jejus nhỹ hã mẽ ahkre ho mẽ pa xwỳnh maatijsẽ hkôt gjẽx pa. Hãmri nẽ xatã axpẽn wỳr akuprõ nẽ Tĩrtũm mã amnhĩ jarẽnh o hkrĩ.

*Tĩrtũm kot Jut Kariot pãnhã mễhõ xãm ã harẽnh
Matêwre 27.3-10; Juãw 15.27*

¹⁵⁻¹⁹ Tã nhũm mẽ kot Jejus kôt amnhĩ xunhwỳr xwỳnhjsa ra kệp 120. Jakamã nhũm mẽmo arĩgro hã axpẽn wỳr akuprõ nẽ hkrĩ. Nhũm Simãw Pẻtre kànhmã xa nẽ tanhmã mẽ kãm Jut Kariot jarẽnh to nẽ mẽ kãm:

—E Jejus kôt ixtõ nẽ ixtõjsa. Pa mẽ amã tanhmã finat Jut Kariot jarẽnh to ka mẽ inhma. Na pre axtem nẽ mẽ pahkwỳjẽ mã Jejus ã amỹnẽ nẽ hpãnhã kàxpore hkwỳ jamỹ nẽ o tẽ nẽ ho amnhĩm pyka hkwỳ japrõ. Tã tanhmã amnhĩ to nẽ nhỹri õ pyka kamã tẽm nẽ amnhĩ tu katõk nẽ hkrẽx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwỳnhjsa harẽnh ma nẽ pykaja ã hixi mẽ nhũm kệp “pyka kamrõhti.” No mẽ pahpẻ Ijaew kapẻ kãm kệp “Ajetãm.” Amnepẻm na pre Tĩrtũm Karõ finat Tawi mã Jut Kariot kukamã tanhmã harẽnh to. Kormã kator nẽ kot tanhmã amnhĩ to hkết tã nhũm ra hkukamã omu nẽ Tawi mã harẻ. Kot axtem nẽ mẽ kãm Jejus ã àmnẻnhja nhũm hkukamã omu nẽ Tawi mã harẻ nhũm kuma nẽ ô ri hã kagà. Tã nhũm kot hkukamã hã kagà hkết nhũm ã Jejus nhĩpẻx anẻ. Jut Kariotja mẽ panhĩ na pre. Na pre Jejus mẽ pahpyrà nẽ amnhĩm

kuta. Mě pahpyrà nẽ ỹ hã kapěr jarēnh o pa kaxyw. Tã nhũm axtem nẽ ã hipêx anẽ.

²⁰ Nom na pre Tawi kot Tĩrtũm mex ã grer ã kagà kot ra hkukamã tanhmã harēnh to. Kagà hkwỹ pẽ Sam kamã kot harēnh kot:

Kot amnhĩ tomnuj xwỹnh̃ta nhõrkwỹ koja hkaprỹn kuhê ho kuhê nhũm mēhõj mỳr pẽ kamã pa hkêt kumrēx. Koja ãm arĩ hkaprỹn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mēhõ mỳr pẽ ho amnhĩptà nẽ hpãnhã Jejus nhỹ hã mẽ ahkre ho pa. Anẽ.

Ã Tĩrtũm kapěr ã kagà htũm kot Jut Kariot kukamã harēnh kot anhỹr. ²¹ Jakamã e ixkwỹjaja. Kot puj mẽ hpãnhã mẽ atõ xãm ka Jut mỳr pẽ mẽ pahpẽ Jejus nhỹ hã mẽ ahkre ho ixpa xwỹnh̃jẽ hkôt Jejus akupỹm htĩr ã harēnh o apa. ²² E mẽ atõ na ka pre mẽ ixpyràn finat Juãw Paxis kot Jejus hkrã kumrār ã omu? Nẽ Jejus kot ri tanhmã amnhĩ nhĩpêx to ho pa xà hkrax rũm ka mẽ ixkôt ri omunh o ri apa? Nẽ htyk kãm omu nẽ akupỹm htĩr kãm omu nẽ ma akupỹm kaxkwa hwỳr àpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhỹr ã omunh par o ri hkôt apa? ã mẽ ate kot amnhĩ nhĩpêx anhỹr ã omunh o apa xwỹnh̃jẽ hõ kot paj mẽ ata ka Jut Kariot mỳr pẽ mẽ ixpyràn ma mẽ kãm Jejus akupỹm htĩr ã harēnh o ri apa. Anẽ.

²³ Nhũm pre ã Simãw Pêtre mẽ kãm kapěr anẽ. Hãmri nhũm mẽ kuma nẽ axpẽn pumunh o hkrĩ hãmri nẽ Maxitre mẽ Jujere wa kãm hamaxpěr. Jujere na pre hixi axkrunēpxi. Na pre kệp Jujere nẽ kệp Pasapas nẽ kệp Justĩ. ²⁴⁻²⁵ Hãmri nhũm mẽ wa hã Tĩrtũm kukja nẽ kãm:

—Pa Tĩrtũm? Nà na pre finat Jut Kariotja Jejus kaga nẽ ty nẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma mỗ. Tã ot pa mẽ ixte mễhỗ kot mỳr pẽ mẽ ixpyrà nẽ Jejus nhỹ hã mẽ ahkre ho pa kaxyw mễhỗ hã akukjêr kaxyw akuprỗ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpêr kôt mẽ ixpumunh par nẽ mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kẽn pijakrutja ã wa hixi xi nẽ ho àk nẽ hỡ py. Hãmri ka amã hprãm xwỳnh ta. Kêr pa mẽ kẽn pumunh kêt rãhã hỡ py nẽ hã hixi pumu nẽ amã hprãm xwỳnh kôt omunh kurê kumrêx. Anẽ.

²⁶ Nhũm prem ã Tĩrtũm mã kapêr anẽ hãmri nẽ kẽnja o axkamur nẽ ho àk nẽ omunh kêt rãhã ja py nẽ omu nhũm hã Maxitre nhĩxi nỡ. Jakamã nhũm Jejus nhỹ hã mẽ ahkre ho mẽ pa xwỳnh maatijsa amnhĩ kôt kumẽ nhũm mẽ akupỳm kêp 12.

2

Tĩrtũm Karỗ kot mẽ hwỳr wrỳk ã harênh

Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pẽ Pêtekos kato nhũm mẽ kot Jejus kôt amnhĩ xunhwỳr xwỳnhjsa nhỹri axpẽn wỳr akuprỗ nẽ hã hkĩnh. Pêtekosja ã na pre hte Ijaew mẽ hpur kãm mẽo rũnh ã hkĩnh kaxyw axpẽn wỳr akuprỗ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjsa haxwỳja axpẽn wỳr akuprỗ. ² Hãmri nẽ kaxkwa kamã mẽmoj ma. Nhũm mẽmoj te kôk xàpêr tỳx krihkrit pyràk o mẽ hwỳr wrỳk o mỗ nẽ mẽ pikuprỗnh xà hã ixkreja

wỳr axà nhũm mẽ piitã kuma. ³ Hãmri nhũm mẽmoj te kuwy jakrax pyrækja ahpỹnhã mẽ hwỳr anhrà nẽ mẽ hkrã nhũmøk ã hikwỹ. ⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptàr kaxyw mẽ hkarõm gjêx pa nhũm mẽ ỹ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỹnhã mẽ kapêr kwỳ ho Tĩrtũm mã mex o mex ã harẽ. Na pre Ijaew kwỳjaja ahpỹnhã pyka hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỹm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jesus kwỳjê hwỳr hprõt nẽ ahpỹnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harênh to ho:

—Kokỹỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỹnhã ri mẽ pakapêr o kapêr. Ahpỹnhã mẽ pakapêr nẽ ahpỹnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat
 nẽ Met
 nẽ Erãw
 nẽ Mēsopotãm
 nẽ Jutej
 nẽ Kapatos
 nẽ Põt
 nẽ As
 nẽ Prik
 nẽ Pãpir
 nẽ Ejit
 nẽ Sirẽn wỳr Ripja

ně krĩ pê Rõm
 ně gô hipôk pê Kret
 ně Arap.

Ně mẽ pahkwỳjaja mẽ pahpê Ijaew kumrêx
 ně mẽ pahkwỳjaja amarĩ ri amnhĩ to Ijaew.

Ăm ahpỹnhã mẽ panhõ pyka ně ahpỹnhã ri mẽ pakapêr.

—Tã pu mẽ ahpỹnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harênhja pu mẽ hã mẽ mar mex ně. Anê.

Nhũm prem ã axpẽn mã mẽ harênh anê ně tee ri mẽ omunh o kuhê. Amnhĩ jaêr pê amnhĩ kapêr kãm mẽ kapêr ma ně tee ri hamaxpêr ně axpẽn mã:

—Kokỹỹ. Tanhmã măn pre wem amnhĩ to ně ra mẽ pakapêr ma ně mẽ pakapêr o kapêr? Anê.

Nhũm mẽ hkwỳjaja axtem ně ri mẽ hã hpêr o axkê ně axpẽn mã:

—Tk. Ăm mẽ pipãnh ã ã ri mẽ kot amnhĩ nhĩpêx anhỹr kênã. Anê.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr anhỹrja ma hãmri ně kỳx pê mẽ kãm kapêr ně mẽ kãm:

—E Jerujarê nhõ xwỳnhjaja ně mẽ apê ixkwỳ Ijaew. Pa mẽ amã mẽmoj jarê ka mẽ inhma ně inhmar tỳx ně. ¹⁵ Na ka mẽ atỳx ri mẽ ix-pipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpôk wỳr htêm kênã. Na hte Ijaew kwỳhtã kagôxỳhti ho hkôm kêt ně. ¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhỹrja kukamã mẽ ijarê nhũm ỹ hã kapêr o pa

xwỳnh finat Joew mẽ ixkukamã hã kagà. Nẽ hã kagà ho:

¹⁷ Koja nhỹrmã mẽmoj piitã hapêx kaxyw pa mẽ piitã mẽ hwỳr Ixkarõ rẽ nhũm ma mẽ hwỳr wrỳ nẽ mẽ hkarõ mã agjê. Hãmri nhũm mẽ hkanrêhã mẽ hkra xàptàr nywjaja ma mẽ kãm ixkapêr jarênh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêjtaja haxwỳja. Kot paj mẽ hpimtir kãm tanhmã mẽ kãm ixkapêr to.

¹⁸ Nẽ kot paj mẽ kot ixkôt ri tanhmã amnhĩ nhĩpêx to ho mẽ pa xwỳnhjê hwỳr Ixkarõ rẽ nhũm mẽ ỹ hã ma mẽ kãm tanhmã ixkapêr jarênh to ho ri mẽ hkôt pa.

¹⁹ Kot paj kaxkwa kamã nẽ pyka kamã aa mẽ kot mẽmoj pumunh kêt kwỳ ho anẽ nhũm mẽ amnhĩ jaêr pê omu. Jao nhỹri mẽ hkamrô pumu nẽ kuwy pumu nẽ kuwy hkũm pumu hãmri nẽ tee ri amnhĩ kukamã hamaxpêr.

²⁰ Nẽ koja myyti ahtyk nhũm mytwrỳre haxwỳja te mry kamrô pyràk. Pahihti Jejus akupỹn hpôx xà hã arĩgro xwỳj ri koja mẽmoj ã amnhĩ nhĩpêx anẽ. Akupỹn hpôx xà hã arĩgro koja mex kumrêx.

²¹ Tã koja mẽhõ mẽmoj kot ã amnhĩ nhĩpêx anhỹr ã omu nẽ amnhĩ kaxyw inhmã hamaxpêr nẽ amnhĩ to ixwỳ pa kuma nẽ ho ixkra nẽ mẽmoj punujta pê utà. Anẽ.

Na pre ã Tĩrtũm kapêr anẽ nhũm finat Joewja mẽ pamã hã kagà. ²² E pa mẽ amã tanhmã Jejus jarênh to ka mẽ inhma. Nà Najare nhõ xwỳnh na pre. Mẽ pahte Tĩrtũm nhỹ hã kot tanhmã amnhĩ nhĩpêx to

ho pa hã omunh kaxyw na pre Tĩrtũm mẽ pahwỳr kumẽ nhũm ỹ hã mẽ panoo mã tanhmã amnhĩ nhĩpêx to ho pa. Nẽ aa mẽ pahte mẽmoj pumunh kêt kwỳ ho anhyr o pa pu prem hã omu.

23 —Tã ka prem tanhmã kaxyw ajamaxpêr punuj to nẽ apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwỳr kumẽ ka mẽ axtem nẽ apĩ. Jao mẽ kot htỳx ri amnhĩ nhĩpêx o mẽ pa xwỳnhjê mã agõ nhũm mẽ kupĩ. Pĩkahpa hã kunhõ nhũm ty. No ăm mẽ kajaja na ka prem mẽ kãm hã amỹnê nhũm mẽ ă mẽ amã hprãm xà hkõt hipêx anê nẽ mẽ amã kupĩ.

24 —Tã nhũm Tĩrtũm akupỹm ho htĩr nhũm akupỹm htĩr o htĩr nhũm mẽ htykja tee ri kot amnhĩ kõt mēnh prãm kaprỳ. 25 Amnepêm na pre finat Tawija Jejus akupỹm htĩr kukamã harẽ. Te Jejus tãm kapêr pyrak o kapêr nẽ kapêr o:

Na hte Pahi Maati ixkõt pa ho pa rãhã nẽ. Kot inhĩhkõ hã ixtãnopxar o pa jakamã kot paj inhmã ma hkêt nẽ ri ixàmnhĩx ijamakêtkati nẽ ri ixpa.

26-27 Pa Tĩrtũm? Nà kot paj nhỹrmã ixtyk tã arĩ amnhĩ wỳr akãm ama. Kot kaj mẽ htykjê kamã ixkarõ rer kêt nẽ. Ixte akapêr kõt amnhĩ nhĩpêx mex o ri ixpa jakamã koja inhĩkormã omnu nẽ hkro hkêt ri ka akupỹm ixto ixtĩr. Jakamã na pa inhmã ixtyk pyma hkêt nẽ ixkĩnh nẽ ijamakêtkati nẽ ri ixpa. Nẽ amnhĩ kĩnh jarēnh rãhã ho ri ixpa.

28 Na ka pre akupỹm ixto ixtĩr ă amnhĩ jarẽ pa ixtĩr tũm nẽ ixpa ho ixpa kaxyw. Tã ate ixkõt ri apa rãhã jakamã pa ixkĩnh nẽ ri ixpa. Anẽ.

29 Æ na pre mẽ panhĩgêť finat Pahi Tawija Jejus htyk nẽ akupỹm htĩr kukamã harẽnh anẽ. No tãm amnhĩ jarẽnh kêt nẽ. Tawija na pre ty nhũm mẽ haxà nhũm htem arĩ haxàr xà hã pika ho mex o pa. Tã tãm ã kot amnhĩ jarẽnh anhỹr ro nhỹx akupỹm htĩr nhũm mẽ arĩ haxàr xà kaprỹ ho mex o pa hkêt nẽ. 30 Pahi Tawi kêp Tĩrtũm nhỹ hã kapêr jarẽnh o pa xwỹnh jakamã nhũm Tĩrtũm kãm hkanrêhã htãmnhwỹ Jejusja kukamã harẽ nẽ kãm:

Koja nhỹrmã akanrêhã atãmnhwỹjê hõ amỹr pê apyrà nẽ mẽ ho amnhĩptàr o pa. Æm hãmri na pa amã ja jarẽ. Anẽ.

31 Nhũm pre ã Tĩrtũm Tawi mã mẽ pakaxyw ãm mã xwỹnhhta jarẽnh anẽ nhũm kuma. Nẽ mar tỹx jakamã hkukamã htyk nẽ akupỹm htĩr ã harẽ nẽ hã kagà. Nẽ hã kagà ho:

Koja Tĩrtũm mẽ htykjê kamã hkarõ rer kêt nẽ nhũm aa ĩ omnu nẽ hkro kêt. Anẽ.

Æ na pre finat Tawija Jejus Kris kukamã harẽ nẽ hã kagà anẽ. 32 Kot harẽnh xwỹnh Jejusja tãm na pre Tĩrtũm akupỹm ho htĩr pa mẽ pamjaja akupỹm htĩr kãm omu. Hãmri nẽ mẽ ixte omunh xà hkôt ã mẽ amã harẽnh anẽ. Anẽ.

Nhũm pre ã Simãw Pêtre mẽ kãm Jejus jarẽnh anẽ. Hãmri nẽ mẽ kãm:

33 —Na pre Tĩrtũm akupỹm amnhĩ wỹr Kra Jejus o api. Hãmri nẽ kãm anẽ nhũm ĩhkô hã mẽmoj piitã ho amnhĩptàr o hkrĩ. Hãmri nhũm Tĩrtũm kot kãm amnhĩ jarẽnh xà hkôt kãm amnhĩ Karõ gõ. Tã nhũm ra amnhĩ pyrà nẽ mẽ ixwỹr kurẽ nhũm jarãhã mẽ ixwỹr te kuwy jakrax pyrà nẽ mẽ ixwỹr wrỹ nẽ mẽ ixkarõ hwỹr gjêx pa. Hãmri pa mẽ ĩ hã ahpỹnhã mẽ akapêr o ixkapêr ka mẽ inhma. Tã mẽ

akwỳjaja axtem nẽ mẽ xpipãnh ã mẽ ixkamnhĩx.

³⁴ No finat Tawija na pre tãm kaxkwa hwỳr àpir ã amnhĩ jarẽnh kêt nẽ. Jejus kot ì ho kaxkwa hwỳr àpirja na pre harẽ nẽ harẽnh o:

Na pre Tĩrtũm inhõ Pahihti mã kapẽr nẽ kãm:

³⁵ “E jar inhĩhkô hã nhỹ.

Pa amã mẽ kãm akurê xwỳnhjê gõ ka mẽ ho amnhĩptàr o akrĩ.” Anẽ.

Ã na pre finat Tawija Tĩrtũm kapẽr jarẽnh anẽ. Nom tãm ì rãhã kaxkwa hwỳr àpir ã amnhĩ jarẽnh kêt nẽ. Pahihti Jejus na pre ã hã harẽnh anẽ.

³⁶ Jakamã kwa ixkwỳ Ijaew. Mẽ inhma nẽ inhmar tỳx nẽ. Mẽ ate Jejus ã axàmnhẽnh nhũm mẽ kot mẽ amã pĩ kahpa hã hpĩr xwỳnhhta. Tãm na pre Tĩrtũmja kęp mẽ panhõ Pahihti kaxyw ãm. Nẽ kęp mẽ papytār xwỳnh kaxyw mẽ pakaxyw ãm. Anẽ.

³⁷ Nhũm pre ã Simãw Pêtre mẽ kãm ujarẽnh anhỹr o xa. Hãmri nhũm mẽ tee ri ujarẽnhja ma nẽ hkaprĩ nẽ. Nẽ tee ri amnhĩ kukamã hamaxpẽr nẽ hamaxpẽr o:

—Hêxta waa nẽ. Pẽr ãm hãmri na pre Jejus mẽ pamã amnhĩ jarẽnh tã pu prem amnhĩ kaxyw hkõt pajamaxpẽr kêt nẽ axtem nẽ kupĩ. Anẽ.

Hãmri nẽ amnhĩ tã mẽ hkukja nẽ Simãw Pêtre mã:

—Kwa ã kot anhỹr jakamã tanhmã kot paj mẽ amnhĩ nhĩpêx to? Anẽ.

³⁸ Hãmri nhũm mẽ kãm:

—Nà kër ka mẽ tee ri ate amnhĩ tomnuj mã ajamaxpẽr nẽ akaprĩ nẽ. Hãmri nẽ Jejus Kris kõt amnhĩ xunhwỳ. Pa mẽ ja hã mẽ apumu nẽ Jejus nhỹ hã mẽ akrã kumrã. Hãmri nhũm Tĩrtũm ja hã mẽ apumu nẽ te amnhĩ katut kõt mẽ ate amnhĩ

tomnuj piitã rên̄h par pyrã nê axte kãm hamaxpêr kêt nê. Hãmri nê mẽ ixkuxwar mẽ awýr amnhĩ Karõ rê. ³⁹ Kãm mẽ awýr rên̄h prãm. Mẽ amã nê mẽ akanrêhã mẽ akra nê mẽ atãmnhwýjê mã nê mẽ kot kormã Tĩrtũm kapêr mar kêt xwýnhjê mã. Ấm mẽ kot amnhĩ to hwýr xwýnh piitã nhũm kãm mẽ hwýr rên̄h prãm. Anê.

⁴⁰ Nhũm pre ã Simãw Pêtre mẽ kãm ujarên̄h anê. Mẽ kãm kapêr xihtýx o kapêr ry nê. Hãmri nê mẽ kãm:

—Koja nhỹrmã Tĩrtũm mẽ kot tanhmã amnhĩ tomnuj to ho mẽ pa xwýnhjaja tanhmã mẽ homnuj týx to. Jakamã kwa mẽ tokýx mẽ ate amnhĩ tomnuj kaga kê tanhmã mẽ ato hkêt nê. Anê.

⁴¹ Hãmri nhũm mẽ hkwýjaja kapêr mar týx nê amnhĩ kaxyw Jejus kôt hamaxpêr nê hkôt amnhĩ xunhwý. Mẽ ohtô rax nê hkôt amnhĩ xunhwý. Mẽ kêp 3.000 nê hkôt amnhĩ xunhwý. Hãmri nhũm mẽ kot Jejus nhỹ hã kapêr jarên̄h o mẽ pa xwýnhjaja mẽ hkrã kumrãr pa. Mẽ kêp Jejus kwý hã amnhĩ to amnhĩrĩt kaxyw mẽ hkrã kumrãr pa. ⁴² Hãmri nhũm mẽ ra mẽ kot Jejus kôt amnhĩ nhĩpêx xwýnhjê hkôt amnhĩ nhĩpêx o pa nhũm Jejus nhỹ hã mẽ ahkre xwýnh maatijaja apkati mẽ Jejus kapêr o mẽ ahkre nhũm mẽ mar týx nê ra Jejus kôt amnhĩ nhĩpêx mex o mỗ. Nê gaa nê hkôt amnhĩ nhĩpêx mex o pa. Mẽ kãm kapêr mar prãm týx jakamã na pre htem axpên wýr akuprô nê axpên kutã apku nê Tĩrtũm mã amnhĩ jarên̄h o hkrĩ. Nê mẽ kãm axpên to mex pix prãm o axpên kôt pa ho pa.

Jejus kwỳ kot tanhmã amnhĩ nhĩpêx to hã mẽ harênh

Atre 4.32-35

⁴³ Tã nhũm Jejus nhỹ hã mẽ ahkre ho mẽ pa xwỳnh maatiјаja xatã Tĩrtũm nhỹ hã aa mẽ kot mẽmoј pumunh kêt kwỳ ho anhyr o ri krĩ nhõ xwỳnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nê mẽ kamã no pyma ho tee ri tanhmã Tĩrtũm mã hamaxpêr to. ⁴⁴ Nhũm mẽ kot Jejus kôt amnhĩ xunhwỳr xwỳnh piitã mẽmoј to axpên kutã nojarêr o pa. Јao axpên pê ri mẽmoј to ôxy hkêt nê pa. ⁴⁵ Јakamã nhũm mēhõ kêp amrakati nhũm mẽ ja hã omu hãmri nê ô pyka hkwỳ ho wēnê rỳ mẽ hikukrêx kwỳ ho wēnê nê kàxpore jamỳ nê ma o mra nê mẽ kãm kugõ. Na pre hte ã mẽ kot Jejus kôt amnhĩ xunhwỳr xwỳnhjaja axpên nhĩpêx anhyr o pa. ⁴⁶ Hãmri nê apkati mẽ Tĩrtũm mã amnhĩ jarênh xà hã ixkre hwỳr mra nê kãm mex o mex ã harê. Nê hamakêtkati nê àmnhĩx ri hkĩnh kãm axpên nhõrkwy hkôt ri apkur o pa. ⁴⁷ Pê Tĩrtũm mã mex o mex ã harênh o ri axpên kôt pa. ã mẽ kot amnhĩ nhĩpêx anhyr o pa јakamã nhũm krĩ nhõ xwỳnh piitã kãm mẽ hkĩnh nê. Nê mẽ hkwỳjaja apkati mẽ mẽ hwỳr mra nê mẽ hkôt axkamê nê mẽ uràk nê Jejus kôt amnhĩ xunhwỳ nhũm Tĩrtũm ja hã mẽ omu nê mẽ ho hkra. Јakamã nhũm mẽ ra ohtô rax kumrêx o mō.

3

Te grà xwỳnh jarênh

Juãw 14.12-14; Atre 14.8-10

¹ Tã nhũm apkati hõ hã nhũm Simãw Pêtre mẽ Juãw wa ma Tĩrtũm mã amnhĩ jarênh xà hã ixkre

hwỳr wa tẽ. Na pre hte myt àhpanh grire nhũm mẽ piitã kot Tĩrtũm mã amnhĩ jarẽnh kaxyw hwỳr mra. Jakamã nhũm Simãw Pêtre mẽ Juãw wa haxwỳja ma hwỳr wa mra. ² Nhũm mẽhõja hakwakrem hkrĩ. Katorxà nhõxà hkre rũm hte grà nẽ kator xwỳnhta. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkràmnhwỳjaja apkati mẽ hamỳ nẽ ma o pa nẽ Tĩrtũm mã amnhĩ jarẽnh xà hã ixkre jakwakrem hkrĩ nhũm mẽ hwỳr o hkrĩ. Hakwakreja mẽ kot kãm: “Mẽ gjêx xà mex” anhỹr xwỳnhta kapem hwỳr mẽ mrar xwỳnhjê hwỳr o hkrĩ. ³ Tã nhũm Simãw Pêtre mẽ Juãw wa tẽ nẽ ixkreja wỳr wa àr o tẽ nhũm hte grà xwỳnhta wa omu nẽ kàxpore hã wa kuwỳ ⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htỳx ho wa kot kãm kàxpore hkwy nhõr ã wa hkamnhĩx nẽ wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhõ xwỳnhta nhỹ hã amã ixkapêr jakamã tokyx kànhmã xa nẽ ri mra. Anẽ.

⁷ Hãmri nẽ upôk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra. ⁸ Hãmri nẽ hte mex ã amnhĩ pumu nẽ hkĩnh tỳx nẽ. Nẽ hkĩnh xàj ma wa hkôt harĩ ho tẽ nẽ wa hkôt ixkrem axà. Tĩrtũm mã mex o mex ã harẽnh pê harĩ ho wa hkôt tẽn axà. ⁹ Hãmri nhũm mẽ piitã amnhĩ jaer pê akupỹm mex ã omu nẽ kamã no pyma nẽ. ¹⁰ Nẽ axpẽn mã:

—Kokỹỹ mũjti na pre hte mẽ gjêx xà mex kamã mẽ hwỳr rãhã ho hkrĩ htã nhũm Tĩrtũm tanhmã

ho nhũm kànhmã xa nê ri mrar mex kurê kumrêx.
Hêxta waa nê. Anê.

Simãw Pêtre kot mẽ kãm ujarênh

Rukre 24.46-47; Atre 2.14-36

¹¹ Hãmri nhũm hte mex xwýnhja Simãw Pêtre mẽ Juãw wa hkôt ixkre hwýr axà nê wa kuri xa. Nhũm mẽ piitã amnhĩ jaêr pê harênh ma nê hwýr hprôt nê agjê nê omu. Mẽ kot ixkre nhĩkjê jarênh o: “Pahi Sarumãw nhõ” anhýr xwýnh jarênhja wýr nhũm mẽ hprôt nê hte mex xwýnhhta kamã no pyma ho kuhê. Nê kuri Simãw Pêtre mẽ Juãw wa omu nê axpên mã wa harênh o:

—Hêxta waa nê. Tanhmã na we wa amnhĩ to nê akupým kãm hte ho mex nhũm ri mra?

Anê nê wa kamã no pyma nê. ¹² Hãmri nhũm Simãw Pêtre mẽ kuma nê mẽ kãm:

—Pa ixkwýjaja. Kwa mẽmo na ka mẽ ri mẽ ixkamã ano pyma ho akuhê? Xà wa ixàhpumunh tỳx xà ho na pa wa ho mex? Nà ja kot anhýr kêt. Rỳ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nà mãănên ja kot anhýr kêt. ¹³⁻¹⁷ Mẽ ate omunh xwýnhhta Jejus tãm kot ho mex kênã. Kot amnhĩ kaxyw kãm hamaxpêr tỳx jakamã nhũm akupým ho mex ka mẽ omu.

—Finat Apraãw nê Ijak nê Jako mẽ hkwyjaja kot hkôt amnhĩ nhĩpêx o pa xwýnh pê Tĩrtũmja. Tãm na pre akupým Kra Jejus o htĩr nê mex o mex ã harê. Mẽ ate hã axàmnênh nhũm mẽ kot hpĩr xwýnhhta. Pahihti Pirat kot kãm urer kaxyw tã ka mẽ nê kãm akapêr kãm axihtỳx nê. Nom Jejus tãm kot amnhĩ nhĩpêx o pa xwýnh na pre. Na pre hte amnhĩ nhĩpêx mex rãhã ho pa htã ka mẽ axtem nê hkaga. Nhũm pahihti Pirat mẽ ate kot kãm urer kêt

ã axihty^x nhũm kãm urer kêt nê ò pôristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tĩrtũm kot mẽ pahwỳr mẽn h tã ka mẽ axtem nê apĩ.

—Nom mẽ ate kêp Tĩrtũm Kra hã omunh kêt jakamã na ka prem ã hipêx anê. Mẽ kot mẽ ato amnhĩptàr xwỳnhjê mẽ na ka prem amarĩ apĩ. Na prem mẽ axàmnên h xà hkôt mẽ amã pĩ kahpa hã kunhò nê ã hpĩr anê. Kêp akupỹm mẽ pahto mẽ pahtĩr xwỳnh tã ka prem axtem nê apĩ. No nhũm Tĩrtũm akupỹm ho htĩr pa prem akupỹm htĩr kãm omu.

¹⁸—Amnepê m Tĩrtũm nhỹ hã kapêr jarênh o mẽ pa xwỳnhjaja na prem Tĩrtũm kot mẽ pakaxyw ãm xwỳnhja kukamã tanhmã harênh to nê hã kagà nê mẽ kãm harênh o pa. Kot amnhĩ xà htỹx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhyr xàja kôt ka mẽ ã hipêx anê nê apĩ.

¹⁹—Jakamã kwa mẽ tee ri mẽ ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wỳ kê mẽ anê mẽ ate amnhĩ tomnuj piitã amnhĩ katut kôt rên h pa. ²⁰ Hãmri nê mẽ ato mex nê ka mẽ kukwak ri akĩnh nê ajamakêtkati nê axàmnhĩx ri apa. Koja nhỹrmã akupỹn mẽ pahwỳr Jejus mẽ. Ra kot mẽ pakaxyw ãm kênã.

²¹—Nom koja tokyx akupỹn wrỳk kêt nê. Koja kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwỳr wrỳ. Amnepê m Tĩrtũm nhỹ hã kapêr jarênh o pa xwỳnhjaja kot ja kukamã harênh nê hã kagà xà hkôt.

22 —Na pre finat Mojes haxwỳja Tĩrtũm nhỹ hã mẽ pahpãmjê mã tanhmã ja jarẽnh to nẽ harẽnh o: Koja nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrà nẽ axte mẽ panhĩõ xãm. Mẽ panhĩõ koja. Koja nhỹrmã inhmỳr pẽ mơn pøj nẽ mẽ amã Tĩrtũm kapẽr jarẽnh o pa. Ka mẽ kapẽr ma nẽ mar tỳx nẽ kapẽr kôt amnhĩ nhĩpêx o ri apa.

23 Koja mẽhõ kuma nẽ ãm kuma nẽ hkôt amnhĩ nhĩpêx kêt nẽ nhũm Tĩrtũm tee ri ja hã omu nẽ kêp hkra hkêt ã harẽnh kurê kumrêx. Anẽ.

24 ã na pre finat Mojesja mẽ kãm Jejus kukamã ujarẽnh anẽ. No ãm tapxipix na pre ã harẽnh anhỹr kêt nẽ. Tĩrtũm nhỹ hã mẽ kapẽr o mẽ pa xwỳnh piitã na prem ã mẽ kãm harẽnh anhỹr o pa. Kot harẽnh o pa xwỳnh kot wa finat Sãmuewja nẽ hkôt mẽ hkwỳjê piitã ã Jejus kukamã hkwỳjê mã harẽnh anhỹr o pa.

25 —Tã mẽ pahpê mẽ hkamrô hkwỳ na pu mẽ. Mẽ pahpê mẽ hkanrêhã mẽ htàmnhwỳy. Mẽ pakaxyw na pre Tĩrtũm ã mẽ kãm kapẽr anẽ. Nẽ Kraja kukamã finat Apraãw mã kãm:

Koja nhỹrmã akanrêhã atàmnhwỳjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrêx nẽ ri pa. Anẽ.

26 ã kot Kra hkukamã harẽnh anhỹr tã mẽ pakumrêxjê hwỳr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwỳr kumẽ. Anẽ.

Nhũm pre ã Simãw Pêtreja hte grà xwỳnh pumunh o mẽ kuhê xwỳnhjê mã ujarẽnh anẽ.

4

Simãw Pêtre mē Juãw wa kot mē àptàr tũmjê mã kapêr ã wa harênh

Rukre 21.12-13

¹⁻⁴ Nhũm Simãw Pêtre mē Juãw wa arĩ mē kãm Tĩrtũm kapêr jarênh o wa xa nē mē kãm:

—Nà na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nē akupỹm mē htyk xwỹnh piitã mē ho htĩr pa. Anẽ.

Hãmri nhũm mē kot wa mar o kuhê xwỹnh kwỹjaja wa kuma nē wa hkôt hamaxpêr nē wa urà nē Jejus kôt amnhĩ xunhwỳ. Jakamã nhũm ra mē kot Jejus kôt amnhĩ xunhwỳr xwỹnhjaja ohtô rax kumrêx. Ra mē kêp 5.000.

Hãmri nhũm axtem mē hkwỹjaja wa hwỳr mra nē wa mar o kuhê. Mẽ õ patre nhõ pôristi krãhtũm mē Satusew nhõ xwỹnh kwỹjê mē nhũm mē ma Simãw Pêtre mē Juãw wa hwỳr mra nē tee ri wa kot mē ahkre hã wa mar o kuhê. Nē mē kãm akupỹm mē htĩr jarênhja ma nē wa kamã gryk nē. Satusew nhõ xwỹnhjaja na pre htem akupỹm mē htĩr kôt hamaxpêr kêt jakamã nhũm wa akupỹm mē htĩr jarê nhũm mē tee ri wa kuma nē hamaxpêr punuj nē wa kamã gryk kato. Hãmri nē wa hã amỹnê nhũm mē wa unê nē ma wa o tẽ nē mē hagjênh xà kamã wa haxà. Ra myt grire nhũm mē wa haxà. Wa kot mē hagjênh xà kamã hã apkati nhũm rĩ kormã mē kot ujarênh ã tanhmã wa ho kaxyw.

⁵⁻⁶ Tã nhũm apkati nhũm mē ohtô nē wa ujarênh ã wa mar kaxyw Jerujarê kamã axpên wỳr akuprô. Ijaew pigêtjaja nē mē àptàr tũm kwỹjaja. Nē mē kot

finat Mojes kapêr o mẽ ahkre ho mẽ pa xwỳnhjaja. Nê mẽ õ patre maati Anas mẽ hkwỳja. Nê Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpên wỳr akuprõ. ⁷ Hãmri nê wa hã karõ nhũm pôristi wa hwỳr tẽ nê wa haprô nê ma mẽ hwỳr wa o tẽ nê wa ho axà nê mẽ kutã wa ỳr nhũm wa nhỹ. Hãmri nhũm mẽ wa omu nê wa kãm:

—E mẽ inhmã amnhĩ jarẽ. Mẽhõ xàhpumunh xà ho na ka pre wa hte grà xwỳnhta ho mex? Mẽhõ na pre hwỳr war amẽ ka wa ho mex? Anẽ.

⁸ Hãmri nhũm Simãw Pêtre mẽ kãm awjarẽ. Tĩrtũm Karõ kot kãm hamaxpêr o hihtỳx jakamã nhũm ỳ hã Ijaew pigêjtê mẽ mẽ àptàr tũmjê mã awjarẽ nê mẽ kãm:

⁹ —Tõe mẽhõ kot ho mex xwỳnhja ã mẽ ate wa ixkukjêr ¹⁰ jakamã kot paj mẽ amã harẽ ka mẽ ixte harênhja ma. Wa ixpyrà nê mẽ apê Ijaew kêr ka mẽ wa ixkapêr mar tỳx nê. Jejus Kris pê Najare nhõ xwỳnhta. Mẽ ate hpĩr nhũm Tĩrtũm kot akupỹm ho htĩr xwỳnhta. Tãm na pre àhpumunh tỳx o akupỹm hte grà xwỳnhta o mex. ỳ hã ixte kaxyw kãm ixkapêr nhũm tãm akupỹm ho mex. ¹¹ Tĩrtũm kot mex o mex ã harênh nê mẽ pakaxyw ãm tã ka prem axtem nê hkaga. Nom Tĩrtũm kapêr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarênh nê mẽ ajarênh kot:

Mẽ kot kên o amnhĩm òrkwỹ nhĩpêx kaxyw nê nhỹri kên maati pumu nê htỳx omnuj ã hkamnhĩx nê hkaga. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

Anhÿr o kot mẽ ajarēnh. Te mẽ ate kēn maati kaga xwÿnh ã mẽ ajarēnh pyrāk. Tã ka mẽ ã mẽ kot mẽ akukamã mẽ ajarēnh anhÿrja kôt te mẽ ate kēn maati kaga pyrà nē Jesus kaga nē apī. Tĩrtũm kot amnhĩm mex o mex ã omunh nē harēnh tã ka prem axtem nē hkaga. ¹² Tapxipix na hte mẽ panê mẽ pahte amnhĩ tomnuj rê. Mēhõ koja urāk nē àhpumunh tÿx o mẽ panê kurê? Mēhõ koja ahpÿnhã pyka piitã hkôt urāk nē ã mẽ panhĩpêx mex anê? Nà ãm amrakati kumrêx. ãm Jesus pix. Tapxipix na pre Tĩrtũm ja kaxyw ãm jakamã tapxipix na kēp mẽ pahkaprĩ xwÿnh maati. Anê.

¹³ Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nē axpên mã:

—Kwa wa kãm mẽ pahpyma wa hã hkwy jêt kêt kumrêx. Te ri wa htÿx ri wa pa pyrāk tã wa hamaxpêr tÿx kumrêx. Mãn wa kēp Jesus kôt mẽ pa ho mẽ pa xwÿnh kwÿ jakamã na wa ã kapêr anê nà? Anê.

¹⁴ Hãmri nē tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwÿnh ra kot mẽ hwÿr àr nē Simãw Pêtre wa kuri mex nē ãm nhũm mẽ kot no ho omunh jakamã wa kãm àkjêr kêt nē. ¹⁵ Hãmri nē wa kãm anê nhũm wa mẽ kēp kato nē kapôt ã xa nhũm mẽ tanhmã wa kãm nē kaxyw wa hã axpên ma nē axpên mã:

¹⁶ —Kwa tanhmã kot puj mẽ wa ho? Ra jar Jerujarē kamã mẽ piitã mẽ kot akupÿm hte grà xwÿnh ta mex ã wa omunh kēnã kot puj kêt mẽ kãm wa kot ho mex hkêt ã wa harê. ¹⁷ Tã mẽ kot harēnh o hprôt pymaj kot puj mẽ axte Jesus jarēnh o pa nē wa hkurê. Kê hte grà xwÿnh jarēnhja ãm jar mẽ

pakamã hapêx. Nà kot puj mẽ ã wa kãm karõ anê. Anê.

¹⁸ Nhũm mẽ wa hã axpên mar pa hãmri nê akupỹn wa hã karõ nhũm wa akupỹn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. Âm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tĩrtũm tãm kot ja hã wa inhmã karõ kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupỹm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhỹr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwỳnhhta hte grà nê hkrĩ ho hã amgrà pê 40 tã ra akupỹm mex nhũm mẽ piitã ja hã omu nê hã axpên mã Tĩrtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. Âm axte wa kot Jejus jarênh o pa nê wa kãm kapêr kãm hihtỳx nê wa hano nhũm wa ma tẽ.

Mẽ kot amnhĩ to Tĩrtũm wỳr ã mẽ harênh

Matêwre 18.19-20

²³ Tã nhũm Simãw Pêtre mẽ Juãw wa ma akupỹm Jejus kôt htõ nê htõxjê hwỳr wa tẽ nê mẽ kãm amnhĩ jarê. Nê patre krãhtũmjê mẽ mẽ àptàr

tũmjaja kot Jejus kapêr jarênh nê wa hkurê kamã hihtýxja nhũm amnhĩ tã mẽ kãm mẽ harê. ²⁴ Hãmri nhũm mẽ wa kuma nê amnhĩ to Tĩrtũm wýr kurê kumrêx nê kãm:

—Pa Pahi Maati? Nà mẽmoj piitã ho akator xwýnhta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa. ²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarõ nhỹ hã akapêr kwý jarê nê hã kagà. Nê kagàja kamã mẽ kot Pahihti Jejus kutã amnhĩ xunhwýr xwýnhjê jarê nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mýrapê na prem Ijaew kêt xwýnhjaja Tĩrtũm kutã amnhĩ xunhwý?

Nê Ijaew haxwýja. Mẽmo mýrapê na prem htýx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwýr pa.

Nê kot mẽ pakaxyw ãm xwýnh Jejus Krisja nhũm mẽ mããnên kutã amnhĩ xunhwýr pa.

Nê mẽ kot hpĩr kaxyw mẽ kãm hã amýnê.

Kwa mẽmo mýrapê na prem axtem nê ã amnhĩ nhĩpêx anê? Anê.

Ã na pre finat Tawija Akarõ nhỹ hã mẽ harê nê hã kagà anê Tĩrtũm. ²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhýr kênã. Krĩ ja kamã na prem ã amnhĩ nhĩpêx anhýr kaxyw axpên wýr akuprõ. Pahi Eroxo nê pahi Põn Pirat nê mẽ ixkwýjaja nê mẽ kêp Ijaew kêt xwýnhjaja axpên wýr akuprõ nê Akra Jejus kutã amnhĩ xunhwý nê mẽ kot hpĩr kaxyw hã amýnê. Kot tãm amnhĩ

nhĩpêx o pa nhũm ate mẽ ixkaxyw ãm xwỳnhja nhũm mẽ axtem nẽ kutã amnhĩ xunhwỳ.

28 —Nom amnepêm kormã mẽ ixkêr ri na ka pre mẽ hkukamã ã mẽ kot amnhĩ nhĩpêx anhỹr ã mẽ omu. Mẽ kot tanhmã apê Akra Jejus to nẽ hpĩrta kukamã ka pre hã mẽ omu. Tã mẽ ixwỳr amẽ nhũm prem kupĩ. No ãm ajamaxpêr xà hkôt.

29 —Tã ka mẽ omu. Na mẽ Jejus ã mẽ ixkamã gryk tỳx nẽ tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwỳnhjaja ka tanhmã mẽ ixkrã hto pa mẽ inhmã mẽ uma hkêt nẽ mẽ hkôt ixpa ho ixpa. Mẽ kot tanhmã mẽ ixto hã mẽ ixkagrônã tã pa mẽ inhmã mẽ uma hkêt nẽ ixãmnhĩx ri ixkĩnh nẽ ri ixpa. Nẽ anhỹ hã mẽ kutã amnhĩ to htỳx nẽ arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

30 —Akra Jejus mex o mex jakamã kot paj mẽ àhpumunh tỳx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwỳnhjaja akupỹm mẽ o mex. Nẽ mẽ kot aa mẽmoj pumunh kêt kwỳ ho anẽ. Kê mẽ omu nẽ axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anẽ.

31 Nhũm prem ã amnhĩ to Tĩrtũm wỳr anẽ. Puh nhũm ixkreja mẽ kãm htertet tỳx nẽ nhũm Tĩrtũm Karô axte tanhmã mẽ hkrã hto nhũm mẽ ỹ hã kãm mẽ uma hkêt nẽ. ãm amnhĩ to htỳx nẽ mẽ kãm Tĩrtũm kapêr jarênh rãhã ho ri mẽ hkôt pa.

Jejus kwỳjaja tanhmã kot axpên nhĩpêx to hã mẽ harênh

Atre 2.42-47

32-33 Nhũm Jejus nhỹ hã mẽ ahkre ho mẽ pa xwỳnh maatiјaja. Na pre Tĩrtũmja mẽ ho mẽ kãm ma hkêt jakamã nhũm pre htem akupỹm Jejus htĩr kôt mẽ kãm harẽnh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwỳr xwỳnh piitã mẽ kutã nojarêr rãhã ho pa nhũm mẽ ra ohtô rax nẽ. Nẽ mẽ kãm axpẽn to mex pix prãm o ri axpẽn kôt pa. Mẽ ohtô htã te mẽ tipxi pyræk. Nẽ axpẽn pê mẽmoј to õxỳ hkêt nẽ. Na pre htem axpẽn mã mẽ hikukrêx nẽ mẽ apkur xà jarẽnh o: “Inhõ pix kêt mẽ pahpiitã mẽ panhõ na.” Anhỹr o ri mẽmoј tã axpẽn kutã nojarêr o ri pa. No kêt axpẽn mã mẽmoј jarẽnh o: “Tk. Nà ãm inhõ pix na.” Anhỹr o harẽnh kêt nẽ. 34-35 Na pre htem tũhã õ ixkre hõ ho wẽnê. Rỳ õ pyka hkwỳ ho wẽnê nẽ kàxpore jamỳ nẽ ma o mra nẽ Jejus nhỹ hã mẽ ahkre ho mẽ pa xwỳnhjê mã kugõ nhũm mẽ hamỳ nẽ mẽ kêp amrakati xwỳnhjê mã ho anhgrà. Hãmri nhũm mẽ amnhĩm hamỳ nẽ ho amnhĩm awjaprô. Jakamã na pre hte mẽ hkwỳjaja kãm prãm nẽ rĩ pa rỳ ê hkêt nẽ ri pa hkêt nẽ.

36-37 Jujere na pre ã amnhĩ nhĩpêx anẽ nẽ mẽ kaxyw õ pika hkwỳ ho wẽnê. Hãmri nẽ kàxpore py nẽ o tẽ nẽ Jejus nhỹ hã mẽ ahkre xwỳnh maatiјê mã kugõ. Jujereja Ijaew nhõ patre ho ajuta xwỳnh na pre. Gô hipòk pê Sipre kamã na pre kato. Kêp Jujere htã no nhũm Jejus nhỹ hã mẽ ahkre ho mẽ pa xwỳnhjaja na prem kãm: “Panâpe” Anẽ. Mẽ kapêr kãm Panâpeja te kêp “mẽ hamaxpêr o mẽ hihtỳx o pa xwỳnh” anhỹr pyræk. Jakamã nhũm õ pika hkwỳ ho wẽnê nẽ kàxpore py nẽ o tẽ nẽ Jejus nhỹ hã mẽ ahkre xwỳnhjê mã kugõ nhũm mẽ kupy

ně mẽ kệp amrakati xwỳnhjê mã ho anhgrà.

5

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananĩs mẽ hprõ Sapire wa Jujere jarênh ma nẽ uràk nẽ õ pyka hkwỳ ho wẽnê.

² Hãmri nẽ kàxpore py. Nom na pre wa ra hã axpẽn ma. Jakamã nhũm Ananĩs Jujere kĩnhã kàxpore hkwỳ pix py nẽ o tẽ nẽ Jejus nhỹ hã mẽ ahkre xwỳnh maatijê mã kugõ. Nom katàt kôt mẽ kãm òr ã amnhĩ jarênh kêt nẽ. Kot kàxpore ho pikjêr nẽ amnhĩm hkwỳ ho àrĩk ã amnhĩ jarênh kêt nẽ. ãm mẽ kãm amnhĩ jarênh o hêx. Te piitã òr par pyràk o amnhĩ nhĩpêx nẽ mẽ kãm:

—E ota ixkàxporeta. Na pa wa inhõ pika hkwỳ ho wẽnê nẽ kàxpore hpy nẽ hpãnhã Jujere pyrà nẽ man mẽ awỳr piitã o tẽ. Anẽ.

³ Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nẽ kãm:

—Tk. Kwa mon ka axtem nẽ Satanasti kapêr ma nẽ hkôt amnhĩ nhĩpêx nẽ te akàxpore piitã òr pyràk ã amnhĩ to axêx anẽ? Te ate piitã òr pyràk tã no ãm hkwỳ pix gõ. Hêxta waa nẽ. Na ka axtem nẽ Tĩrtũm Karõ mã akàxpore nhõr par o axêx. ⁴ Anhõ pyka kênã. Nẽ hpãnhã kàxporeja anhõ kênã. Kot kaj amã tanhmã ho hprãm xà hkôt mãmri tanhmã ho. Amã piitã ho axàrĩk prãm nẽ mãmri piitã ho arĩk. Rỳ amã hkwỳ hpix nhõr prãm nẽ mãmri hkwỳ pix gõ. No ri ate òr par pyràk o amnhĩ to axêx kêt nẽ. Te ate mẽ inhmã pix mã axêx pyràk nom mẽ

inhmã pix mã hkêť. Na ka mãănăn te Tĩrtũm mã axêx pyràk. Anê.

⁵⁻⁶ Nhũm pre ã Simãw Pêtre Ananĩs mã kapêr anê nhũm kuma nê pykap tẽm nê htyk kurê kumrêx. Hãmri nhũm mẽ àptàr nywjaja hwỳr tẽ nê kupêxê ho hkupu nê kumỳ nê ma o tẽ nê haxà. Hãmri nhũm mẽ kot ã kot amnhĩ nhĩpêx anhỹr ã harênh mar xwỳnhjaja tee ri harênh ma nê kãm ma htỳx nê.

⁷ Tã nhũm ra hã ahtũm nê. Ra hã 3 ore nê hapêx nhũm Ananĩs prô Sapireja htỳx hamakêtkati nê mẽ hwỳr tẽ nê axà. Kormã mjên htyk ã harênh mar kêt nê hamakêtkati nê hkĩnh nê mẽ hwỳr tẽ nê axà.

⁸ Hãmri nhũm Simãw Pêtre omu nê hêx rom hkukja nê kãm:

—Pa? E kwa inhmã mẽmoj jarê. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harê nà? Anê.

Hãmri nhũm kuma nê mjên pyrà nê kãm ho hêx nê kãm:

—ỖỖ. ãm hãmri kot amã harênh kênã. Anê.

⁹ Hãmri nhũm Simãw Pêtre tee ri kuma nê kãm:

—Tk. Hêxta waa nê. Kwa mon ka war ajamẽ war akàxpore ho te Tĩrtũm mã axêx pyràk? Mãn ka wa ajamaxpêr o: “Koja Tĩrtũm ja hã wa ixpumu nê ãm hã wa ixpumu nê tanhmã hã wa ixto hkêť nê.” Anhỹr o mãn ka wa ajamaxpêr nà? Nom na ka wa ãm kãm axêx kaprỳ. Onêj ra mẽ kot amjên jaxàr xwỳnhjaja akupỹn hpôx o mra. Koja mẽ anhĩpêx o te hipêx pyrà nê mãănăn ato tẽ nê ajaxà ka rĩ amnhĩ pumu.

¹⁰ Anê nhũm kuma nê mjên pyrà nê pykap tẽm nê htyk kurê kumrêx. Hãmri nhũm mẽ kot mjên jaxàr xwỳnhjaja mra nê mẽ hwỳr agjê nê omu

nhũm ra htyk mex nẽ nõ nhũm mẽ kumy nẽ ma o tẽ nẽ mjên nhĩhkô hã haxà. ¹¹ Hãmri nhũm mẽ piitã wa harẽnh ma nẽ kãm ma htyx nẽ. Mẽ kot Jejus kôt amnhĩ xunhwỳr xwỳnhjê mẽ amarĩ ri mẽ pa xwỳnhjaja nhũm mẽ tee ri wa hkukamã hamaxpěr o kãm ma htyx kumrẽx.

Mẽ kot aa mẽmoj pumunh kêt kwỳ ho anhỹr ã mẽ harẽnh

Makre 16.17-20; Atre 19.11-12

¹²⁻¹⁴ Na pre hte Jejus kôt mẽ kot amnhĩ xunhwỳr xwỳnhjaja xatã Tĩrtũm mã amnhĩ jarẽnh xà hã ixkre hwỳr akuprõ. Mẽ kot ixkre nhĩkjê mã: “Pahi Sarumãw nhõ” anhỹr xwỳnh jarẽnhja wỳr nhũm pre htem akuprõ. Nhũm mẽ piitã kãm mẽ hkĩnh nẽ mẽ ohtô nẽ mẽ hkôt akuprõ nẽ mẽ uràk nẽ Jejus kôt amnhĩ xunhwỳ. Mẽnijaja nẽ mẽmyjaja. No nhũm mẽ hkwyja Ananĩs mẽ Sapire wa kot amnhĩ nhĩpêxja mã hamaxpěr nẽ kãm mẽ hkôt mrar pyma nẽ. Kãm mẽ hkĩnh tâ kãm mẽ hkôt mrar pyma nẽ.

Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỹr o ri mẽ piitã mẽ hkôt pa. ¹⁵ Jakamã nhũm pre htem mẽ à xwỳnhjê jamy nẽ ma mẽ hwỳr mẽ o mra nẽ Simãw Pêtre kutêp pry kamã mẽ haxwỳ nẽ mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rỳ nhũm hkarõ pix mẽ atã harir ka mẽ akupỹm amex japêr.

Anhỹr o mẽ kãm kapêr hãmri nhũm mẽ kupĩp kãm kutêp hikwỹ. ¹⁶ Nẽ Jerujarẽ pu hã krĩ hkwy kamã. Mẽ à xwỳnhjaja nẽ mẽkarõmnuti kot tanhmã

mẽ ho xwýnhjaja nhũm pre htem mẽ hamý nẽ ma mẽ ãhkrep mẽ o mra nhũm mẽ piitã akupỹm mex pa.

Mẽ kot Jejus kwýjê jagjênh ã mẽ harênh

Rukre 21.12-15; Juãw 15.26-27; Atre 4.1-22

¹⁷ Tã nhũm mẽ õ patre maati mẽ hkràmnhwý Satusew nhõ xwýnhjaja tee ri akupỹm mẽ mex ã mẽ harênh ma mẽ axpẽn mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwýnhjê kamã gryk nẽ ra tanhmã mẽ ho kaxyw. ¹⁸ Hãmri mẽ unẽ nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamàt nhũm Tĩrtũm kapêr o mẽ wryk xwýnhja ma mẽ hagjênh xà hwýr mẽ hwýr wry nẽ mẽ hwýr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ —E mẽ ma akupỹm Tĩrtũm mã amnhĩ jarênh xà hã ixkre hwýr mra nẽ axte mẽ kãm awjarẽ. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anẽ.

²¹ Hãmri nhũm mẽ kuma nẽ ma akupỹm hwýr hapêx kurê kumrêx. Nhũm myt kator o mõi mẽ nhũm mẽ hwýr agjê nẽ mẽ kãm Tĩrtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwýnhjaja amnhĩ wýr mẽ àptàr tũm xwýnhjê hwý nhũm mẽ piitã axpẽn wýr pikuprõnh pa. Hãmri nẽ htýx arĩ Jejus kwýjjaja mẽ hagjênh xà kamã mẽ

hkrĩ hã mẽ hkamnhĩx nẽ amnhĩ wỳr mẽ hã karõ.
²² Nhũm pôristijaja ma kot mẽ haprôr kaxyw mẽ
 hagjênh xà hã ixkre hwỳr mra nẽ tee ri kamã mẽ
 hapêr nhũm mẽ kamã amrakati. Hãmri nhũm mẽ
 akupỹm mẽ pikuprõnh xwỳnhjê hwỳr hprôt nẽ mẽ
 kãm:

²³ —Nà na pôristi hkwyjaja arĩ hakwakrem ixkre
 jamâr mex nhũm hakwakre arĩ kahê htỳx nẽ xa.
 Tã pa mẽ hwỳr agjê nẽ tee ri hkre kamã mẽ hapêr
 nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpêr.

²⁵ Rôm nhũm ja mẽ hwỳr tẽn axàn mẽ kãm:

—Kwa jãã mẽ ate mẽ hagjênh xwỳnhjaja na mẽ
 axte Tĩrtũm mã amnhĩ jarênh xà hã ixkre kamã mẽ
 ahkre ho kuhê pa ham mẽ omu nẽ mẽ kurũm tẽ.
 Anẽ.

²⁶ Hãmri nhũm patre nhõ pôristi krähtũmja kuma
 nẽ mẽ hwỳr pôristi hkwy rẽ nhũm mẽ ma mẽ hwỳr
 mra nẽ mẽ hwỳr agjê nẽ kê axte mẽ unê nẽ akupỹm
 mẽ o mra. Nom tanhmã mẽ ho hkêt nẽ. Mẽ kot
 hkôt ri mẽ pikamênh xwỳnhjê pymaj mẽ ho mex
 nẽ mẽ o mō. Nẽ mẽ hã axpên mã:

—Nà kot puj mẽ tanhmã mẽ ho nhũm mẽ ja hã
 mẽ pahpumu nẽ kẽn o mẽ pahkapê nẽ tanhmã
 amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mōn mẽ
 hwỳr mẽ ho agjê nẽ mẽ pikuprõnh xwỳnhjê kutã
 mẽ hkrĩ. Hãmri nhũm mẽõ patre maatija mẽ kãm:

²⁸ —Kwa ra mẽ ixte Jesus kapêr jarênh nê mẽ
 akurê htã ka xep mẽ ăm mẽ inhma nẽ arĩ mẽ kãm
 harênh o ri apa. Nẽ jar Jerujarê kamã mẽ piitã mẽ
 kãm harê. Nẽ mẽ pajaja mẽ ixte Jesus pĩr ã ka mẽ
 ri mẽ kãm mẽ ijarênh o apa. Anẽ.

²⁹ Hāmri nhũm Simāw Pêtre mẽ kuma nẽ mẽ amnhĩ tã mẽ kām kapêr nẽ mẽ kām:

—Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tĩrtũm kapêr pix ma nẽ hkôt ri amnhĩ nhĩpêx.

³⁰ Amnepêm mẽ panhĩgêjtaja na prem Tĩrtũm kôt pix mã amnhĩ nhĩpêx o pa. Tã ka prem axtem nẽ kêp mẽ kām Kra Jejus ã amỹnê nhũm mẽ pĩ kahpa hã kunhõ nẽ kupĩ. Nom nhũm Tĩrtũm akupỹm ho htĩr ³¹ nẽ kêp mẽ panhõ Pahihti hã harẽ. Nẽ kêp mẽ pahkaprĩ xwỹnh mex ã harẽ. Hāmri nẽ ra amnhĩ ri ỹr nhũm ãhkô hã mẽmoj piitã ho amnhĩptàr o hkrĩ. Nhũm kām: “Koja Ijaew mẽ kot amnhĩ tomnuj kaga nẽ akôt amnhĩ xunhwỳ pa ja hã mẽ omu nẽ amnhĩ katut kôt mẽ kot amnhĩ tomnuj rênh pa nẽ mẽ ho ixkra.” Anẽ. ³² Tã mẽ pajaja mẽ ixte Jejus htyk nẽ akupỹm htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anẽ. Karõja na pre Tĩrtũm mẽ ixte hkôt amnhĩ nhĩpêx xwỹnhjê hwỳr kurẽ nhũm mẽ ixwỳr wrỳ nẽ mẽ ixkarõ mã agjê. Tã ỹ hã na pa htem ri ã harênh anhỹr o ri mẽ akôt ixpa. Anẽ.

³³ Hāmri nhũm mẽ kuma nẽ mẽ kamã gryk tỳx nẽ. Nẽ mẽ kām mẽ himex prãm nẽ mẽ kām mẽ hã amỹnê. ³⁴ Hāmri nhũm Kamariewtija tee ri ja hã mẽ omu hāmri nẽ kànhmã xa nẽ Jejus nhỹ hã mẽ ahkre xwỹnh maati-jê xyr pê hkwỳjê mã kapêr. Parijew nhõ xwỹnh na pre. Nẽ kêp Tĩrtũm kapêr ã kagà htũm o mẽ ahkre ho pa xwỹnhjê hõ na pre. Nhũm mẽ piitã kām hkĩnh nẽ. Jakamã nhũm kànhmã xa nẽ pōristi mã anẽ nhũm mẽ amnhĩ nẽ Jejus nhỹ hã mẽ ahkre ho mẽ pa xwỹnhjê kator nhũm

mê kapôt ã kuhê. ³⁵ Hămri nhũm Kamariewtija mẽ nê tanhmã mẽ kãm kapêr to nê mẽ kãm:

—E ixkwỳjaja. Kwa kêr pu mẽ tanhmã mẽ ho hkukamã pajamaxpêr mex nê. ³⁶ Mãn arĩ mẽ ate finat Tetastija jarênh ã anohtỳx nê ho apa japêr. Mytwrỳ hõ hã na pre mẽ kãm amnhĩ to rax ã amnhĩ jarênh o pa. Hămri nhũm hkôt ri mẽ pa xwỳnhjaja ohtô nê. Mẽ kêp 400. Tã nhũm prem mẽ kêp Tetasti pĩ nhũm hkôt ri mẽ pa xwỳnhjaja axpên pê angrà nê ma hapêx.

³⁷ —Tã nhũm mẽ kot mẽ piitã mẽ ho kôta xà hã arĩgroja ã nhũm Garirej nhõ xwỳnh pê finat Jut haxwỳja hkôt mẽ pa xwỳnhjaja ohtô nê. Tã nhũm mẽ mãănênh mẽ kêp kupĩ nhũm hkôt ri mẽ pa xwỳnhjaja haxwỳja axpên pê angrà nê ma hapêx.

³⁸ —Jakamã kwa pu mẽ tanhmã jajê ho hkêr nê. Pu mẽ ãm mẽ omu. Kojã mẽ amnhĩ krã hkôt ã ujarênh anhỹr o pa japêr hã koja Tetasti mẽ Jut wa hkôt pa xwỳnhjê pyrã nê tokyx axpên pê angrà nhũm Jejus jarênh o paja hapêx o hapêx. ³⁹ Nom koja mẽ ãm hămri Tĩrtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwỳr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwỳnh maati-jê xyr pê hkwỳjê mã kapêr anê. ⁴⁰ Hămri nhũm mẽ kuma nê kãm:

—Tỳ nã ãm hămri na ka ã akapêr anê. Kot puj xep mẽ tanhmã mẽ ho hkêr nê. Anê.

Hămri nê akupỳn mẽ hã karõ nhũm mẽ akupỳn mẽ hwỳr agiê. Hămri nhũm mẽ pôristi mã mẽ hã amỹnê nhũm mẽ htak. Hămri nhũm mẽ àptàr tũmrejaja mẽ kãm:

—E mẽ māmri ma akupỹm mra. Nom kêr ka mẽ axte mẽ kām Jejus kapër jarēnh o ri apa hkêt kumrẽx. Anẽ.

⁴¹ Hāmri nhũm mẽ kām ure nhũm mẽ ma mra. Kĩnh nẽ ma mra nẽ axpẽn mã:

—Nà kwār mẽ Jejus ã mẽ pahtak nẽ tanhmã hã mẽ pahto. Kwār mẽ māmri ã hã mẽ pahto anẽ. Kot pu mẽ hkaga hkêt nẽ. Ra Tĩrtũm kot ja hã mẽ pahpumunh mex kẽnã.

Anhỹr o axpẽn mã kapër o axpẽn jamaxpër o hihtỹx mex o pa.

⁴² Hāmri nẽ arĩ apkati mẽ hkwỳjê mã Jejus kapër jarēnh o mẽ ahkre ho mẽ hkôt pa. Tĩrtũm mã amnhĩ jarēnh xà hã ixkre kamã nẽ nhām mẽ orkwỹ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kām harēnh o ri mẽ hkôt pa.

6

Mẽ kêp mẽ mjên htyk xwỳnhjê jarēnh

Wam Ximotre 3.8-9

¹ Tã nhũm mẽ kot Jejus kôt amnhĩ xunhwỳr xwỳnhjaja ohtô rax kumrẽx o mỗ. Mẽ piitã kêp Ijaew no nhũm mẽ hkwỳjaja axtem Gres kapër o kapër nhũm mẽ hkwỳjaja Ijaew kapër o kapër. Na pre hte Ijaew kapër o kapër xwỳnhjaja apkati mẽ mẽ kêp mẽ mjên htyk xwỳnhjê mã mẽõ ho pa. No ãm mẽ piitã mẽ hipêx o axpẽn pyrak kêt jākamã nhũm Gres kapër o mẽ kapër xwỳnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ kamã gryk nẽ. Hāmri nẽ mẽ kām:

—Kwa na ka htem amnhĩ kamã mẽ kêp mẽ mjên htyk xwỳnhjê mã mẽõ ho rũnh nẽ agõ. No mẽ ixkamã jajê mã na ka htem ãm ho hkryre nẽ agõ.

Kwa mẽ ri ã mẽ hipêx anhỹr kêt nẽ. Mẽ hipêx o axpẽn pyræk nà. Anẽ.

² Hãmri nhũm Jejus nhỹ hã mẽ ahkre xwýnh maatijaja mẽ hã mẽ kapêr ma hãmri nẽ mẽ piitã mẽ ho akuprõ nẽ mẽ kãm:

—Kwa kêr ka mẽ ja hã axpẽn mã axàkjêr kêt nẽ. E pu mẽ kot mẽ kêp mẽ mjên htyk xwýnhjê mã ô ho pa kaxyw mẽ akwýjê rê. No mẽ pajaja kot paj ja ho anhỹr o ri ixpa hkêt nẽ. Kot pa mẽ anẽ nẽ Jejus kapêr o ri mẽ ajahkre hkêt nẽ nhũm ja mex kêt nẽ. Jakamã mẽ atõ kot kaj mẽ akatàt kôt mẽ kãm mẽ ô ho apa? ³ E mẽ amnhĩ kamã mẽ ho 7 nẽ mẽ arê pu mẽ kêp mẽ mjên tyk xwýnhjê mã ô ho pa kaxyw mẽ unhwý.

Tãm mẽ hamaxpêr xwýnhjaja.

Nẽ mẽ ate axpẽn mã mẽ mex ã mẽ harênh xwýnhjaja.

Nẽ Tĩrtũm Karõ nhỹ hã mẽ kot amnhĩ nhĩpêx o mẽ pa xwýnhjaja.

Ã mẽ kot amnhĩ nhĩpêx anhỹr xwýnhjaja ka mẽ ho 7 nẽ arê pu mẽ kaxyw mẽ unhwý. ⁴ Nom mẽ pajaja kot paj mẽ akôt arĩ mẽ amã Tĩrtũm kapêr jarênh o ri mẽ ajahkre pix tânopxar o ri ixpa. Anẽ.

⁵ Hãmri nhũm mẽ kuma nhũm ja mẽ kãm mex nẽ. Nhũm mẽ ma mra nẽ axpẽn mã hkwýjê nhĩxi jarê hãmri nẽ mẽ ho 7 nẽ mẽ kurê. Ã mẽ hixi kot anhỹr.

Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwýnh mã àr nẽ ho amnhĩptâr jakamã nhũm pre hte tãm ri amnhĩ nhĩpêx o pa.

Nẽ kaxyw Firipti
nẽ Prokot

ně Nīkanō

ně Timā

ně Parmēnti

ně Nīkoraw. Nīkorawja krī pē āxiok nhō xwýnh na pre. Kêp Ijaew kêt tâ kām Tīrtūm kīnh o pa. Tā ra mǎānēn Kra Jejus kôt amnhī xām.

⁶ Jakamā nhūm mẽ mẽ kêp 7tajê rê ně Jejus nhỹ hǎ mẽ ahkre xwýnh maatijê hwýr mẽ o mra. Hāmri nhūm mẽ omu ně mẽ ǎpēnh ǎ mẽ unhwýr kaxyw mẽ hǎ ĩhkra jaxwý ně mẽ ho Tīrtūm wý. Hāmri nhūm mẽ kêp mẽ mjên htyk xwýnhjê mǎ mẽ ǒ ho pa ně mẽ piitǎ mẽ hipêx o axpēn pyrāk.

⁷ Tā nhūm mẽ ra ohtô rax ně Tīrtūm kapēr ma ně hkôt amnhī nhīpêx o pa. Jakamā nhūm Jerujarē kamā mẽ kot Jejus kôt amnhī xunhwýr xwýnhjaja ra ohtô rax kumrêx. Ně mẽ ǒ patre hkwy haxwýja ohtô ně mẽ urāk ně amnhī kaxyw hkôt hamaxpēr ně hkôt amnhī xunhwý.

Mẽ kot Estewǎw pynênh ǎ mẽ harênh

Rukre 21.14-15

⁸ Tā nhūm Estewǎwja. Kot mẽ kêp mẽ mjên htyk xwýnhjê mǎ mẽ ǒ ho pa xwýnhjê hōja. Tīrtūm kot kutǎ nojarêt mex jakamā na pre hte ý hǎ ǎhpumunh tỳx o aa mẽmoj pumunh kêt kwý ho anhỹr o ri mẽ hkôt pa. ⁹ Hāmri nhūm Ijaew kwýjaja tee ri ja hǎ omu nhūm ja mẽ kêp omnuy tỳx ně nhūm mẽ hǎ kām akir. Urāk ně mẽ kêp Ijaew ně Jerujarē kamā ri mẽ hkôt pa htǎ ǎhpýnhǎ mẽ ǒ pyka. Mẽ kot kām “Ripetat” xwýnh kwý na pre mẽ. Ně ǎhpýnhǎ mẽ ǒ krī.

Mẽ hkwyjaja kêp Sirēn nhō xwýnh.

Ně mẽ hkwyjaja kêp Aresǎn nhō xwýnh.

Ně mẽ hkwyjaja kêp Siris nhō xwýnh.

Ně mẽ hkwỳjaja kệp As nhỗ xwỳnh.
 Ahpỳnhã mẽo pika nẽ mẽ õ krĩ htã na prem Jeru-
 jarẽ kamã ri axpẽn kôt pa ho pa. Tã Estewãw kot
 ã amnhĩ nhĩpêx anhỹr o pa hã omu nhũm ja mẽ
 kệp omnuj tỳx nẽ nhũm mẽ hã kãm akir. ¹⁰ No
 nhũm Tĩrtũm Karõ nhỹ hã hamaxpêr tỳx o mẽ kãm
 kapêr nhũm mẽ kuma nẽ tee ri kutã tanhmã kãm
 nẽ hprãm kaprỳ. ¹¹ Hãmri nẽ ma mra nẽ tanhmã ho
 hêx to kaxyw amnhĩ kwỳjê rê nẽ mẽ kãm hã amỹnê
 nẽ mẽ kãm:

—E kêr ka mẽ krĩ nhỗ xwỳnhjê mã Estewãw o
 axêx nẽ tanhmã mẽ kãm ho akapêr punuj to ho ri
 mẽ hkôt apa. Kê mẽ ama nẽ kamã gryk kato. Kot
 kaj mẽ ã amnhĩ nhĩpêx anê pa mẽ hpãnhã mẽ amã
 amnhĩre. Anê.

Hãmri nhũm mẽ kuma nẽ ma mra nẽ hapôj nẽ
 ma krĩ nhỗ xwỳnhjê mã tanhmã ho hêx to ho rĩ mẽ
 hkôt pa nẽ mẽ kãm:

—E mẽ amnê akuprõ nẽ mẽ inhma. Kwa kêr ka
 mẽ Estewãwti kapêr mar kêt nẽ. Na hte finat Mojes
 mẽ Tĩrtũm wa ho kapêr punuj pix o ri pa. Pa mẽ ra
 kot wa ho kapêr punuj ã kuma. Anê.

¹² Hãmri nhũm mẽ kuma. Krĩ nhỗ xwỳnhjê mẽ
 nẽ mẽ àptàr tũmrejê mẽ Tĩrtũm kapêr tũm o mẽ
 ahkre ho mẽ pa xwỳnhjaja nhũm mẽ tee ri mẽ kot
 Estewãw o hêxja ma nẽ kamã gryk nẽ. Hãmri nẽ
 ma hwỳr mra nẽ unê nẽ ma mẽ õ juisti hwỳr o tẽ.
¹³ Hãmri nhũm mẽ kãm ho hêx xwỳnhjaja mẽ hkôt
 mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhỹ hã
 mẽ pahte tanhmã amnhĩ nhĩpêx to hã karõ ho
 hêx rãhã ho pa. Nẽ Tĩrtũm mã amnhĩ jarênh xà
 hã ixkreja nhũm tanhmã ho hêx to pa mẽ kuma.

¹⁴ Na hte mẽ kãm: “Koja nhỹrmã Jejus pê Najare nhõ xwýnh Tĩrtũm mã amnhĩ jarẽnh xà hã ixkreja grành pa kãm ga.” Anhỹr o mẽ kãm hêx o pa. Nê Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nê Estewãw wỳr rĩt nê hkuk pumu nhũm te kot Tĩrtũm kapêr o mẽ wrỳk xwýnhjê kuk nhĩrã rax pyrà nê xa nhũm mẽ tee ri omu nê kamã no pyma nẽ.

7

Estewãw kot juistijê mã ujarẽnh

¹ Hãmri nhũm mẽ õ patre maatija Estewãw mã kapêr nê kãm:

—E mẽ inhmã amnhĩ jarẽ. Xà ãm hãmri na mẽ ri ã ajarẽnh anẽ nà? Anẽ.

² Hãmri nhũm kuma nê mẽ piitã mẽ kãm kapêr. Mẽ kãm kapêr ryy nê mẽ kãm:

—Tõe kot paj mẽ amã mẽ panhĩgêr finat Apraãw tanhmã harẽnh to ka mẽ inhma. Amnepêr na pre Tĩrtũm maatija Apraãw wỳr kato. Kormã pyka pê Mêsopotãm kamã pa ri. Kormã kot ma krĩ pê Arã hwỳr mõi kêt ri nhũm hwỳr kato nê kãm: ³ “E kêr ka mẽ anhõ krĩ pê akato nê akwỳjê re nê ma mõi. Kot paj ma nhỹhỹm hpãnhã pyka hõi hwỳr mẽ ato mõi.” Anẽ.

⁴ —Hãmri nhũm kuma nê amnhĩ to akuprõ nê ma mõi. Õ pyka pê Katej pê kato nê ma krĩ pê Arã hwỳr mõi nê hpãnhã kamã pa. Tã nhũm hipêêxà Terahti kêp ty nhũm Tĩrtũm amnẽ jar mẽ panhõ pyka hwỳr kumẽ. Jar mẽ papapxà hwỳr kumẽ.

⁵ —Nom nhũm kormã kãm pykaja nhõr kêt nẽ. Kormã kãm hkwỳ ho grire nẽ õr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrẽhã akra nẽ atàmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pê Kanaãja jarẽ. Apraãw kormã hkra hkêt ri nhũm ã kãm kapẽr anẽ.

⁶ Hãmri nẽ kãm:

Koja akanrẽhã atàmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrà xohtô rax kumrẽx. Nhũm mẽ hã amgrà pê 400.

⁷ Nom kot paj mẽ hã mẽ homnuj tỳx nẽ. Akanrẽhã atàmnhwỳjê hã mẽ homnuj tỳx nẽ nhũm mẽ rĩ kormã mẽ kurũm kato nẽ man akupỹn pa nẽ jar pøj. Hãmri nẽ jar inhmã inhmex o inhmex ã ijarẽnh rãhã ho pa. Anẽ.

⁸ Hãmri nẽ kãm:

E pu axpên ma. Koja ka nẽ akanrẽhã akra nẽ atàmnhwỳjaja ka mẽ ixkôt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhĩ my kwỳt kà hkwỳ jakà. Nẽ koja mẽ akrajaja hapôj nẽ my ka mẽ mã mẽ ho anẽ nẽ mẽ kếp mẽmy kwỳt kà hkwỳ jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhÿr o Apraãw mã kapêr nhũm kuma nê mar xà hkôt hkra Ijak my kwryt kà hkwỳ krãhta. Kormã hkaràre ri. Kormã hã arĩgro pê 8 pix ri nhũm kêp hkwỳ krãhta.

—Tã nhũm Ijak hprêk nê hprô nê hkra. Hãmri nê mã hkra Jako ho anê nê. Nhũm Jako hprêk nê mã hkra pê 12jê ho anê nê mē piitã mēmy kwryt kà hkwỳ jakàr pa. ã na pre mē pahpàr kraxjaja amnhĩ nhĩpêx anhÿr o pa.

⁹ —Jako hkrajê hõ na pre kêp Juje. Nhũm Juje htôjaja hipêêxà hkôt kamã gryk nê axtem nê mē urojê mã ho wênê nhũm mē kêp haprô nê ma pyka pê Ejit wÿr o mō. Amarĩ Ejit nhõ xwÿnhjê mã àpênh o pa kaxyw. Tã no nhũm Tĩrtũm arĩ tânopxar rãhã ho hkôt pa. ¹⁰ Hãmri nê Ejit kãm mē kot homnuj xwÿnhjê nhĩhkra rũm hka pa nê tanhmã hkrã hto nhũm àhpumunh tÿx nê hamaxpêr mex nê. Jakamã nhũm Ejit nhõ xwÿnhjê nhõ pahĩ Parahtija omu nê kãm hkĩnh nê. Kot tãm amnhĩ nhĩpêx nê àhpumunh tÿx kôt omu nê kãm hkĩnh nê. Hãmri nê amnhĩ ri kumê nhũm ãhkô hã àpênh o pa. Kãm òrkwy pumu nê Ejit nhõ xwÿnhjê ho amnhĩptàr o pa.

¹¹ —Rôm nhũm mē hpur kãm mēmoj nhĩgrôt mex kêt nê nhũm mē kêp mē apkur xà hã mē ôja ra ri mē kêp kryre. Ejit kamã nê jar Kanaã kamã nhũm mē apkur xà hã mē ôja mē kêp hapêx par o mō. Nhũm mē piitã prãm xàj ra hiire nê kãm prãm tÿx o pa nhũm mē panhĩgêjtaja hãmri prãm xàj tee ri amnhĩ xàpkur xà hã mēmoj japêr.

¹² —Tã nhũm Jakoja Ejit kãm arĩ mē apkur xà hã mē ò rax ã harênh ma nê ma hwÿr hkra hkwỳjê

rě. Mě panhîgêtjaja nhũm ma mẽ hwỳr mẽ kurě nhũm mẽ ma mẽ hwỳr mra. Hămri nẽ mẽ hwỳr pôi nẽ mẽ kêp mẽmo hy hkwỳ japrô nẽ ma akupỹm o mra. Wam mẽ mōrta ã mẽ kêp mẽmoj japrô nẽ ma akupỹm o mra.

¹³ —Tã nhũm mẽ kêp mẽmo hy japrô xwỳnhja hapêx nhũm mẽ axte akupỹm mẽ hwỳr mra. Hămri nhũm mẽ htô Juje mẽ kãm amnhĩ to amnhĩrĩt nẽ kêp mẽ htô hã mẽ kãm amnhĩ jarě. Mẽ kot ra htyk ã hkamnhĩx tã nhũm mẽ kãm amnhĩ jarě. Hămri nhũm Paraohiti mẽ kêp Juje htô hã mẽ harěnh ma.

¹⁴ —Tã nhũm Juje amnhĩ wỳr hipêêxà Jako mẽ htamnhwỳjaja mẽ hã karô nhũm mẽ piitã ma Ejit wỳr hapêx. Mẽ kêp 75 nẽ ma Ejit kamã Juje hwỳr hapêx hămri nẽ kamã pa ho pa.

¹⁵ —Ã kot anhỹr jakamã nhũm Jakoja ma Ejit wỳr mō nẽ hpānhã kamã pa ho pa. Tã hămri kamã ty. Nhũm hkrajê piitã Ejit kãm pa hămri nẽ gaa nẽ htyk pa. ¹⁶ Hămri nhũm mẽ hkanrêhã mẽ hkrajaja mẽ hamỳ nẽ ma akupỹm Kanaã hwỳr krĩ pê Sikê hwỳr mẽ o pa nẽ kamã mẽ hagjê. Na pre mẽ hkukamã finat Apraãw kot Amōr krajê pê kēnkre japrô nẽ kamã hprô jaxà. Jakamã nhũm prem mỳr pê ma hwỳr mẽ o pa nẽ kamã mẽ hagjê hămri nẽ ma akupỹm Ejit wỳr pa.

¹⁷ —Tã gaa nẽ rĩ ohtô rax kumrêx o mō. Mẽ panhîgêtjaja ohtô rax kumrêx o mō. Hămri nhũm Tĩrtũm kot Apraãw mã mẽ õ pyka jarěnh xwỳnhja nhũm kot mẽ kãm ôr kaxyw. ¹⁸ No nhũm Ejit nhô pahi kot Juje ho mex xwỳnhta na pre ra ty nhũm axtem hpānhã hōja mẽ ho amnhĩptar o pa. Nẽ aa Juje jarěnh mar kêt nẽ. Kormã pahi xar nyw kêt

ri htyk jakamã nhũm mỳr pê harẽnh mar kêt nẽ.
¹⁹ Hãmri nẽ hkwỳjê homnuj o pa. Tanhmã mẽ panhĩgêjtê nhĩpêx to ho pa. Nẽ mẽ kãm mẽ hkra my hapôx xwỳnhjê hã amỹnê. Mẽ hapôx nhũm mẽ kot pikap mẽ rẽnh nhũm mẽ htyk kaxyw nhũm mẽ kãm mẽ hã amỹnê.

²⁰ —Rôm nhũm finat Mojesja kato. Nẽ mexre. Hãmri nhũm katorxà Ejit nhõ xwỳnhjê kot kêp hpĩr pymaj ỏrkwy kamã ri mẽ kêp ho hpimxur o pa hã mytwrỳ axkrunẽpxi.

²¹ —Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hãmri nẽ mẽ kot wa kêp hpĩr pymaj kumỳ nẽ ma o tẽ nẽ kaxyw à nhĩpêx nẽ nhỹri gô nhĩpôk ri pô kamã ho amũxu. Tã nhũm Paraohti hkra nija ra gôx mã wỳr mã tẽ nẽ ra omu hãmri nẽ amnhĩm kumỳ nẽ ma o tẽ nẽ ho hkra. ²² Jakamã nhũm Mojes Ejit nhõ xwỳnhjê kamã hprêk. Hãmri nẽ mẽ àhpumunh xà hã kagà pumunh pa. Nẽ hihtỳx nẽ mẽ kãm kapêr kãm hihtỳx mex o pa.

²³ —Tã hãmri ra hã amgrà pê 40 nẽ hapêx nhũm Mojes hamaxpêr nẽ ra kãm amnhĩ kwỳ pê Ijaewjê pumunh prãm nẽ ma mẽ hwỳr tẽ. ²⁴⁻²⁵ Hãmri nẽ htêm kôt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu nẽ hamaxpêr o: “E pa ma wa hwỳr tẽ nẽ ixkwỳ mũj ã Ejit nhõ xwỳnhta pĩ kê ixkwỳjaja ja hã ixpumu nẽ Tĩrtũm kot mẽ hwỳr inhmẽn ã ixpumu. Ixte Ejit nhõ xwỳnhjê nẽ mẽ kator kaxyw mẽ ja hã ixpumunh kurê kumrêx.”

—Anhỹr o hamaxpêr hãmri nẽ wa hwỳr tẽ nẽ amnhĩõja nẽ Ejit nhõ xwỳnh pĩ. Tã no nhũm

hkwyjaja kot hpîr ã harênh mar tâ tanhmã amnhî kaxyw kãm hamaxpêr to hkêr nê. ²⁶ Nhũm apkati nhũm mēhōja war axkrut nê axte pijapu ho wa xa. Hamê wa kêp Ijaew. Jakamã nhũm Mojes akupỹm mē hwỳr tē nê tee ri axpēn tâ wa omu nhũm ja kêp omnuj nê. Hāmri nhũm wa hwỳr tē nê axpēn nê wa kãm kapêr nê wa kãm: “Pa? Kwa war ajamê war apê Ijaew kēnã na ka wa ri axtem nê ã axpēn nhîpêx anê.” Anê. ²⁷ Hāmri nhũm kot amnhî kaxyw hkryx xwýnhja kuma nê nhãm amnhî nê hkujate nê kãm: “Tk. Kwa xà apê mē inhō pahi hã na ka ã wa inhmã akapêr anê? Nà apê mē inhō pahi hkêr kēnã. ²⁸ Kot kaj inhîpêx o te ate Ejit nhō xwýnhta nhîpêx pyrã nê wa ixtō hpîr kêt nê.” Anê.

²⁹ —Hāmri nhũm tee ri kuma nê ra kãm ma nê Ejit rûm kator kurê kumrêx nê ma pyka pê Mijiã hwỳr mō nê kamã hpānhã pa. Kamã hprō nê hkra. Nhũm hkra myja wa hamêxkrut.

³⁰ —Tã nhũm Mijiã kamã pa hã axte hã amgrã pê 40. Hāmri nê mēmo arîgro hã kapôt ã krã hakỳx pê Sinai kape hã ri pa nhũm Tîrtũm kãm kapêr. Nom nhũm Mojes omunh kêt nê. Âm utĩ kaôk kamã kuwy hpôk pix pumu. ³¹ Amnhî jaêr pê ã kot amnhî nhîpêx anhỹr ã omu hāmri nê amnhî tâ hprĩ hã omunh kaxyw hwỳr tē nhũm Tîrtũm kãm:

³² Pa Mojes? E ixpê Tîrtũm na pa. Ixpê akukamã anhîgêr Apraãw nhō Tîrtũm na pa. Nê ixpê Apraãw kra Ijak mē htãmnhwýy Jako wa ò Tîrtũm na pa. Anê.

Hāmri nhũm tee ri kuma nê kãm ma xàj htertet tỳx nê. Hāmri nê umaj axte pĩ hpôkja wỳr rît kêt nê. Âm nhãm hkrã nê rît o xa. ³³ Hāmri nhũm Tîrtũm kãm:

E kwa ixpê Tĩrtũm maati hã ixtã apijaàm ã aparkà kapa nẽ apar kênh nẽ xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwýnhjaja ixpê mẽ homnuj tỳx kumrêx rãhã ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nẽ inhmã mẽ hkaprĩ nẽ. Jakamã kot paj Ejit nhõ xwýnhjê nhĩhkra rũm mẽ kator pa. E ka kot paj mẽ hwỳr amẽ ka ma akupỹm mẽ hwỳr mỗ nẽ mẽ kurũm mẽ kator.

Anhỹr o kãm mẽ kaxyw karõ. ³⁵ Ra Ijaew kot Mojes hkaga tã nhũm mẽ kaxyw ãm nẽ ma akupỹm kot mẽ hwỳr mẽnh kaxyw. Na prem ra omu nẽ hkaga. Te mẽ ate Jejus kagaja pyrà nẽ hkaga. Jakamã nhũm pijapu xwýnhta tee ri amnhĩ tã omu nẽ kamã gryk nẽ amnhĩ nê kãm kapêr nẽ kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi kêt.” Anhỹr tã nhũm Tĩrtũm mẽ kaxyw tãm xãm. Kot mẽ ho amnhĩptàr nẽ Ejit nhõ xwýnhjê rũm mẽ kator kaxyw. Ja kaxyw na pre pĩ hpôk kamã kãm kapêr nẽ mẽ kaxyw ãm.

³⁶ —Jakamã nhũm Mojes ma akupỹm Ejit wỳr mỗ nẽ mẽ kurũm hkwỳjê kator nẽ ma mẽ o pa. Na pre mẽ ho mex nẽ Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ o pa. Ejit kamã nẽ mãănẽn mẽ kot gô xujanãr mã: “Gô kamrêk” anhỹr xwýnhta kamã. Nẽ kapôt ã mẽ kãm ã amnhĩ nhĩpêx anhỹr o mẽ o pa. Nẽ kapôt ã ri mẽ o pa ho ra hã amgrà pê 40.

³⁷ —Tã tãm na pre mẽ panhĩgêjtê mã mẽhõ hkukamã mẽ kãm tanhmã harênh to nẽ mẽ kãm harênh o: “Koja Tĩrtũm nhỹrmã te ra mẽ akaxyw pa ixãm pyrà nẽ inhmỳr pê mẽ panhĩ xãm. ỹ hã

mê amã kapêr jarênh o pa kaxyw nhũm nhỹrmã mẽ akaxyw âm ka mẽ omu.”

—Anhỹr o ã Jejus kukamã harênh anê. ³⁸ Na pre Mojes kapôt ã mẽ panhĩgêjtê ho pa nhũm mẽ krã hakỳx pê Sinaija wỳr pa. Mẽ panhĩgêjtaja hãmri hwỳr pa nhũm Tĩrtũm kapêr o mẽ wrỳk xwỳnhja mẽ kaxyw Mojes mã kapêr nhũm ô ri mẽ kãm awjarê nê hã kagà. Mẽ kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarênh o pa. Nê mẽ pajaxwỳja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà. ³⁹ Tã no nhũm mẽ panhĩgêjtaja Mojes ma nê âm kuma nê hkaga kumrêx nê akupỹm Ejit wỳr hkrà. ⁴⁰ Jakamã nhũm Mojes kormã nhỹri mẽ kaxyw Tĩrtũm mã kapêr o âm rôm nhũm mẽ wakre kamã htõ Arãw wỳr mra nê kãm: “Kwa Mojes ra kot tanhmã amnhĩ to kênã. Kot Ejit rùm mẽ pakator nê mẽ pahto mõi tã ra nhỹri arĩk nê tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wỳr mẽ pahto pa.” Anê.

⁴¹ —Hãmri nhũm mẽ kuma nê mẽ kãm kàx o mõi krare karõ ho sãnti nhĩpêx nê mẽ kãm âm. Hãmri nhũm mẽ axtem nê te ho Tĩrtũm nhĩpêx pyràk o hipêx nê kãm ôwêhti hkwỳ pa nê kãm haxwỳ nê hã apku. Hãmri nê ã amnhĩ nhĩpêx anhỹr ã amnhĩ pumu nê hkĩnh nê. ⁴² Hãmri nhũm Tĩrtũm tee ri ja hã mẽ omu nhũm ja kêp omnuj tỳx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwrỳre nê kanhêti karõ nhĩpêx nê te mẽ kot Tĩrtũm nhĩpêx pyràk o hipêx o pa. Hãmri nê amnhĩ kaxyw kumã pix mã hamaxpêr o pa hã

amgrà xohtô nê. Tã nhũm Tĩrtũm nhỹ hã kapêr jarênh o mẽ pa xwỳnhjaja tanhmã mẽ kãm kapêr to nê mẽ hã kagà. Te Tĩrtũm tãm mẽ kãm kapêr pyràk o mẽ kãm kapêr nê hã kagà kot:

Pa mẽ apê Ijaewjaja? E mẽ inhma. Amnepê mễ ate kapôt ã ri mẽ apa hã amgrà pê 40ta ã. Xà we inhmã na ka prem akrit kwỳ hpar o apa?

⁴³ Nà inhmã hkêt. Na ka prem axtem nê ri amnhĩ krã hkôt amnhĩm mẽmo karõ nhĩpêx nê hipêx o te mẽ ate pa inhĩpêx pyràk. Pê kãm akrit kwỳ hpar nê ỡr o ri apa.

Mễ anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwỳnhja ka pre htem à kamã amnhĩ kôt ho apa.

Nê amnhĩm kanhêti karõ nhĩpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhỹrja mỳrapê kot paj pãnhã nhỹhỹm mẽ arê.

Koja mẽ akutã amnhĩ xunhwỳr xwỳnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axàpênh rũnh o ri apa kãm ga. Anê.

Ã na pre Tĩrtũm mẽ panhĩgêjtê mã kapêr anê nhũm ỹ hã kapêr jarênh o pa xwỳnhja mẽ kãm hã kagà.

⁴⁴ —Tã nhũm mẽ panhĩgêjtaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapêr xà hã ixkreja nhũm prem amnhĩ kôt ri o pa. Mễ kot kãm “Tĩrtũm nhõrkwỹ kaàkre” anhỹr xwỳnhja. Tĩrtũm kot mẽ kãm hã karõ xà hkôt nhũm mẽ hipêx nê amnhĩ kôt ri o pa. Na pre Tĩrtũm hprĩ

hã Mojes mã tanhmã kot hipêx to hã karõ nhũm mẽ hkôt hipêx nẽ amnhĩ kôt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wỳr Mojes mỳr pẽ mẽ o pa. Hãmri nẽ hwỳr mẽ o pỏj nhũm Tĩrtũm mẽ nẽ mẽ kot ra kamã mẽ pa ho mẽ pa xwỳnhjẽ japỏj nhũm mẽ pãnhã kamã pa ho pa. Nẽ amnhĩ kôt Tĩrtũm nhỏrkwy kaàkreta o pa. Rãhã nhũm finat Tawija mẽ hpãnhã mẽ ho amnhĩptà. ⁴⁶ Na pre Tĩrtũm Tawi kot tanhmã amnhĩ nhĩpêx to ho pa hã omu nẽ kãm hapê nẽ. Jakamã nhũm Tawi kãm kapêr nẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhỹr tã no nhũm Tĩrtũm kormã kãm ja prãm kêt nẽ. ⁴⁷ Jakamã nhũm Tawi hkra Sarumãwja hipêxà mỳr pẽ hpãnhã kêp mẽ õ pahi nẽ kãm hipêx. ⁴⁸ Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwỳnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhỹ hã kapêr jarênh o pa xwỳnhja Tĩrtũm kot tanhmã mẽ pajamãr to ho pa hã kagà nẽ hã kagà ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to nẽ mẽ ãhkra ho mẽ kot inhmã ixkre nhĩpêxta wỳr axà nẽ kamã ixpa ho ixpa?

⁵⁰ Nà ixte mẽmoj piitã ho ixkator xwỳnh kênã kot pa kêt ã amnhĩ nhĩpêx anẽ. Anẽ.

Nhũm pre ã Tĩrtũm amnhĩ tã mẽ kãm kapẽr anẽ
nhũm ỹ hã kapẽr jarẽnh xwỳnhja ô ri mẽ pamã hã
kagà.

⁵¹ —E kwa mẽ inhma ixkwỳjaja. Mẽ akrã hihtỳx
kumrẽx jakamã mẽ amã Tĩrtũm kapẽr mar prãm
kêt. Na ka htem mẽ panhĩgêjtê pyrã nẽ amnhĩ nẽ
Tĩrtũm Karõ kaga nẽ kapẽr mar kêt nẽ. ⁵² Na pre
hte Tĩrtũm nhỹ hã kapẽr o mẽ pa xwỳnhjaja mẽ
panhĩgêjtê hwỳr mra nẽ mẽ kãm kapẽr jarẽnh o ri
mẽ hkôt pa. Tã nhũm mẽ hkaga nẽ mẽ hipêx kati
ho pa. Na pre htem Jesus wrỳk kukamã mẽ kãm: “E
koja nhỹrmã kot Tĩrtũm kapẽr mar nẽ hkôt amnhĩ
nhĩpêx mex rãhã xwỳnh maatija mẽ pahwỳr wrỳ.”
Anhỹr o mẽ kãm harẽnh o pa. Tã no nhũm mẽ kãm
ja mar prãm kêt jakamã axtem nẽ hã mẽ hpar o pa.
Mẽ kot mẽ kãm Jesus jarẽnh o mẽ pa xwỳnhjê hpar
o pa. Tã nhũm tãm mẽ pahwỳr wrỳ ka mẽ omu nẽ
mẽ kot amnhĩ nhĩpêxta pyrã nẽ hã amỹnê nhũm
prem mẽ amã kupĩ.

⁵³ —Tĩrtũm kapẽr o mẽ wrỳk xwỳnhjaja kot
Tĩrtũm nhỹ hã tanhmã mẽ pahte amnhĩ nhĩpêx to
ho papa hã mẽ pamã karõ nhũm mẽ ate mar tã
mẽ apê hprãm nōkati. Nẽ ama nẽ ãm ama nẽ hkôt
amnhĩ nhĩpêx o ri apa hkêt nẽ. Anẽ.

Mẽ kot Estewãw pĩr ã mẽ harẽnh

Rukre 21.16-19, 23.34; Atre 22.20

⁵⁴ Hãmri nhũm juistijaja tee ri Estewãw xujarẽnh
ma nẽ kamã gryk tỳx nẽ kãm kapẽr punuj nẽ.

⁵⁵ Nom nhũm Tĩrtũm Karõja tanhmã hkrã hto
nhũm kãm mẽ uma hkêt nẽ. Hãmri nẽ kànhmã rĩt
nẽ kaxkwa pumunh o xa nẽ kamã Tĩrtũm rũm hirã

rax pumu. Nhũm Jejus Tĩrtũm nhĩhkô hã xa nhũm omu nê hkĩnh nê mẽ kãm:

⁵⁶ —Kokỹỹ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwỳr mẽnh xwỳnh Jejusja xa. Hêxta waa nê. Nà na pa jarãhã wa omu nê ixkĩnh tỳx kumrêx. Anê.

⁵⁷ Hãmri nhũm mẽ kuma nê kamã gryk tỳx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xàj àmra htỳx nê hwỳr hprôt

⁵⁸ nê unê nê krĩ pê ho kato nê ma o tẽ nê nhỹri o xa. Hãmri nê kên o htak o hpĩr kaxyw amnhĩ nhĩnôkà hkwrỳ nê mẽhõ my pê Sawti mã kugõ nhũm mẽ kãm hamỳ. Hãmri nhũm mẽ kên rũnh kwỳ jamỳ nê o mra nê Estewãw wỳr rêngh prêprêk o kuhê. Nê ho ĩ kamã htak nê hkrãx pê htak. ⁵⁹ Hãmri nhũm ra htyk kaxyw nê Jejus mã amnhĩ jarê nê kãm:

—Pa Pahihti Jejus? E koja ixkarõ awỳr api ka ixto amnhĩptà. Anê.

⁶⁰ Hãmri nê hkôn krã ho tẽm nê nhỹ nê axte kãm amnhĩ jarê nê mẽ kot hpĩr xwỳnhjê nê kãm kapêr nê kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nê.

Anhỹr o mẽ nê Jejus mã kapêrja kôt ra ty.

8

Mẽ kot Estewãwjaxàr ã mẽ harênh

Atre 22.4, 26.9-11

¹⁻² Hãmri nhũm mẽ kot Jejus kôt amnhĩ nhĩpêx xwỳnhjaja Estewãw wỳr mra nê htyk kãm omu nê hkaprĩ nê. Nê mur nê kumỳ nê ma o mỗ nê haxà. Nom nhũm Sawtija mẽ kot hpĩr ã omu nhũm ja kãm mex nê.

*Sawti kot Jejus kwỳjê nhĩpêx kati ho pa hã harênh
Atre 1.8*

Tã nhũm Jerujarê kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hãmri nhũm mẽ tee ri amnhĩ kukamã hamaxpêr nê mẽ hkwỳjaja mẽ umaj hapôj nê ma pika hkwỳ hkôt hpigrành pa. Mẽ hkwỳjaja Jutej wỳr ma pa nhũm mẽ hkwỳjaja Samar hwỳr ma pa. ã na prem mẽ umaj nhỹhỹm hpigrành par anê. ãm Jejus nhỹ hã mẽ ahkre xwỳnh maati pixjaja na prem Jerujarê kamã arĩk nê nhỹhỹm môr kêt nê. Simãw Pêtre nê Juãw nê Xiakre nê Andre nê Firipti nê Patoromew nê Matêwre nê Makre nê Tomas nê Xiakre hõja nê Simãw ô nê Maxitreja. ãm jajaja pix na prem arĩk.

³ Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xaj tanhmã mẽ hipêx to ho pa. Na pre hte mẽ ôrkwỹ hwỳr agjê nê mẽ unê. Memyjê pynê nê mênijê pynê nê ma mẽ o mra nê mẽ hagjênh xà kamã mẽ hagjê. Mẽ uràk nê kêp Ijaew tã ã mẽ hipêx anhỹr o pa.

⁴ Tã nhũm mẽ umaj Jerujarê rũm pika hõ hwỳr mẽ hpigrành xwỳnhhtaja amarĩ pika hkwỳ hkôt ri pa hkêt nê. Na prem ma mẽ piitã mẽ kãm Jejus kapêr jarênh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harênh rãhã ho ri mẽ hkôt pa.

*Wajaga kot amnhĩ tã Firipti mar ã harênh
Juãw 2.23-24*

⁵⁻¹² Tã nhũm Firipti haxwỳja ma mỗ. Ma krĩ pê Samar hwỳr mỗ nê kamã mẽ kãm Tĩrtũm kot mẽ pakaxyw ãm xwỳnhhtaja jarênh o pa. Samar kamã

na pre wajaga Simãwti ri Samar nhõ xwýnhjê hkôt mẽ no kupyrr rãhã ho ri mẽ hkôt pa. Nê àhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nê kamã no pyrna nê. Nê htỳx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyrr rãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwýnhjaja nê mẽ kot amnhĩ to rũnh xwýnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nê ri axpêr mã harênh o:

—Kokỹỹ. Wajagaja àhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỹr o pa nã? Mãn pre Tĩrtũm kãm àhpumunh xà hkwy gõ nhũm ỹ hã ã amnhĩ nhĩpêx anhỹr o pa. Anê.

Hãmri nê hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mỗ nê mẽ kãm Jejus Kris jarênh o ri mẽ hkôt pa nê mẽ kãm:

—Jesús kêp Tĩrtũm kot mẽ pahwỳr mênh xwýnh jakamã kot kaj mẽ amnhĩ kaxyw hkôt ajamaxpêr nê hkôt amnhĩ xunhwỳ nhũm Tĩrtũm hã mẽ apumu nê mẽ ato hkra. Anê.

Hãmri nê Tĩrtũm nhỹ hã akupỹm tanhmã mẽ kute xwýnhjê ho mex to ho pa. Mẽ ĩ kamã mẽ htyk xwýnhjaja nê mẽ hyk o mẽ pa xwýnhjaja nhũm mẽ ohtô nê akupỹm mẽ ho mex o pa. Nê mẽ hkwyjê nê mẽkarõmnuti hkwy jano nhũm mẽ àmra htỳx o mẽ hkaga nê ma mẽ kurũm hapôx nê mra. ã Firiptija Jejus nhỹ hã mẽ ho mex o pa anê nhũm mẽ piitã ja hã omu nê kapêr ma nê hkĩnh nê. Nê kapêr mar tỳx nê hkôt hamaxpêr. Jao wajaga Simãwti kaga nê hpãnhã amnhĩ kaxyw Jejus kôt pix mã

hamaxpêr nê hkôt amnhĩ xunhwỳ. Hāmri nhũm Firipti ja hã mẽ omu nê mẽ hkrã kumrã. Měmyjaja nê mēnijaja nê mẽ piitã mẽ hkrã kumrã. Ra mẽ kot Jejus kôt amnhĩ xunhwỳr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrãr pa.

¹³ Hāmri nhũm wajaga Simãwti haxwỳja Jejus kapêr ma nê mẽ uràk nê amnhĩ kaxyw hkôt hamaxpêr nê hkôt amnhĩ xãm nhũm Firipti hkrã kumrã. Hāmri nhũm hkĩnh nê Firipti hkôt ri pa. Nê aa mẽ kot mēmoj pumunh kêt kwỳ ho anhyr o ri pa hã omu nê kamã no pyma ho hkôt ri pa. Nê kot Tĩrtũm nhỹ hã akupỹm mẽ ho mex ã omu nê tee ri hamaxpêr.

¹⁴ Tã hāmri nhũm Jerujarẽ kamã Jejus nhỹ hã mẽ ahkre xwỳnh maatijaja Samar nhõ xwỳnhjê jarẽnh ma. Ra mẽ kot Tĩrtũm kapêr kôt amnhĩ nhĩpêx ã mẽ harẽnh ma nê hkĩnh nê. Hāmri nê ma mẽ hwỳr Simãw Pêtre mẽ Juãw wa kumẽ. ¹⁵⁻¹⁷ Hāmri nhũm wa ma mẽ hwỳr wa mō nê pøj. Hāmri nhũm Firipti wa omu nê wa kãm krĩ nhõ xwỳnhjê jarẽ nê wa kãm:

—Nà na pa pre mẽ kãm Jejus kapêr jarẽ nhũm mẽ inhma nê hkôt amnhĩ xunhwỳ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nê. Anẽ.

Hāmri nhũm wa mẽ harẽnh ma nê mẽ himõk ã wa ãhkra jaxwỳr o ri mẽ hkôt mra. Ja kôt nhũm Tĩrtũm Karõ mẽ hwỳr wrỳ nê mẽ hkarõ mã gjêx pa. ¹⁸⁻¹⁹ Hāmri nhũm wajaga Simãwja mẽ amnhĩ tã wa omunh o xa nê hamaxpêr o:

—Kokỹỹ. Kwa wa kot mẽ hã ãhkra jaxwỳrja kôt na hte Tĩrtũm Karõ mẽ hkarõ mã agjê. Hêxta waa

ně. Inhmã ã mẽ hipêx anhÿr o ri ixpa hprãm tÿx. E pa ixkàxpore hkwỹ jamỹ nẽ o tẽ nẽ wa kãm kugõ kê wa tanhmã ixto pa wa uràk nẽ ã mẽ hipêx anhÿr o ri ixpa. Nà kot paj anẽ. Anẽ.

Hãmri nẽ wa hwÿr tẽ nẽ wa kãm:

—E ota ixkàxporeta. Kwa amnhĩm apy nẽ hpãnhã tanhmã ixto pa war apyrà nẽ mẽ hã inhĩhkra jaxwÿr o ri mẽ hkôt ixpa kê Tĩrtũm Karõja mẽ hkarõ mã agjê. Inhmã ja ho anhÿr prãm tÿx. Anẽ.

²⁰⁻²³ Hãmri nhũm wa tee ri ã kapẽr anhÿrja ã omu nhũm Pêtre kãm:

—Tk. Kwa ajamaxpẽrja mex kêt. Xà na htem kàxpore ho Tĩrtũm mã amnhĩrer pê ÿ hã mẽ ho hwÿr o pa nhũm Karõ mẽ hwÿr agjê? Nà na htem kàxpore ho Tĩrtũm Karõ japrôr kêt nẽ. Kot kaj wa ixpyrà nẽ ã mẽ hipêx anhÿr kêt nẽ. Ajamaxpẽrja mexre hã. Kormã ate Tĩrtũm kôt amnhĩ xãm tÿx kêt jakamã na ka atÿx ã ri ajamaxpẽr anẽ.

—Na ka ã wa ixte Tĩrtũm nhÿ hã mẽ hipêx anhÿr ã wa ixpumu nẽ amã wa ixpyrà nẽ ã mẽ hipêx anhÿr o ri apa hprãm xàj ajamaxpẽr punuj nẽ. Nhũm ajamaxpẽr punuj te kot apa hã apyr ka tee ate kêp amnhĩ kjênh pyràk. Kwa tokyx ajamaxpẽr punuj ã amnhĩ pumu nẽ akaprĩ nẽ tokyx hkaga. Hãmri nẽ amnhĩ to Tĩrtũm wÿ kê amnhĩ katut kôt ajamaxpẽr punujja mẽ ka axte ã ajamaxpẽr anhÿr kêt nẽ. ã mẽ hamaxpẽr punuj anhÿr xwÿnhjaja koja mẽ nhÿrmã ma kuwy hwÿr pa. Anẽ.

²⁴ Hãmri nhũm tee ri amnhĩ tã kuma nẽ hkaprĩ nẽ wa kãm:

—Kwa xà wehe? Tô tokyx ixto Tĩrtũm wÿ kê ã ijamaxpẽr anhÿrja mÿrapê hwÿr inhmẽnh kêt nẽ. Anẽ.

²⁵ Tã nhũm Simãw Pêtre mẽ Juãw wa Samar nhõ xwỳnhjê mã Pahihti Jejus kapêr jarênh pê ho mẽ ahkre hãmri nê ma akupỹm Jerujarê hwỳr mỗ. Ma pyka pê Samar hkôt mẽ kãm Jejus kapêr jarênh o ma akupỹm mỗ.

*Firipti mẽ Exiop nhõ xwỳnh wa harênh
Ijais 53.7-8*

²⁶ Hãmri nhũm Firipti arĩ Samar kamã arĩk. Hãmri nhũm Tĩrtũm kapêr o mẽ wrỳk xwỳnhja hwỳr wrỳ nê kãm:

—Pa? E ot pa awỳr wrỳ nê tẽ. Nà kêr ka tokyx akato nê ma mỗ nê Jerujarê rũm kànhmã Kas wỳr pry kahpêr ta nê hã juk nê ma hã mỗ. Kapôt ã pry nỏrta kahpêr ta nê hã mỗ. E kwa tokyj.

Anhỳr o kãm kapêr hãmri nê ma akupỹm tẽ nê kaxkwa hwỳr api. ²⁷ Hãmri nhũm Firipti kuma nê kato nê ma hwỳr mỗr kurê kumrêx. Mỗõ hãmri nê pryja kahpêr ta nê hã mỗ.

Hãmri nhũm ra mẽhõ myja mỗ. Exiop nhõ xwỳnh na pre. Exiop kamã mẽõ pahi na pre niti. Hixi pê na pre Kãtatre. Nhũm pry hã mỗr xwỳnhja kêp kãm kàxpore jamãr o pa xwỳnh. Exiop kamã te kêp mẽ õ kôwenatô pyràk. Tã kot Tĩrtũm mã mex o mex ã harênh kaxyw ma Jerujarê hwỳr mỗ.

²⁸ Hãmri nê akupỹm Exiop wỳr kormã mỗ. Õ pàr kãm nhỹ nê Tĩrtũm kapêr ã kagà htũm kamã kapêr o mỗ. Tĩrtũm nhỹ hã kapêr o pa xwỳnh pê Ijais kot Tĩrtũm kapêr ã kagà htũmja nhũm kamã kapêr o mỗ. ²⁹ Hãmri nhũm Tĩrtũm Karõ Firipti mã harẽ nê kãm:

—E mẽhõ mũj wỳr aprôt nê tẽ nê hã ajêt nê ma hkôt tẽ. Anẽ.

³⁰ Hāmri nhũm kuma nẽ ma hwỳr hprôt nẽ hã ajêt nẽ kot kagà kamã kapër ã kuma. Ijais kot Tĩrtũm kapër ã kagà htũm kamã kapër ã kuma nẽ kãm:

—Pa? Mãn ka aprĩ hã ate kamã akapër xwỳnhta ma nà? Anẽ.

³¹ Hāmri nhũm kãm:

—Nà ixte maare hã. Mẽhõ kot hprĩ hã inhmã harẽ pa ixprĩ hã kuma? Xàt ka ixwỳr api nẽ ixri nhỹ nẽ aprĩ hã inhmã harẽnh o ixkôt mō nà? Anẽ.

Hāmri nhũm kuma nẽ hwỳr api nẽ ìhkô hã nhỹ nẽ kagàta pumunh o nhỹ. ³² Nhũm hã kagà kot:

Na htem ôwêhti par kaxyw nhũm amarĩ mẽ kãm akryk kuhê.

Nẽ mẽ kot kêp hkĩ jakàr kaxyw nhũm ma anẽ nẽ amarĩ mẽ kãm akryk kuhê.

Tã na pre mẽhõja ôwêhti kot amnhĩ nhĩpêx pyràk o amnhĩ nhĩpêx.

Jakamã nhũm mẽ kot tanhmã hipêx to htã no nhũm arĩ mẽ kãm akryk xa. Amnhĩ nê tanhmã mẽ kãm kapër punuj to hkêt nẽ. ãm arĩ mẽ kãm xa.

³³ Na prem homnuy tỳx nẽ ri hipêx kati rax nẽ.

Aa kot tanhmã amnhĩ tomnuy to hkêt kumrêx tã nhũm mẽ ã hipêx anẽ nhũm mẽhõ yr pê tanhmã nê mẽ kãm kapër to hkêt nhũm prem kupĩ.

Nhũm amnhĩ kanrêhã hkra hkêt rãhã ty. Jakamã kot puj mẽ hkrajê nhĩxi mar kêt nẽ. Kra hkêt rãhã htyk kênã. Anẽ.

³⁴ Nhũm pre ã Exiop nhõ xwỳnh Tĩrtũm kapër ã kagà htũm kamã harẽnh anẽ. Hāmri nẽ tee ri ã

kot mēhō jarēnh anhỹrja kukamã hamaxpēr nē hã Firipti kukja nē kãm:

—Kwa aprĩ hã inhmã mēhōja jarē. Mēhō na prem ã hipêx rax anē? Xà kot kagà xwỳnhhta na prem ã hipêx anē nà xà nhãm mēhō na prem ã hipêx anē? E kwa aprĩ hã inhmã harē pa ã mē kot hipêx anhỹr xwỳnh kôt omu. Anē.

³⁵ Hãmri nhũm kãm:

—Tôe kot paj amã harē. Nà Jejus na prem ã hipêx anē nhũm prem hã kagà. Anē.

Hãmri nē hprĩ hã kãm kot kamã harēnh xwỳnhhta jarē. Jejus kot tanhmã mē panē amnhĩ nhĩpêx toja nhũm hprĩ hã kãm harēnh o hkôt mō.

³⁶ Hãmri nhũm wa kormã mō nē pry htã himô hãnh mō nhũm Exiop nhō xwỳnh omu nē Firipti mã kãm:

—E mũj gô mũj nō. Xà kot kaj kamã ixkrã kumrã nà? Anē.

³⁷ Nhũm kãm:

—Nà kot kaj amnhĩ kaxyw Jejus Kris kôt ajamaxpēr nē hkôt amnhĩ xãm hã kot paj akrã kumrãr kurê kumrêx. Anē.

Hãmri nhũm kãm:

—Tỳ. Kêp Tĩrtũm Kra kênã kot paj kêt amnhĩ kaxyw hkôt ijamaxpēr kêt. Anē.

³⁸ Hãmri nē pàr o mrar xwỳnh mã anē nhũm pàr o nō nhũm wa kato nē himô hwỳr wrỳ nhũm Firipti hkrã kumrã. Kot Jejus kôt amnhĩ xãm ã hkrã kumrã. ³⁹ Hãmri nē wa akupỹm api nhũm Tĩrtũm Karō Firipti mỳ nē ma nhỹhỹm o mō nhũm Exiop nhō xwỳnhja axte omunh kêt nē. Hãmri nē ma akupỹm papxà hwỳr mō. Ra kot Jejus kôt amnhĩ xãm jakamã hkĩnh nē ma akupỹm mō.

⁴⁰ Rôm nhũm Firipti krĩ pê Ajôt kamã pôj. Tĩrtũm Karõ kot Exiop nhõ xwỳnh pê kator nẽ tanhmã ho nẽ Ajôt wỳr o mỗ hãmri nẽ kamã kumẽ. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harênh pê ma krĩ hõ hwỳr mẽ kãm ujarênh anhỹr o pa rãhã krĩ pê Sejarej wỳr mỗ nẽ pôj.

9

Sawti kot Jejus kôt amnhĩ xãm ã harênh

Atre 22.6-11, 26.12-18

¹ Rôm nhũm Sawtija xatã Jerujarẽ kamã Pahihti Jejus kôt mẽ kot amnhĩ xunhwỳr xwỳnhjaja tanhmã mẽ homnuj tỳx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhỹr pix o pa. Tã ra hamaxpêr nẽ ma patre maati hwỳr tẽ nẽ mẽ hã amnhĩ jarẽ nẽ kãm:

² —E ot pa awỳr tẽ. Kwa inhmã kagà nhĩpêx pa kupy nẽ ma krĩ pê Tamas kãm mẽ pahpê Ijaew xaptàr tũmrejê hwỳr o mỗ nẽ mẽ kãm kugõ. Kê mẽ kamã harẽ nẽ omu hãmri nẽ hkôt inhĩhkra kamã Jejus kôt mẽ kot amnhĩ nhĩpêx xwỳnhjê jagjê. Mẽnijaja nẽ mẽmyjaja. Hãmri pa mẽ unê nẽ man akupỹn awỳr mẽ o mỗ ka mẽ omu nẽ kam tanhmã mẽ hipêx to. Anẽ.

Hãmri nhũm kuma nhũm ja kãm mex nẽ. Hãmri nhũm kãm kagà nhĩpêx nẽ kugõ nhũm kupy nẽ hkôt mẽ pa xwỳnhjê mẽ ro hã ma Tamas wỳr mẽ hwỳr mỗr kurê kumrêx.

³ Mỗ mẽ ra hpôx o mỗ mẽ nhũm puh kaxkwa rũm hirã rax kumrêx wrỳ nẽ hã ajêt nhũm hipôk ri xa. ⁴ Hãmri nẽ tee ri omu nẽ kãm ma xàj pykap tẽm

nê akryk nō. Hāmri nhũm kaxkwa rŭm mēhō kām kapēr nē kām:

—Pa Sawti? Hêxta waa nê. Kwa mon ka hte ixtomnuj tỳx o ri apa? Anê.

⁵ Hāmri nhũm amnhĩ jaêr pê kuma nê kām:

—Kwa mē atō na ka ã inhmã akapēr anê pahihtī? Anê.

Hāmri nhũm kām:

—Kwa nhũm ixpê Jejus ixte amã ixkapēr kênã. Pa na ka hte ixpê ixkôt mē kot amnhĩ xunhwỳr xwỳnhjê nhĩpêx kati ho apa. Jao te pa ate ixtomnuj tỳx pyrāk. ⁶ Nom kot kaj axte ã amnhĩ nhĩpêx anhỹr kêt kumrêx. E kànhmã xa nê māmri ma krĩ hwỳr tē. Kot kaj hwỳr pōj nhũm mēhō awỳr tē nê mēmoj tã amã karō ka ama nê hkôt amnhĩ nhĩpêx. Anê.

⁷ Nhũm pre ã Jejus Sawti mã kapēr anê. Nhũm hkôt mē pa xwỳnhjaja mēmoja ma no ãm hprĩ mar nê mēmoj pumunh kêt nê. Hāmri nê tee ri hamaxpēr nê kām ma xàj akryk kapēr kêt kumrêx nê kuhê. ⁸ Hāmri nhũm Sawti kànhmã xa nom rīt kêt nê tee ri rīt mã nhũm mē hpa hã kupy nê ma krĩm o mō. ⁹ Nê Tamas wỳr o pōj nê nhỹri mēhō nhōrkwy hwỳr ho axà nhũm kamã nohkre nê arĩ hkrĩ. Tee ri amnhĩ kukamã hamaxpēr o hkrĩ. Nê apkur kêt nê hkôm kêt o ra hã apkati axkrunēpxi.

¹⁰ Tamas kamã na pre mēhō my pê Ananĩsja pa. Kot Jejus kôt amnhĩ xunhwỳr xwỳnhjê hō na pre. Jakamã nhũm Jejus hwỳr kato nê kām kapēr. Te hpimtir kām hwỳr kator nê kām kapēr pyrà nê kām:

—Pa Ananĩs? Anê.

Nhũm kām:

—Ỡ? Ot pa xa. Mo na Pahihtī? Anê.

¹¹ Nhũm Jejus kãm:

—E kêr ka akato nẽ ma mẽ kot kãm: “Pry katàt” anhỹr xwỳnh̃ta wỳr tẽ. Hãmri nẽ kamã Jut nhõrkwỹ japêr. Kamã na Tas nhõ xwỳnh̃ pẽ Sawtija hkrĩ. Na no hkre nẽ inhmã amnhĩ jarẽnh o hkrĩ. Ka hwỳr axà nẽ omu. ¹² Ate hwỳr atẽm nẽ inhỹ hã hã anhĩhkra xir nhũm akupỹm rĩt mex kaxyw na ato amỹti. Jakamã e ma hwỳr tẽ nẽ ã hipêx anẽ. Anẽ.

¹³ Hãmri nhũm Ananĩs tee ri kuma nẽ kãm Sawti puma ho amnhĩ kamã kahak nẽ. Hãmri nẽ kãm:

—Kwa nà Pahiti. Tãm na xep hte Jerujarẽ kamã mẽ kot amnhĩ kaxyw akôt mẽ hamaxpẽr xwỳnh̃jẽ nhĩpêx kati ho pa. Pa ra mẽ hã harẽnh ma. ¹⁴ Tã na xep ra jar Tamas wỳr pøj. Patre krãhtũm kapêr nhỹ hã kot mẽ ixpê akôt amnhĩ xunhwỳr xwỳnh̃jẽ pynẽnh nẽ ma akupỹm hwỳr mẽ ixto mõi kaxyw. Tãn ka ri hwỳr ijano. Kwa nà ri ixto anhỹr kêt nẽ Pahiti. Anẽ.

¹⁵ Nhũm Jejus kãm:

—Nà mamrĩ ma hwỳr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhỹrta hpãnhã ma mẽ piitã mẽ kãm ixkapêr jarẽnh o pa. Mẽ apê Ijaew mã nẽ mẽ anhõ pahĩ hkwỳjẽ mã nẽ mẽ kêp Ijaew kêt xwỳnh̃jẽ mã. Koja mẽ piitã mẽ kãm ixkapêr jarẽnh mex o ri mẽ hkôt pa. ¹⁶ Koja mẽ ixtã homnuj tỳx nẽ nhũm amnhĩ xà htỳx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarẽnh pa nhũm amnhĩ kukamã amnhĩ jarẽnh ma. E tokyx mãmrĩ ma axãmnhĩx hwỳr tẽ. Anẽ.

¹⁷ Hãmri nhũm kuma nẽ kato nẽ ma Sawti hwỳr htẽm kurê kumrẽx. Hãmri nẽ ixkre hwỳr axà nẽ omu nẽ hkrã hã ãhkra xi nẽ kãm:

—Pa Jejus kôť ixtô Sawti? E na Pahihti Jejus awÿr inhmẽ pa awÿr tẽ. Pry kahti ri kot awÿr kator xwÿnh̃ta. Tã akupÿm arĩt nhũm Tĩrtũm Karô kot akarô mã àr kaxyw na awÿr inhmẽ pa tẽ. Anẽ.

¹⁸ Hãmri nhũm mẽmoj te tep kà pyràkja Sawti no rũm hapôj nẽ rôrôk nhũm akupÿm rĩt mex kurê kumrêx. Hãmri nẽ kànhmã xa nhũm Ananĩs hkrã kumrã. Ra amnhĩ kaxyw Jejus kôť hamaxpêr ã hkrã kumrã. ¹⁹ Hãmri nhũm nhỹ nẽ apku nẽ akupÿm hihtÿx.

*Sawti kot Tamas kamã Jejus kapêr jarênh
Sikũn Korĩt 11.22-23*

Nhũm Sawti Tamas kãm mẽ kot Jejus kôť amnhĩ xunhwÿr xwÿnh̃jê hkôť amnhĩ xãm nẽ mẽ hkôť ri pa nẽ tokyx ma akupÿm môr kêt nẽ. ²⁰ Kormã mẽ hkôť ri pa nẽ Ijaew nhô Tĩrtũm kapêr o mẽ ahkre xà hã ixkre hwÿr mra nẽ kamã mẽ kãm Jejus kapêr jarê. Kêp Tĩrtũm Kra hã harênh o kuhê. ²¹ Hãmri nhũm mẽ amnhĩ jaêr pê ã harênh anhÿrja ma nẽ tee ri hamaxpêr nẽ xapêñ mã:

—Kokÿÿ. Kwa tãm na xep pre Jerujarê kamã amnhĩ kaxyw Jejus kôť mẽ kot amnhĩ xunhwÿr xwÿnh̃jê homnuj tÿx o pa. Tã xep jar kot mẽ hkwyjê pynênh nẽ ma mẽ o môr nẽ Jerujarê kamã patre krãhtũmjê mã mẽ ôr kaxyw na pre man mẽ pahwÿr mō. Tã ra tanhmã hamaxpêr to nẽ axtem nẽ mẽ pamã Jejus kapêr jarênh o mẽ pajahkre ho pa. Anẽ.

²² Hãmri nhũm Sawti arĩ Tamas kãm Ijaew mã tanhmã Jejus jarênh to kamã hihtÿx o mẽ hkôť pa nẽ mẽ kãm:

—Nà Jejus Krisja na pre Tirtũm mẽ pakaxyw ãm nẽ mẽ pahwỳr kumẽ. ãm hãmri na pa mẽ amã ja jarẽ. Anẽ.

Hãmri nhũm mẽ kuma nẽ tee ri kutã tanhmã kapẽr to hkukamã hamaxpẽr.

²³ Tã ra hã apkati xohtô nẽ nhũm Tamas kãm Ijaew kwỳjaja kot Sawti pĩr kaxyw hã axpẽn ma.

²⁴ Hãmri nhũm mẽhõja hã ama nẽ Sawti hwỳr tẽ nẽ kãm mẽ harẽ nẽ kãm:

—Kwa Sawti kêr ka axkãm ajamak rom. Na mẽ pahkwỳjaja atã amỹnẽ. Na mẽ ra krĩ puhã kahê xà hã hakwakre piitã hamãr ho kuhê. Kot kaj nhỹhỹm akato nhũm mẽ apumu nẽ apynẽ nẽ apĩ. Anẽ.

²⁵ Jakamã nhũm kamàt nhũm Sawti hkôt ri mẽ pa xwỳnhjaja kawà rax ô mỳ nẽ hwỳr o tẽ nẽ kãm ãm nhũm hwỳr axà nẽ nhỹ. Hãmri nhũm mẽ hkagrĩ nẽ kẽn o krĩ puhã kahêja nhĩrô pê ho wrỳ nhũm mẽ kêp kato nẽ ma mỗ.

*Sawti kot Jejus kwỳjê hkôt pikamẽnh ã harẽnh
Karatas 1.15-24*

²⁶ Tã nhũm Sawti krĩ pê Tamas rũm kato nẽ ma akupỹm Jerujarẽ hwỳr mỗ hãmri nẽ hwỳr pøj. Hãmri nẽ mẽ kot Jejus kôt amnhĩ xunhwỳr xwỳnhjê hkôt amnhĩ jarẽnh kaxyw mẽ hwỳr tẽ. Hãmri nhũm mẽ tee ri amnhĩ wỳr omu nẽ kot Jejus kôt amnhĩ xãm ã amnhĩ to hêx ã hkamnhĩx hãmri nẽ amnhĩ kamã kahak o amnhĩ nẽ hkurẽ nẽ mẽ piitã kãm uma nẽ. ²⁷ ãm Panãpe pix ãm hãmri kot Jejus kôt amnhĩ xãm kôt hamaxpẽr. Hãmri nẽ ma hwỳr tẽ nẽ haprô nẽ ma Jejus nhỹ hã mẽ ahkre xwỳnh maatijê hwỳr o tẽ nẽ yr pê mẽ kãm kapẽr nẽ mẽ kãm:

—Kwa ãm hãmri na Sawti amnhĩ jarẽ. Na ra mẽ pahpyrà nẽ Jejus kôt amnhĩ xãm. Na xep pre Tamas wỳr pry hã kormã mỗ nhũm xep Pahihti Jejus hwỳr kato nẽ kaxkwa rũm kãm kapẽr nhũm kuma nẽ hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhõ xwỳnhjê mã Jejus kapẽr jarẽnh o ri mẽ hkôt pa. Ra amnhĩ kamã kãm mẽ uma hkêt nẽ àmnhĩx ri mẽ kãm harẽnh o ri mẽ hkôt pa. Anẽ.

²⁸ Hãmri nhũm mẽ kuma nẽ amnhĩ kôt Sawti mẽ nhũm mẽ hkôt ri pa. Hãmri nẽ Jerujarẽ kamã mẽ piitã mẽ kãm Jejus kapẽr jarẽnh o pa. Kãm Jejus kôt amnhĩ xunhwỳr kêt xwỳnhjê pyma hkêt nẽ àmnhĩx ri mẽ kãm kapẽr jarẽnh o ri mẽ hkôt pa. ²⁹ Nẽ Ijaew kwỳ pẽ Gresjê kapẽr o mẽ kapẽr xwỳnhjê mã nhũm xatã mẽ kãm Jejus jarẽnh o ri mẽ hkôt pa. Kêp Tĩrtũm kot mẽ pakaxyw ãm xwỳnh ã harẽnh rãhã ho ri mẽ hkôt pa. No nhũm mẽ kãm mar prãm kêt nẽ ra kot Jejus ã hpĩr mã. ³⁰ Hãmri nhũm mẽ kot Jejus kôt amnhĩ xunhwỳr xwỳnh kwỳjaja mẽ harẽnh ma nẽ mẽ kêp ho kato nẽ ma krĩ pẽ Sejarej wỳr o mỗ. Hãmri nẽ kurũm ma akupỹm ò krĩ pẽ Tas wỳr kumẽ nhũm ma akupỹm mỗ.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurẽ xwỳnhjaja axte Jejus ã tanhmã hkwỳjê hto hkêt nhũm mẽ piitã hamakêtkati nẽ àmnhĩx ri pa. Pika pẽ Jutej kamã nẽ Garirej kamã nẽ Samar kamã nhũm mẽ piitã hamakêtkati nẽ àmnhĩx ri pa. Hãmri nẽ Tĩrtũm mã mex o mex ã harẽnh o ri pa. Nhũm Tĩrtũm Karõ tanhmã mẽ hkrã hto nhũm mẽ ra kapẽr kôt amnhĩ nhĩpêx mex o mỗ. Hãmri nhũm mẽ ohtô rax nẽ mẽ uràk nẽ Jejus kôt amnhĩ xunhwỳ nẽ hkwỳjê hkôt

axkamẽ.

Enejti akupỹm mex ã harẽnh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwỳr xwỳnhjê mã Tĩrtũm kapẽr jarẽnh o mẽ ahkre kaxyw ma krĩ piitã hkôt pa. Jakamã krĩ pẽ Rit wỳr mỗ ³³ nẽ hwỳr pỏj nẽ kamã Enejti pumu. Nhũm ã kamã htyk pa nẽ kupĩp kãm hikwỹ rãhã hã amgrà pẽ 8. ³⁴ Hãmri nhũm Simãw Pêtre omu nẽ Jejus nhỹ hã kãm kapẽr nẽ kãm:

—Pa Enejti? E na Jejus Kris akupỹm ato mex. Jakamã e kànhmã xa nẽ akupĩpta py. Anẽ.

Hãmri nhũm akupỹm mex nẽ kànhmã xa nẽ amnhĩ pumu nẽ hkĩnh o hkĩnh. ³⁵ Hãmri nhũm krĩja kamã nẽ krĩ hỏ pẽ Sarỏ kamã mẽ piitã harẽnh ma nẽ mẽ kot amnhĩ tomnuj kaga hpa nẽ hpãnhã Jejus kôt amnhĩ xunhwỳ nẽ hkôt amnhĩ nhĩpêx o pa.

Tapitre akupỹm htĩr ã harẽnh

Rukre 8.49-56; Atre 20.7-12

³⁶ Nhũm Tapitreja krĩ pẽ Jope kamã na pre pa. Gres kapẽr kãm hixi pẽ Nokre. Mẽ kapẽr kãm Nokreja te kệp “karà” anhỹr jarẽnh pyràk. Na pre ra Tapitre pẽ Nokreja Jejus kôt amnhĩ xãm nẽ mẽ piitã mẽ ho mex o ri mẽ hkôt pa. Nẽ mẽ kệp amrakati xwỳnhjê kamã ukapĩr ho ri mẽmoj to mẽ kutã nojarêt o ri mẽ hkôt pa. ³⁷ Tã ra à htỳx nẽ hãmri ty. Hãmri nhũm mẽ tee ri omu nẽ hkapĩr nẽ mỳr rax nẽ. Nẽ kumỹ nẽ kuhỏ hãmri nẽ kormã haxàr kêt ri kỳx pẽ ixkre kamã kuxi nẽ kuri mỳr o hkrĩ.

³⁸ Nhũm Simãw Pêtre kormã krĩ hỏ pẽ Rit kamã ri pa. Rit rũm Jope hwỳr jawỳ jakamã nhũm Jope

kamã mẽ kot Jejus kôt amnhĩ xunhwỳr xwỳnhjaja Simãw Pêtre jarēnh ma hãmri nẽ hwỳr ja wa ho hamẽxkrut nẽ wa kumẽ. Nhũm wa ma hwỳr tẽ nẽ hwỳr pøj nẽ omu nẽ kãm:

—Pa? E jar na pa wa awỳr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwỳr tẽn omu nà? Anẽ.

³⁹ Hãmri nhũm wa kuma nẽ ma wa hkôt htẽm kurê kumrẽx. Hãmri nẽ Jope hwỳr pøj nẽ mẽ hwỳr tẽ nhũm mẽ kỳx pê htyk nẽ nôr xwỳnhja wỳr ho api nhũm hwỳr axà. Nhũm kuri mẽ kêp mẽ mjên htyk xwỳnhjaja hkaprĩ nẽ mỳr o hkrĩ. Hãmri nhũm Simãw Pêtre mẽ hwỳr axà nhũm mẽ omu nẽ kãm Tapitre kormã htĩr ri kot tanhmã mẽ ho mex to hã harẽ. Nẽ mẽ ê hkwỳ jamỳ nẽ kãm kupẽ nẽ kãm:

—Ga ja pumu. Tyk xwỳnhhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpê ty. Hêxta gàa nẽ. Na pa mẽ ixkaprĩ htỳx kumrẽx. Anẽ.

⁴⁰ Hãmri nhũm mẽ kuma nẽ mẽ kator pa hãmri nẽ htyk xwỳnhhta ri hkõn krã ho nhỹ nẽ ho Tĩrtũm wỳ. Hãmri nẽ htyk xwỳnhhta mã kapêr nẽ kãm:

—Pa Tapitre? E kwa kànhmã nhỹ. Anẽ.

Pu nhũm no amra nẽ Simãw Pêtre pumu nẽ kànhmã nhỹ. ⁴¹ Hãmri nhũm hpa hã kupy nẽ kànhmã âm nẽ kapôt ã mẽ kuhê xwỳnhjê mã anẽ nhũm mẽ akupỹm wa hwỳr agjê nhũm mẽ kãm:

—E ota. Na Tĩrtũm akupỹm mẽ amã ho htĩr. Anẽ.

Hãmri nhũm mẽ amnhĩ jaêr pê omu nẽ hkĩnh tỳx nẽ. ⁴² Hãmri nhũm Jope kamã mẽ piitã harēnh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. ⁴³ Hãmri nhũm Simãw

Pêtre Jope kamã ri pa hã apkati xohtô nê tokyx mẽ kurũm kato nê ma krĩ hõ hwỳr mõi kêt nê. Na pre mry kà ho mẽmoj nhĩpêx o pa xwỳnh pê Simãw ri pøj nê kuri pa hã apkati xohtô nê.

10

*Konẽre kot Simãw Pêtre hã karõ hã harẽnh
Rukre 7.1-10*

¹ Tã nhũm Ijaew kêt xwỳnh Konẽre. Kêp Rõmjê nhõ põiستی krãhtũm na pre. Õ põiستیja pika pê Itar nhõ xwỳnh na pre mẽ nhũm Konẽre kêp mẽ hkrãhtũm. Krĩ pê Sejarej kamã. ² Konẽreja kot amnhĩ to mex o pa xwỳnh na pre. Kêp Ijaew kêt tã na pre hte òrkwy kamã hkwỳjê mẽ Tĩrtũm ã hpĩaam nê kãm mex o mex ã harẽnh o pa. Apkati mẽ kãm amnhĩ jarẽ. Nê mẽ kêp amrakati xwỳnhjê mã kàxpore hkwỳ nhõr o pa. ³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpĩmtir kãm kot omunh pyrã nê kaxkwa kamã Tĩrtũm kapêr o wrỳk xwỳnh pumu. Nhũm hwỳr wrỳ nê tanhmã kãm kapêr to nê kãm:

—Pa Konẽre? Anẽ.

⁴ Nhũm tee ri omu nê kãm ma htỳx kumrẽx. Hãmri nê kãm:

—Mo na? Anẽ.

Hãmri nhũm kãm:

—Nà ate amnhĩ to Tĩrtũm wỳr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwỳnhjê mã kàxpore hkwỳ nhõr o apaja nhũm ja mãănẽn kãm mex nê.

⁵ —Jakamã e inhma. Kêr ka ma Jope hwỳr amã mẽ àpênh xwỳnh kwỳ rẽ kê mẽ ma hwỳr mra nê kamã mẽhõ pê Simãw Pêtre japrô nê man akupỳn

awÿr o mō. ⁶ Simāw kot mry kà ho mẽmoj nhĩpêx o pa xwÿnh̄ta nhõrkwÿ kamã na hte pa. Õrkwÿja gô mÿ ri na. E hwÿr mẽ arê kê mẽ ma hwÿr mō nê haprô nê man awÿr o mō kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrÿk xwÿnh̄ja Konêre mã kapêr anê hãmri nê kato nê ma akupÿm api. Hãmri nhũm kot mar xà hkôt jajê rê nê Simāw Pêtre hwÿr mẽ kurê. Kãm àpênh xwÿnh̄jê ho hamẽxkrut nê kaxyw ò pōristi hō. Pōristija na pre hte Konêre pyrà nê Tĩrtũm ã hpijaàm o pa. ⁸ Jakamã nhũm mẽ kurê nê mẽ kãm kapêr hãmri nê ma Jope hwÿr Simāw Pêtre hwÿr mẽ kurê nhũm mẽ kato nê ma hwÿr mō. ⁹ Hãmri nhũm apkati nhũm kaxkwa nhĩpôk ri myt nhÿ nhũm mẽ hwÿr hpôx o mō.

*Simāw Pêtre tanhmã hpimtir to hã harênh
Atre 11.5; Karatas 2.11-21*

Rôm nhũm Simāw Pêtre kot Tĩrtũm mã amnhĩ jarênh kaxyw ixkre nhĩmōk ã api nê himōk po hã kãm amnhĩ jarênh o nhÿ. ¹⁰ Hãmri nê ra kãm prãm nê nom nhũm mẽ kormã kãm ò hã àpênh jakamã nhũm arĩ ixkre nhĩmōk ã Tĩrtũm mã amnhĩ jarê.

Hãmri nê Konêre pyrà nê te hpimtir kãm kot mẽmoj pumunh pyrà nê mẽmoj pumu nhũm Tĩrtũm Konêre hkukamã tanhmã kãm mẽmoj to amnhĩrĩt to. No ãm hã kuxi nê kãm harênh jakamã nhũm Simāw Pêtre te hpimtir kãm kot mẽmoj pumunh pyrà nê mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiipro xà pyràk xwÿnh̄ja pyka hwÿr wrÿk o mō. Nê hatur xà piitã axpên tã akuprô nê ajêt nê wrÿk o mō nhũm omu. ¹² Mẽ hpiipro xàta kamã mẽmo mry

piitã hikwỹ. Mẽmo mry hpar o ri pa xwỹnhjaja nẽ
htu mỳr pẽ ri pa xwỹnhjaja nẽ mẽmo àk kỳx pẽ htor
o ri mrar xwỹnh piitã mẽ hpiro xàja kamã hikwỹ
nhũm omu. ¹³ Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nẽ nà? E
kànhmã xa nẽ axàmnhĩx mãmri mryta ò kapi nẽ apĩ
nẽ ho anẽ nẽ aku. Piitã mẽ ate hkur mã mex. Anẽ.

¹⁴ Hãmri nhũm tee ri kuma nẽ kãm:

—Kwa nà Pahi Maati. Mẽ ixpẽ Ijaew mẽ ixte
mry piitã hkur kêt. ãm hkwỹ pix na pa htem kuku.
No mry jaja aa mẽ ixte hõ hkwỹ hkrẽr kêt. Anẽ.

¹⁵ Hãmri nhũm Tĩrtũm kãm:

—Nà kot anhỹr tã kot paj pam amã mẽmoj jarẽ
ka kamã anhõkre kahak kêt nẽ. Mãmri amnhĩm
hõ kapi nẽ apĩ nẽ ho anẽ nẽ axàmnhĩx hkwỹ hkre.
Anẽ.

¹⁶ Nhũm pre ã kãm mry hã karõ anhỹr o
axkrunẽpxi. Simãw Pêtre kot mãmri Ijaew kêt
xwỹnhjẽ hkõt pa nẽ àmnhĩx ri mẽ kutã apkur nhũm
Tĩrtũm kãm ja mex nhũm kot hã amnhĩ pumunh
kaxyw nhũm ã kãm harẽnh anhỹr o axkrunẽpxi.
Hãmri nhũm mẽ hpiro xàja ma akupỹm kaxkwa
hwỹr àpir o mỗ nẽ akunok. ¹⁷ Hãmri nhũm Pêtre
te hkrākator pyrāk jao tee ri hpimtir kukamã
hamaxpẽr o nhỹ nẽ hamaxpẽr o:

—Kwa mo kaxyw na Tĩrtũm ã inhmã ja hã karõ
anẽ? Anẽ.

Rôm nhũm Konẽre kot hwỹr mẽ rẽnh xwỹnhjaja
ra hwỹr hpôx o mỗ. Ijaew kêt xwỹnhjtaja Simãw
nhõrkwỹ hã mẽ hkukjêr o mỗ nẽ hwỹr pỏj nẽ
hakwakrem kuhê. ¹⁸ Hãmri nẽ õrkwỹ nhõ xwỹnhjẽ
mã kãm:

—Pa na ka mẽ arĩ akrĩ? E Simãw Pêtre hwỹr na
pa mẽ mỗ. Xà jar na hte pa nà? Anẽ.

Hāmri nhũm mẽ kām: —Tỳ. Omũj kỳx pê ixkre nhĩmõk ã na nhỹ. Anẽ.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tĩrtũm Karõ kām mẽ hpôx xwỳnhjê jarẽ nẽ kām:

—E Simãw Pêtre. Ota Ijaew kêt xwỳnhjaja axkrunêpxi nẽ ajapêr o mỗ nẽ ra anhõrkwỹ hwỳr pôj. ²⁰ Mẽ hwỳr wrỳ nẽ mẽ kot amã mẽmoj jarênh ma nẽ mãmri axàmnhĩx ma mẽ hkôt mỗ. Tanhmã ajamaxpêr to hkêt nẽ. Pa na pa awỳr mẽ kumẽ nhũm mẽ mỗ. Anẽ.

²¹ Hāmri nhũm kuma nẽ mẽ hwỳr wrỳ nẽ mẽ omu nẽ mẽ kām:

—Pa? Xà pa na ka mẽ ijapêr o mỗ? E ot pa xa. Kam nẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwỳr mỗ? Anẽ.

²² Hāmri nhũm mẽ kām:

—Nà mẽ inhõ patrãw Konêre na awỳr mẽ inhmẽ pa mẽ mỗ. Na hte tãm amnhĩ nhĩpêx o pa. Nẽ Tĩrtũm ã hpijaàm nẽ kām mex o mex ã harênh o pa. Nhũm mẽ inhõ krĩ kamã Ijaew kām hkĩnh nẽ. Tã na Tĩrtũm kapêr o wrỳk xwỳnhja ham hwỳr wrỳ nẽ kām ajarẽ. Kot amnhĩ wỳr atã karõ nhũm ate hwỳr amõr nẽ kām axujarênh kaxyw kām ajarênh jakamã nhũm mẽ ixte ajaprôr kaxyw awỳr mẽ inhmẽ pa mẽ man awỳr mỗ. Anẽ.

²³ Hāmri nhũm mẽ kuma nẽ mẽ kām:

—Tôe nà na pa mẽ ama. E mẽ agjê nẽ akrĩ nẽ jar mẽ ixri nỏ kê apkati pu mẽ rĩ ma akupỹm mỗ. Anẽ.

Hāmri nhũm mẽ kuma nẽ mẽ hwỳr agjê.

Tã nhũm apkati nhũm mẽ akupỹm nojarêr nhũm Simãw Pêtre ma mẽ hkôt mỗ. Nhũm Joep kamã mẽ

kot Jesus kôť amnhĩ xunhwỳr xwỳnh kwỳjaja ma mẽ hkôť mỗ. Nhũm mẽ mỗr o kamăt.

²⁴ Hãmri nhũm apkati nhũm mẽ Sejarej wỳr hpôx o mỗ. Nhũm ra Konẽre mẽ kutêp amnhĩ wỳr hkwỳjê ho akuprỗ nhũm mẽ Simãw Pêtre kutêp ôrkwỹ kamã akuprỗ nẽ hkrĩ. ²⁵ Hãmri nhũm mẽ hwỳr pôj nẽ mẽ hwỳr àr kaxyw nhũm Konẽre amnhĩ wỳr omu nẽ kànhmã xa nẽ kutã tẽ nẽ hpar pê hkônkrã ho tẽm nẽ nhỹ. ²⁶ Hãmri nhũm tee ri ja hã omu nẽ pa hã kupy nẽ kànhmã ăm nẽ kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷ Hãmri nẽ hkôť ôrkwỹ hwỳr axà nẽ kutêp mẽ pikuprỗnh xwỳnhjê pumu nẽ mẽ kãm:

²⁸ —Pa na ka mẽ arĩ akrĩ? E măn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhỗ xwỳnhjê hkôť ri ixpa hkêt nẽ. Nẽ mẽ anhôrkwỹ hwỳr inhgêx kêt nẽ. Tã ham Tĩrtũm inhmã mẽ ixte ã amnhĩ nhĩpêx anhỹr o ixpaja nẽ ixkurê nẽ inhmã: “Kot paj pam mẽ hkwỳjaja mex ã mẽ harẽ ka mẽ kamã anhôkre kahak kêt nẽ.”

²⁹ —Anhỹr jakamã ka xep pre ixtã karỗ pa inhĩtôt kêt nẽ man mẽ awỳr inhmỗr kurê kumrêx. E mẽ inhmã mẽmoj jarẽ pa mẽ ama. Mẽmo kaxyw na ka mẽ ixtã karỗ? Anẽ.

³⁰ Hãmri nhũm Konẽre kãm:

—Nà jãã na pa pre jar inhôrkwỹ kamã Tĩrtũm mã amnhĩ jarênh o nhỹ. Ra myt xàpanh grire pa kãm amnhĩ jarẽ. Hãmri nhũm Tĩrtũm kapêr o wrỳk xwỳnh ixwỳr wrỳ nẽ hirã rax kãm xa. ³¹ Hãmri nẽ inhmã: “Pa Konẽre? E na hte Tĩrtũm ate kãm amnhĩ

jarēnh̄ta mar o hkrī. Nē ate mē kēp amrakati xw̄ynh̄jē ho mex o apaja nh̄um h̄a apumu.

³² Jakamā e ma Jope hw̄yr amā mē àpēnh̄ xw̄ynh̄ kw̄y rē kē mē ma hw̄yr mō nē kamā Simāw Pētre japrō nē man akup̄yn̄ aw̄yr o mō. Mry kà ho mēmoj nh̄ipēx o pa xw̄ynh̄ Simāw nh̄orkw̄y kamā na hte pa. Ōrkw̄yja gō m̄y ri na.” Anē.

³³ —Ā kot inhmā kapēr anh̄yr jakamā na pa kuma hāmri nē aw̄yr jajē rēnh̄ kurē kumrēx. Tā ka mē hkôt man mē ixw̄yr mō nē ā apōx anē. Ām hāmri na ka mē hkôt mō. Mē apē Ijaew kot amnh̄i nh̄ipēx kuhpa h̄a amnh̄i nh̄ipēx nē axāmnh̄ix man mē ixw̄yr mō. Tā ot pa mē Tīrtūm noo mā ixkrī. Kam nē māmri ỹ h̄a mē inhmā mēmoj jarē pa mē ama. Anē.

Simāw Pētre kot Konēre mā ujarēnh̄

³⁴ Hāmri nh̄um Simāw Pētre Konēre kot kām amnh̄i jarēnh̄ja ma nē mē kām aw̄jarē nē mē kām:

—Nà ām hāmri na Tīrtūm mē akukamā tanhmā inhmā kapēr to. Xep kām mē ixpē Ijaew pix japē hkēt. Kām mē pahpiitā mē pajapē nē mē panh̄ipēx o axpēn pyrāk. ³⁵ Koja ahp̄ynh̄a pyka piitā hkôt mēhō mē ixpyrà nē kēp Ijaew kēt tãã hkôt amnh̄i xām nē h̄a hpijaām pē kām mex o mex ā harē nē tām amnh̄i nh̄ipēx. Hāmri nh̄um Tīrtūm ja h̄a omu nh̄um ja kām mex nē.

³⁶ —Na pre ra mē ixpē Ijaew mā tanhmā Kra Jesus Kris jarēnh̄ to. Jesus kot mē panē htyk kukwak ri na hte mē ixte hkôt amnh̄i xunhw̄yr xw̄ynh̄jē ho hkra. Tā ra määnēn ā mē apē Ijaew kēt xw̄ynh̄jē mā ā amnh̄i jarēnh̄ anē nē Jesus htyk kukwak ri mē ate mē ixpyrà nē hkôt amnh̄i xunhw̄yr xw̄ynh̄jē

ho hkra. Jakamã Jejus Krisja kêp mẽ pahpiitã mẽ panhõ Pahihtĩ.

37-38 —Mãn ka prem ra harênh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harê nẽ mẽ hkrã kumrãr o pa. Mẽ piitã mẽ kot amnhĩ tomnuj kaga nẽ Tĩrtũm kôt amnhĩ xunhwỳr ã mẽ omunh xà hkôt mẽ hkrã kumrã. Jejusja krĩ pê Najare kamã na pre hprêk. Tã hwỳr na pre Tĩrtũm amnhĩ Karõ mẽ nhũm wrỳ nẽ hkarõ mã axà nẽ hkôt pa ho pa. Jakamã nhũm àhpumunh o àhpumunh nẽ ma krĩ piitã hkôt tanhmã mẽ ho mex to ho ri mẽ hkôt pa. Pika pê Garirej kumrêx kamã mẽ piitã ri mẽ kãm Tĩrtũm kapêr jarênh o pa. Nẽ mẽkarõmnuti kot Satanasti nhỹ hã tanhmã mẽ ho xwỳnhjaja nhũm mẽ nẽ mẽkarõmnuti japôx o pa. ã na pre Tĩrtũm nhỹ hã amnhĩ nhĩpêx anhỹr o pa.

39 —Tã Jejus nhỹ hã hkrajê jahkre ho mẽ ixpa xwỳnhjaja na pa prem kot ri tanhmã amnhĩ to ho pa hã omunh par o ri hkôt ixpa. Mẽ ixpê Ijaew nhõ pyka kamã nẽ mẽ inhõ krĩ pê Jerujarê kamã kot ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nẽ mẽ ixpê pĩ kahpa hã kunhõ nẽ kupĩ. ⁴⁰ Hãmri nhũm htyk o apkati axkrunêpxi nhũm Tĩrtũm akupỹm ho htĩr nẽ akupỹm mẽ ixwỳr kumẽ pa prem akupỹm htĩr kãm omu. ⁴¹ No nhũm mẽ piitã akupỹm htĩr kãm omunh kêt nẽ. ãm mẽ ixwỳr pix na pre kato nẽ mẽ ixkutã apku pa mẽ papxipixjaja akupỹm htĩr ã omu. Hãmri nhũm Tĩrtũm mẽ ixte ma mẽ piitã mẽ kãm akupỹm htĩr ã harênh o ri ixpa kaxyw mẽ ixrê. ⁴²⁻⁴³ Amnepêm Tĩrtũm nhỹ hã kapêr

jarēnh o mẽ pa xwỳnhjaja na prem Jejus kukamã tanhmã hã kagà hto nẽ mẽ kãm harēnh o pa. Nẽ mẽ kãm:

Koja nhỹrmã mēhōja man mẽ pahwỳr wrỳ nẽ mẽ panê tanhmã amnhĩ nhĩpêx to. Ka mẽ atō amnhĩ kaxyw hkôt ajamaxpēr nẽ hkôt amnhĩ xãm hã koja Tĩrtũm ja hã apumu nẽ mēhō kot tanhmã mẽ panê amnhĩ nhĩpêx to xwỳnhhta kukwak ri amnhĩ katut kôt ate amnhĩ tomnuj rēnh pa nẽ axte kãm hamaxpēr kêt nẽ. Anẽ.

Na pre Tĩrtũm nhỹ hã kapēr jarēnh o mẽ pa xwỳnhjaja Jejus kukamã ã harēnh nẽ hã kagà anẽ. Tã koja Jejus nhỹrmã akupỹn wrỳ hãmri nẽ mẽ htyk xwỳnhjê nẽ arĩ mẽ htĩr xwỳnhjê mẽ pahto pim-ràatã tanhmã mẽ pajarēnh to. Mẽ pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarēnh to. Hãmri nẽ Tĩrtũm mẽ wa kuri mẽ pahtĩr tũm nẽ mẽ papa ho papa mã xwỳnhjê jarē nẽ mãănēn wa kuri mẽ htĩr tũm kêt xwỳnhjê jarē. Mẽ pahpiitã tanhmã mẽ pajarēnh to kaxyw na pre Tĩrtũm mẽ pakaxyw Jejus xãm. Tã ã kot mẽ pajarēnh anhyrja kukamã na pre mẽ ixte mẽ amã tanhmã harēnh to ho ixpa kaxyw mẽ awỳr mẽ ixrẽ. Mẽ ate kapēr mar nẽ tokyx Jejus kôt amnhĩ xunhwỳr kaxyw. Anẽ.

⁴⁴ Nhũm Simãw Pêtre ã mẽ kãm ujarēnh anhyr rôm nhũm Tĩrtũm mẽ kot mar o hkrĩ xwỳnhjê hwỳr amnhĩ Karō rē nhũm mẽ hwỳr wrỳ nẽ mẽ hkarō mã gjêx pa. ⁴⁵⁻⁴⁶ Hãmri nhũm mẽ Tĩrtũm mã mex o mex ã harēnh o hkrĩ. No ãm mẽ kapēr kãm harēnh kêt nẽ. Mẽ kapēr kwỳ hō ho kãm mex o mex ã harē. Aa mẽ kot mẽ kapēr mar kêt tã ra ho kapēr mex

ně. Jakamã nhũm Jope rũm mẽ kot Simãw Pêtre hkôt mẽ mõi xwýnhjaja. Ijaew kwý kot ra Jejus kôt amnhĩ xunhwýr xwýnhjaja amnhĩ jaêr pê ja hã mẽ omu nẽ axpẽn mã:

—Hêxta waa nẽ. Mẽ kêp Ijaew kêt tã nhũm Tĩrtũm kot mẽ panhĩpêx pahpyrà nẽ mẽ hwýr amnhĩ Karõ rẽ nhũm mẽ hwýr wrý nẽ mẽ kãm agjê. Nà ãm hãmri na mẽ pahpyrà nẽ ã mẽ hipêx anẽ. Anẽ.

Hãmri nhũm Simãw Pêtre mẽ kuma nẽ mẽ kãm:
⁴⁷ —Kwa pu mẽ hkrã kumrãr kurê kumrêx. Ra Tĩrtũm Karõ kot mẽ pahpyrà nẽ mẽ hkarõ mã gjêx kênã kot kêt mễhõ mẽ nẽ tanhmã mẽ pahpê àmnàr to. Ra mẽ kot mẽ pahpyrà nẽ Jejus kôt amnhĩ xunhwýr kênã. Anẽ.

⁴⁸ Hãmri nẽ Konêre mẽ hkwýjê mã kãm:

—E kot paj mẽ ate Jejus Kris kôt amnhĩ xunhwýr ã mẽ akrã kumrã. Anẽ.

Hãmri nẽ mẽ hkrã kumrãr pa nhũm mẽ Simãw Pêtre mã kãm:

—Kwa kormã anojarêr kêt nẽ. Kritpêm ri mẽ ixkôt ri apa hã atã apkati grêre nẽ kormã ma akupỹm mõi. Anẽ.

Hãmri nhũm mẽ kuma nẽ mẽ hkôt ri pa hã apkati grêre hãmri nẽ nojarêr nẽ ma akupỹm mõi.

11

Simãw Pêtre kot hkwýjê mã Konêre jarênh

Atre 10.1-48

¹⁻² Hãmri nhũm Simãw Pêtre ma akupỹm mõi. Jutej kamã krĩ pê Jerujarẽ wýr ma akupỹm mõi hãmri nẽ pôi. Hãmri nhũm Jutej kamã Jejus nhỹ hã mẽ ahkre xwýnh maatijê mẽ mẽ kot Jejus

kôt amnhĩ xunhwỳr xwỳnhjaja Ijaew kêt xwỳnhjê jarēnh ma. Konēre mẽ hkwỳ kot mẽ uràk nē Jejus kôt amnhĩ xunhwỳr ã mẽ harēnh ma. Jakamã nhũm Simāw Pêtre akupỹm mẽ hwỳr pôj nhũm mẽ omu nē mẽ hã àhkukjêr kurê kumrêx. Hãmri nhũm mẽ hkwỳjaja mẽ hã kãm akir nē kãm:

³—Kwa mẽ pahpê Ijaew pyrà nē mẽ kot amnhĩ my kwrýt kà jakàr kêt tâ ka mẽmo hwỳr mẽ hwỳr mō mẽ kuri pôj nē mẽ kutã apku. Anê.

⁴Hãmri nhũm Pêtre tee ri mẽ kuma hãmri nē hprĩ hã mẽ kãm amnhĩ jarê. Nē tanhmã Tĩrtũm kot kãm Ijaew kêt xwỳnhjê jarēnh to hã mẽ kãm harê nē mẽ kãm:

⁵—Kwa mẽ ã ri ajamaxpêr anhỹr kêt nē. E pa mẽ amã amnhĩ jarê ka mẽ inhma măn. Nà na pa pre jãã Jope kamã Tĩrtũm mã amnhĩ jarēnh o nhỹ nē te ixpimtĩr kãm mẽmoj pumunh pyràk. Nhũm mẽmojja te mẽ hpiro xà pyrà nē kaxkwa rũm ixwỳr wrỳk o mō pa ixprĩ hã omu. ⁶Nhũm kamã mry piitã. Mry xoprê nē mry xuwapô nē mry hpar o ri pa xwỳnhjaja nē mry htu mỳr pê ri pa xwỳnhjaja nē àk. Nē mẽ pahte hkur xwỳnhjaja nē mẽ pahte hkur kêt xwỳnhjaja. ⁷Kamã mry piitã pa omu. Hãmri nhũm Tĩrtũm inhmã: “Pa Simāw Pêtre? Măn ka ra amã prãm nē nà? E kànhmã xa nē axàmnhĩx mãmri mryta ò kapi nē apĩ nē ho anê nē aku. Piitã mẽ ate hkur mã mex.” Anê.

⁸—Pa tee ri kuma nē kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. Âm hkwỳ hpix na pa htem kuku. No ja hkwỳ aa mẽ ixte hō hkwỳ hkrêr kêt.” Anê. ⁹Nhũm inhmã: “Nà nom kot anhỹr tãã. Kot paj pam amã mẽmoj jarê ka kamã anhōkre kahak kêt nē. Jakamã e mãmri

amnhĩm hõ kapi nẽ apĩ nẽ ho anẽ nẽ axàmnhĩx hkwỳ hkrẽ.” Anẽ.

¹⁰ —Na pre ã Ijaew kêt xwỳnhjê hwỳr inhmõr kukamã inhmã karõ ho axkrunẽpxi anẽ. Nom hã kuxi nẽ inhmã mẽ pahte mry kur kêeta jarẽ. Hãmri nhũm mẽ hpiro xàja ma akupỹm kaxkwa hwỳr api nẽ kakrãm axà nẽ akunok. ¹¹ Hãmri nhũm Ijaew kêt xwỳnhjaja mẽ ixwỳr axkrunẽpxi nẽ mra nẽ pøj. Konẽreja Sejarej rũm ixwỳr mẽ rẽnh xwỳnhjaja nhũm mẽ mra nẽ ixwỳr pøj. ¹² Hãmri nhũm Tĩrtũm Karõ ma mẽ hkõt inhmẽ. Mẽ kệp Ijaew kêt tã nhũm ixàmnhĩx ma mẽ hkõt ixpa kaxyw mẽ hkõt inhmẽ pa ma mẽ hkõt mō. Nhũm Jope kamã mẽ kot Jejus kõt amnhĩ xunhwỳr xwỳnh kwỳjaja kệp 6ja ma mẽ ixkõt mō. Pa mẽ mō nẽ Sejarej kamã Konẽreja wỳr pøj. ¹³ Hãmri nhũm mẽ ixpumu nẽ mẽ inhmã amnhĩ jarẽ. Tĩrtũm kapẽr o wrỳk xwỳnh kot hwỳr wrỳk nẽ òrkwỳ hwỳr àr nẽ tanhmã kãm kapẽr toja nhũm inhmã harẽ. Na xep pre kãm: “E kêr ka ma Jope hwỳr amã mẽ àpênh xwỳnh kwỳjê rẽ kê mẽ ma hwỳr mō. Hãmri nẽ kamã Simãw Pêtre japrô nẽ man akupỹn awỳr o mō kê tanhmã mẽ amã ujarẽnh to. ¹⁴ Koja mẽ amã tanhmã mẽ apê Tĩrtũm kra hprãm xàj tanhmã mẽ ate amnhĩ nhĩpêx to hã mẽ amã karõ ka mẽ ama nẽ mar tỳx nẽ hkõt amnhĩ nhĩpêx. Ka mẽ anhõrkwỳ kamã akwỳjê mẽ apimràatã ama nẽ mar tỳx nẽ. Hãmri nẽ kot mẽ amã hã karõ xà hkõt amnhĩ nhĩpêx nhũm Jejus mẽ ate amnhĩ tomnuj pẽ mẽ apytàr pa.” Anẽ.

—Na xep pre ã Tĩrtũm kapẽr o wrỳk xwỳnhja kãm ijarẽnh anẽ. Jakamã nhũm ixwỳr jajê rẽ pa ma mẽ hkõt mō. ¹⁵ Hãmri nẽ kormã mẽ kãm tanhmã Jejus

jarēnh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarēnh o ixãm rôm nhũm Tĩrtũm Karô te wam kot mẽ panhĩpêxta pyrà nê mẽ hwỳr wrỳ nê mẽ hkarô mã gjêx pa. ¹⁶ Pa ja hã mẽ omu nê Pahihti Jejus kot akupỹm kaxkwa hwỳr nojarêr nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tĩrtũm ta hpãnhã mẽ awỳr amnhĩ Karô rê nhũm mẽ akarô mã agjê.” Anê.

— ã na pre Pahihti Jejus akupỹm nojarêr nê mẽ pamã kapêr anê. Jakamã pa ã kot mẽ hipêx anhỳr ã mẽ omu nê ã kapêr anhỳrja mã ijamaxpêr kurê kumrêx. ¹⁷ Na pu prem Pahihti Jejus Kris kôt amnhĩ xunhwỳ nhũm Tĩrtũm ja hã mẽ pahpumu nê mẽ pahwỳr amnhĩ Karô rê. Tã te kot mẽ panhĩpêxta pyrà nê mãânên Ijaew kêt xwỳnhtajê hwỳr kurê nhũm mẽ hkarô mã agjê. Mẽ kêp Ijaew kêt tã nhũm mẽ pahpyrà nê mẽ hwỳr kurê nhũm mẽ hkarô mã agjê. Tĩrtũm tãm kot amnhĩ krã hkôt mẽ hwỳr rēnh kēnã kot pa kêt mẽ nê tanhmã kêp ixàmnr to. Anê.

¹⁸ Nhũm pre ã Simãw Pêtre mẽ kãm amnhĩ jarēnh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. ãm mẽ hã Tĩrtũm mã mex o mex ã harê. Hãmri nê axpên mã:

— Nà ãm hãmri. Mẽ kêp Ijaew kêt tã na prem Jejus kôt amnhĩ xunhwỳ nhũm Tĩrtũm kot mẽ panhĩpêxta pyrà nê amnhĩ katut kôt mẽ kot amnhĩ tomnuj rēnh pa. Nhỹrmã wa hkuri mẽ pahpyrà nê htĩr tũm nê pa ho pa kaxyw nhũm ã mẽ hipêx anê. Nà ãm hãmri na ã kot mẽ panhĩpêx pyrà nê mẽ hipêx anê. Anê.

ãxiok kamã Jesus kwỳ jarēnh

Atre 4.36-37

¹⁹ Tã ra mẽ kot kēn o Estewãw kapēr o hpĩr xwỳj ri mẽ kot ã hipêx anhỹrta pyrà nẽ mẽ kot Jesus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pigranh pa. Wēnĩs wỳr nẽ Sipre hwỳr nẽ ãxiok hwỳr nhũm mẽ ma ahpỹnhã krĩ hkwỳ hkôt anhgrà nẽ kamã pa ho pa. Nẽ mẽ kãm tanhmã Pahihti Jesus kot mẽ panê amnhĩ nhĩpêx to hã harēnh o ri mẽ hkôt pa. No ãm kormã Ijaew pix mã harēnh o pa.

²⁰ Tã hãmri nhũm mẽ hkwỳjaja Sipre mẽ Sirēn rũm ãxiok hwỳr pan pøj. Hãmri nẽ kamã mẽ kēp Ijaew kêt xwỳnhjê mã Pahihti Jesus kot amnhĩ nhĩpêx jarēnh o pa. ã mẽ kot amnhĩ nhĩpêx anhỹr jakamã na mẽ ra ahpỹnhã ri mẽ kãm harēnh o ri pa. Ijaew mã nẽ mãănēn Ijaew kêt xwỳnhjê mã ²¹ nhũm mẽ ma mẽ hkôt ri Pahihti Jesus nhỹ hã mẽ kãm kapēr jarēnh o ri mẽ hkôt pa. Hãmri nhũm mẽ ohtô nẽ amnhĩ nhĩpêx tũm kaga hpa nẽ hpãnhã amnhĩ kaxyw Jesus kôt hamaxpēr nẽ hkôt amnhĩ xunhwỳ.

²² Hãmri nhũm Jerujarē kamã Jesus kwỳjaja mẽ harēnh ma nẽ mẽ hwỳr Panãpe mẽ. ãxiok hwỳr mẽ hwỳr kumẽ. Ma mẽ hwỳr mōr nẽ Jesus kôt mẽ hamaxpēr o hihtỳx kaxyw. ²³ Hãmri nhũm ma mẽ hwỳr mō nẽ mẽ hwỳr pøj nẽ mẽ omu. Tĩrtũm kot mẽ ho mex ã mẽ omu hãmri nẽ mẽ ỹ hã hkĩnh nẽ. Nẽ mẽ kãm:

—Nà ãm hãmri na ka mẽ ra Jesus kôt amnhĩ xunhwỳ nẽ hkôt amnhĩ nhĩpêx mex o ri apa. Tã kêr

ka mẽ ãm kapêr kôt pix mã ri amnhĩ nhĩpêx rãhã ho ri apa nẽ aa hkaga hkêr nẽ. Anẽ.

²⁴ Panãpeja na pre tãm amnhĩ nhĩpêx o pa. Nẽ amnhĩ kaxyw Jejus kôt pix mã hamaxpêr mex o pa. Nẽ Tĩrtũm Karõ hkôt amnhĩ nhĩpêx rãhã jakamã na pre hte ỹ hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nẽ ohtô nẽ Jejus kôt amnhĩ xunhwỳ.

²⁵ Tã nhũm Panãpe ãxiok rũm kato nẽ kot Sawti japrôr kaxyw ma krĩ pê Tas hwỳr mỗ. ²⁶ Hãmri nẽ hwỳr pôj nẽ Sawti pumu nẽ haprô nẽ ma akupỹm amnhĩ kôt ãxiok hwỳr o mỗ. Hãmri nẽ kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrà pyxi nẽ hapêx. Nẽ mẽ ho ohtô nẽ ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nẽ mẽ hã mẽ hixi rẽ nẽ mẽ harênh o: “Kris tỗ nẽ htõxjaja” anhỹr o mẽ harê. ãxiok kumrêx kãm na prem ã mẽ kot Jejus kôt amnhĩ xunhwỳr xwỳnhjê jarênh anẽ. Jakamã nhũm mẽ piitã ã mẽ harênh anhỹr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tĩrtũm nhỹ hã kapêr jarênh xwỳnh kwỳjaja mẽ hwỳr mran pôj. Jerujarê rũm mẽ hwỳr mran pôj. ²⁸ Hãmri nhũm mẽ piitã mẽ kot mẽ kapêr mar kaxyw mẽ hwỳr akuprô. Jakamã nhũm hõ pê Akapôja kànhmã xa nẽ tanhmã mẽ kãm ujarênh to. Tĩrtũm Karõ nhỹ hã mẽmoj kukamã mẽ kãm awjarê nẽ mẽ kãm:

—Kwa okora kêr ka mẽ axkãm ajamak rom. Koj tokyx pika piitã hkôt mẽ apkur xà hã mẽõja mẽ kệp

hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptàr ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhỹr kêt ri nhũm Akapôja kukamã ã mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jesus kôt mẽ hkwyjê hkukamã hamaxpêr nê axpên mã:

—E kwa pu mẽ Jutej kamã Jesus kôt mẽ pahtõ nê pahtõxjê mã pahkàxpore hkwy gô kê mẽ ho amnhĩm awjaprô nê hkur o pa. Anê.

Hãmri nê mẽ kaxyw kàxpore hkwy ho akuprô. Nhũm mẽ hikàxpore hkryre xwýnhja ãm mẽ kãm ho hkryre nê kugô nhũm mẽ hikàxpore rũnh xwýnhja mẽ kãm ho rũnh nê kugô. ³⁰ Jakamã nhũm mẽ ho hpikuprônh pa nê Panãpe mẽ Sawti wa kot mẽ hwýr o môr nê mẽ kãm ôr kaxyw wa kãm kugô. Hãmri nhũm wa hamý nê ma Jutej kamã Jerujarê hwýr mẽ hwýr o mō. Hãmri nê hwýr pōj nê mẽ kot Jesus kapêr o mẽ ahkre xwýnhjê mã kugô. Hãmri nhũm mẽ kãm Jesus kôt mẽ htō nê htōxjê mã o anhgrà nhũm mẽ hamý nê hkĩnh nê ho amnhĩm awjaprô.

12

Mẽ kot Simãw Pêtre pynênh nê haxàr ã mẽ harênh Matêwre 18.19-20

¹ Tã nhũm mẽ ô pahi Eroxa ô pôristi mã Kris kwýjê hã amýnê nhũm mẽ mẽ hipêx kati nê nhũm mẽ amnhĩ xà htýx kamã hamak o pa. ² Juãw tō Xiakreja nhũm mẽ pahi Erox nhỹ hã unê nê hkanhwýr o kupĩ. ³ Hãmri nhũm Ijaew kãm ja mex

jakamã nhũm pahi Erox hpãnhã mẽ kãm Simãw Pêtre hã amỹnê nhũm unê nê haxà. Mẽ kot pãwti kaxkrit kêt kur ã mẽ hkĩnh xà hã arĩgro pê Pasja ã nhũm prem unê. ⁴ Na pre Erox Simãw Pêtre hkukamã hamaxpêr o:

—Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm pôristi kot Simãw Pêtre jamãr xwỹnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kôt htõ nê htõxjaja harênh ma nê tee ri hkukamã hamaxpêr hãmri nê axpên wỳr akuprõ nê ho Tĩrtũm wỳr rãhã ho hkrĩ.

Tĩrtũm kapêr o wrỳk xwỹnh kot Simãw Pêtre kator ã harênh

⁶ Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simãw Pêtre ho xà hã arĩgroja wỳr nhũm kamàt nhũm pôristijaja arĩ mẽ hagjênh xà kamã hamãr mex o kuhê. Nhũm kuri wa hamẽxkrut nê akutã hijê nê hamãr o nõ. Kàx o akutã kãm ê nê wa ho nõ nhũm wa hkaêx kãm htỳx gõr nê nõ. Nhũm ja wa hakwa krem mẫănênh hamãr o xa. ⁷ Puh nhũm Tĩrtũm kapêr o wrỳk xwỹnhjê hõja mẽ hwỳr axà nê wrỳhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kànhmã xa pu mỗ. Anê.

Hãmri nhũm hkrākato nê omu nê kànhmã ăm kurê kumrêx nhũm kaxprexà hã kàxja axrê nê pykap rôrôk nê hikwỹ. No nhũm kuri pôristi wa nờr xwỹnhhta wa mar kêt nê. Wa arĩ õt tỳx nê nõ.

⁸ Hāmri nhũm Tĩrtũm kapēr o wrỳk xwỳnhja Simāw Pêtre mǎ:

—E tokyx anhõ kamĩs jaxà nê amnê ixkôt tẽ pu pakato nê ma tẽ. Anê.

⁹ Hāmri nhũm kamĩs nê hparkà jaxà nê ma hkôt tẽ. No âm kormǎ amnhĩ pumunh mex kêt nê. Te hpimtir kām ã kot amnhĩ nhĩpêx anhỹr pyrāk ã amnhĩ kamnhĩx. ¹⁰ Hāmri nhũm wa hakwakrem pōristi wa kot hamār o wa âm xwỳnhja hānh wa tẽ nê wa hakre nê hpānhǎ ihōja wa hānh wa tẽ no nhũm mē õt tỳx nê hkrĩ nê wa omunh kêt nê. Nhũm wa hakwakre nhĩtep xà hkôt wa tẽn kato nê hpānhǎ krĩ nê kahê xà hǎ hakwakreja wỳr wa tẽ. Hāmri nhũm tām wa kām amnhĩ kahê xà mē nhũm wa kato nê pry hǎ tẽ. Ja kôt nhũm Tĩrtũm kapēr o wrỳk xwỳnhja akunok nhũm Simāw Pêtre axte omunh kêt nê. ¹¹ Hāmri nê hprĩ hǎ amnhĩ pumunh kurê kumrêx nê hamaxpēr o:

—Kwa te ixpimtir kām ã ixte amnhĩ nhĩpêx anhỹr pyrāk tǎ xep ixpimtir kêt. Tĩrtũm na ixwỳr kapēr o wrỳk xwỳnhja mē nhũm ixwỳr wrỳ nê mē kêp ixkator. Pahi Erox ra kot xpĩr nhũm ixkwỳ Ijaew kām ja prām tǎ nhũm mē kêp ixkator. Nà âm hāmri na Tĩrtũm ã mē kêp ixkator anê. Anê.

¹² Hāmri nê Marir nhōrkwỹ hwỳr htēm kurê kumrêx. Juāw Makre katorxà Marirja nhũm ōrkwỹ hwỳr tẽ nhũm mē ra kamǎ hpikuprōnh rax nê ho Tĩrtũm wỳr o hkrĩ nhũm tām mē hwỳr tẽ. ¹³ Hāmri nê kormǎ kapôt ã hakwa krem mē kām kahê xà tatak o xa nhũm ixkre kamǎ mē kām àpēnh xwỳnh Rotreja kuma nê hwỳr tẽ. ¹⁴ Hāmri nhũm kām kapēr nhũm amnhĩ jaêr pē kuma nê hkĩnh nê. Nê kormǎ kām kahê xà mēnh kêt ri ma akupỹm tẽ nê

mẽ kot ho Tĩrtũm wỳr xwỳnhjê hwỳr axà nẽ mẽ kãm:

—Xê pěr Simãw Pêtre na tẽ nẽ kapôt ã hakwakrem xa nẽ inhmã kapěr.

¹⁵ Hãmri nhũm mẽ tee ri kuma nẽ kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atỳx ã akapěr anẽ. Anẽ.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harẽ. Mẽ kam nẽ mra nẽ omu. Anẽ.

Nom nhũm mẽ kuma nẽ ãm kuma nẽ kãm:

—Nà tãm kêt. Kaxkwa rũm Tĩrtũm mã hamãr o pa xwỳnh mãn amã kapěr nom tãm kêt. Anẽ.

¹⁶ Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaêr pê omu nẽ hkĩnh nẽ.

¹⁷ Hãmri nhũm kànhmã mẽ kãm ìhkra hpẽ nẽ mẽ ho hpìnhkrênh pa nẽ mẽ kãm:

—Nà Tĩrtũm na ixwỳr kapěr o wrỳk xwỳnhja mẽ nhũm ixwỳr wrỳ nẽ pôristi pê ixkator. Anẽ.

Hãmri nẽ mẽ kãm:

—E kêr ka mẽ Xiakre nẽ Jejus kôt mẽ pahtõ nẽ pahtõxjê mã ijarẽ kê mẽ ijarênh mar kurê kumrêx. Nom kot paj ixkato nẽ ma krĩ hõ hwỳr mỗ. Anẽ.

Hãmri nẽ mẽ kêp kato nẽ ma mỗ.

¹⁸ Tã nhũm apkati nhũm pôristi kot hamãr o hkrĩ xwỳnhjaja hkrã hapôj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpêr o kãm ma htỳx kumrêx nẽ axpên mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahĩ Erox hã mẽ pahkukja pu mẽ harênh to? Anẽ.

19 Hāmri nhũm pahi Erox hpikunor ã harēnh ma nē axtem pôristi hkwỳjê mã anē nhũm mẽ mra nē tee ri mẽ hagjēnh xà kamã hapêr nom nhỹri omunh kêt nē. Hāmri nhũm Erox mẽ kot hamār xwỳnhjê kamã gryk tỳx kumrêx nē amnhĩ wỳr mẽ hã karō nē mẽ kãm:

—Kwa nok? Mẽ ate hamār rãhã ho akuhê hã ixte mẽ amã karō htã nhũm tanhmã amnhĩ to nē akunok. Nà kot paj mẽ anhĩmex ka mẽ rĩ amnhĩ pumu. Anē.

Hāmri nhũm mẽ tee ri kãm amnhĩ tã àprār kaprỳ nhũm mẽ hã amỳnê nhũm mẽ ho kator nē ma mẽ o mra nē mẽ himex. Hāmri nhũm pahi Erox Jutej rũm kato nē ma Sejarej wỳr mō nē hpãnã kamã pa ho pa.

Pahi Erox tanhmã htyk to hã harēnh

Wam Pêtre 1.24-25

20 Krĩ pê Xir mẽ Sito wa kamã mẽ pa xwỳnhjaja na pre htem pahi Erox nhõ pyka hwỳr pa nē mẽ kệp amnhĩm apkur xà hã mẽõ japrôr o pa. Tã nhũm Erox kot mẽmoj mỳrapê mẽ kamã gryk jakamã nhũm mẽ tee ri mẽ kệp ujaprôr kaxyw mẽ hwỳr mra nom nhũm mẽ kãm mẽmoj kwỳ ho wēnê hkêt nē. Hāmri nhũm mẽ tee ri amnhĩ kukamã hamaxpêr nē pahi Erox nhõ kôwenatô Pratója wỳr mra nē kãm:

—E awỳr na pa mẽ mra. Kwa mẽ ixyr pê pahi Erox mã tanhmã akapêr to kê ama nē mẽ ixkamã gryk kêt nē. Pa mẽ axte mẽ awỳr mra nē mẽ apê mẽmoj kwỳ japrôr o ri ixpa. Anē.

21 Hāmri nhũm mẽ kuma nē hwỳr tẽ nē mẽ yr pê tanhmã kãm kapêr to nhũm kuma hāmri nē kot tanhmã mẽ kãm kapêr to kaxyw mẽ kãm arĩgro hta.

Tã nhũm ra kot arĩgro hyr xwỳnhta kato nhũm Erox kệp pahi hã ê mex jaxà nẽ tẽ nẽ kệp pahi hã mẽ hkrĩ xà kamã nhỹ nẽ tanhmã mẽ kãm kapêr to.
²² Mẽ kãm kapêr ryy nẽ. Hãmri nhũm mẽ kuma nẽ hêx rom kãm mex o mex ã harẽ. Nẽ kỳx pêê axpên mã harẽ nẽ harênh o:

—Kwa pahi Erox kệp mẽ panhĩõ hkê. Pêr kaxkwa rũm Mẽpahpãm na pre mẽ pahwỳr wrỳ nẽ ã mẽ pamã kapêr mex anẽ. Anẽ.

Hãmri nẽ te kệp Tĩrtũm pyràk o hipêx nẽ kãm mex o mex ã harẽ. Nom hêx rom ã harênh anẽ. Kot mẽ mar nẽ kãm mẽ hkĩnh nẽ akupỹm mẽ kãm mẽmoj to wẽnê hprãm xàj nhũm mẽ hêx rom ã axpên mã mex ã harênh anẽ. ²³ Hãmri nhũm mẽ kuma nhũm ja kãm mex nẽ nhũm hkĩnh nẽ mẽ mar o nhỹ nẽ kệp Tĩrtũm pyràk ã harênhja nẽ tanhmã mẽ kãm nẽ hkê nẽ. Jakamã nhũm tee ri amnhĩ tã omu nẽ hwỳr kapêr o wrỳk xwỳnhjê hõ mẽ nhũm hwỳr wrỳ nẽ tanhmã ho nhũm õhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harênh

Atre 11.27-30

²⁴ Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harênh ma nẽ hkôt amnhĩ xunhwỳ.

²⁵ Hãmri nhũm Panãpe mẽ Sawti wa ra Kris kôt htô nẽ htôxjê mã kàxporeta jamỳ nẽ ma Jerujarê hwỳr o mõi nẽ mẽ kãm kugõ. Hãmri nẽ ma akupỹm ãxiok hwỳr nojarê nẽ war amnhĩ kôt Juãw Makre o mõi. Hãmri nẽ mẽ ma mõi nẽ akupỹm mẽ hwỳr pôi.

13

Tĩrtũm kot Panãpe mẽ Sawti wa hyr

Atre 9.15-16; Rõmãn 1.1

¹ ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapër o mẽ ahkre ho pa xwỹnhjê nhĩxi ã kot anhỹr. Na pre Panãpe nẽ Sawti nẽ Simeãw kà htykre nẽ Rusti pê Sirẽn nhõ xwỹnh nẽ pahi Erox kràmnhwỳ Mãnahêja. ² Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harẽn h kaxyw apkur kêt rãhã kãm amnhĩ jarẽn h o hkrĩ. Hãmri nhũm Tĩrtũm Karõ mẽ kãm tanhmã kapër o amnhĩrĩt to nẽ mẽ kãm:

—E kêr ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hãmri nhũm mẽ kuma nẽ wa hyr kurê kumrẽx nẽ wa himõk ã mẽ ãhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mỗ.

Wajaga kot Jejus nẽ hkràmnhwỳ kurê hã harẽn h

Atre 8.9-24

⁴⁻⁵ Tã nhũm Tĩrtũm Karõ krĩ pê Serêw wỳr Panãpe mẽ Sawti wa kumẽ nhũm wa ma hwỳr mỗ. Nẽ amnhĩ kôt Juãw Makre ho mỗ. Kot tanhmã wa ho ajuta hto ho wa hkôt pa kaxyw. Hãmri nẽ wa mẽ mỗ nẽ Serêw wỳr pỏj nẽ pàr krem axà nẽ ma gỏ hipỏk pê Sipre hwỳr mỗ. Hãmri nẽ gỏ hipỏk ã krĩ pê Saramĩn wỳr pỏj nẽ Ijaew nhõ Tĩrtũm kapër o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harẽn h o wa xa.

⁶⁻⁸ Tã nhũm mẽ krĩa rũm kato nẽ hpãn hã gỏ hipỏk kôt mỗ nẽ hatur xà kamã krĩ pê Papos wỳr

pôj. Hămri nê kamã wajaga Pajejus pumu. Gresjê kapêr kãm hixi pê Erĩm. Erĩm haxwýja kêp Ijaew. Na pre hte hêx rom te kêp Tĩrtũm nhỹ hã kapêr jarênh o pa xwýnh pyrãk o amnhĩ nhĩpêx nê ma mẽ kãm ujarênh o ri mẽ hkôt pa. No ãm mẽ kãm amnhĩ to hêx o pa. Gô hipôkja ã pahi Sejupaw hkràmnhwý na pre. Pahi Sejupawja àhpumunh tỳx jakamã na pre Panãpe mẽ Sawti wa harênh ma nê kãm wa kapêr mar prãm nê wa kot kãm Tĩrtũm kapêr jarênh kaxyw amnhĩ wýr wa kuwý. Nom nhũm hkràmnhwý wajaga Erĩmja kãm wa hkĩnh kêt nê wa nê kãm kapêr kãm hihtỳx nê kãm:

—Kwa nà wa kapêr mar kêt nê. Kot kaj war ama nê wa urãk nê amnhĩ kaxyw Jesus kôt ajamaxpêr nê hkôt amnhĩ xãm. Kwarĩ wa kapêr mar kêt nê. Anê.

⁹ Hămri nhũm Sawti ra axtem pãnhã hixi. Ra hpãnhã kêp Pawre. Nhũm Tĩrtũm Karõ ra hkarõ mã àr jakamã nhũm ý hã wajagata pumu nê wa nê hkràmnhwý mã kapêr ã kãm akir nê kãm:

¹⁰ —Tk. Kwa pêr apê Satanasti hkwy hã na ka ã wa inhnê kãm akapêr anê. Na ka hte mẽmoj punuj pix kukamã ajamaxpêr nê mẽmoj mex nê mẽ no kupyri o apa. Tĩrtũm kapêr mex kumrêx tã ka axtem nê nê mẽ hkurê ho ri apa. ¹¹ ã ate amnhĩ nhĩpêx anhýrja mýrapê koja Tĩrtũm tanhmã ato ka ano hkre nê arĩt kêt o atã apkati xohtô nê kãm ga. Anê.

Hămri nhũm no hkre kurê kumrêx nê tee ri rĩt kaxyw no pikirar pýnh o xa nom mẽmoj pumunh kêt nê. Hămri nê mẽhõ kot hpa hã hpyr nê ôrkwy hwýr ho mör kaxyw ri amnhĩ pu hã mẽ hapêr pênh o xa. ¹² Hămri nhũm hkràmnhwý pahihtija tee ri ja

hã omu nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Hãmri nê Pawre mẽ Panãpe wa kot tanhmã Tĩrtũm kapêr jarênh to hã wa kuma nê hamaxpêr o:

—Hêxta waa nê. Aa ixte ã mêhõ kapêr kot anhyr mar kêt tâ pa jarãhã kuma. Nà ãm hãmri na Jejus jarênhja. Anê.

Pawre mẽ Panãpe ãxiok õ hwyr wa mör ã wa harênh

Atre 15:38

¹³ Tã nhũm Pawre mẽ Panãpe mẽ Juãw Makre wa mẽ krĩ pê Papos rũm kato nê hpãnhã ma pyka hõ hwyr mõi. Pãr kãm ma pyka pê Pãpir wyr mõi nê kamã krĩ pê Perke hwyr pøj. Hãmri nhũm Juãw Makre tanhmã hamaxpêr to nê tee ri axte wa hkôt mör kukamã hamaxpêr hãmri nê wa hkaga nê awjanã nê ma akupym Jerujarê hwyr ahte mõi. ¹⁴ Jakamã nhũm Pawre mẽ Panãpe wa ahte Perke rũm kato nê hamũ pika pê Pisit kãm krĩ pê ãxiok wyr mõi nê hwyr pøj. Nhũm Ijaew nhõ arĩgromnu pê sap kato nhũm wa Tĩrtũm kapêr o mẽ ahkre xà hã ixkre hwyr wa tẽ nê hwyr axà nê nhỹ. ¹⁵ Hãmri nhũm mêhõ mẽ kãm Tĩrtũm kapêr ã kagà htũm kwỳ kamã harênh o xa. Mojes mẽ Tĩrtũm nhỹ hã kapêr o mẽ pa xwỳnh kot kapêr ã kagà hkwy kamã nhũm mẽ kãm kamã harênh o xa. Hãmri nê kamã harênh pa nhũm mẽ ahkre xwỳnhjaja Pawreja wa omu nê wa hwyr mêhõ mẽ nhũm wa hwyr tẽ nê wa kãm:

—E na mẽ ijahkre xwỳnhjaja war ate mẽ inhmã axujarênh prãm nê mãmri mẽ inhmã mẽmoj jarênh kaxyw nhũm mẽ war atã anê. Anê.

¹⁶ Hãmri nhũm wa kuma nhũm Pawre kànhmã xa nê mẽ hpinhkrênh kaxyw mẽ kãm kànhmã ãhkra

nhũm mẽ omu nê hpinhkrênh pa nhũm mẽ kãm awjarê. Amnhĩ kwỳ pê Ijaewjê mẽ mẽ kêp Ijaew kêt xwỳnhjê kãm Tĩrtũm kĩnh xwỳnhjê mã nhũm mẽ kãm awjarê. Nê mẽ kãm kapêr ryy nê. Tĩrtũm kot tanhmã mẽ hkukamã Ijaew nhĩgêr nê pãmjê nhĩpêx to hã mẽ kãm awjarê nê mẽ kãm:

—E kot paj mẽ amã awjarê ka mẽ inhma. ¹⁷ Nà mẽ ixpê Ijaew nhõ Tĩrtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurê nê mẽ ho ohtô rax kumrêx. Hãmri nê mẽ kaxyw hihtỳx jakamã Ejit rũm mẽ kator pa. ¹⁸ Hãmri nê mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htỳx ri tanhmã amnhĩ nhĩpêx to ho pa htã nhũm mẽ kamã ukapĩ ryy ho mẽ hkôt pa. ¹⁹⁻²⁰ Na pre mẽ kãm pyka pê Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpỹnhã axpên kaxyw mẽõ krĩ pê 7ja nhũm mẽ kãm mẽ ho hapêx pa. Hãmri nê hpãnhã mẽ inhĩgêrjê mã pykaja o hpigrành pa. Mẽ ixpê Ijaew nhĩgêrjê mã ho hpigrành pa nhũm mẽ kamã pa hã amgrà xohtô nê. Hã amgrà pê 450. Tã nhũm Tĩrtũm hpãnhã mẽ kãm juisti hkwỳ rê nê mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptà nê mẽ o pa. Kêp Tĩrtũm nhỹ hã kapêr jarênh o pa xwỳnhjê hõ nhũm Tĩrtũm mẽ kaxyw ãm.

²¹ —Tã nhũm mẽ ixpãmjaja axpên ma nê ra te krĩ hkwỳ kamã mẽ urak nê mẽõ pahi kot Sãmuew pãnhã mẽ ho amnhĩptàr o pa hprãm xàj amnhĩ to Tĩrtũm wỳ nê kãm: “Pa Tĩrtũm. Kwa mẽ ixkaxyw pahi hõ xãm kê mẽ ixto amnhĩptàr o pa nà. Ja na mẽ inhmã hprãm tỳx kumrêx.”

—Anhÿr o amnhĩ to hwÿr jakamã nhũm mẽ kuma nẽ mẽ kaxyw Sawti xãm. Kisti hkra na pre. Nẽ mẽ inhĩgêť Pějãmĩ kanrêhã htàmnhwÿ na pre. Hãmri nhũm Tĩrtũm mẽ kaxyw âm nhũm kêp mẽõ pahi nẽ mẽ ho amnhĩptàr o pa hã amgrà pê 40. ²² Tã nhũm Tĩrtũm kator nẽ hpãnhã mẽ kaxyw Tawi xãm. Hãmri nẽ harênh o: “Nà Jese hkra Tawija na hte inhmã hprãm xà hkôt amnhĩ nhĩpêx mex o pa.” Anẽ.

²³ —Tã Jejus kêp Tawi hkanrêhã htàmnhwÿ na pre. Kukamã na pre Tĩrtũm mẽ ixpê Ijaew nhĩgêťjê mã harẽ nẽ harênh o: “Koja nhÿrmã Tawi hkanrêhã htàmnhwÿjê hõ mẽ ate amnhĩ tomnuj pê mẽ apytà.” Anhÿr o hkukamã mẽ kãm harẽ. ²⁴ No nhũm kormã Jejus kot mẽ ixpê Ijaewjê mã amnhĩ to amnhĩrĩť kêt ri nhũm Juãw Paxis kumrêx hkukamã mẽ ixwÿr mỗ nẽ mẽ inhmã Tĩrtũm kapêr jarênh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrâr ã mẽ inhmã karõ ho pa.

²⁵ —Tã mẽ kãm kapêr o pa ryy nẽ ra hatur xàm mênh kaxyw nẽ amnhĩ tã tanhmã mẽ inhmã kapêr to nẽ mẽ inhmã: “Na ka mẽ ixpumu nẽ atÿx Tĩrtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw âm mã xwÿnhťa kukamã na pa pre mỗ. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte âm kukwak ri ixpa nẽ amnhĩ tã hã xpijaàm o ixpa.” Anẽ.

—Na pre ã Juãw Paxisja mẽ inhmã Jejus jarênh anhÿr o pa.

26 —Tã kwa mẽ inhma mẽ apê Apraãw kanrêhã htàmnhwýjaja nẽ mẽ apê Ijaew kêt xwýnh kãm Tĩrtũm kĩnh xwýnhjaja. E mẽ apiitã ixkapêr ma nẽ kãm ajamaxpêr tỳx rãhã ho ri apa. Nà mẽ pahpiitã mẽ pakaxyw na Tĩrtũm kapêrja. Kot mẽ pahte amnhĩ tomnuj pê mẽ papytâr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nẽ hkôt amnhĩ nhĩpêxja na Tĩrtũm kãm hprãm. ²⁷ Nom Jerujarê nhõ xwýnhjê mẽ mẽ àptâr tũmrejaja na prem Jesus kêp Tĩrtũm kot mẽ pakaxyw ãm xwýnh ã harênh mar tã hkôt hamaxpêr kêt nẽ. Na pre htem mẽ inhõ arĩgromnu pê sap ã akuprõ nẽ axpên mã Tĩrtũm kapêr ã kagà htũm kamã ujarênh o hkrĩ. Kagàja kamã Tĩrtũm nhỹ hã mẽ kapêr o mẽ pa xwýnhjaja kot hprĩ hã Jesus jarênh nẽ hã kagà nhũm mẽ kot mar tã hprĩ hã mar tỳx kêt nẽ. Jakamã na prem axtem nẽ mẽ kãm hã amýnê. Tĩrtũm nhỹ hã kapêr jarênh xwýnhjaja kot mẽ hkukamã mẽ harênh xàja kôt nhũm mẽ kot hpĩr kaxyw mẽ kãm hã amýnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnênh nhũm õ pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tĩrtũm kapêr ã kagà htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwýnhjaja pĩ kahpa nê ho wrỳ nẽ ma o tẽ nẽ kên kre kamã haxà. ³⁰ Tã nhũm Tĩrtũm akupỹm ho htĩr ³¹ nhũm xatã hkôt mẽ pa ho pa xwýnhjê hwỳr hapôj. Kormã htyk kêt ri ra Garirej rũm Jerujarê hwỳr hkôt mẽ pa ho mẽ pa xwýnhjê hwỳr xatã mẽ hwỳr hapôx o pa. Jao hã arĩgro xohtô nẽ nhũm prem piitã omu. Tã mẽ

tāmja na htem mẽ ixpê Ijaew mã harênh o pa.

³²⁻³³ —Amnepêm Tĩrtũm na pre mẽ ixpê Ijaew nhĩgêjtê mã tanhmã Kra Jejus jarênh to. Kormã mẽ pahwỳr wrỳk kêt ri tanhmã mẽ kãm harênh to. Jakamã ra kot hkukamã harênh xà hkôt nhũm pre mẽ pahwỳr wrỳnẽ tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awỳr mỗ. Amnepêm finat Tawi na pre Tĩrtũm kapêr kwỳ hã kagà. Tĩrtũm mex ã mẽ grer xà pê Sam 2ja kamã hã kagà. Te Tĩrtũm tãm Jejus mã kapêr pyràk o hã kagà nẽ hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrĩt. Anẽ.

Nhũm pre ã Tĩrtũm Jejus mã kapêr anẽ nhũm Tawi ô ri mẽ pamã hã kagà.

³⁴ —Amnepêm na pre Tĩrtũm tanhmã Kra Jejus kukamã harênh to. Mẽ kot hpĩr nhũm kot akupỹm ho htĩr kukamã hã amnhĩ jarẽ. ĩ hkro pymaj kot mẽ htykjê pê hkaxàr nẽ akupỹm ho htĩr ã nhũm hkukamã hã amnhĩ jarẽ. Te Kraja mã amnhĩ jarênh pyrà nẽ amnhĩ jarênh o:

E kot paj ato mex rax nẽ. Ixte Tawi mã amnhĩ jarênh xà hkôt.

Anhỹr o hkukamã harênh xà hkôt akupỹm ho htĩr nhũm axte htyk kêt ã harẽ.

³⁵ —Nẽ kagàja nhãm hô hõ kot tanhmã Jejus jarênh kute. Te Jejus tãm Tĩrtũm mã kapêr pyrà nẽ harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nẽ. Anẽ.

Tĩrtũm kapẽr ã kagà htũm kot ã Jejus jarẽnh kot anhỹr. ³⁶ Nom ã Tawi jarẽnh anhỹr kêt nẽ. Tawi na pre Tĩrtũm kapẽr kôt amnhĩ nhĩpêx mex o pa hãmri nẽ ty nhũm prem mẽ panhĩgêjtê nhĩhkô hã haxà hãmri nhũm ĩ hkro nẽ hapêx.

³⁷ —Tã no Jejusja Tĩrtũm kot akupỹm ho htĩr jakamã nhũm Tawi pyràn ĩ hkro nẽ hapêx kêt nẽ.

³⁸ —E mẽ inhmar tỳx nẽ ixkwỳjaja. Kra Jejus pix kukwak na hte Tĩrtũm amnhĩ katut kôt mẽ pahte amnhĩ tomnuj rẽ. ³⁹ Jakamã kot kaj mẽ ãm Mojes kapẽr kôt pix mã ri amnhĩ nhĩpêx nhũm Tĩrtũm tee ri ja hã mẽ apumu nẽ amnhĩ katut kôt mẽ ate amnhĩ tomnuj rẽnh kêt nẽ. Jejusja tapxipix na pre htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa. ⁴⁰⁻⁴¹ Amnepêm na pre Tĩrtũm kapẽr nhỹ hã kapẽr xwỳnhjê hõja mẽ kãm Tĩrtũm kapẽr jarẽ nẽ hã kagà. Te Tĩrtũm tãm mẽ kot kapẽr ã hpẽr o pikẽnh xwỳnhjê mã kapẽr pyrà nẽ mẽ kãm: E kot paj aa mẽ ate mẽmoj pumunh kêt õ ho anẽ. Nhũm mẽhõ mẽ amã harẽ ka mẽ harẽnh ma nẽ ãm ama.

Nhũm mẽ kot omunh mex xwỳnhjê hõ kot hprĩ hã mẽ amã harẽnh tã ka mẽ ãm ama nẽ hkôt ajamaxpẽr kêt nẽ.

Hãmri nẽ tee ri tanhmã kãm ajamaxpẽr to ho ri apa. Anẽ.

Ã Tĩrtũm mẽ kãm kapẽr anhỹr jakamã kwa mẽ o kora. Apu mẽ kajaja na pre ã mẽ ajarẽnh anẽ rỳ ko. Anẽ.

⁴² Nhũm pre ã Pawre mẽ kãm ujarẽnh ryy anẽ. Hãmri nẽ Panãpe mẽ wa ixkreta rũm kator kaxyw nhũm mẽ kot mar o hkrĩ xwỳnhjaja tee ri ma wa mõi ã wa omu nẽ ma wa hkôt mra nẽ wa kãm:

—Kwa war axujarēnhja na mex kumrēx. Mē inhmā axte mar prām. Xă koja axte sap kato ka wa akupŷn mē ixwŷr wa tē nē axte mē inhmā awjarē? Anē.

Hāmri nhūm wa mē kām:

—Tôe. Nà kot paj war anē. Anē.

⁴³ Hāmri nē wa ma tē nhūm mē hkwyja ma wa hkôt mra. Ijaew kwýjaja nē Ijaew kêt xwŷnh kām Tĩrtũm kĩnh xwŷnhjaja nhūm mē ma wa hkôt mra. Hāmri nhūm wa pry hā mē kām kapēr o mō. Tĩrtũm kot mē kutā nojarēt rāhā ho pa nhūm mē kot amnhĩ tã omunh nē hkôt amnhĩ nhĩpêx tŷx rāhā ho pa nē hkaga hkêt ā mē kām kapēr o mō.

⁴⁴ Tã nhūm axte sap nhūm krĩ nhō xwŷnh piitā axte Tĩrtũm kapēr mar kaxyw ixkre wŷr akuprō. Ijaewjaja nē Ijaew kêt xwŷnhjaja. ⁴⁵ Hāmri nhūm Ijaew kwýjaja tee ri mē amnhĩ wŷr Ijaew kêt xwŷnhjê pumu nē mē hā Pawre mē Panāpe wa kamā gryk nē. Mē kām Ijaew kêt xwŷnhjaja kot Tĩrtũm kapēr mar prām kêt jakamā mē hā wa kamā gryk nē. Hāmri nē Pawre kapēr ma nē xatā kām kapēr punuj nē kām:

—Tk. Kwa na ka Tĩrtũm kapēr jarēnh o axêx. Ja kot anhŷr kêt. Anē.

⁴⁶ Nom nhūm wa kām mē uma hkêt nē. Wa âm Tĩrtũm Karō nhŷ hā amnhĩ to htŷx nē wa mē kām kapēr. Nē amnhĩ tã tanhmā mē kām kapēr to nē mē kām:

—Nà wa ixpyrà nē mē apê Ijaew jakamā na pa mē akumrēxjê mā Tĩrtũm kot mē pakaxyw Jejus xām ā harē. Tã ka mē ama nē âm ama nē te mē ate hkaga pyrà nē ā wa inhmā akapēr anē nē wa ixte kapēr o ixêx ā wa ijarē. Pēr âm mē ate mē

amã Tĩrtũm mẽ Kra wa kuri mẽ atĩr tũm nẽ mẽ
apa hprãm kêt. Jakamã kot paj wa mẽ apê ixkato
nẽ hpãnã ma Ijaew kêt xwỳnhjê mã Jejus kapêr
jarênh o ri mẽ hkôt ixpa. ⁴⁷ Tĩrtũm kapêr ã kagà
htũm ã kot mẽ ixte amnhĩ nhĩpêx anhỹrja kukamã
mẽ ijarẽ nẽ mẽ ijarênh o:

Mẽ ate Ijaew kêt xwỳnhjê mã ixkapêr jarênh o ri
apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwỳnhjaja ohtô
nẽ mẽ akapêr ma nẽ ixkra hkôt amnhĩ xun-
hwỳ.

Koja mẽ ã amnhĩ nhĩpêx anẽ pa ja hã mẽ omu nẽ
mẽ ho ixkra. Anẽ.

Tĩrtũm kot ã ja kukamã mẽ ijarênh anhỹr jakamã
kot paj wa mẽ apê ixkato nẽ mẽ apãnã ma Ijaew
kêt xwỳnhjê mã Tĩrtũm kapêr jarênh o ri mẽ hkôt
ixpa. Anẽ.

⁴⁸ Hãmri nhũm Ijaew kêt xwỳnhjaja amnhĩ tã
wa kapêrja ma nẽ hkĩnh nẽ Tĩrtũm kapêr mex o
mex ã harẽ. Hãmri nhũm ra Tĩrtũm kot nhỹrmã
amnhĩ ri mẽ htĩr tũm nẽ mẽ pa ho mẽ pa kaxyw
mẽ rênh xwỳnhjaja amnhĩ kaxyw Pahihti Jejus kôt
hamaxpêr nẽ hkôt amnhĩ xunhwỳ.

⁴⁹ Tã nhũm pika pê ãxiok kamã mẽ piitã Tĩrtũm
kapêr jarênh ma. ⁵⁰ Nom nhũm Ijaew xaptàr
tũmrejaja kãm Pawre mẽ Panãpe wa hkĩnh kêt
jakamã na prem krĩ hkôt mẽ kot amnhĩ to rũnh
xwỳnhjê mã wa ho kapêr punuj o pa. Mẽ õ pahi mẽ
mêni kot amnhĩ to rũnh xwỳnhjaja nhũm mẽ kãm
tanhmã wa ho kapêr to nhũm mẽ kuma nẽ mẽ hkôt
hamaxpêr. Mênijaja kãm Tĩrtũm prãm tã amnhĩ
kaxyw Jejus kôt hamaxpêr kêt jakamã tanhmã mẽ
kot Pawre mẽ Panãpe wa ho hêx toja ma nẽ hkôt

hamaxpêr nê wa kamã gryk nê. Jakamã nhũm mẽ ohtô nê tanhmã wa hipêx to nê amnhĩ nê wa hano.
⁵¹ Hãmri nhũm wa mẽ kêp kato nê xa nê mẽ kot Tĩrtũm kapêr kaga hã amnhĩ pumunh kaxyw mẽ noo mã wa hparkà kapa nê nê awjagrô kapĩ nê ma wa tẽ. Hãmri nê ma krĩ pê Ikôn wỳr hpãnhã wa mỗ.
⁵² Hãmri nhũm ãxiok kamã mẽ kot Jejus kôt amnhĩ xunhwỳr xwỳnhjaja hkĩnh nê ri pa. Tĩrtũm Karô kot mẽ hkarô mã gjêx jakamã nhũm mẽ hkĩnh nê ri pa ho pa.

14

Pawre mẽ Panãpe wa kot Ikôn wỳr mỗr ã wa harẽnh

Matêwre 10.34-35

¹ Hãmri nhũm Pawre mẽ Panãpeja wa ãxiok rũm kato nê hpãnhã ma krĩ pê Ikôn wỳr wa mỗ. Hãmri nê hwỳr pøj nê Ijaew nhỗ Tĩrtũm kapêr o mẽ ahkre xà hã ixkre hwỳr wa tẽ nê kamã mẽ kãm Jejus jarẽnh o nhỹ. Mẽ kãm harẽnh kãm hihtỳx jakamã nhũm mẽ hkwỳjaja wa kuma nê amnhĩ kaxyw hkôt hamaxpêr nê hkôt amnhĩ xunhwỳ. Ijaew kwỳjaja nê mẽ kêp Ijaew kêt xwỳnh kwỳjaja nhũm mẽ ohtô nê Jejus kôt amnhĩ xunhwỳ.

² Tã nhũm mẽ hkwỳjaja kãm Jejus jarẽnh mar prãm kêt nê. Hãmri nê kato nê ma Ijaew kêt xwỳnh kwỳjê hwỳr mra nê tanhmã mẽ kãm Pawre mẽ Panãpe wa ho hêx to nê wa ho kapêr punuj nê nhũm mẽ mar xà hkôt wa kamã gryk nê. ³ Nom nhũm wa tokyx kator nê ma mỗr kêt nê arĩ Tĩrtũm Karô nhỹ hã amnhĩ to htỳx nê mẽ kãm Tĩrtũm kapêr jarẽnh o ri mẽ hkôt pa. Nê kêp mẽ kutã nojarêr xwỳnh ã harẽnh o pa. Nê ỹ hã mẽ kãm aa

mê kot mẽmoj pumunh kêt kwỳ ho anhỹr o ri mẽ hkôt pa. Jakamã nhũm mẽ hkwỳjaja ja hã wa omu nẽ wa kapêr ma nẽ hamaxpêr o:

—Kwa ãm hãmri na wa Tĩrtũm kêp mẽ pakamã ukaprĩ xwỳnh ã harẽ. Pêr ỹ hã wa kot ã amnhĩ nhĩpêx anhỹr o pa kênã. Anẽ.

⁴ Hãmri nhũm Ijaew kêt xwỳnh kwỳjaja wa hkôt hamaxpêr nẽ wa hkôt amnhĩ xunhwỳ. No nhũm mẽ hkwỳjaja wa hkôt hamaxpêr kêt nẽ. Ra mẽ kot Ijaew kwỳ kot tanhmã wa ho kapêr punuj toja ma nẽ mẽ hkôt hamaxpêr jakamã nhũm krĩ nhõ xwỳnhjaja axpên kwỳm ri tanhmã wa hkôt hamaxpêr to ho pa. Jao axpên kwỳm ri wa hkôt hamaxpêr o pa.

⁵ Tã nhũm wa hkôt hamaxpêr kêt xwỳnhjaja axpên wỳr akuprõ nẽ wa hã amỹnê. Ijaew kwỳjaja nẽ Ijaew kêt xwỳnh kwỳjaja nẽ mẽ õ pahijaja nhũm mẽ kot kên o wa htao o wa hpĩr kaxyw wa hã amỹnê. ⁶ Hãmri nhũm wa amnhĩ tã ama nẽ mẽ kêp kato nẽ hpãnhã ma pika hõ hwỳr mỗ. Ma Rikõn kãm krĩ hkwỳ hwỳr hpãnhã mỗ. Risti wỳr nẽ Tepe wỳr nẽ pu hã krĩ hkwỳ hwỳr wa mỗ. ⁷ Wa mỗ nẽ pỏj nẽ ma mẽ kãm Jejus kot tanhmã mẽ panê amnhĩ nhĩpêx to hã harẽnh o ri mẽ hkôt pa.

Te grà xwỳnh jarẽnh

Atre 3.1-10

⁸ Nhũm Risti kamã mẽhõ my hte grà nẽ hkrĩ xwỳnhja. Katorxà nhõxà kre rũm hte grà nẽ kator jakamã ri pa hkêt nẽ arĩ hkrĩ xà kamã hkrĩ ho hkrĩ.

⁹ Jakamã nhũm Pawre mẽ kãm ujarẽnh o xa nhũm kuri mar o nhỹ. Hãmri nẽ hamaxpêr o:

—Nà pěr Tĩrtũm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anẽ.

Hãmri nhũm Pawre ã hamaxpěr anhỹr ã omu
¹⁰ nẽ kàx pê kãm kapěr nẽ kãm:

—E kwa kànhmã xa. Anẽ.

Hãmri nhũm kuma nẽ kànhmã ãm kurê kumrẽx nẽ ri mra. Nẽ amnhĩ te kamã hamak o ri mra nẽ hkĩnh tỳx kumrẽx. ¹¹ Hãmri nhũm kuri mẽ kuhê xwỳnhjaja Pawre kot ã hipêx anhỹrja ã omu nẽ htỳx wa kệp kaxkwa kamã mẽhpãm ã wa hkamnhĩx nẽ hkĩnh nẽ axpẽn mã:

—Kwa pěr mẽpahpãm na wa. Mẽpahpãm Jupti mẽ Mẽkurtija na wa panhĩ hã amnhĩ jahkre nẽ mẽ pahwỳr wrỳ. Nà ãm hãmri na wa mẽ pahwỳr wrỳ. Anẽ.

Nom mẽ kapěr pê Rikaôn o axpẽn mã kapěr jakamã nhũm Pawre mẽ Panãpe wa mẽ mar kêt nẽ. Wa kot mẽ kapěr mar kêt jakamã ã mẽ kot wa harênh anhỹrja mar kêt nẽ htỳx wa xa. ¹² Nhũm mẽ ã wa kệp mẽhpãm ã wa harênh anẽ nẽ hkĩnh tỳx nẽ. Panãpeja nhũm prem kệp mẽ hpãm Jupti hã hkamnhĩx no Pawreja nhũm prem kệp mẽhpãm Mẽkurti hã hkamnhĩx. Pawreja Mẽkurti pyrà nẽ kapěr japjê rũnh jakamã nhũm mẽ kệp hã hkamnhĩx. ¹³ Na prem krĩ htã mẽhpãm Juptija mã amnhĩ jarênh xà hã ixkre nhĩpêx nẽ hkarô nhĩpêx. Hãmri nẽ hwỳr akuprô nẽ kãm mex o mex ã harê nẽ amnhĩ to hwỳr o pa. Jakamã nhũm Jupti nhõ patrejaja Pawre mẽ Panãpe wa kệp mẽhpãm ã wa harênh ma hãmri nẽ wa hã hkwyjê mã kãm:

—Kwa pu mẽ wa kãm môx kwỳ hpa nẽ pixôrã hkwy rê. Hãmri nẽ wa kãm wa mex o wa mex ã

wa harẽ nẽ wa kêp mẽpahpãm ã amnhĩ to wa kuwỳ.
Wa kêp mẽpahpãm kênã. Anẽ.

Hãmri nẽ ra ã wa hipêx anhỹr kaxyw ¹⁴ nhũm
wa tee ri mẽ kot amnhĩ nhĩpêx ã mẽ omu nhũm ja
wa kêp omnuj tỳx nẽ. Jakamã nhũm wa amnhĩ pê
hinôkã kaxônh pa nẽ mẽ kutã hprôt nẽ ã mẽ kot
wa hipêx anhỹrja nẽ mẽ kãm kapêr kãm hihtỳx nẽ.
¹⁵ Nẽ mẽ kãm:

—Kwa mẽ ri ã wa inhĩpêx anhỹr kêt nẽ. Wa
ixpê mẽapãm kêt kênã kot ka kêt mẽ ã wa inhĩpêx
anẽ. Nom mẽapãmja na ka htem ãm amnhĩ to hwỳr
kaprỳ nẽ kãm mex o mex ã harênh kaprỳ o ri apa.
Tã mẽ ate ã amnhĩ nhĩpêx anhỹr kaga nẽ hpãnhã
Tĩrtũm kôt amnhĩ xunhwỳr nẽ amnhĩ to pix wỳr
o apa kaxyw na pa pre wa mẽ awỳr mỗ nẽ pøj.
Tĩrtũmja mẽ ate mẽ apãm jarênhta rom htĩr o htĩr.
Na pre mẽmoj piitã ho kato. Kaxkwa ho kato nẽ
pyka ho kato nẽ gô xujanâr o kato. Nẽ kamã ri
mẽmoj piitã ho kator pa.

¹⁶ —Amnepêm mẽ pa xwỳnhjaja na pre htem
amnhĩ krã hkôt pix mã tanhmã ri amnhĩ nhĩpêx
to ho pa nhũm Tĩrtũm ja hã mẽ omu nẽ ãm mẽ
omu nẽ tanhmã mẽ ho hkêt nẽ. ¹⁷ Mẽ pahte amnhĩ
tã omunh kaxyw na hte amarĩ tanhmã mẽ pahto
mex to ho pa. Na hte mẽ pahwỳr na rẽ nhũm mẽ
pahpur go mex nẽ. Nhũm mẽ pamã tanhmã mẽ
pahpur kãm mẽmo hyja to nhũm ra mẽ pamã ô
rũnh nẽ. Pu htem hamỳ nẽ ho paxàpkur mex nẽ
pahkĩnh nẽ ri papa. Tĩrtũm pix kukwak ri na pu
htem ã amnhĩ nhĩpêx anhỹr o ri papa. Anẽ.

¹⁸ Nhũm pre ã Pawre mẽ kot wa kãm môx parja
nẽ mẽ kãm kapêr kãm hihtỳx anẽ. No nhũm mẽ
kuma nẽ ãm kuma nẽ wa kãm mry hkwy hpar

kaxyw wa hã hihtỳx nẽ. Jakamã kritpêm nhỹx
prem wa kãm hkwy pa. Tã tanhmã hamaxpêr to
nẽ hkaga nẽ wa kãm hpar kêt nẽ.

Mẽ kot Pawre pĩr ã àmnênh ã mẽ harênh

Sikũn Ximotre 3.10-11

¹⁹ Tã nhũm Ijaew kwỳjaja mẽ hwỳr mran pøj. Krĩ
pê ãxiok mẽ Ikôn rũm ma mẽ hwỳr mran pøj nẽ mẽ
kãm Pawre ho hêx o mẽ hkôt pa nhũm mẽ kuma nẽ
axtem nẽ Pawre kamã gryk kato. Hãmri nẽ mẽ kot
hpĩr kaxyw kên runh kwỳ jamỳ nẽ ho htak prêprêk
o kuhê. Hãmri nhũm amnhĩ xà htỳx kamã ama nẽ
têm nẽ akryk nõ nhũm mẽ omu nẽ htỳx ho ra htyk
ã hkamnhĩx. Hãmri nẽ hwỳr tẽ nẽ hpa hã kupy nẽ
ma hkjênh o mỗ nẽ krĩ pum kumẽ nẽ ma akupỹm
mra. ²⁰ Hãmri nhũm Jejus kôt mẽ kot axpên to
htôjaja tee ri ã mẽ kot hipêx anhỹr ã omu nẽ hkaprĩ
htỳx nẽ hwỳr hprôt nẽ omu nẽ mỳr o kuhê. Hãmri
nhũm te htyk pyrà nẽ nờr tã Jejus nhỹ hã akupỹm
hihtỳx mex nẽ kànhmã nhỹ hãmri nẽ ma akupỹm
mẽ hkôt krĩm tẽ.

Tã nhũm apkati nhũm Panãpe mẽ wa krĩja rũm
kato nẽ ma wa mỗ. Pãnhã ma krĩ pê Tepe hwỳr wa
mỗ.

*Pawre mẽ Panãpe akupỹm ãxiok wỳr wa mỗr ã wa
harênh*

²¹⁻²² Tã nhũm wa ma Tepe hwỳr mỗ nẽ pøj. Hãmri
nẽ kamã mẽ kãm Jejus tanhmã kot mẽ panê amnhĩ
nhĩpêx to hã harênh o ri mẽ hkôt wa pa nhũm mẽ
wa kuma nẽ ohtô nẽ Jejus kôt amnhĩ xunhwỳ.

Tã nhũm wa kato nẽ awjanã nẽ ma akupỹm pika
pê Pisit wỳr wa mỗ. Nẽ kamã krĩ hkwy hkôt ri ra
mẽ kot Jejus kôt amnhĩ xunhwỳr xwỳnhjê jahkre

ho ri mẽ hkôt pa. Krĩ pê Risti mẽ Ikôn mẽ ãxiokja kôt. Nẽ mẽ ahkre kamã Jejus kôt mẽ ho mẽ hihtỳx o wa pa mẽ mẽ kãm:

—E ra mẽ ate Jejus kôt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu mẽ hã tanhmã mẽ anhĩpêx to. Tã kêr ka mẽ ãm amnhĩ tã mẽ omu mẽ ãm mẽ omu mẽ Jejus kaga hkêt mẽ. Nẽ arĩ hkôt amnhĩ nhĩpêx mex o ri apa rãhã nhỹrmã ma ô krĩ hwỳr api mẽ Tĩrtũm wa kuri amex kumrêx mẽ atĩr tũm mẽ apa ho apa. Anẽ.

²³ Hãmri mẽ ahpỳnhã krĩ piitã hkôt ri mẽ kot pastô nhỹ hã mẽ ahkre kaxyw mẽ hkwỳjê rê mẽ mẽ kaxyw mẽ unhwỳ mẽ mẽ ho Tĩrtũm wỳ. àpkur kêt rãhã mẽ ho kuwỳ mẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkôt apa. Anẽ.

Hãmri mẽ wa mẽ kêp kato mẽ ma hpãnhã nhỹhỹm wa mỗ. ²⁴ Pyka pê Pisit kamã mỗ mẽ hpãnhã nhãm pyka pê Pãpir kôt mỗ. Wa ma mẽ kãm tanhmã Jejus kapêr jarênh to ho mẽ hkôt mỗ. ²⁵ Hãmri mẽ krĩ pê Perke hwỳr wa pôj mẽ kamã mẽ kãm Jejus kot tanhmã amnhĩ nhĩpêx to hã harê hãmri mẽ mẽ kurũm kato mẽ axte mỗ. Pãnhã ma krĩ pê Atari hwỳr wa mỗ. ²⁶ Hãmri mẽ hwỳr pôj mẽ hpãnhã kurũm akupỹm ãxiok wỳr wa mỗ. Pàr rax kãm ma akupỹm mỗ. ãxiokja kamã na pre wa nojarêt nhũm Jejus kôt wa htô mẽ wa htôxjaja wa ho Tĩrtũm wỳ mẽ ma krĩ hkwỳ hwỳr wa kumẽ. Wa kot ma mẽ hkôt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumẽ. Jakamã nhũm

wa ra ja ho anhÿr pa nẽ akupÿm mẽ hwÿr wa mỗ.
²⁷ Hãmri nẽ wa akupÿm pøj nẽ Jesus kôt mẽ kot
 axpẽn to htõ nẽ htõxjê ho akuprõ nẽ mẽ kãm amnhĩ
 jarẽ nẽ mẽ kãm:

—Nà ãm hãmri na pa wa ra ixkàhkĩnh pê akupÿn
 mẽ awÿr pøj. Na pre Tĩrtũm wa ixkutã nojarêt rãhã
 ho wa inhĩhkô hã pa. Jakamã pa pre wa ma ÿ hã
 Ijaew kêt xwÿnhjê mã Jesus jarẽnh o ixpa nhũm mẽ
 hkwyjaja wa inhma nẽ hkôt amnhĩ xunhwÿ.

²⁸ Anhÿr o wa mẽ kãm kapër hãmri nẽ wa tokyx
 ma nhÿhÿm krĩ hõ hwÿr axte mỗr kêt nẽ. War arĩ
 ãxiok kamã Jesus kôt wa htõ nẽ htõxjê hkôt ri pa.

15

*Jerujarẽ kamã Jesus kwÿ hpikuprõnh ã mẽ harẽnh
 Matêwre 23.1-4; Karatas 2.1-5, 5.1-16*

¹ Tã hãmri nhũm Ijaew kwÿjaja ãxiok wÿr Jesus
 kwÿ pê Ijaew kêt xwÿnhjê hwÿr mỗn pøj. Pika pê
 Jutej rũm mẽ hwÿr pøj nẽ tanhmã mẽ ahkre hto
 ho pa. Nom axtem nẽ Tĩrtũm kapër kuhpa hã mẽ
 ahkre nẽ mẽ kãm:

—Kot ka mẽ amã Jesus kôt amnhĩ xunhwÿr prãm
 hãmri nẽ mẽ ixpyrà nẽ finat Mojes kot mẽ pamã
 karõ xà hkôt amnhĩ my kwÿrýt kà kwÿ jakà nẽ rĩ
 kormã hkôt amnhĩ xunhwÿ. Kot kaj mẽ ã amnhĩ
 nhĩpêx anhÿr kêt nẽ nhũm Tĩrtũm tee ri ja hã mẽ
 apumu nẽ amnhĩ katut kôt mẽ ate amnhĩ tomnuj
 rẽnẽ nẽ mẽ ato hkra hkêt nẽ. Anẽ.

² Hãmri nhũm Pawre mẽ Panãpe tee ri mẽ kapër
 anhÿrja ma nhũm wa kệp ja omnuj tỳx nẽ. Hãmri
 nhũm wa mẽ kãm:

—Tk. Kwa kot anhÿr kêt. Na hte Tîrtûm mẽ pahte amnhĩ my kwryt kà jakàr ã mẽ pahpumunh kôt mẽ pahto hkra hkêt nê. Anê.

Hămri nê tee ri mẽ kapêrja nê mẽ kãm kapêr no nhũm mẽ ãm wa kuma nê wa hkôt hamaxpêr kêt nê. Nê arĩ ã mẽ ahkre anhÿr o mẽ hkôt pa. Jakamã nhũm mẽ ja hã axpên mã kapêr rax nê. Hămri nhũm Jejus kwÿ pê Ijaew kêt xwÿnhjaja amnhĩ tã Pawre mẽ Panãpe wa hkukja nê wa kãm:

—Kwa xà kot paj mẽ apyrà nê amnhĩ my kwryt kà jakà nhũm Tîrtûm kãm ja mex nê nà? Kwa wa ma akupÿm Jerujarê hwÿr mō nê ja hã Jejus nhÿ hã mẽ ahkre xwÿnh maati jê mẽ mẽ kot Jejus kwÿ jahkre xwÿnhjê kukja nê hã mẽ ama. Nê ota mẽ ixkwÿjaja koja ma war akôt mra. Kê mẽ tanhmã mẽ amã ja jarênh to ka mẽ ama nê man akupÿn mẽ ixwÿr mra nê tanhmã mẽ inhmã mẽ kapêr jarênh to. Anê.

Hămri nhũm wa mẽ kãm: “Tôe. Nà kot paj mẽ anê.” Anê. ³Hămri nê wa mẽ ma Jerujarê hwÿr mō. Ma pyka pê Wênĩs mẽ Samar hkôt ma hwÿr mō. Hămri nê nhÿri Jejus kôt mẽ htō nê htōxjê pumu nê mẽ kãm Ijaew kêt xwÿnhjê jarê. Mẽ hkwÿjaja mẽ uràk nê Jejus kôt amnhĩ xunhwÿr ã mẽ harênh o mō. Hămri nhũm mẽ harênh ma nê mẽ ÿ hã hkĩnh nê. ⁴Hămri nhũm mẽ ra Jerujarê hwÿr Jejus kôt mẽ htōjê hwÿr mōn pōj. Hămri nê mẽ ahkre xwÿnhjê mẽ Jejus nhÿ hã mẽ ahkre xwÿnh maati jê pumu nhũm mẽ haxwÿja amnhĩ wÿr mẽ omu nê hkĩnh nê. Nê tanhmã mẽ ho mex to nê mẽ kãm kapêr mex nê. Hămri nhũm Pawre mẽ Panãpe wa mẽ kãm amnhĩ jarê. Tîrtûm kot wa ãhkô hã wa hkôt pa nhũm wa ÿ hã kot Ijaew kêt xwÿnhjê mã

kapêr o pa nhũm mẽ hkwỳja kot wa mar nê Jejus kôt amnhĩ xunhwỳr ã nhũm wa mẽ kãm amnhĩ jarê. ⁵ Nhũm Jejus kwỳjê kamã mẽ kêp Parijew nhõ xwỳnh kwỳjaja. Mẽ kêp Parijew tã hkwỳjê rom Jejus kôt amnhĩ xunhwỳ. Jakamã nhũm mẽ tee ri Pawre mẽ Panãpe wa kot Ijaew kêt xwỳnhjê jarênh ma nê kànhmã kuhê nê wa kãm:

—Kwa kê mẽ pahpyrà nê amnhĩ my kwrýt kà jakà nê finat Mojes kot Tĩrtũm nhỹ hã mẽ pamã mẽmoj tã karõ hkôt amnhĩ nhĩpêx o pa. No kot mẽ ã amnhĩ nhĩpêx anhỹr kêt nhũm ja mẽ pahpê omnuij nê. Anê.

⁶ Hãmri nhũm Jejus nhỹ hã mẽ ahkre xwỳnh maati jê mẽ mẽ hkwỳjê jahkre xwỳnhjaja mẽ kuma nê hapôj nê nhỹri akuprõ. Ijaew kêt xwỳnh kot Jejus kôt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỹri akuprõ. ⁷ Hãmri nê mẽ hã axpẽn mar ryy nê. Hãmri nhũm Simãw Pêtre tã kànhmã xa nê mẽ kãm:

—Nà na pre Tĩrtũm mẽ pahkapi nê Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhũm mẽ kot inhmar nê hkôt amnhĩ xunhwỳr kaxyw nhũm mẽ kaxyw ixta. Ra mẽ ate ja hã ixpumunh mex. ⁸⁻⁹ Tĩrtũm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nê mãânênh Ijaew kêt xwỳnhjê nhĩpêx. Mẽ kot mẽ pahpyrà nê amnhĩ kaxyw Jejus kôt hamaxpêr jakamã nhũm Tĩrtũm te ra mẽ panhĩpêx pyrà nê amnhĩ katut kôt mẽ kot amnhĩ tomnuj rê nê mẽ ho hkra. Hãmri nê mẽ hwỳr amnhĩ Karõ rê nhũm mẽ hkarõ mã agjê. Tĩrtũm tãm kot amnhĩm mẽ rênh kênã.

¹⁰ —Tã xà mẽ pahpê Ijaew na pu htem wam Tĩrtũm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtaja na xep prem haxwỳja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtỳx kênã. Tã Ijaew kêt xwỳnhjaja kot hkôt amnhĩ nhĩpêx o pa hã ka mẽ ra mẽ kãm karõ kaxyw. Kwa kot kaj mẽ anê nhũm Tĩrtũm tee ri ja hã mẽ apumu nhũm ja kêp omnuj nê. Kãm ja prãm kêt. ¹¹ Kwa mẽ ã mẽ kãm hã karõ anhỳr kêt nê. Mẽ panhõ pahihti Jejus na hte mẽ pahpiitã mẽ pakutã nojarêr o axpên pyræk. Jakamã Ijaew kêt xwỳnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ pahpumu nê mẽ panhĩpêx o axpên pyrà nê Jejus kukwak ri amnhĩ katut kôt mẽ pahte amnhĩ tomnuj rê nê mẽ pahto hkra. No na hte mẽ pahte amnhĩ my kwỳr kà jakàr rỳ finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

¹² Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩjarê. Tĩrtũm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nê Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa hã mẽ kãm amnhĩjarê nhũm mẽ piitã akryk wa mar o hkrĩ nê wa ujarênhta hkukamã hamaxpêr. ¹³ Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kànhmã xa nê mẽ kãm kànhmã ìhkra pẽ nê mẽ kãm:

¹⁴ —E pa ijaxwỳja mẽ amã ixkapêr ka mẽ inhma.

Nà na pu mẽ ra Simãw Pêtre kapêr ma. Tĩrtũm kot wam amnhĩ kaxyw Ijaew kêt xwỳnh kwỳjê rênh ã mẽ harênhja pu mẽ ra kuma. ¹⁵ ãm hãmri na ã mẽ harênh anê. Amnepê m Tĩrtũm kapêr nhỹ hã mẽ kapêr o mẽ pa xwỳnhja na prem ra ja kukamã Tĩrtũm kot tanhmã mẽ hipêx to hã amnhĩ jarênh kukamã hã kagà. Te ho tãm kot kãm kapêr pyrà nê hã kagà ho:

¹⁶ Amnepê m finat Tawija na pre hte inhmã amnhĩ kwỳjê ho amnhĩptàr o pa.

Mẽ kêp Ijaewja na nhũm pre inhmã mẽ ho amnhĩptàr o pa.

Hãmri nhũm mẽ gaa nê axpên pê anhgrà nê ahpỳnhã ri pa.

Tã ixpê Tĩrtũm kot paj nhỹrmã ma mẽ hwỳr wrỳ nê axte mẽ ho akuprô nê tãm mẽ unhwỳr pa.

¹⁷ Jakamã Ijaewjê kukwak ri koja Ijaew kêt xwỳnh kwỳjja mãănê nê ixkôt amnhĩ xunhwỳ.

Pa te ixte Ijaewjê nhĩpêx pyrà nê mẽ ho ixkra.

¹⁸ ã mẽ hkukamã ijamaxpêr anhỹr xà hkôt.

¹⁹ Anhỹr o mẽ harênh jakamã nhũm ra mẽ hkwỳja mẽ higêt kot amnhĩ nhĩpêx kaga hpa nê hpãnhã Tĩrtũm kôt amnhĩ xunhwỳ. Jakamã kwa kêt pu mẽ axte ja nhĩjuk ri mẽ kãm mẽmoj tã karô hkêt nê. Ja pix na mex. ²⁰ ãm ja pix kot puj mẽ kãm hã karô nê hã kagà nê mẽ hwỳr kumê:

Mẽ kot sãnti hã mẽ ô hkur nê kot puj mẽ hkurê.

Nê mẽ kot mẽmo mry hpar nê hkamrô runh kêt rãhã hkur nê mẽ hkurê.

Nê mẽ kot mẽmo mry kamrô kur nê mãănê nê mẽ hkurê.

Ně mẽmyjaja kot amnhĩ prõ pix tãnopxar ã mẽ kãm karõ.

Ně mẽnijaja haxwỳja kot amnhĩ mjên pix tãnopxar ã mẽ kãm karõ.

— ãm ja pix kot puj mẽ kãm hã kagà nẽ mẽ kãm hã karõ. ²¹ Mẽ panhĩgêjtjê mã finat Mojes kot ã mẽ kãm karõ anhỳrja na htem arĩ krĩ piitã hkôt ã mẽ kãm hã karõ anẽ. Mẽ panhõ arĩgromnu pẽ sap ã na htem arĩ ri Tĩrtũm kapẽr o mẽ ahkre xà hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwỳnhjê hwỳr kagà mẽnh ã mẽ harẽnh

Karatas 5.1

²² Hãmri nhũm mẽ Xiakre kapẽr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nẽ mẽ kot hkwỳjê jahkre xwỳnhjaja nẽ Kris kwỳjê piitã Xiakre kapẽr ma nhũm ja mẽ kãm mex nẽ. Jakamã nhũm mẽ axpẽn mã:

— Tõe. Nà ãm hãmri na Xiakre ã Ijaew kêt xwỳnhjê jarẽnh anẽ. Nà ja mex. Pu mẽ ã ãxiok nhõ xwỳnhjê mã ja hã kagà anẽ hãmri nẽ mẽ hwỳr kumẽ. Kojja Pawre mẽ Panãpeja wa kupy nẽ ma akupỹm mẽ hwỳr o mỗ nẽ mẽ kãm kugõ. E mẽ pahtõ kot puj mẽ ma wa hkôt mẽ hwỳr mỗ? Anẽ.

Hãmri nhũm mẽ kuma nẽ Siras mẽ Jut Pasapas wa kuta. Jejus kôt mẽ kot axpẽn to htõ nẽ htõxjaja kot axpẽn mã hamẽ wa kot amnhĩ to mex xwỳnh ã wa harẽnh jakamã nhũm mẽ ma Pawre mẽ Panãpe wa hkôt mỗr kaxyw wa kuta. ²³ Hãmri nẽ ãxiok kamã Kris kwỳ pẽ Ijaew kêt xwỳnhjê kaxyw kagà nhĩpêx nẽ kamã ã mẽ kãm kapẽr anẽ nẽ mẽ kãm:

Pa? ãxiok mẽ Sir mẽ Siris kamã Ijaew kêt xwỳnhjaja? Xà mẽ amex? Mẽ ixpê Jejus kôt mẽ

atōjaja na pa mẽ awỳr kagàja nhĩpêx nẽ mẽ awỳr kumẽ. Mẽ ixpê Jejus kôt mẽ kot amnhĩ xunhwỳr xwỳnhjê jahkre ho ixpa xwỳnhjaja nẽ Jejus nhỹ hã mẽ ahkre ho mẽ pa xwỳnh maatijaja pa mẽ awỳr kumẽ.

²⁴ Na xep ra ja rũm mẽ ixkwỳjaja ma mẽ awỳr mō nẽ mẽmoj tã tanhmã mẽ amã karō hto. Mẽ ate amnhĩ my kwỳr kà jakàr nẽ amnepêm mẽ inhĩgêt Mojes kapêr kôt amnhĩ nhĩpêx o apa hã mẽ amã karō. Ka xep mẽ tee ri ja kukamã ajamaxpêr. No mẽ pajaja na pa prem mẽ awỳr mẽ rēnh kêt nẽ. Ām amnhĩ krā hkôt na prem mẽ awỳr mō nẽ ã mẽ amã ja hã karō anẽ.

²⁵ Tã pa tee ri mẽ harēnh ma nhũm ja mẽ ixpê omnuj tỳx nẽ. Jakamã na pa mẽ jar akuprō nẽ mẽ akaxyw mẽ inhĩōja wa kuta. Wa kot ma Panāpe mẽ Pawre wa hkôt mẽ awỳr wa mōr nẽ mẽ amã mẽ ixkapêr jarēnh kaxyw. Panāpe mẽ Pawreja mẽ inhmã wa hapê htỳx. ²⁶ Na hte mẽ amã Pahihti Jejus Kris kapêr jarēnh o pa kaxyw wa amnhĩ grōnh kôt mẽ amã harēnh o pa.

²⁷ Tã pa mẽ akupỹm mẽ awỳr wa kumẽ nẽ wa hkôt mẽ pahtō Jut mẽ Siras wa kumẽ. Mẽ ixte mẽ amã kagà kamã mẽ ixkapêrja nhũm wa kot hprĩ hã mẽ amã harēnh kaxyw pa mẽ wa hkôt mẽ awỳr wa kumẽ.

²⁸⁻²⁹ E ja pix nẽ kot paj mẽ akurê:

Kêr ka mẽ sãnti hã mẽ õ hkur kêt nẽ.

Nẽ mẽmo mry kamrô kur kêt nẽ. Jao mẽmo mry pa nẽ hkamrô runh kêt rãhã hkur kêt nẽ. Kamrô runh pa nẽ rĩ kormã tanhmã ho nẽ aku.

Nẽ kêr ka mẽ amyjaja amnhĩ prō pix tãnopxar o apa.

Ně mẽ anijaja ajaxwỳja amnhĩ mjên pix tănopxar o apa.

E âm ja pix kot paj mẽ amã hã karõ. Tĩrtũm Karõ kãm ja mex. Ně mẽ inhmã mãnên ja mex. Kot kaj mẽ ã amnhĩ nhĩpêx anhỹr o ri apa nẽ amex nẽ apa.

Tã âm ja pix. Mẽ ixpê Jejus kwỳjê jahkre xwỳnhjê mẽ Jejus nhỹ hã mẽ ahkre xwỳnh maati jê mẽ pa mẽ mẽ awỳr kagàja nhĩpêx nẽ kumẽ. E kêr ka mẽ amex nẽ akĩnh nẽ ri axpên kôt apa. Âm ja pix na hapêx. Anẽ.

Nhũm prem ã kagà kamã mẽ kãm mẽmoj tã karõ anẽ. ³⁰ Hãmri nẽ Jut wa mẽ kãm kugõ nẽ ma ãxiok wỳr wa mẽ kumẽ nhũm wa mẽ ma akupỹm hwỳr o mỗ. Jut nẽ Siras nẽ Pawre nẽ Panãpeja nhũm wa mẽ ma akupỹm mẽ hwỳr o mẽ mỗ. Mỗõ hãmri nẽ mẽ hwỳr pôj. Hãmri nẽ Jejus kwỳjê ho akuprõ nẽ mẽ kãm kagàja gõ ³¹ nhũm mẽ kupy nẽ kamã harẽ nẽ kuma. Kamã mẽ kot mẽ kãm mẽmoj tã karõ kamã harẽ nẽ kuma nẽ ỹ hã hkĩnh nẽ akupỹm tãm hamaxpêr.

³² Jut mẽ Siras wa kêp Tĩrtũm nhỹ hã kapêr o pa xwỳnh na pre wa. Jakamã na prem mẽ hwỳr mỗn pôj hãmri mẽ kãm tanhmã ujarênh to ho pa. Mẽ kot Jejus kôt pix mã hamaxpêr o pa kaxyw mẽ kãm ujarênh o pa nẽ mẽ kãm:

—E kêr ka mẽ mãmri Jejus kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

³³ Hãmri nẽ mẽ hkôt ri pa hã apkati xohtô nẽ. Hãmri nẽ wa akupỹm Jerujarẽ hwỳr nojarêr nẽ mẽ kãm amnhĩ jarẽ nhũm mẽ wa kuma nẽ wa kãm:

—Tôe. Nà wa māmri ma akupỹm mō. Koja Tĩrtũm war apumunh mex nẽ ka wa ma akupỹm amex nẽ akà hkĩnh pê akwỳjê hwỳr akato. Anẽ.

³⁴ Hāmri nhũm wa nojarêť tã nhũm Siras tanhmã hamaxpěr to nẽ hitôt nẽ mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽn h xwỳnhjê hwỳr mō.

³⁵ Hāmri nhũm Pawre mẽ Panãpe wa Siras pyrà nẽ kormã ãxiok kamã pa. Hāmri nẽ Jejus kôt mẽ htō hkwỳjê mẽ pimrààť mẽ ahkre ho pa. Tĩrtũm kapěr o mẽ hkôt mẽ ahkre ho pa.

Pawre mẽ Panãpe wa kot axpẽn pê pikjêť ã wa harẽn h

Atre 13.13; Korosẽ 4.10

³⁶ Hāmri nhũm Pawre mẽ Panãpe war arĩ mẽ hkôt ri pa hã apkati xohtô nẽ. Tã nhũm Pawre hamaxpěr nẽ Panãpe mã:

—Kwa ma pu ma akupỹm ra pahte krĩ hkwỳ hkôt mẽ kãm Jejus jarẽn h o papa xwỳnhjê hkôt akupỹm mō. Pu ma mẽ hwỳr mō nẽ Jejus kôt pahtō nẽ pahtōxjê kot tanhmã ri amnhĩ nhĩpêx to hã mẽ omu. Anẽ.

³⁷ Hāmri nhũm kuma nẽ kãm:

—Tôe. Nà pu ma mō. Nom kêr pu ma amnhĩ kôt Juãw Makre ho mō kê axte pahtō ajuta ho pahkôt mō. Anẽ.

³⁸ Hāmri nhũm Pawre tee ri kuma nhũm ja kêp omnuj nẽ nhũm kãm:

—Tk. Kwa na pre pahkôt pa htã Pãpir kamã tanhmã hamaxpěr to nẽ pahkaga nẽ ma akupỹm Jerujarẽ hwỳr mō. Jakamã kwarĩ koja axte pahkôt mōr kêt nẽ. Anẽ.

³⁹ Hāmri nhũm Panāpe tee ri hã hihtỳx no nhũm kêp hkaga kumrẽx. Jakamã nhũm wa ja hã axpẽn pê axkjê nẽ ma ahpỳnhã mỗ. Nhũm Panāpe amnhĩ kôt Juāw Makre ho mỗ nẽ wa ma pàr kām gô hipôk pê Sipre hwỳr wa mỗ. ⁴⁰ Nhũm Pawre axtem amnhĩ kôt Siras wỳ nẽ ma wa mỗ. Hāmri nẽ wa nojarêr nhũm Jejus kôt wa htôjaja wa ho Tĩrtũm wỳ nẽ kām:

—Pa Tĩrtũm. E koja Pawre mẽ Siras wa ma krĩ hkwỹ hkôt mẽ kām akapêr jarênh o ri wa pa. Jakamã kêr ka wa htânopxar o ri wa hkôt apa. Anẽ.

Hāmri nhũm wa kato nẽ ma krĩ hkôt ri Jejus kapêr o mẽ ahkre ho wa pa. ⁴¹ Wa ma pyka pê Sir mẽ Siris kôt Jejus kôt mẽ htô nẽ mẽ htôxjê pumunh nẽ Jejus kôt mẽ ho mẽ hihtỳx o wa pa kaxyw.

16

Ximotre kot Pawre mẽ Siras wa hkôt ri pa hã harênh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupỹm krĩ pê Tepe hwỳr wa mỗ nẽ hwỳr pôj nẽ hpãnhã kurũm ma Risti hwỳr mỗ. Hāmri nẽ wa hwỳr pôj nẽ kamã Ximotre pumu. Ximotre na pre ra katorxà pyrà nẽ Jejus kôt amnhĩ xãm nhũm mẽ kot Jejus kôt axpẽn to htô xwỳnhjaja kām hapê nẽ. Nẽ kot Jejus kapêr kôt amnhĩ nhĩpêx mex o pa hã axpẽn mã harẽ.

Krĩ pê Risti mẽ Ikõn kamã nhũm prem ã axpẽn mã Ximotre jarênh anhỹr o pa. Jakamã nhũm Pawre mẽ Siras wa mỗ nẽ mẽ hwỳr pôj nẽ Ximotre kot amnhĩ nhĩpêx ã omu nhũm Pawre kām war amnhĩ kôt o mỗr prãm nẽ. Nom Ximotre hkamrô

pihkàr na pre. Katorxà kêp Ijaew nhũm hipêêxà kêp Gres jakamã nhũm ã Ximotre hkamrô pihkàr anê. Nhũm Ijaew kot katorxà hkôt kêp Ijaew ã omunh jakamã nhũm Pawre hamaxpêr nê mẽ kaxyw kêp my kwrýt kà krãhta nê arĩ kormã mẽ hwýr amnhĩ kôt o mỗ. ⁴ Hãmri nê mẽ ma krĩ hkwỹ hkôt mỗ. Mỗ nê Ijaew kêt xwýnhjaja ra kot amnhĩ kaxyw Jejus kôt hamaxpêr xwýnhjê jahkre ho mẽ hkôt pa. Ra Jerujarê kãm mẽ kot Jejus kwýjê jahkre ho pa xwýnhjê mẽ Jejus nhỹ hã mẽ ahkre xwýnh maatijsaja mẽ kot mẽ kãm mẽmoj tã karõta nhũm mẽ ma mẽ kãm harênh o ri mẽ hkôt pa. ⁵ Hãmri nhũm mẽ kuma nê ra Jejus kôt amnhĩ nhĩpêx mex o mỗ. Hãmri nhũm apkati mẽ krĩ nhõ xwýnh kwýjaja mẽ uràk nê Jejus kôt amnhĩ xunhwý. Jakamã nhũm mẽ ra ohtô rax o mỗ.

Pawre tanhmã hpimtir to hã harênh

Rômãn 15.18-21

⁶ Tã nhũm Pawre mẽ Siras mẽ Ximotre mẽ ma pyka pê As wýr nojarê. Mẽ kot mẽ kãm tanhmã Jejus jarênh to ho pa kaxyw mẽ hwýr nojarê tã nhũm Tĩrtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwỹ pê Prik mẽ Karatas wa hkôt pa. Ixpê Rukre na pa pre mẽ hã ajêr nê ma mẽ hkôt ixpa ho ixpa. ⁷ Hãmri nê mẽ pyka pê Mĩs ã mỗ nê hpãnhã ma Pitĩn wýr inhmõr mã tã no nhũm Tĩrtũm Karõ axte kê mẽ nê mẽ ixkurê. ⁸ Jakamã pa mẽ arĩ Mĩs jakàr ã mỗ nê gô xujanãr mý ri krĩ pê Tôx wýr pøj.

⁹ Tã nhũm kamàt pa mẽ ixpiitã gõr nê inhĩkwý nhũm Pawre tanhmã hpimtir to. Nhũm xep pika pê Masetõn nhõ xwýnhja mẽ amnhĩ wýr hwýr kãm

hihtỳx o xa nhũm hprĩ hã omu nẽ kapẽr ma. Nhũm xep pre kãm:

—Pa Pawre? Kwa amnẽ Masetõn wỳr mẽ ixwỳr mỗ nẽ tanhmã mẽ ijahkre hto. Anẽ.

¹⁰ Hãmri nhũm Pawre hkrākato nẽ mẽ inhmã hpimtir jarẽ. Pa mẽ kuma nẽ axpẽn mã:

—Tô kwa tokyx pu mẽ hwỳr. Tĩrtũm kot mẽ hwỳr mẽ parẽnh kênã. E pu mẽ ma mẽ hwỳr mỗ nẽ mẽ kãm Jejus jarẽnh o mẽ ahkre. Anẽ.

Hãmri nẽ amnhĩ to akuprõ nẽ mẽ hwỳr inhno-jarêt kurê kumrẽx.

Ritre kot Jejus kôt amnhĩ xãm ã harẽnh

Piripos 1.1

¹¹ Hãmri pa mẽ ma Masetõn wỳr mỗ. Tôx rũm ma pàr kãm hwỳr mỗ. Hãmri nẽ gô nhĩpôk pê Samõtas wỳr pôj nhũm mẽ hã pàr nhô. Hãmri nhũm apkati pa mẽ axte mỗ nẽ Masetõn kamã krĩ pê Nẽap wỳr pôj. ¹² Hãmri nẽ pàr rũm ijapôj nẽ hpãnhã kurũm hamũ krĩ pê Piripos wỳr ixpar o mỗ. Piriposja Masetõn kamã krĩ maati na. Rõm nhô xwỳnhjaja na prem ho kato. Jakamã pa prem ma hwỳr mỗ nẽ pôj nẽ tokyx axte kurũm nhỹhỹm inhmõr kêt nẽ.

¹³ Hãmri nhũm sap kato pa mẽ axpẽn mã:

—Kwa pyhti mỳri măn hte Ijaewjaja axpẽn wỳr akuprõ nẽ Tĩrtũm mã amnhĩ jarẽnh o hkrĩ nà. E kwa pu mẽ hwỳr nẽ gô mỳri mẽ hapêr o ri papa. Anẽ.

Hãmri nẽ ma hwỳr mra nẽ mẽ hapêr o ri ixpa nhũm ãm mēni pixjaja axpẽn wỳr akuprõ. Pa mẽ omu nẽ mẽ kuri ixkrĩ nẽ mẽ kãm Jejus kapẽr jarẽnh o mẽ ahkre o ixkrĩ. ¹⁴ Nhũm mẽ kot mẽ inhmar o hkrĩ xwỳnhjê hõ pê Ritreja. Krĩ pê Xijaxir nhô xwỳnh na pre. Nẽ kệp kupẽxê mex o wẽnê xwỳnh.

Na pre hte kãm Tĩrtũm prãm o pa. Jakamã nhũm Pawre kot mẽ ahkre ho ỹrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nê. ¹⁵ Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Õrkwỹ kamã hkwỹjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tĩrtũm kra hã mẽ omunh kaxyw. Hãmri nhũm Ritre amnhĩ kôt mẽ ixwỳ nê mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mỗ nê hpãnã inhõrkwỹ kamã pøj nê apa. Anê.

Pa mẽ kuma nê ma hkôt mỗ.

*Mẽ kot Pawre mẽ Siras wa haxàr ã mẽ harênh
Makre 1.23-26, 1.34*

¹⁶ Tã nhũm arĩgro hõ hã pa mẽ Tĩrtũm mã amnhĩ jarênh kaxyw axte pyhti mỳri mẽ pikuprõnh xàja wỳr mỗ. Hãmri nê pry kamã mẽ kãm àpênh xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarênh to ho pa. Jakamã nhũm ò pa-trãwjaja kukwak ri ujamỳnh rũnh pê hkĩnh nê pa. ¹⁷ Jakamã pa mẽ mỗ nhũm nija mẽ ixpumu nê mẽ ixtã ajêt nê ma mẽ ixkôt mỗ. Hãmri nê mẽ kãm mẽ ijarênh o mẽ ixkôt mỗ nê mẽ kãm:

—Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pê tanhmã mẽ apytàr to hã mẽ amã ujarênh kaxyw na mẽ awỳr mra. Anê.

¹⁸ Nê ãm xatã mẽ kãm mẽ ijarẽnh o mẽ ixkôt paja o ra hã apkati xohtô nê. Tã nhũm Pawre ra kãm mar kaga nê nê mẽkarõmnuti mã kapẽr nê kãm:

—Tk. Kwa kêp akato nê ma tẽ. Pa Jejus Kris nhỹ hã amã ixkapẽr ka inhma nê kêp akato nê ma atẽm kurê kumrẽx. Anẽ.

Hãmri nhũm kuma nê kêp kato nhũm akupỹm tãm hkrã. ¹⁹ Jakamã nhũm õ patrãwjaja tee ri ja hã omu nê gryk tỳx nê axpẽn mã:

—Kwa ra mẽkarõmnutijaja kêp kator jakamã koja axte mẽmoj kukamã tanhmã ujarẽnh to hkêt nê. Pu mẽ kukwak ri axte paxujamỹnh kêt nê. Anẽ.

Hãmri nê Pawre mẽ Siras wa kamã gryk tỳx nê. Hãmri nê wa unê nê ma mẽ kot axpẽn mar xà hã ixkre hwỳr wa hkjênh o tẽ ²⁰ nê mẽ kot mẽ ho amnhĩptàr xwỹnhjê mã tanhmã wa ho hêx to nê mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hêx pix o pa nhũm mẽ tee ri wa kapẽr ma nê wa kamã gryk tỳx nê. ²¹ Mẽ ixte amnhĩ nhĩpêx te kot axpẽn pyræk kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhỹnh mẽ pahwỳr mỗ. Nom mẽ pahpê Rõm nhõ xwỹnhjaja axtem mẽ pahte amnhĩ nhĩpêx kênã kot pu kêt wa kuma nê wa kapẽr kôt amnhĩ nhĩpêx. Anẽ.

²² Hãmri nhũm mẽ kuma nê piitã wa kamã gryk tỳx nê. Hãmri nhũm mẽ ho amnhĩptàr xwỹnhjaja wa kêp wa ê kaxôn o hkapa nê wa hã mẽ õ pôristi mã amỹnê nê mẽ kãm:

—E mẽ ma wa o tẽ nê mẽ htak xà ho wa htak. Anẽ.

²³ Hāmri nhũm mẽ kuma nẽ ma wa o tẽ nẽ wa htak rax nẽ. Hāmri nẽ wa haxà nẽ mẽ hagjênh xà jamār xwỳnh mã kãm:

—E kêr ka ja wa omunh mex nẽ kê wa kator kêt nẽ. Anẽ.

²⁴ Hāmri nhũm mẽ kuma nẽ wa o tẽ nẽ ixkre jatur xà kamã wa haxà nẽ wa kator pymaj hamẽ wa htem pĩ jaxà nẽ ho htỳx nhũm wa arĩ hte tỳx nẽ nhỹ.

²⁵ Tã nhũm kamàt. Nẽ kôt ã kamàt nhũm wa Tĩrtũm mã amnhĩ jarẽ nẽ mex o mex ã wa grer o wa nhỹ nhũm wa uràk nẽ mẽ hagjênh xwỳnhjaja wa mar o hkrĩ. ²⁶ Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpêr tỳx nẽ amnhĩ kahê xà rênh pa. Nhũm mẽ hagjênh xwỳnhjê kaxpre xà piitã mẽ nê pirênh pa. ²⁷ Hāmri nhũm mẽ hamār o kuhê xwỳnhja pika tertet kamã ama nẽ hkrākato. Hāmri nẽ mẽ hã ixkre jakwakre kahê xà rênh parja pumu nẽ mẽ hagjênh xwỳnhjaja hapôx par ã mẽ hkamnhĩx nẽ tee ri amnhĩ kukamã hamaxpêr. Hāmri nẽ pahi kot mẽ hã hpĩr pymaj ò wapo kapa nẽ ra tãm kot ho amnhĩ pĩr kaxyw. ²⁸ Hāmri nhũm Pawre tee ri ja hã omu nẽ kàx pẽ kãm amỹra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtō ixkator nẽ ixprôt kêt nẽ. Anẽ.

²⁹ Hāmri nhũm kuma nẽ kanê hã ahwỳ nẽ kuwy nẽ mẽ hwỳr axà nẽ mẽ piitã mẽ omu. Hāmri nẽ Pawre mẽ Sirasja wa omu nẽ wa hwỳr kãm ma ho htertet o tẽ. Hāmri nẽ wa hã hpijaàm kaxyw wa kutã tẽm nẽ hkõnkrã ho nhỹ. ³⁰ Hāmri nẽ kànhmã

xa nê wa ho kato nê ixkre kapem wa o xa nê wa kãm:

—Kwa tanhmã kot pa amnhĩ nhĩpêx to kê Tĩrtũm war apyrà nê ixte amnhĩ tomnuij pê ixpytà? Anê.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpêr nê hkôt amnhĩ xãm nhũm Tĩrtũm ja hã apumu nê amnhĩ katut kôt ate amnhĩ tomnuij piitã rênh pa. Nhũm anhõrkwỹ kamã akwỹjaja apyrà nê Jejus kôt amnhĩ xunhwỳ nhũm ã mẽ hipêx anê. Anê.

³² Hãmri nê wa ma hkôt õrkwỹ hwỳr tẽ nê hprĩ hã mẽ kãm Tĩrtũm kapêr jarê nhũm mẽ wa mar o hkrĩ. ³³ Hãmri nhũm mẽ hagiênh xà jamãr xwỳnhja wa kãm wa htaak xà kuhõ. Kormã kamãt kô hkwỹ kamã wa kãm kuhõ nê hkane. Hãmri nhũm wa mẽ kot Jejus kôt amnhĩ xunhwỳr par ã mẽ omu nê mẽ hkrã kumrã. Mẽ hamãr xwỳnh mẽ hkwỹjẽ mẽ hkrã kumrãr pa. ³⁴ Hãmri nhũm mẽ kot amnhĩ kaxyw Tĩrtũm kôt hamaxpêr jakamã piitã hkĩnh nê. Hãmri nhũm mẽ hamãr xwỳnhja õrkwỹ hwỳr Pawre mẽ Siras wa o tẽ nê wa kãm õ nhũm wa apku nhũm ma akupỹm mẽ hagiênh xà hwỳr wa o tẽ nê akupỹm wa haxà.

*Mẽ kot Pawre mẽ Siras wa kãm urer ã mẽ harênh
Atre 22.25-29*

³⁵ Hãmri nhũm apkati nhũm krĩ pytàr xwỳnhjaja mẽ õ pòristi mã anê nhũm mẽ hagiênh jamãr xwỳnh wỳr tẽ nê kãm:

—E na mẽ papytàr xwỳnhjaja ate Pawre mẽ Siras wa kãm anhũrer nhũm wa mãmri ma akupỹm htẽm kaxyw hã karõ. Anê.

³⁶ Hāmri nhũm mẽ kuma nẽ wa hwỳr axà nẽ wa kām:

—E na krĩ pytār xwỳnhjaja ixte war akator kaxyw war atā inhmā karō. Jakamā e wa māmri axàmnhĩx ma mō. Anẽ.

³⁷ Hāmri nhũm Pawre kām:

—Nà wa ixte tanhmā amnhĩ tomnuj to hkêt tã nhũm mẽ kot wa ixpynênh nẽ wa ixtak. Wa ijaxwỳja wa ixpê Rôm nhõ xwỳnh tã nhũm prem axtem nẽ mẽ piitã mẽ noo mã wa ixtak nẽ wa ijaxà. Mẽ kot amarĩ Rôm nhõ xwỳnh tak nẽ mẽ hagjênh kêt tã nhũm mẽ ã mẽ noo mã ã wa inhĩpêx anẽ. Kormã wa ixte tanhmā amnhĩ tã ixàprār to hkêt tã nhũm mẽ ã wa inhĩpêx anẽ. Jakamā kwarĩ kot kaj mẽ no hkàx ã wa ixkator kêt nẽ. Kê mẽ kot wa ijaxār xwỳnhjaja tãm man mra nẽ wa ixkator pa war arĩ ma mō. Anẽ.

³⁸ Hāmri nhũm pōristija kuma nẽ ma akupỹm mẽ hwỳr mra nẽ mẽ kām wa kapêr jarẽ. Hāmri nhũm mẽ tee ri mẽ uràn wa kêp Rôm nhõ xwỳnh ã wa harênh ma nẽ kām ma htỳx nẽ. ³⁹ Hāmri nẽ ma wa hwỳr tẽ nẽ wa hwỳr axà nẽ wa kām:

—Pa? E māmri war akato nẽ axàmnhĩx ma mō. Na pa prem war anhĩpêx kati rax nẽ. Tã kêr ka wa axte ja mã ajamaxpêr hkêt nẽ. Kê ja ãm jar mẽ pakamā hapêx. Anẽ.

Hāmri nẽ wa kator nẽ wa kām:

—E kwa wa mẽ inhõ krĩ pê akato nẽ ma nhỹhỹm mō. Anẽ.

⁴⁰ Hāmri nhũm wa kuma nẽ kato nẽ ma akupỹm Ritre nhõrkwỹ hwỳr wa tẽ. Hāmri nẽ Jejus kôt wa mẽ htôjê pumu nẽ wa mẽ kām amnhĩ jarẽ nẽ mẽ kām:

—E kot paj hāmri wa mǎ mǎ. Nom kêr ka mē arī Jejus Kris kôt amnhĩ nhĩpêx mex rǎhǎ ho ri apa nē aa hkaga hkêt nē. Anē.

Hāmri nē wa mē kurūm kato nē ma krī hō hwỳr wa mǎ.

17

*Tesarōn kamǎ mē kot wa kamǎ gryk ǎ mē harēnh
Wam Tesarōn 1.1, 2.13-14*

¹⁻² Tǎ nhūm Pawre mē Sirasja wa ma krī hkwy hkôt pa. Piripos rūm ma Apiporip mē Apôrōn kôt wa mǎ hāmri nē ra Tesarōn wỳr wa pōj. Na pre hte Pawre nhỹri pōj nē Ijaew nhō Tĩrtūm kapēr o mē ahkre xǎ hǎ ixkre hwỳr agjê nē kamǎ mē kām Jejus kapēr jarēnh o kuhê. Jakamǎ nhūm wa mǎ nē Tesarōn wỳr pōj nē ixkre hwỳr mē hwỳr tē nē mē kām ujarēnh o xa. Nē mē kām ujarēnh o hǎ arīgromnu pê sap o axkrunēpxi. ³ Nē hprī hǎ mē kām tanhmǎ Tĩrtūm kapēr jarēnh to nē mē kām:

—Nǎ Tĩrtūm kapēr ǎ kagà htūm kot mē pakaxyw ǎm xwỳnh jarēnh. Amnhĩ xǎ htỳx kamǎ hamak kām htyk hāmri nē akupỹm htĩr ǎ nhūm kot hkukamǎ harēnh. Tǎ na pre Jejusja ǎ amnhĩ nhĩpêx anē. Tām kêp Krisja. Tĩrtūm kot mē pakaxyw ǎm xwỳnhhta na. Anē.

⁴ Hāmri nhūm mē hkwyja kuma nē wa hkôt hamaxpēr nē wa uràk nē Jejus kôt amnhĩ xunhwỳ. Ijaew kwỳjê nē Ijaew kêt xwỳnh kwỳjaja nē mēni kot amnhĩ to rūnh xwỳnh kwỳjaja nhūm mē ohtô nē amnhĩ kaxyw Jejus kôt hamaxpēr nē hkôt amnhĩ xunhwỳ. ⁵ Tǎ nhūm Ijaew kwỳjaja tee ri hkwy kot wa hkôt amnhĩ xunhwỳr ǎ mē omu nē mē hǎ Pawre mē Siras wa kamǎ gryk tỳx nē. Hāmri nē ma

mra nê wa kaxyw mẽ kot amnhĩ tomnuj tỳx xwỳnh kwỳjê ho akuprõ nê mẽ kãm wa hã amỳnê. Jakamã nhũm mẽ ma kapêr punuj pê wa hapêr o ri mra nhũm mẽ piitã mẽ omu nê mẽ kuma. Hãmri nhũm mẽ wa hapêr o ra Jasãw nhõrkwỹ hwỳr mra. Nê mẽ kot Pawre mẽ Siras pynênh nê ma mẽ utàr xwỳnhjê hwỳr wa o htẽm kaxyw mẽ kêp kahê xà mẽ nê mẽ hwỳr agjê. ⁶ Hãmri nê tee ri õrkwỹ kamã wa hapêr nhũm wa kamã amrakati. Jakamã nhũm mẽ Jasãw mẽ kot Jejus kôt axpên to htõ xwỳnh kwỳjê pynê nê ma mẽ kot mẽ ho amnhĩptàr xwỳnhjê hwỳr mẽ o mra. Hãmri nê mẽ kãm tanhmã Pawre mẽ Siras wa ho hêx to. Âm kapêr punuj kãm kàx pê mẽ kãm wa harẽ nê mẽ kãm:

—Kwa na hte Pawre mẽ Siras wa pyka piitã hkôt mẽ kãm ri mêmoj to hêx o pa. Tã wa ra mẽ panhõ krĩ hwỳr pøj nê jar mẽ pamã ri tanhmã hêx to ho ri mẽ pahkôt pa. ⁷ Jasãw nhõrkwỹ kamã na pre wa pøj nhũm amnhĩ wỳr wa kuwỳ. Na hte wa hkôt mẽ hamaxpêr xwỳnhjaja pahihtĩ Sesti kapêr kwỳm ri kuhpa hã kapêr o pa nê axtem nê mẽõ pahi pê “Jejus” anhỹr xwỳnhja kapêr kôt amnhĩ nhĩpêx o pa. Anẽ.

⁸ Hãmri nhũm mẽ kot mẽ ho amnhĩptàr xwỳnhjê mẽ krĩ nhõ xwỳnhjaja mẽ kuma nê gryk tỳx kumrêx. ⁹ Hãmri nê Jasãw mã kãm:

—E kot paj mẽ apê mẽ akàxpore hkwỳ jamỳ. Ka mẽ ajapøj nê ma mẽ panê Pawre mẽ Siras wa hano nhũm wa kato nê ma mõi pa rĩ akupỹm mẽ amã kugõ. Anẽ.

Hãmri nê mẽ kêp mẽ hikàxpore hkwỳ jamỳ.

Pawre mẽ Siras kot Perej wỳr mõi ã wa harênh

¹⁰ Tã nhũm ra kamàt nhũm mẽ kot Jejus kôt axpẽn to htõjaja hãmri Pawre mẽ Sirasja wa ma krĩ pẽ Perej wỳr wa kumẽ. Hãmri nhũm wa kato nẽ ma hwỳr mỗ nẽ hwỳr pỏj. Hãmri nẽ Ijaew nhõ Tĩrtũm kapẽr o mẽ ahkre xà hã ixkre hwỳr htẽm kurẽ kumrẽx nẽ wa axà. ¹¹ Perej kamã Ijaew na pre te mẽ kot Tesarõn kamã Ijaew pyràk kêt nẽ. Mẽ kurom mẽ kãm Tĩrtũm kapẽr mar prãm nẽ. Jakamã nhũm pre Pawre mẽ Siras Tĩrtũm kapẽr o mẽ ahkre ho pa. Apkati mẽ mẽ ahkre mex o pa nhũm mẽ wa kuma nẽ hkĩnh nẽ. Nẽ Tĩrtũm kapẽr ã kagà htũm kamã wa kot mẽ ahkreta japêr nẽ kamã omu nẽ axpẽn mã wa harẽnh o:

—Nà ãm hãmri na wa ã Tĩrtũm kapẽr o mẽ pajahkre anẽ. Tĩrtũm kapẽr ã kagà htũm hkôt na hte wa mẽ pajahkre. Anẽ.

¹² Hãmri nẽ ohtô nẽ Jejus kôt amnhĩ xunhwỳ. Ijaew kwỳ nẽ Ijaew kêt xwỳnh kwỳ nẽ mẽnĩ kot amnhĩ to rũnh xwỳnhjaja nhũm mẽ ohtô nẽ Jejus kôt amnhĩ xunhwỳ.

¹³ Tã nhũm Tesarõn kãm Ijaewjaja Pawre jarẽnh ma. Kot Perej nhõ xwỳnhjê mã Tĩrtũm kapẽr jarẽnh o pa hã harẽnh ma. Hãmri nẽ ma mẽ hwỳr mra nẽ mẽ kãm tanhmã ho hêx to nhũm krĩ nhõ xwỳnhjaja mẽ kuma nẽ ra Pawre kamã gryk tỳx nẽ. ¹⁴ Jakamã nhũm Jejus kôt mẽ htõjaja mẽ harẽnh ma nẽ mẽ umaj Pawre kator nẽ ma gô xujanâr wỳr o mỗ. No nhũm Siras mẽ Ximotre wa Perej kamã mẽ kuri arĩk. ¹⁵ Hãmri nhũm mẽ hkwyjaja ma Pawre o mỗ. Ma krĩ pẽ Atenas wỳr o mỗ. Hãmri nẽ hwỳr o pỏj nẽ kamã kure. Hãmri nẽ ra akupỹm Perej wỳr nojarêt nhũm Pawre mẽ kãm:

—E kêr ka mẽ ma akupỹm mỗ nẽ Siras mẽ Ximotre wa kãm ijarẽ kê war amnhĩm nojarêt nẽ tokyx man ixkôt wa mỗ. Anẽ.

Pawre kot Atenas nhõ xwỳnhjê mã kapêr ã harẽnh

Rõmãn 1.18-20

¹⁶ Tã nhũm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpêx ã mẽ omunh o pa. Na pre Atenas nhõ xwỳnhjaja sãnti ho ohtô rax nẽ mẽ õ krĩ kamã unhwỳ nhũm Pawre ri omunh o ri kuhê ho pa. Na pre htem ahpỹnhã mẽmo karõ nhĩpêxja o te Tĩrtũm nhĩpêx pyrà nẽ kutã hkõn krã ho rôrôk nẽ hkrĩ nẽ kãm mex o mex ã harẽnh o pa. Hãmri nhũm Pawre tee ri ja hã mẽ omunh o ri mẽ hkôt pa nẽ hkaprĩ nẽ. ¹⁷ Hãmri nẽ ma amnhĩ kwỳjê nhõ Tĩrtũm kapêr o mẽ ahkre xà hã ixkre hwỳr pa nẽ kamã mẽ ahkre ho kuhê. Ijaewjê mẽ Ijaew kêt xwỳnh kot Tĩrtũm ã hpijaàm xwỳnhjê mã nhũm Tĩrtũm kapêr jarẽnh o kuhê. Nẽ apkati mẽ mẽ kot mẽmoj to wẽnê xà hwỳr mra nẽ mẽ ujaaprôr xwỳnhjê mã Tĩrtũm kapêr jarẽnh o kuhê. ¹⁸ Hãmri nhũm mẽ mar o pa. Atenas nhõ xwỳnhjaja na prem axpẽn kôt amnhĩ nhĩpêx o pa hkêt nẽ. Mẽ hkwỳjaja kêp Epikure hkôt amnhĩ nhĩpêx xwỳnh. Nẽ mẽ hkwỳjaja axtem kêp Etok kôt amnhĩ nhĩpêx xwỳnh. Hãmri nhũm Pawre mẽ kãm Jesus kot tanhmã mẽ panê amnhĩ nhĩpêx to hã harẽnh o pa nẽ akupỹm hĩr ã harẽnh o pa. Hãmri nhũm mẽ tee ri kuma nẽ hã axpẽn kukjêr o kuhê nẽ axpẽn mã:

—Tk. Kwa mo na hte myti ata harẽnh o pa? Anẽ.
Nhũm mẽ hkwỳja mẽ kãm:

—Ko. Axtem mẽpahpãm ò na hte tanhmã harẽnh to. Anẽ.

¹⁹⁻²¹ Atenas nhõ xwỳnhjê mẽ axtem krĩ hõ nhõ xwỳnhjaja na prem kãm mẽ ujarẽnh nyw mar prãm nẽ. Jakamã nhũm prem mẽmoj jarẽnh nyw ma hãmri nẽ ãm axpẽn mã harẽnh pix o ri pa. Tã ra Pawre xujarẽnh nyw ma nẽ ma amnhĩ kôt mẽ kot axpẽn mar xà hã ixkre hwỳr o tẽ. Ixkre pẽ Areopja wỳr nhũm prem amnhĩ kôt o tẽ nẽ kãm:

—E kwa aprĩ hã mẽ inhmã ate mẽmo jarẽnh nywta jarẽ pa mẽ ama. Mẽ inhmã mar prãm. Anẽ.

²² Hãmri nhũm mẽ kuma nẽ mẽ kãm ujarẽnh o xa. Mẽ kot axpẽn mar xà hã ixkre kamã Atenas nhõ xwỳnhjê mã awjarẽ nẽ mẽ kãm:

—E nà na ka htem anhõ mẽmo karõ nhĩpêx xohtôta ã apijaàm pẽ kãm amnhĩ jagrer o ri apa. Pa hte ja hã mẽ apumunh o mẽ akôt ixpa. ²³ Na pa ra mẽ anhõ sãnti piitã hkôt omunh o ri ixpa nẽ o mũj hõ kuhê xà kaprỳja wỳr ixkato. Nhũm himõk ã mẽmo karõ nhĩpêx amrakati nom à hã kagà kot:

MỄPAHPÃM PUMUNH KÊT KUHÊ XÀ NA JA

Ã mẽ ate hã kagà kot anhỹr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarẽnh mar mex. Tã kot paj mẽ amã harẽ ka mẽ inhma.

²⁴ —Mẽpahpãm mẽ ate omunh kêt ã amnhĩ jarẽnhta Tĩrtũm na. Tãm na pre pyka ho kato nẽ kamã mẽmoj piitã ho kator pa. Gô ho kato nẽ mry ho kato nẽ panhĩ ho kato. ãm mẽmoj piitã ho kator par kumrêx. Na hte pika kamã nẽ kaxkwa kamã mẽmoj piitã ho amnhĩptàr mex rãhã ho pa. Jakamã mẽmo kaxyw kot puj mẽ jar kãm ôrkwy nhĩpêx? Tãm kệp mẽmoj piitã ho kator xwỳnh jakamã kot

mëmoj to presija hkêt. ²⁵ Kêp mëmoj piitã hpãm jakamã mëmoj piitã õ na. Jakamã tanhmã kot pu wem amnhĩ to nê kãm mëmoj gõ? Tãm kot mëmoj piitã ho kator nê ho htĩr nê kot mëmoj piitã õr kênã kot puj kêt mẽ amnhĩ pyrã nê kãm mëmoj gõ. ²⁶ Na pre mẽ pahkukamã ahpỹnhã mẽ pahpiitã mẽ papapxà jarẽ nê mẽ pakator hã arĩgro jarẽ. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpår krax.

²⁷ —Tã mẽmo kaxyw na pre ã Tĩrtũm mẽ panhĩpêx mex anê? Nã ãm mẽ pahte amnhĩ kaxyw hkôt pajamaxpêr nê hkôt amnhĩ xunhwỳr kaxyw na pre mẽ panhĩpêx. Ja mẽ pahpê hihtỳx kêt. Kojã mēhō kãm Tĩrtũm prãm nhũm amnhĩ tã omunh kurê kumrêx.

²⁸ —Nê Tĩrtũm pix kukwak ri na pu htem pahtĩr nê tanhmã amnhĩ nhĩpêx to ho ri papa. Mẽ akwỳ kot kagà jahkre xwỳnhja na pre ja hã kagà nê hã kagà ho: “Mẽ pahpê mẽpahpãm kra na pu htem papa.” Anê. ã hã kagà kot anhỹr.

²⁹ —Tã ka prem amnhĩm mẽmo karõ nhĩpêx. ôr o hkwỳ nhĩpêx nê prat o hkwỳ nhĩpêx nê kên o hkwỳ nhĩpêx. Hãmri nê hipêx pa nê ho mẽpahpãm ã harẽ nê ri hã apijaàm o apa. No mẽ ãm amnhĩ krã hkôt mẽ ate hipêx. Tĩrtũm te kot ja pyrãk kêt.

³⁰ —Amnepêm mẽ pa xwỳnhjaja na prem mẽ apyrã nê ã mẽmoj nhĩpêx anhỹr o pa nhũm Tĩrtũm ja hã mẽ omu nê ãm mẽ omu nê hã tanhmã mẽ hipêx to hkêt nê. Kormã mẽ kot kapêr mar kêt jakamã nhũm pre ja hã mẽ omu nê ãm mẽ omu. Tã na ra mẽ pahte mẽmo karõ nhĩpêx o mẽpahpãm nê mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm.

³¹ Koja nhỹrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nẽ amnhĩ ri mẽ htĩr tũm mẽ mẽ pa ho pa xwỳnhjê jarê mẽ amnhĩ ri mẽ pa hkêx xwỳnhjê jarê. Na pre ra ã mẽ harênh anhỹr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupỹm ho htĩr. Nẽ akupỹm ho htĩr jao kot nhỹrmã kãm tanhmã mẽ pajarênh to xwỳnh ã ho amnhĩrĩt. Anẽ.

³² Nhũm pre ã Pawre mẽ kãm Tĩrtũm kapêr jarênh anẽ nhũm mẽ mar o kuhê. Kot mẽ kãm Jejus tyk mẽ akupỹm htĩr ã harê nhũm mẽ mar o kuhê. Nhũm mẽ hkwyjaja kuma mẽ ãm kuma mẽ axtem mẽ ri hã akunha. Nom nhũm mẽ hkwyjaja mẽ kurom mar tỳx mẽ Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex mẽ. Anẽ.

³³ Hãmri nhũm Pawre akupỹm nhỹri hpôx xà hã ixkre hwỳr ma tẽ. ³⁴ Hãmri nhũm Xiônĩs pê Areop kãm mẽ kãm kapêr xwỳnh mẽ mễhõ ni pê Tãmaris mẽ mẽ hkwyjaja kapêr mar tỳx mẽ amnhĩ kaxyw Jejus kôt hamaxpêr mẽ hkôt amnhĩ xunhwỳ. Hãmri mẽ Pawre kôt pa.

18

Pawre Korĩt wỳr mỗr ã harênh

Wam Korĩt 1.1-3

¹ Tã nhũm Pawre krĩ pê Atenas rũm kato mẽ ma krĩ pê Korĩt wỳr mỗ mẽ pỏj. ² Hãmri mẽ nhỹri Akirti pumu. Haxwỳja kêp Ijaew. Krĩ pê Pỏt kamã na pre kato. Tã ma pyka pê Itar wỳr mỗ mẽ Itar kamã

krĩ pê Rõm kamã hpãnhã pa. Pa ho pa htã nhũm mẽ õ pahihtĩ Krawti tanhmã hamaxpêr to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korĩt wỳr mỗ. Hãmri nê hwỳr pỏj nê kamã pa ho pa. Jakamã nhũm Pawre Korĩt wỳr pỏj nê wa omu³ nê wa kuri pỏj nê wa hkỏt ri pa. Nê Siras mẽ Ximotre wa kamã hamak pê wa iħkỏ hã àpênh o pa. Wa uràk nê kupêxê pytĩ ho ixkre nhĩpêx nê ho wêneh ho ri wa hkỏt pa.⁴ Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwỳr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwỳnhjê mã nhũm mẽ kãm ujarênh o hkrĩ. Nê mẽ kãm Jesus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wỳr mỗn pỏj. Jakamã nhũm Pawre axte ixkre nhĩpêx ã àpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jesus jarênh to ho ri mẽ hkỏt pa. Kêp Tĩrtũm kot mẽ pakaxyw ãm xwỳnh ã harênh o ri mẽ hkỏt pa. Xatã mẽ kãm ujarênh o pa.⁶ Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jesus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmri ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkỏt nê. Ra mẽ ate Tĩrtũm kapêr kaga kênã. Nà kot paj mẽ akaga nê ma hpãnhã Ijaew kêt xwỳnhjê hkỏt ri mẽ kãm ja jarênh o ri ixpa. Anê.

Hãmri nê kànhmã xa nê hinỏkà kapa nê ho apê.

Mê kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê. ⁷ Hãmri nê ixkre rũm kato nê hijuk ri Ijaew kêt xwỳnh pê Xijutre nhõrkwy hwỳr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpêr rãhã ho pa.

⁸ Tã nhũm Ijaew ô pê Kriptija hkwyjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhõ Tĩrtũm kapêr o mẽ ahkre xà hã ixkre kamã mẽ ahkre xwỳnh na pre. Jakamã õrkwy kamã hkwyjê mẽ mẽ hpimràatã Pahihti Jejus kôt amnhĩ xunhwỳr pa. Nê krĩa kamã ra Ijaew kêt xwỳnh ohtô nê Kripti pyrà nê amnhĩ kaxyw Jejus kôt hamaxpêr nê hkôt amnhĩ xunhwỳ. Jakamã nhũm Pawre mẽ kêp Jejus kwỳ hã mẽ piitã mẽ hkrã kumrã.

⁹ Tã nhũm kamàt nhũm Pawre gõr nê nõ nê amỹti nhũm kêwe Pahihti Jejus axte hwỳr kato nê kãm kapêr nê kãm:

—Pa Pawre? E kwa kêr ka mãmri axãmnhĩx ri atar mẽ kãm ijarênh rãhã ho ri apa nê amnhĩ kamã akahak o ri mẽ hkôt apa hkêt nê. ¹⁰ Kot paj atãnopxa nhũm mẽhõ tanhmã ato hkêt nê. Krĩa kamã koja mẽ ohtô nê ixkôt amnhĩ xunhwỳ. Anê.

¹¹ Nhũm pre ã Pahihti Jejus Pawre hpimtir kãm kãm kapêr anê. Jakamã nhũm Korĩt kãm arĩ ri mẽ hkôt pa ryy nê. Arĩ mẽ hkôt pa hã amgrà pyxi nê hkôt mytwrỳ kêp 6. Jao Tĩrtũm kapêr o mẽ ahkre ho ri mẽ hkôt pa.

¹² Tã nhũm Korĩt nhõ xwỳnhjê nhõ pika pê Gres kamã mẽ ho amnhĩptàr xwỳnh nyw Gartija. Korĩt kãm pa jakamã nhũm Ijaew xaptàr tũmrejaja Pawre pynê nê ma hwỳr o tẽ nê kãm tanhmã ho hêx

to. ¹³ Jakamã nhũm Ijaew pikuprõnh xà hã ixkre kamã mẽ kãm kapêr xwỳnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwỳm ri mẽ ahkre ho pa. Jao mẽ ixte axtem nê tanhmã Tĩrtũm kôt ri amnhĩ nhĩpêx to ho ri xpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

¹⁴ Hãmri nhũm ra Pawre kot Garti mã amnhĩ jarênh mã tâ nhũm Garti amnhĩ to wa nê hã mẽ kãm kapêr nê mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nê tanhmã mẽ amã hipêx to. ¹⁵ No xep âm kot mẽ axaptàr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mỳrapê na ka mẽ kamã agryk nê ã inhmã ho akapêr anê. Nà kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xà hkôt tanhmã ho. Anê.

¹⁶ Hãmri nê amnhĩ nê mẽ hano. ¹⁷ Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarênh to htã nhũm kuma nê âm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê âm mẽ omu nê nê tanhmã mẽ kãm nê hkêt nê.

Pawre kot akupỹm ãxiok wỳr mỗr ã harênh

¹⁸ Tã nhũm Pawre arĩ Korĩt kamã mẽ hkôt pa nê gaa nê nojarêr nê Jejus kôt htôjê mã amnhĩ jarê nê mẽ kãm:

—E kot paj ma akupỹm pika pê Sir wỳr mỗ. Anê.

Hāmri nē mē kēp kato nē ma hwỳr mō. Nē ma amnhĩ kōt Akirti mē hprō Prisire wa o mō. Mōō nē krī pē Sēnkrej wỳr pōj. Nhũm Pawre amnhĩ kukamā mēmoj tā tanhmā Tĩrtũm mǎ amnhĩ jarēnh to nē amnhĩ jarēnh xà hkōt amnhĩ krā hkēnh pa. Ijaew kot amnhĩ nhĩpêx xà hkōt ǎ amnhĩ nhĩpêx anē. Hāmri nē mē pàr wỳr agjê nē Sēnkrej rũm kato nē ma Sir wỳr mō. ¹⁹⁻²¹ Mōō nē krī pē Epes wỳr pōj. Hāmri nhũm Pawre mē hkwỳjaja pàr rũm hapōj nē krī hwỳr agjê nē Ijaew nhō Tĩrtũm kapēr o mē ahkre xà hǎ ixkre hwỳr mra nē hwỳr agjê nhũm Pawre mē kām Tĩrtũm kapēr jarēnh o nhỹ. Hāmri nhũm mē kuma nē kām mar prām nē. Nē kām:

—Kwa anojarēt kēt nē. Kritpēm mē ixkōt ri apa ryre nē Tĩrtũm kapēr o mē ijahkre. Mē inhmā ja mar prām.

Anhỹr tā no nhũm mē kām:

—Nà kot paj ma mō. Nom koja Tĩrtũm nhỹrmǎ akupỹn mē awỳr inhmē pa man akupỹn mē awỳr mō nē axte kapēr o mē ajahkre. Anē.

Hāmri nē ma mō. Ma Epes rũm pàr kām mō. Nom nhũm Akirti mē Prisireja wa Epes kamā arĩk nē hpānhǎ kamā pa ho pa.

²² Tǎ nhũm Pawre krī pē Sejarej wỳr pōj. Hāmri nē hpānhǎ kurũm ma akupỹm Jerujarē hwỳr mō. Kot Jesus kōt htōjê pumunh mǎ ma mē hwỳr mō. Hāmri nē mē hwỳr pōj nē mē omu nē tanhmā mē kām amnhĩ jarēnh to nē mē kēp kato nē ma akupỹm ǎxiok wỳr mō. ²³ Hāmri nē hwỳr pōj nē kamā mē hkōt ri pa ryy nē mē kurũm kato nē hpānhǎ ma akupỹm pyka pē Prik mē Karatas wa hwỳr mō. Nē kamā mē kot Jesus kōt amnhĩ xunhwỳr xwỳnhjê

jahkre ho pa. Mě kot Jejus kôt amnhĩ nhĩpêx tỳx rãhã ho pa kaxyw mẽ hkôt mẽ ahkre mex o ri mẽ hkôt pa.

*Apor kot Epes kãm Tĩrtũm kapêr jarênh
Epes 1.1-2; Wam Korĩt 3.6-9*

²⁴ Tã nhũm Epes wỳr Ijaew ò pê Aporja mỗ nẽ hwỳr pỏj. Krĩ pê Aresãn kamã na pre kato. Na pre hte amnhĩ kaxyw Tĩrtũm kôt pix mã hamaxpêr nẽ kapêr ã kagà htũm mar tỳx nẽ. Jakamã mẽ kãm harênh mex o pa nhũm mẽ piitã kãm mar prãm nẽ. ²⁵ Nom kormã Jejus jarênh jatur xà mar kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tỳx nẽ. Nẽ tanhmã kot mẽ hkrã kumrãr to ho paja nhũm mãănên mar tỳx nẽ. Jakamã na pre hte mẽ kãm ja pix jarênh o pa. No Jejus kêp Tĩrtũm kot mẽ pahwỳr mẽnh xwỳnh ã harênhja nhũm kormã mar kêt nẽ. Tã Epes wỳr mỗ nẽ pỏj. ²⁶ Hãmri nẽ Ijaew nhõ Tĩrtũm kapêr o mẽ ahkre xà hã ixkre hwỳr axà nẽ kamã mẽ kãm ujarênh o nhỹ. Amnhĩ kamã kahak kêt nẽ àmnhĩx ri mẽ kãm ujarênh mex nẽ. Hãmri nhũm Prisire mẽ Akirti wa kot mẽ kãm ujarênh ã kuma nẽ war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhorkwỹ hwỳr o tẽ nẽ pahprĩ hã kãm harênh jatur xàm kumẽ kê hprĩ hã mar pa. Anẽ.

Hãmri nẽ war amnhĩ kôt kuwỳ nẽ hprĩ hã kãm ujarênh jatur xàm kumẽ nhũm hprĩ hã harênh piitã mar tỳx nẽ.

²⁷ Tã ra pyka pê Gres wỳr nojarêr nẽ Jejus kôt htỏjê mã amnhĩ jarẽ nhũm mẽ kuma nhũm ja mẽ

kām mex nê. Hāmri nê Gres kamā Jejus kôt mẽ
htôjê mã kagà nhĩpêx. Apor kot mẽ hwỳr amnhĩ
kôt o mōr nê mẽ kām ôr nhũm mẽ kot omunh nê
kamā harênh nê ho mex kaxyw mẽ kām hipêx.
Hāmri nê hipêx pa nê kām kugô nhũm kupy nê
mẽ kurũm kato nê ma mẽ hwỳr mō. Hāmri nê
mẽ hwỳr pôj. Gres nhô xwỳnh kwỳjaja na prem
ra Jejus kôt amnhĩ xunhwỳ. Tĩrtũm kot mẽ kutā
nojarêť jakamā nhũm mẽ ra hkôt amnhĩ xunhwỳ.
Jakamā nhũm Apor mẽ hwỳr pôj hāmri nê mẽ ĩhkô
hã tanhmã mẽ ho ajuta hto ho pa. ²⁸ Nê xatā Ijaew
mã tanhmã Jejus jarênh to kamā hihtỳx o mẽ hkôt
pa nê mẽ kām:

—Nà Jejusja tām na pre Tĩrtũm mẽ pakaxyw
ãm. Tĩrtũm kapêr ã kagà htũm kamā ã harênh kot
anhỳr. Anê.

19

Pawre akupỹm Epes wỳr mōr ã harênh

Rukre 3.15-16

¹ Tã nhũm Apor kormã Korĩt kām pa ri nhũm
Pawre ma akupỹm Epes wỳr mō. Ma krāhakỳx kôt
akupỹm hwỳr mō. Hāmri nê hwỳr pôj nê mẽ kot
Jejus kôt amnhĩ nhĩpêx o mẽ pa xwỳnhjê pumu.
Nhũm mẽ kormã Jejus jarênh jatur xà mar kêt nê.
² Jakamā nhũm Pawre mẽ hwỳr mō nê mẽ omu nê
Tĩrtũm Karô hã mẽ hkukja nê mẽ kām:

—Kwa mẽ ate Jejus kôt amnhĩ xunhwỳr xà hã
arĩgrota ã xà na pre Tĩrtũm Karô mẽ akarô mã agjê?
Anê.

Hāmri nhũm mẽ kuma nê kām:

—Nà mẽ ixte Tĩrtũm Karô jarênh mar kêt. Anê.

³ Hāmri nhũm mẽ kām:

—No mẽmoj kôt na prem mẽ akrã kumrã? Anẽ.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapër o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapër o pa. Nẽ mẽ kãm Jejus jarẽnh o: “Koja tokyx mẽhõ ixkôt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamaxpër nẽ hkôt amnhĩ xunhwỳ.” Anẽ. Tã Jejusja na pre ã mẽ kãm harẽnh anhỹr o pa. Anẽ.

⁵ Nhũm pre ã Pawre mẽ kãm Juãw Paxis mẽ Jejus wa harẽnh anẽ nẽ hpãnhã Jejus nhỹ hã mẽ hkrã kumrã. ⁶ Hãmri nẽ hpãnhã mẽ hã ìhkra jaxwỳ nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa. Hãmri nhũm mẽ ý hã ahpỹnhã axtem mẽ kapër kwỳ ho kapër nẽ ý hã Tĩrtũm mex o mex ã harẽnh o kuhê. ⁷ ã mẽ kot amnhĩ nhĩpêx anhỹr xwỳnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapër o mẽ ahkre xà hã ixkre hwỳr mrar ã mytwrỳ axkrunêpxi. Amnhĩ kamã kahak kêt nẽ hprĩ hã Ijaew mã hprĩ hã Jejus jarẽ nẽ mẽ kãm:

—E pa mẽ amã Jejus jarẽ ka mẽ inhma. Nà Tĩrtũm kot mẽ pahwỳr mẽnh xwỳnhhta na. Nẽ mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpër nẽ hkôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra. Anẽ.

Hāmri nhũm mẽ hkwỳjaja kuma nẽ hkôt hamaxpěr kurê kumrêx. ⁹ Nom nhũm mẽ hkwỳjaja kuma nẽ ăm kuma nẽ Jejus o kapěr punuj nẽ. Mẽ piitã mẽ noo mã kuhê nẽ ho kapěr punuj tỳx nẽ. Nhũm Pawre tee ri ja mẽ omu hāmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỳnhja wỳr hpãnhã mỗ. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre. ¹⁰ Jao hã amgrà axkrut. Jakamã nhũm pyka pê As kamã mẽ piitã Pahihti Jejus jarênh ma. Ijaew nẽ Ijaew kêt xwỳnhja nhũm mẽ piitã harênh ma.

Wajaga hkwỳ jarênh

¹¹ Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa. ¹² Jakamã nhũm pre htem hwỳr mra nẽ kệp ê hkwỳ jamỳ nẽ ma mẽ à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mãânên mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrar kurê kumrêx nhũm mẽ akupỹm tãm hkrã.

¹³⁻¹⁴ Tã nhũm mẽõ patre maati Sewahtija hkra my kệp 7 nẽ piitã kệp wajaga. Hāmri nẽ mẽ kãm Pawre pyrà nẽ mẽ nẽ mẽkarõmnuti japôx o pa hprãm nẽ. Jakamã kormã Jejus kôt amnhĩ xunhwỳr kêt tã mẽ kot ỹ hã Pawre pyrà nẽ mẽhõ nẽ hkwỳ janor kaxyw nẽ kãm:

—E Pawre kot Jejus jarēnh o ri pa xwỳnhhta nhỹ hã kot paj amã ixkapēr. Jakamã e kwa tokyx myta rûm akato nẽ ma tẽ. Anẽ.

¹⁵ Hãmri nhũm mēkarōmnutija mẽ kuma nẽ ãm mẽ kuma nẽ mẽ kãm:

—Tk. Mẽ apê Jejus mẽ Pawre wa hkwỳ hkêt tã mẽ nẽ ã mẽ inhmã akapēr anhỹr o apa. Nà Jejus mẽ hkwỳ pixjaja na htem Tĩrtũm nhỹ hã mẽ kệp mẽ ijapôx o pa. Mẽ apê mẽ hkwỳ hkêt kênã. Nà pa ixkatoore kaxyw ã. Anẽ.

¹⁶ Hãmri nhũm mēkarōmnuti kot tanhmã ho xwỳnhhta mēkarōmnuti nhỹ hã wajagajê pynê nẽ mẽ htak rax o kệp mẽ ê kaxônh pa nhũm mẽ tee ri amnhĩ nhĩpêx. Hãmri nẽ hkênh nẽ ôrkwỹ rûm hapôj nẽ ma umaj hprôt nẽ mra. ¹⁷ Hãmri nhũm Epes kamã mẽ piitã ã kot mẽ hipêx anhỹr ã mẽ harēnh ma nẽ tee ri hamaxpēr nẽ kãm ma nẽ. Ijaew nẽ Ijaew kêt xwỳnhjaja nhũm mẽ piitã tee ri kãm hamaxpēr o pa. Nẽ Pahihti Jejus mã mex o mex ã harẽ. ¹⁸ Jakamã nhũm mẽ kot Jejus kôt amnhĩ xunhwỳr nyw xwỳnhjaja piitã tanhmã amnhĩ jarēnh to. Nẽ mẽ hkwỳjaja amnhĩ jarēnh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kôt amnhĩ xãm hãmri nẽ axte ã amnhĩ nhĩpêx anhỹr kêt nẽ. Anẽ.

Nhũm mẽ hkwỳjaja kệp wajaga htã mẽ uràk nẽ Jejus kôt amnhĩ xunhwỳ hãmri nẽ amnhĩ jarēnh o:

—Nà ijaxwỳja kormã Jejus kôt amnhĩ xãm kêt ri na pa pre hte nẽ mẽ no kupy r nẽ mẽ y pix o ri mẽ hkôt ixpa. Tã Jejus kôt amnhĩ xãm hãmri nẽ axte ã amnhĩ nhĩpêx anhỹr kêt nẽ. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

19 Hāmri mẽ õ wajaga xàhpumunh xà hã kagà jamỳ nẽ ma o mra nẽ kaxyw kuto nẽ kamã rẽn h pa nẽ mẽ piitã mẽ noo mã ho xết pa. Wajaga xàhpumunh xà hã kagàja ã kàxpore xohtô rax kumrêx tã nhũm mẽ Jesus gryk ã hamỳ nẽ o mra nẽ ho hxết pa nhũm hapêx. 20 Hāmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nẽ ohtô rax nẽ mẽ uràk nẽ Jesus kôt amnhĩ xunhwỳ.

Pawre kot Rôm wỳr hkrà hã harênh

Rômãn 1.13-15, 15.22-29

21 Tã nhũm Pawre ra akupỹm Jerujarê hwỳr nojarêr nẽ hamaxpêr o:

—E kot paj ixkato nẽ hpãnhã ma Masetôn mẽ Gres wa hkôt ma akupỹm Jerujarê hwỳr mỗ. Ma mẽ kot Jesus kôt amnhĩ xunhwỳr xwỳnhjê pumunh o mẽ hkôt mỗ. Hāmri nẽ Jerujarê hwỳr pôj nẽ kamã tanhmã amnhĩ to hpa hāmri nẽ hpãnhã ma Rôm wỳr mỗ. Anẽ.

22 Hāmri nẽ hkôt ho ajuta ho wa pa xwỳnh Xi-motre mẽ Eras wa kãm amnhĩ jarê nẽ wa kãm:

—E kêr ka wa ma ixkukamã Masetôn wỳr wa mỗ. Kot paj kormã jar As kamã ixpa grire hāmri nẽ ma war akôt mỗ pu mẽ hamũ ma Jerujarê hwỳr mỗ. Anẽ.

Hāmri nhũm wa kuma nẽ kato nẽ ma hkukamã Masetôn wỳr mỗ.

Mẽ kot sãnti hã Pawre mã àkjêr ã mẽ harênh

Sikũn Korĩt 1.8-9

23 Rôm nhũm Epes nhõ xwỳnhjaja tee ri Pawre kot tanhmã Pahihti Jesus jarênh to hã kuma nhũm ja mẽ kêp omnuj nẽ. Nhũm mẽ Jesus ã kamã

gryk tỳx nê. ²⁴ Na prem amnhĩ kaxyw Tĩrtũm kôt hamaxpêr kêt nê. Na prem axtem sânti ho mẽ hpãm nê amnhĩ to hwỳr pê hã hpijaàm nê kãm mex o mex ã harênh o pa. Mẽ õ sântija ni Xiãnre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwỳr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãnre nhõrkwy karõ hkryre hkwy nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ âpênh xwỳnhjê mẽ nhũm mẽ kot haprôr xwỳnhjê kukwak ri kàxpore jamỳnh rũnh o pa.

²⁵ —Jakamã nhũm Pawre mẽ hwỳr mỗ nê pôi nê mẽ kãm Mẽpahpãm Tĩrtũm jarênh o ri mẽ hkôt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mẽ kot urak nê Xiãnre nhõrkwy karõ hkryre nhĩpêx nê ho wênê ho pa xwỳnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãnre nhõrkwy karõ hkryre pãnhã kàxpore jamỳnh rũnh o papa. ²⁶ Tã măn ka mẽ ra ham hpôx xwỳnh Pawreja pumu nê kapêr ma. Na hte jar mẽ panhõ krĩ kamã nê As piitã hkôt mẽ kãm mẽpanã Xiãnre karõ nê mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtô nê kuma nê ra hkôt hamaxpêr.

²⁷ —Kwa ja mex kêt. Kojja mẽ kapêr ma nê hkôt amnhĩ nhĩpêx hãmri nê axte mẽ pahte ixkre karõ hkryre nhĩpêx xwỳnhhta japrôr kêt nê. Hãmri nê mẽ paxâpênh o kapêr punuj nê. No ãm ja pix omnuj kêt. Kojja mẽpanã Xiãnre mã amnhĩ jarênh xà hã

ixkreja kaga hpa. Nê haxwýja karôja kaga. Mê piitã kãm hapê kênã. As kamã nê pyka piitã hkôt mê piitã kãm hapê nê hwýr mra nê amnhĩ to hwýr o pa. Kêp mêpanã mex kumrêx tâ koja mê Pawre kapêr gryk ã hkaga hpa nê axte kãm hamaxpêr kêt nê. Hãmri pu mê axte mê kukwak ri pakàxpore rax nê papa hkêt nê. Kwa tanhmã kot puj mê amnhĩ nhĩpêx to? Anê.

²⁸ Hãmri nhũm mê tee ri ã kapêr anhýr ã kuma nê Pawre kamã gryk týx kumrêx. Nê gryk xàj kàx pêê kapêr nê xatã kapêr týx kãm kapêr punuj nê. Nê kapêr o:

—Xiãnre na mex kumrêx. Kêp mê pahpê Epes nhõ xwýnhjê nã maati na.

Anhýr o kàxpêê kapêr o kuhê. ²⁹ Hãmri nhũm krĩ nhõ xwýnh piitã mê kuma nê mê hwýr hprôt nê haxwýja gryk nê kàxpêê mê hkôt ã harênh anhýr o kuhê. Hãmri nê gryk xàj Pawre hkôt ri wa pa xwýnhja wa unê nê ma mê kot axpên mar xà hã ixkre hwýr wa hkjênh o tẽ. Masetôn nhõ xwýnh wa kêp Gajore mê Aristakja nhũm mê wa unê.

³⁰ Hãmri nhũm Pawre mê kot wa unênh ã mê omu nê tee ri wa hkukamã hamaxpêr nê mê hkôt hprôt nê mê kãm tanhmã kapêr to kaxyw nom nhũm mê kot Jesus kôt amnhĩ xunhwýr xwýnhjaja ja nê kãm kapêr kãm hihtýx nê. ³¹ Hãmri nhũm As kamã mê kot mê ho amnhĩptàr xwýnh kwýjaja ã mê kot amnhĩ nhĩpêx anhýr ã mê omu nê Pawre hwýr hpêr mê. Mê kãm hkĩnh jakamã kot mê hkôt htêm nhũm mê kot hpĩr pymaj hwýr hpêr mê nê mê hkôt htêm nê hkurê kamã hihtýx nê.

³² Rôm nhũm mê piitã mê kot axpên mar xà hã ixkre hwýr pikuprôn pa nê kàx pê kapêr punuj

o kuhê. Nom axpên kôt kapêr kêt nê. Âm axpên kwým ri kàx pê tanhmã kapêr punuj to ho. Nhũm mẽ hkwýjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê. ³³ Nhũm Ijaew kwýjaja tee ri ja hã mẽ omu nê axpên mã:

—Tk. Kwa okora. Kojã mẽ nã Xiănre hã gryk hãmri nê tanhmã mẽ pahpê Ijaew to nà? Anê.

Hãmri nê hamaxpêr nê mẽ hwýr amnhĩõ pê Aresãnja mẽ nê kãm:

—Kwa ma mẽ hwýr tẽ nê mẽ kãm tanhmã mẽ pahtã axàprâr to. Pawre kêp mẽ pahkwý htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwýr tẽ nê xa nê tee ri kot mẽ ho hpinhkrênh kaxyw kànhmã mẽ kãm ìhkra pêr kaprý. ³⁴ Nhũm mẽ omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

—Mẽpanã Xiănreja mex o mex. Kêp mẽ pahpê Epes nhõ xwýnhjê nã mex na. Anê.

³⁵ Tã nhũm mẽ õ pahi nhõ kôwenatô jatã tanhmã Epes nhõ xwýnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhĩkrê. Mẽ piitã kot Xiănre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwýnh ã mẽ kot mẽ pahpumunh mex. Nê kaxkwa rũm karõ kot mẽ pahwýr tẽm nhũm mẽ pahpê hamãr o papa xwýnh ã nhũm mẽ kot mẽ pahpumunh mex. ³⁶ Jakamã mẽhõ kot kêt we mẽ pahpê hamãr xwýnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapêr anhýr kêt

ně. ³⁷ No mẽ ate wa unênh nẽ amnhĩ kôt wa ho atêm xwỳnh̄ta wa. Wa kot tanhmã mẽpanã Xiânre ho kapêr punuj to rỳ kêp ỏ ixkre kamã àhkĩnh kêt tã ka mẽ amarĩ wa unê nẽ amnẽ amnhĩ kôt wa o tẽ.

³⁸ —Kwa kê Temêt mẽ hkwỳjaja kãm tanhmã wa ho kapêr to hprãm nẽ ma pahĩti hwỳr wa o tẽ nẽ kumã măn tanhmã wa ho kapêr to. Mẽmoj tã axpẽn mã mẽ kapêr xà hã arĩgrota ãã. ³⁹ Rỳ ka mẽ amã mẽmoj jarênh prãm nẽ arĩgroja ã măn rĩ kormã mẽmoj jarẽ. ⁴⁰ No jarãhã mẽ ate amnhĩ nhĩpêxja te mẽ ate pahĩti kutã amnhĩ xunhwỳr nẽ ho akapêr punuj pyràk. Kojã Rôm nhõ xwỳnh̄jê nhõ pahi mẽ ajarênh ma hãmri nẽ mẽ ate kamã agryk ã amnhĩ kamnhĩx. Hãmri nẽ mẽ atã ixkukja pa tanhmã kãm mẽ ajarênh to? Mẽhõ nhỹ hã na ka mẽ ã apikuprõnh nẽ amnhĩ nhĩpêx anẽ? Nà amnhĩ krã hkôt na ka mẽ akuprõ nẽ ã amnhĩ nhĩpêx anẽ. Anẽ.

⁴¹ Hãmri nẽ mẽ kãm kapêr pa nẽ mẽ hano nhũm mẽ anhrà nẽ ma akupỹm ỏrkwỹ hwỳr hapêx.

20

Pawre ma Masetôn mẽ Gres wa hwỳr mỗr ã harênh

¹ Hãmri nhũm Pawre ra nojarêt. Jerujarẽ hwỳr mỗr mã nom kormã pika pẽ Masetôn kumrêx wỳr mỗr nẽ kurũm ma akupỹm Jerujarẽ hwỳr mỗr mã. Hãmri nẽ nojarêt nẽ mẽ kot Jesus kôt amnhĩ xunhwỳr xwỳnh̄jê ho akuprõ nẽ mẽ kãm amnhĩ jarẽ nẽ mẽ kãm:

—E kot paj ma mō. Nom kêr ka mẽ arĩ ixwakre kamã Tĩrtũm kapêr kôt amnhĩ nhĩpêx mex rãhã ho ri apa nê aa hkaga hkêr nê. Anê.

Hãmri nê mẽ kãm:

—E mẽ mãmri ixwa kre kamã axàmnhĩx aja-makêtkati nê ri apa. Anê.

Hãmri nê kato nê ma Masetõn wỳr mō. ² Nê hwỳr pōj nê kamã krĩ hkwỳ hkôt mō nê nhỹri mẽ kot Jejus kôt amnhĩ xunhwỳr xwỳnhjê pumu nê Tĩrtũm kapêr o mẽ ahkre. Mẽ kot hkôt amnhĩ nhĩpêx mex nê kãm hprãm xà hkôt pix mã amnhĩ nhĩpêx kaxyw mẽ kãm kapêr o ri mẽ hkôt pa. Hãmri nê kato nê ma mō nê pyka pê Gres wỳr pōj. ³ Nê kamã mẽ hkôt pa hã mytwrỳ axkrunẽpxi hãmri nê akupỹm pyka pê Sir wỳr nojarêr. Nê ma pàr kãm hwỳr mōr kaxyw nê amnhĩ tã Sir kamã Ijaew kwỳ kot tanhmã harênh to hã amnhĩ jarênh ma. Na prem ra hã axpên mã amỹnê nê axpên mã:

—E koja amnê mẽ pahwỳr mō pu mẽ nhỹri omu nê hpĩr kurê kumrêx. Anê.

Hãmri nhũm Pawre amnhĩ tã mẽ kapêr ma nê pàr kaga nê mẽ hwỳr mōr kêt nê. Hãmri nê awjanã nê Jerujarê hwỳr Masetõn kamã pa. ⁴ Nhũm Jejus kôt htō hkwỳjaja ma hkôt mō. ã mẽ hixi kot anhỹr.

Perej nhō xwỳnh Sopatōja. Piro hkra na pre.

Nê Tesarõn nhō xwỳnh Aristak mẽ Sikũn wa.

Nê Tepe nhō xwỳnh Gajoreja.

Nê As nhō xwỳnh Xikitre mẽ Torow wa.

Nê Ximotreja.

Jajaja na prem ma Pawre hkôt Jerujarê hwỳr mō.

⁵ Nê pa ixpê Rukre ixte mẽ amã ja jarênh nê hã kagà xwỳnhja na pa axte Pawre hã ajêr nê hkôt

mõ. Jakamã nhũm jajaja piitã ma wa ixkukamã Tôx wỳr mõ nẽ kamã wa ixkãm hamak o pa.

⁶ Tã pa wa ma krĩ pẽ Piripos rũm ixkato nẽ pàr kãm ma mẽ hkõt mõ. Arĩgro pẽ Pas jakành mẽ ma mẽ hkõt mõ.

Tã wa ixtã arĩgro pẽ 5 nẽ mẽ hkõt Tôx wỳr pøj nẽ kamã mẽ omu nẽ mẽ hkõt ixpa hã ixtã ù semãn.

Pawre kot akupỹm Exik o htĩr ã harẽnh

Juãw 5.21; Atre 9.36-43

⁷ Tã nhũm sap nẽ kamàt pa mẽ kot Jejus kõt amnhĩ xunhwỳr xwỳnhjẽ hkõt akuprõ nẽ axpẽn kutã apku nhũm Pawre mẽ kãm kapẽr. Ra apkati hkõt mẽ inhnojarêt kaxyw jakamã nhũm mẽ kãm Tĩrtũm kapẽr jarẽnh ryy nẽ. Ra kõt ã kamàt nhũm arĩ mẽ kãm harẽnh o nhỹ. ⁸⁻⁹ Ixkre hprẽk axpẽn nhĩpy axkrunẽpxi nhĩtep xà kamã na pa prem akuprõ nẽ mar o ixkrĩ. Ixkreja kamã kanẽ ohtõ nẽ hpòk o harir. Jakamã nhũm Pawre arĩ mẽ kãm ujarẽnh o nhỹ nhũm mẽhõ xàptàr nyw Exikja ra òtxwa htỳx nẽ mẽ ixkuri òt o nhỹ. Janere hã òt o nhỹ. Tã ra gõr nẽ janere pẽ kato nẽ ahparmã tẽ nẽ pykap tẽm. Pa mẽ tee ri omu nẽ ahparmã hwỳr ixprõt nẽ wrỳ nẽ omu nhũm htyk mex nẽ nõ. Kỳj rũm ahpar mã htẽm ryy jakamã htyk mex nẽ nõ. Hãmri nhũm hkwyjaja tee ri omu nẽ hkaprĩ htỳx nẽ kumỳ nẽ mỳr o hkrĩ. ¹⁰ Hãmri nhũm Pawre mẽ ixkõt wrỳ nẽ hwỳr tẽ nẽ htyk ã omu nẽ kumỳ nẽ mẽ kãm:

—E mẽ amỳr kêt nẽ. Ra htyk tã koja Tĩrtũm akupỹm mẽ pamã ho htĩr.

Anhỹrja kõt nhũm akupỹm htĩr. ¹¹⁻¹² Hãmri nhũm mẽ akupỹm htĩr ã omu nẽ hkĩnh tỳx kumrẽx. Hãmri

pa mẽ akupỹm kỳx pẽ ixkre hwỳr api nhũm Pawre mẽ inhmã pãwti hkwy nhĩrê nẽ mẽ inhmã kugõ pa mẽ Jesus kot mẽ panẽ htyk mã ijamaxpẽr pẽ kuku. Hãmri nhũm Pawre axte mẽ kãm kapẽr o ỹr rãhã nhũm myt kato pa mẽ kêp anhgrà nẽ ma ixpa.

Pawre Mĩrêt wỳr mõi ã harẽnh

¹³ Hãmri pa mẽ inhnojarêt nhũm Pawre mẽ ixte hkõt mẽ inhmõi xwỳnhjẽ mã:

—E kêr ka mẽ ma pàr kãm ixkukamã mõi. Kot paj ahte ma kỳx pẽ mẽ akõt ixpar o Asõt wỳr mõi. Hãmri nẽ hwỳr pøj nẽ mẽ anhõi pàr mã axà pu mẽ ma pahpimràatã ma hamũ mõi. Anẽ.

¹⁴ Hãmri pa mẽ kuma nẽ ma mõi nẽ mẽmo arĩgro hã Asõt kamã axpẽn wỳr pøj. Hãmri nhũm Pawre mẽ ixkõt pàr wỳr axà pa mẽ ma krĩ pẽ Mĩtirẽn wỳr mõi. ¹⁵ Nẽ hwỳr pøj nẽ kurũm kormã mõi nhũm apkati pa mẽ gô hipôk pẽ Kiw jakrenh o mõi. Nẽ hakre nẽ mõi nhũm apkati pa mẽ gô hipôk pẽ Sãm wỳr pøj nẽ hã pàr nhõi. Hãmri nhũm apkati pa mẽ axte mõi nẽ Mĩrêt wỳr pøj. ¹⁶ Nom nhũm ra Pawre nojarêt nẽ. Kãm tokyx As rũm kator nẽ Jerujarẽ hwỳr mõi nẽ tokyx hpôx prãm nẽ. Kãm mẽ hkĩnh pẽ Pêtekos xwỳj ri hwỳr hpôx prãm jakamã nojarêt tỳx pa mẽ Epes wỳr inhmõi kêt nẽ.

Pawre kot Epes kamã Kris kwỳjẽ mã amnhĩ jarẽnh

¹⁷ Tã pa mẽ Mĩrêt wỳr pøj nhũm Pawre amnhĩ wỳr Epes wỳr Jesus kwỳ jahkre ho mẽ pa xwỳnhjẽ hã karõ. ¹⁸ Hãmri nhũm mẽ man mẽ ixwỳr mõi nhũm Pawre mẽ omu nẽ mẽ kãm amnhĩ jarẽ nẽ mẽ kãm:

—Nà ixte mẽ amã amnhĩ jarẽnh kaxyw na pa mẽ atã karõ. Ra mẽ ate tanhmã ixte amnhĩ nhĩpêx to hã ixpumunh mex. Wam mẽ awỳr As wỳr ixpôxta ã ka prem aprĩ hã ixpumunh mex nẽ. ¹⁹ Na pa pre mẽ akôt ri mẽ amã tanhmã amnhĩ nhĩpêx to ho ri ixpa. Te ixpê mẽ amã ixàpênh xwỳnh pyràk. Nẽ Pahihti Jejus mã tanhmã amnhĩ nhĩpêx to ho ri mẽ akôt ixpa. Nẽ ixkwỳ Ijaew kwỳ kot Jejus kapêr kaga hã mẽ omu nẽ ixkaprĩ nẽ inhmỳr o ixpa. Nhũm prem Jejus ã ixtomnuj pa amnhĩ xà htỳx kamã ijamak o ri mẽ hkôt ixpa. ²⁰ Nom arĩ ri Tĩrtũm kapêr o mẽ ajahkre ho ri mẽ akôt ixpa rãhã nẽ aa hkaga hkêr nẽ. Mẽ anhõrkwỳ kamã nẽ mẽ ahkre xà hã ixkre kamã. Mẽ ate tãm amnhĩ nhĩpêx prãm xàj pa pre ã mẽ ajahkre mex anhỳr rãhã ho ri mẽ akôt ixpa.

²¹ —Nẽ mẽ ixpê Ijaewjê mẽ mẽ apê Ijaew kêt xwỳnhjê mẽ pa pre mẽ ajahkre ho axpên pyràk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kôt amnhĩ nhĩpêx kaxyw. Nẽ amnhĩ kaxyw mẽ panhõ Pahihti Jejus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixpa.

²² —Tã ra Tĩrtũm Karõ kot akupỹm Jerujarẽ hwỳr inhmẽnh jakamã pa kormã hwỳr mỗ. Kot paj hwỳr pôj nhũm krĩ nhõ xwỳnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt. ²³ Ja pix na ixte omunh. Na pa hte nhỹri pôj nhũm htem Jejus ã ixpynê nẽ mẽ hagjênh xà kamã ijagjê nẽ tanhmã inhĩpêx to. Tĩrtũm Karõ na pre ra ã mẽ kot inhĩpêx anhỳrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ

hwỳr pòj nhũm mẽ ixpumu nê Jejus ã tanhmã inhĩpêx to. ²⁴ Tã no pa amnhĩ kamã ixkahak kêt o inhmã mẽ uma hkêt nê. Koja mẽ kãm ixpĩr prãm nê mãmĩrĩ ixpĩ. Inhmã ixtyk pyma hkêt. Âm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapê hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panê tanhmã amnhĩ nhĩpêx to hã harênhja na inhmã mẽ piitã mẽ kãm harênh jatur xàm mẽnh prãm.

²⁵ —Tã e ixkràmnhwỳjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pěr mẽ axte axpẽn pumunh kêt nê.

²⁶⁻²⁷ —Na pa pre ra mẽ amã Tĩrtũm kapěr piitã harênh pa. Mẽ ate mar tỳx nê hkôt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwỳnhjê hõ amnhĩ kaxyw Jejus kôt hamaxpěr prãm kêt nê rĩ tãm. Kwār mãmĩrĩ kot amnhĩ tomnuj kamã ty nê arĩ tãm amnhĩ pumu no ãm kê amnhĩ tã tanhmã inhmã nê hkêt nê.

²⁸ —E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nê mẽ kot Jejus kôt amnhĩ xunhwỳr xwỳnhjê jamār mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamār xwỳnh kot ôwêhti jamār mex o ri pata pyràk.

²⁹ —Kot paj ma mỗ nhũm mẽmojjaja ixpãnhã mẽ awỳr pòj nê mẽ ate Jejus kaga hprãm xàj tanhmã

mê amã hêx to ho ri mê akôt pa. ³⁰ Nê mê akwỳjaja mê urà nê tanhmã hamaxpêr punuj to nê mê ate Jejus kaga hprãm xàj hêx rom tanhmã mê amã kapêr to ho ri mê akôt pa. ³¹ Jakamã kwa mê o kora. Kêr ka mê axkãm ajamak rom nê ri apa. Kê jajaja nhỹrmã ã mê amã kapêr anê ka mê ama nê mê hkôt ajamaxpêr kêt nê. Mê ate mê mar nê mê hkôt ajamaxpêr pymaj na pa pre mê akôt ri mê ajahkre ho ri ixpa hã ixtã amgrã axkrunêpxi. Arĩgro hã nê kamãt kãm mê ajahkre rũnh o ri ixpa. Nê mê ate mê amã mê hêx xwỳnhjê hkôt amnhĩ xunhwỳr pymaj mê ajahkre pê te inhmỳr pyrãk o ri mê akôt ixpa.

³² —E kot paj Tĩrtũm nhĩhkram mê ajagjênh pa. Koja mê atãnopxar o ri mê akôt pa nê mê akutã nojarêr rãhã ho pa. Hãmri ka mê ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã Tĩrtũm mê pahpê hkrajê piitã tanhmã mê pahto mex to.

³³ —Na pa pre mê akôt ixpa ry htã no ãm aa mẽmoj tã mẽ awỳr kêt nê. Mê axê hkwỳ hã mẽ awỳ rỳ mẽ akàxpore hã mẽ awỳr o ri ixpa hkêt nê. ³⁴ Na pa pre amnhĩ pa kukwak ri amnhĩm ixujaprôr pê ixàpkur o ri mê akôt ixpa. Nê ixkôt mẽ pa xwỳnhjê mã ixujaprôr o ri ixpa. Ra mẽ ate ja hã ixpumunh mex.

³⁵ —Tã mẽmo kaxyw na pa pre ã mẽ akôt amnhĩ nhĩpêx anhyr o ri ixpa? Nà mẽ ate ja hã ixpumunh nê ixpyrà nê ã amnhĩ nhĩpêx anhyr o ri apa kaxyw. Nê ixpyrà nê tanhmã mẽ kute xwỳnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã

měmoj gô hămri nê akĩnh tỳx o ate mēhō mã mẽmoj nhōrta jakre.” Anē.

³⁶ Na pre ã Pawre mẽ kām ujarēnh anhỹr pa hămri pa mẽ ra inhnojarēt. Hămri nhũm mẽ piitã hkōnkrã ho hkrĩ pa nhũm Pawre mẽ ho Tĩrtũm wỳ. ³⁷⁻³⁸ Hămri nhũm mẽ piitã kām Pawre hkĩnh tỳx jakamã mỳr rax o kuhê. Tee ri kot axte mẽ kot axpēn pumunh kêt ã mẽ kām amnhĩ jarēnhja ma nê hkaprĩ htỳx nê. Nê hkaprĩ xà kahti hkôt hamỳ nê mur. Hămri nê ma Jerujarē hwỳr hkujaêk kaxyw mẽ ixkôt pàr wỳr hkaprĩ nê mẽ ixkôt mỳr o mō.

21

Pawre kot Jerujarē hwỳr hpôx ã harēnh

¹ Tã pa mẽ gô mỳri Jejus kôt mẽ ixtōjê re nê pàr krem agjê nê axte mō. Ma gô hipôk pê Kosti hwỳr ixkatat kôt mō nê hã ajêt. Hămri nhũm apkati pa mẽ axte hamũ mō nê hpānhã gô hipôk pê Roxti hwỳr mō nê hwỳr pôj nê hã pàr xi. Hămri nê hpānhã axte krĩ pê Patar wỳr mō. ² Hămri nê hwỳr pôj nê pàr rũm ijapôj nê pàr ò pumu. Nhũm ra pyka pê Wēnĩs wỳr nojarēt pa mẽ hwỳr agjê nê ma kamã axte mō. ³ Mōō nê amỳm amnhĩ kukamã gô hipôk pê Sipre pumu. Hămri nê upôk rũm hakrenh mã mō nê pyka pê Sir wỳr mō nê kamã Xir hwỳr pôj nê hã pàr nhô. Pàr pām kot krĩ kamã pàr kukrêx rer kaxyw pa mẽ kormã hã ajêt nê tokyx axte nhām inhmôr kêt nê. ⁴ Hămri pa mẽ kutêp api nê krĩ kamã mẽ kot Jejus kôt axpēn to htō nê htōx xwỳnhjê japêr o mō. Hămri nê nhỹri mẽ omu nê mẽ hkôt ri ixpa ho ixtã ù semăn. Nhũm prem Tĩrtũm Karō nhỹ hã Pawre mã kapêr nê kām:

—Kwa Pawre mẽ inhma. Kot ka Jerujarẽ hwỳr pøj nhũm xep mẽ kãm akurê xwỳnhjaja tanhmã anhĩpêx to. Tĩrtũm Karõ na ã akukamã mẽ inhmã ajarẽnh anẽ. Jakamã kwa hwỳr amõr kêt nẽ. Na pa mẽ tee ri akukamã ijamaxpêr. Anẽ.

⁵ Hãmri nhũm amnhĩ tã mẽ kuma nẽ ãm mẽ kuma nẽ Jerujarẽ wỳr hkrà kamã hihtỳx nẽ. Jakamã nhũm semãn hapêx pa mẽ axte inhnojarêt. Axte Jerujarẽ hwỳr kormã inhmõr kaxyw inhnojarêt. Nhũm Jesus kôt mẽ ixtõjaja mẽ kot mẽ ixkujaek kaxyw piitã pàr wỳr mẽ ixkôt mỗ. Mẽ hprõ nẽ mẽ hkrajê mẽ nhũm mẽ pimràatã mẽ ixkôt mỗ. Hãmri pa mẽ pàr wỳr pøj nẽ gô mỳ ri ixpiitã ixkõnkrã ho ixkrĩ hpa nẽ amnhĩ to Tĩrtũm wỳ. ⁶ Hãmri nẽ mẽ kãm amnhĩ jarẽnh pa nẽ mẽ noo mã pàr krem agiê nẽ ma axte mỗ nhũm mẽ awjanã nẽ ma akupỹm òrkwỹ hwỳr hapêx. Hãmri pa mẽ kurũm kormã ma Jerujarẽ hwỳr mỗ. ⁷ Mỗ nẽ krĩ pê Poremax wỳr pøj nẽ hã ajêt. Hãmri nẽ pàr rũm ijapøj nẽ axte krĩ kamã Jesus kôt mẽ ixtõ nẽ mẽ ixtõxjê japêr o mỗ nẽ nhỹri mẽ omu nẽ mẽ kuri amnhĩm hikra.

⁸ Tã nhũm apkati pa mẽ axte mỗ. Pãnhã ma krĩ pê Sejarej wỳr mỗ. Hãmri nẽ hwỳr pøj nẽ Firipti kuri pøj. Firiptija kormã nyw ri mẽ kot Jerujarẽ kamã mẽ mjên htyk xwỳnhjê mã mẽ apkur xà nhõr ho pa kaxyw mẽ ho ⁷ nẽ mẽ unhwỳr xwỳnhhtajê hõ na pre. Tã hpãnhã kêp Tĩrtũm kapêr jarẽnh o pa xwỳnh. ⁹ Nhũm hkra nijaja kêp kwat. Piitã mjên kêt nẽ hkukrit rãhã pa. Mẽ kêp Tĩrtũm nhỹ hã kapêr o mẽ pa xwỳnh na pre mẽ. Jakamã pa mẽ mẽ kuri pøj. ¹⁰ Hãmri nẽ mẽ hkôt ri ixpa hã ixtã apkati grêre nhũm Akapô Jutej rũm man mẽ ixwỳr mỗn

pôj. Kêp Tĩrtũm nhỹ hã kapêr jarênh o pa xwỳnh na pre. ¹¹ Hãmri nê mẽ ixwỳr pôj nê Pawre pumu nê hkukamã kot tanhmã harênh to kaxyw hwỳr tẽn kêp hprexà kapa nê ho amnhĩ te hpre nê ho amnhĩ pa hpre nê xa. Hãmri nê mẽ inhnoo mã Tĩrtũm Karô nhỹ hã mẽ kot tanhmã hipêx to hkukamã kãm awjarê nê kãm:

—E kot kaj Jerujarê hwỳr pôj nhũm Ijaew xàptàr tũmjaja apumu nê ã anhĩpêx anê nê apa hpre nê ate hpre hãmri nê Ijaew kêt xwỳnhjê nhĩhkram ajaxà. Koja mẽ ã anhĩpêx anê. Anê.

¹² Hãmri pa mẽ tee ri ã ujarênh anhỹrja ma nê Pawre kamã ixkahak tỳx nê ixkaprĩ nê inhmỳr o ixkrĩ. Nê xatã kot mẽ hwỳr mōr nê kãm ixkapêr kãm ixihitỳx nê kãm:

—Kwa mẽ ixkapêr ma Pawre. Mẽ hwỳr amōr kêt o mẽ hwỳr amōr kêt. Anê.

¹³ Hãmri nhũm mẽ inhmã:

—Tk. Kwa mẽ amỳr kêt nê. Na pa mẽ apumu nê ixkaprĩ nê. Nà kot paj ma mẽ hwỳr mō. Kwār mẽ māmri Pahihti Jejus ã tanhmã ixto rỳ hã ixpĩ. Ixte amnhĩ kamã ixkahak kêt. Anê.

¹⁴ Hãmri pa mẽ tee ri mẽ hwỳr mōr nê hkurê kaprỳ nê kãm:

—Tôe. Nà kam nê Tĩrtũm kãm hprãm xà hkôt māmri mẽ hwỳr mō rỳ mẽ hwỳr amōr kêt nê. Anê.

¹⁵ Tã pa mẽ ra inhnojarêr nê amnhĩ to ix-pikuprōnh pa nê ma Pawre hkôt Jerujarê hwỳr tã ma mō. ¹⁶ Hãmri nhũm Sejarej kamã Jejus kôt mẽ ixtō hkwyjaja ma mẽ ixkôt mō. Pa mẽ mōo nê Jerujarê hwỳr pôj. Hãmri nhũm mẽ ixkôt mẽ mōr xwỳnhjaja mẽ ixto mō nê Mēnasō nhōrkwy hwỳr mẽ ixto pôj. Mēnasōja Sipre kamã na pre kato. Tã

hpãnhã Jerujarẽ hwỳr ahpa nẽ kamã ri pa ho pa. Na pre ra Jejus kôt amnhĩ xãm ã hã amgrà xohtô nẽ. Tã pa mẽ kuri pøj.

Pawre mẽ Xiakre wa harẽnh

Atre 15.3-21; Wam Korĩt 9.19-22, 10.32-33

¹⁷ Tã pa mẽ Jerujarẽ hwỳr pøj nhũm Jejus kôt mẽ ixtøjaja mẽ ixpumu nẽ hkĩnh nẽ. ¹⁸ Hãmri nhũm apkati pa mẽ ma Pawre hkôt Xiakre hwỳr mỗ. Nhũm mẽ kot Tĩrtũm kapẽr o mẽ ahkre xwỳnh piitã ra kuri akuprô nẽ mẽ ixkutêp hkrĩ. ¹⁹ Jakamã nhũm Pawre mẽ hwỳr axà nẽ mẽ kãm tanhmã amnhĩ nhĩpêx to ho pa hã amnhĩ jarẽ nẽ mẽ kãm:

—Pa na ka mẽ rĩ akrĩ. E ot pa axte mẽ apumunh mã mỗ. Ixte mẽ amã amnhĩ jarẽnh ã amnhĩ jarẽnh kaxyw. Nà na pa pre ma Ijaew kêt xwỳnhjê hkôt ixpa nẽ mẽ kãm Jejus kot mẽ panê tanhmã amnhĩ nhĩpêx to jarẽnh o ri mẽ hkôt ixpa. Nhũm Tĩrtũm inhĩhkô hã ixkutã nojarêt mex jakamã nhũm prem inhma nẽ ohtô rax nẽ mẽ pahpyrà nẽ Jejus kôt amnhĩ xunhwỳ. Anẽ.

²⁰⁻²⁵ Hãmri nhũm mẽ Ijaew kêt xwỳnh kwỳjaja kot Jejus kôt amnhĩ xunhwỳr ã mẽ harẽnh ma nẽ mẽ ỹ hã hkĩnh nẽ mẽ hã Tĩrtũm mã mex o mex ã harẽ. Hãmri nẽ Pawre mã kãm:

—Nà na pa prem ra mẽ harẽnh ma. Hãmri nẽ mẽ kãm kagà nhĩpêx nẽ mẽmoj tã mẽ kãm karô nẽ mẽ hwỳr kumẽ. Mẽ kot omunh nẽ kamã harẽnh nẽ hkôt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nẽ mẽ hkurê.

Nẽ mry kamrô hkur nẽ mẽ hkurê.

Nẽ mẽmo mry hpar nẽ hkamrô runh kêt rãhã hkur nẽ mẽ hkurê.

Ně mẽ kot amnhĩ prõ pix tănopxar kaxyw mẽ kãm
hã karõ.

Ně mēnijaja kot amnhĩ mjên pix tănopxar kaxyw mẽ
kãm hã karõ.

Ně nhãm mẽ kot axpẽn to amnhĩkati nê mẽ hkurê.
Ã na pa prem ja hã kagà nê mẽ hwỳr mēnh anē.
Jakamã e mẽ inhma. Na ra mẽ pahpê Ijaew
kwỳjaja ohtô rax kumrêx nê mẽ pahpyrà nê Jejus
kôt amnhĩ xunhwỳ. Mãn ka pre mẽ harēnh ma.
Na htem Jejus kôt amnhĩ nhĩpêx o pa jao mǎănēn
Tĩrtũm nhỹ hã Mojes kapêr kôt amnhĩ nhĩpêx mex
o pa. Tã nhỹri mẽ kot tanhmã ato hêx to hã ajarēnh
ma. Na ka xep hte Ijaew kêt xwỳnhjê nhõ krĩ kamã
pôj hãmri nê mẽ õ krĩ kamã Ijaew kwỳjê pumu
nê mẽmoj nê tanhmã mẽ kãm akapêr to ho ri apa.
Nom Ijaew kêt xwỳnhjê mã ka xep hte ã mẽmoj nê
akapêr anhỹr kêt nê. Ấm Ijaew mã pix mã ka xep
hte mẽ kot finat Mojes kapêr kôt amnhĩ nhĩpêx nê
mẽ hkurê ho ri apa. Nẽ mẽ panhĩgêr kot amnhĩ
nhĩpêx kuhpa hã mẽ kot mẽ hkra my kwỳt kà
jakàr nê ka xep hte mẽ hkurê ho ri apa. Nẽ mẽ
kot mẽ panhĩgêr kôt amnhĩ nhĩpêx nê ka xep hte
mǎănēn mẽ hkurê ho ri apa. Mẽ kêp Ijaew tã ka
xep pre hte ã mẽmoj nê mẽ hkurê anhỹr ho ri apa.
Na prem jar ã Ijaewjê mã ato hêx o pa anē nhũm
mẽ kuma nê mẽ hkôt hamaxpêr kurê kumrêx. Jao
ra ate mẽ pahpê Ijaew kot amnhĩ nhĩpêx kôt amnhĩ
nhĩpêx kêt ã akamnhĩx.

—Tã ra mẽ kot apôx ã ajarēnh mar jakamã
tanhmã kot kaj we mẽ kãm amnhĩ tã axàprār
to? Nẽ tanhmã kot kaj we mẽ noo mã amnhĩ
nhĩpêx to kê mẽ arĩ mẽ pahte amnhĩ nhĩpêx kôt
ate amnhĩ nhĩpêx o apa hã apumu? E na pa mẽ

ra ijamaxpêr. Kot ka ã amnhĩ nhĩpêx anê. Na ra jar mẽ pahkwỳjaja kêp kwat nê Tĩrtũm mã tanhmã amnhĩ jarênh to jatur xàm mẽnh kaxyw amnhĩ krã hkênh mã. Jakamã e kêr ka ma mẽ hkôt tê nê mẽ uràk nê amnhĩ krã hkênh nê kam nê mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anê hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nê mẽ kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mẽ kuma nê mẽ kãm:

—Tôe. Nà ãm hãmri na ka mẽ inhmã awjarê. Nà kot paj ã amnhĩ nhĩpêx anê. Anê.

Jakamã nhũm apkati nhũm ma mẽ kêp 4tajê o mô nê mẽ mex kaxyw tanhmã amnhĩ nhĩpêx to. Hãmri nê Tĩrtũm mã amnhĩ jarênh xà hã ixkre hwỳr mra nê agjê nê mẽ ô patre mã mẽ amnhĩ jarê nê kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarênh to. Tã kot paj mẽ axte ixtã ù semãn hãmri nê hatur xàm mẽnh kaxyw akupỳn awỳr mra nê amã mẽmoj gô ka mẽ inhmã Tĩrtũm mã agô nê hkôt kãm mẽ ijarê. Nê pa kot paj mẽ ixpiitã hpãnhã amã amnhĩre. Anê.

Mẽ kot Pawre pynênh ã mẽ harênh

Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwỳjaja ma mra nê Tĩrtũm mã amnhĩ jarênh xà hã ixkre hwỳr agjê. Hãmri nê kamã Pawre pumu nê kamã gryk tỳx nê hwỳr hprôt nê unê nê tanhmã hkwyjê mã ho hêx to nê ho kapêr punuj nê. Nê mẽ kãm:

28 —E mẽ amnẽ mra nẽ jahti pumu. Na hte krĩ piitã hkôt ri mẽ pahkwỳjẽ mã tanhmã ri hêx to ho pa. Tĩrtũm nhỹ hã finat Mojes kapẽr nhũm mẽ kãm ho kapẽr punuj o pa. Nẽ mẽ pahte Tĩrtũm mã amnhĩ jarẽnh xà hã ixkreja nhũm hte mãânẽn tanhmã mẽ kãm ho kapẽr punuj to. Mẽ pahpyrà nẽ kêp Ijaew tã mẽ pahpê hkwỳ ho kapẽr o pa. Tã ra axtem nẽ amnhĩ kôt Tĩrtũm nhõ ixkre hwỳr Ijaew kêt xwỳnh kwỳjẽ ho agjê. Mẽ kot hwỳr gjêx kêt kumrêx tã nhũm axtem nẽ amnhĩ kôt mẽ ho agjê. Anẽ.

29 Na pre krĩja kamã Ijaew kêt xwỳnh Topĩja Pawre hkôt pa nhũm mẽ omu. Kêp Epes nhõ xwỳnh nhũm mẽ kot pry ã Pawre hkôt pa hã omu. Tã hã ahtũm nẽ Tĩrtũm mã amnhĩ jarẽnh xà hã ixkre kamã Pawre pumu nẽ htỳx amnhĩ kôt Topĩ ho àr ã hkamnhĩx nẽ ã mẽ kãm harẽnh anẽ. 30 Hãmri nhũm mẽ kuma nẽ Pawre kamã gryk tỳx nẽ. Nẽ hwỳr hprôt nẽ unê nẽ ixkre rũm ho kato nẽ kêp hakwa kre kahê. 31-32 Hãmri nẽ ma o tẽ nẽ htak rax nẽ. Ra mẽ kot htak o hpĩr mã tã nhũm mẽhõja pôristi krãhtũm wỳr hprôt nẽ kãm awjarẽ nẽ kãm:

—Kwa o mũj mẽ ra kot axpẽn nhĩmex kaxyw pijapu ho kuhê. Anẽ.

Hãmri nhũm tee ri kuma nẽ pôristi hkwỳjẽ mã anẽ nẽ mẽ ma mẽ hwỳr hprôt kurê kumrêx. Nhũm mẽ arĩ Pawre htak tã amnhĩ wỳr mẽ omu nẽ mẽ umaj kãm ure. 33 Hãmri nhũm pôristi krãhtũm Pawre hã amỹnê nhũm pôristijaja unê nẽ kàx o mẽ hkaxprexà ho axkrut nẽ ho hkaxpre pa. Hãmri nhũm mẽ hkrãhtũm Pawre hã mẽ hkukja nẽ mẽ kãm:

—Kwa mẽ atõ inhmã jahti jarẽ. Tanhmã na hixi te? Tanhmã na we amnhĩ tomnuj to hã na ka mẽ ã hipêx anẽ? Anẽ.

³⁴ Hãmri nhũm mẽ kuma nẽ piitã anhĩpê kàxpê kãm tanhmã harẽnh to. Nom axpẽn kwỳm tanhmã ri kãm harẽnh to. Hãmri nhũm tee ri hprĩ hã kot mẽ mar kaxyw hãmri nẽ pôristi mã anẽ nhũm mẽ kêp Pawre ho kato nẽ ma mẽ àpênh xà hã ixkre hwỳr o tẽ. ³⁵⁻³⁶ Hãmri nhũm Ijaew kwỳ ohtô nẽ pry hã axpẽn nhĩgãnh o hkôt mra. Nẽ gryk xàj kapêr punuj tỳx o mẽ hkôt mỗ nẽ kàx pê pôristi mã kapêr nẽ mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anẽ.

Jakamã nhũm pôristija tee ri mẽ kuma hãmri nẽ mẽ kot tanhmã ho pymaj kumỳ nẽ kỳx pê mẽ kêp kupê nẽ o mỗ. Jao ixkreja wỳr mẽ àpir xà hã ho àpir o mỗ. ³⁷ Nẽ kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarẽ ka inhma. Anẽ.

Mẽ kapêr o kãm kapêr hãmri nhũm amnhĩ jaêr pê kuma nẽ kãm:

—Kwa xà na ka mẽ ixpyrà nẽ Gresjê kapêr o akapêr? ³⁸ Na pa ixtỳx apê Ejit nhõ xwỳnh pê mẽ hpar o apa xwỳnhta ã akamnhĩx. Ham na pre mẽ inhõ pahĩhti kutã amnhĩ xãm nẽ kot hkurê kaxàr kaxyw mẽ ho ajuta xwỳnhjê ho 4.000 nẽ mẽ hkurê nẽ ma kapôt ã mẽ o pa. Nom tãm na xep Gresjê kapêr o kapêr kêt nẽ. Anẽ.

³⁹ Hãmri nhũm Pawre kãm:

—Nà ixpê Ejit nhõ xwỳnhta kêt. Ixpê Ijaew na pa. Pyka pê Siris kamã krĩ rax pê Tas kamã na pa

pre ixkato. E xà kot paj ixkôt mẽ mör xwỳnh nễ
mã ixkapěr nà? Anễ.

⁴⁰ Hāmri nhũm kām:

—Tõe. Kam nễ māmri tanhmã mẽ kām akapěr to.
Anễ.

Hāmri nhũm mẽ àpir xàta ã kỳx pê mẽ mỳri xa
nễ kànhmã mẽ kām ìhkra pê nhũm mẽ omu nễ
hpinhkrênh pa nhũm mẽ kām amnhĩ jarẽ.

22

Pawre kot kām hkurê xwỳnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapěr o mẽ
kām kapěr nễ mẽ kām:

—E ixkwỳjaja. Pa mẽ amã amnhĩ jarẽ ka mẽ
inhma. Anễ.

Hāmri nhũm kot mẽ kapěr o kapěr ma nễ
hpinhkrênh pa nễ akryk mar o kuhê nhũm mẽ
kām:

³—Nà ixpê mẽ anhĩõ na pa. Ijaxwỳja ixpê Ijaew.
Pyka pê Siris kamã krĩ pê Tas kamã na pa pre
ixkato no ãm jar Jerujarẽ kamã na pa pre ixàptàr.
Kamariew na pre hte ijahkre ho pa. Finat Mojes
kot Tirtũm nhỹ hã mẽ panhĩgêjtjê mã kapěrja nhũm
pre hprĩ hã ho ijahkre ho pa. Na pa pre mẽ apyrà
nễ inhmã Tirtũm kôt amnhĩ nhĩpêx prãm nễ.

⁴—Jakamã na pa pre mẽ pahkwỳ kot Jesus kôt
amnhĩ xunhwỳr xwỳnhjê japêr o ixpa nễ nhỹri mẽ
kām ixkato nễ mẽ unê. Memyjê pynê nễ mênijê
pynê. Hāmri nễ mẽ kot mẽ hpar kaxyw mẽ hagjênh
o ri ixpa. ⁵ Na pa pre ã mẽ hipêx o ri ixpa anễ. Mẽ
panhõ patre maati nễ mẽ àptàr tũmrejaja ra mẽ kot
ja hã ixpumunh mex. Mẽ tãmjaja na prem krĩ pê

Tamas kām mẽ pahkwỳjê kaxyw kagà nhĩpêx nê inhmã kugõ pa kupy nê ma mẽ hwỳr o mỗ. Ixte mẽ õ krĩ kamã Jesus kwỳjê pynênh par nê man akupỹn Jerujarê hwỳr mẽ ho inhmõr nhũm mẽ kot tanhmã mẽ ho kaxyw.

⁶ —Tã ra myt ahpã pa mẽ hwỳr ixàhtêp o mỗ. Puh nhũm kaxkwa rũm hirã rax kumrêxja ixwỳr wrỳ nê ixtã ajêt pa hipôk ri xa. ⁷ Hãmri nê umaj pykap tẽm nhũm mễhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê. ⁸ Hãmri pa kãm: “Kwa mẽ atõ na ka ri ã inhmã akapêr anê pahihtĩ?” Anê nhũm inhmã: “Ixpê Najare nhõ xwỳnh Jesus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyràk.”

⁹ —Anhỹr o inhmã kapêr nhũm ixkôt mẽ pa xwỳnhjaja kuma no ãm hprĩ hã mar mex kêt nê. ãm hirã raxta pix pumu. ¹⁰ Tã pa kãm: “No tanhmã kot pa we amnhĩ to Pahihtĩ?” Anê nhũm inhmã: “E kànhmã xa nê mãmri ma Tamas wỳr mỗ. Kot kaj hwỳr pỏj nhũm mễhõ awỳr tẽ nê mẽmoj tã amã karõ ka ama nê hkôt amnhĩ nhĩpêx.” Anê.

¹¹ —Nhũm pre ã inhmã kapêr anê. Hãmri pa hirã rax pumunh o ixãm kurê ra inhnno hkre nê ixrĩt kêt nhũm ixkôt mẽ pa xwỳnhjaja ixpa hã ixpy nê ma Tamas wỳr ixto mỗ nê ixto pỏj.

¹² —Tã nhũm Tamas nhõ xwỳnh pê ãnãĩsti ixwỳr tẽ. Na pre hte Tĩrtũm kapêr ã kagà htũm kôt amnhĩ nhĩpêx mex nhũm Tamas kamã Ijaew piitã kãm hkĩnh nê axpẽn mã mex ã harê. ¹³ Jakamã nhũm ixwỳr tẽ nê inhmã: “Pa Jesus kôt ixtõ Sawti? E akupỹm rĩt.” Anhỹrja kôt pa akupỹm ixrĩt mex

kurê kumrêx nê omu. ¹⁴ Hămri nhũm inhmã: “Nà mẽ panhîgêjtê nhõ Tĩrtũm na amnhĩ kaxyw ata. Ate kapêr mar nê hkôt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. ¹⁵ Jakamã kêr ka ma mẽ piitã mẽ kãm ate omunh xwỳnhja jarênh o ari mẽ hkôt apa. Nê mẽ kãm kapêr jarênh o mẽ ahkre ho ri apa. ¹⁶ E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hămri pa apê hkwỳ hã akrã kumrã ka ma mẽ kãm kapêr jarênh o ri apa.” Anê.

—Nhũm pre ã ãnãñisti inhmã kapêr anê.

¹⁷ —Tã pa man akupỹn jar Jerujarê hwỳr mẽ awỳr mỗ. Hămri nê jar Tĩrtũm mã amnhĩ jarênh xà hã ixkre kamã kãm amnhĩ jarênh o ixãm rôm axte mẽmoj pumu. ¹⁸ Nhũm Jejus axte ixwỳr kato nê xa nê inhmã kapêr nê inhmã: “E inhma. Jerujarê nhõ xwỳnhjaja kãm ixkapêr mar prãm kêt jakamã kot kaj mẽ kãm ixkapêr jarê nhũm mẽ amar kêt nê. Jakamã kwa tokyx akato nê hpãnhã ma nhỹhỹm mỗ.” Anê.

—Hămri pa tee ri ã kapêr anhỹrja ã kuma nê kãm: ¹⁹ “Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kôt mẽ kot ixpumunh mex. Na pa pre hte krĩ piitã hkôt mra nê Tĩrtũm kapêr o mẽ ahkre xà hã ixkre kamã mẽ kot akôt amnhĩ kaxyw hamaxpêr xwỳnhjê pynê nê mẽ htak nê mẽ hagjênh xà kamã mẽ hagjê nhũm mẽ kot ja hã ixpumunh mex. ²⁰ Nhũm mẽ kot akapêr jarênh o pa xwỳnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinôkà jamỳnh o hã

mě omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nẽ akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nẽ kãm ixkapêr mar prãm nẽ.” Anẽ.

²¹ —Pa pre ã Jejus mã amnhĩ jarênh anẽ nhũm inhmã: “Nà. Kêr ka mãmri krĩja rũm akato nẽ ma nhỹhỹm mỗ. Kot paj hpãnhã ma Ijaew kêt xwýnhjê hwýr amẽ ka hpãnhã ma mẽ hwýr mỗ nẽ mẽ hkôt mẽ kãm ixkapêr jarênh o ri apa.” Anẽ.

²² Nhũm pre Pawre ã amnhĩ hkwýjê mã amnhĩ jarênh anẽ nhũm mẽ arĩ mar o kuhê rãhã Ijaew kêt xwýnhjê jarênh ma nẽ kamã gryk tỳx nẽ. Ijaew kêt xwýnhjaja kot mẽ uràk nẽ Tĩrtũm kapêr marja nhũm mẽ kãm hprãm kêt jakamã nhũm Pawre ã mẽ harênh anẽ nhũm mẽ kuma nẽ kamã gryk tỳx kumrẽx. Nẽ gryk xàj kapêr punuj nẽ kapêr o:

—Kwa mẽ mãmri apĩhti ri. ãm hpĩr mã htãmti kênã. Anẽ.

²³ Hãmri nẽ gryk xàj amnhĩ nhĩnôkà hkwrý nẽ ho apê nẽ pyka jamý nẽ kànhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

²⁴ Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nẽ mẽ kapêr ma nẽ pôristijê mã kapêr nẽ mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anẽ? E mẽ tokyx ixkre hwýr ho axà nẽ mẽ htak xà ho htak kê mẽ pamã tanhmã amnhĩ jarênh to. Anẽ.

²⁵ Hãmri nhũm mẽ kuma nẽ ho axà nẽ htak kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nẽ hã mẽ

omunh o xa nhũm Pawre omu nẽ amnhĩ tã kãm kapẽr nẽ kãm:

—Kwa kormã ixte tanhmã mẽ amã amnhĩ jarẽnh to hkêt tã ka mẽ ixtak kaxyw. Ixpê Ijaew tã mãănẽn ixpê Rôm nhõ xwýnh kênã. Xà na htem ã Rôm nhõ xwýnhjê nhĩpêx anẽ? Anẽ.

²⁶ Hãmri nhũm tee ri ã amnhĩ jarẽnh anhỹrja ã kuma nẽ pôristi krãhtũmja wýr hprôt nẽ kãm:

—Kwa taxy pu mẽ tanhmã ho hkêt nẽ. Xep kêp Rôm nhõ xwýnh kênã. Anẽ.

²⁷ Hãmri nhũm tee ri kuma nẽ Pawre hwýr axà nẽ kãm:

—Kwa xà ãm hãmri na ka amnhĩ jarẽ? Xà apê Rôm nhõ xwýnh na ka? Anẽ.

Hãmri nhũm kãm:

—Tỳ. ãm hãmri ixte mẽ amã amnhĩ jarẽnh kênã. Ixpê Rôm nhõ xwýnh na pa. Anẽ.

²⁸ Hãmri nhũm kãm:

—Kwa pa na pa pre amnhĩ to Rôm nhõ xwýnh prãm xaj amnhĩ pãnhã mẽ kãm amnhĩrer rax nẽ. Anẽ.

Nhũm Pawre kãm:

—Tỳ nom pa na pa pre amnhĩ pãnhã mẽ kãm amnhĩrer kêt nẽ. Inhĩpêxà hkôt ixpê Rôm nhõ xwýnh na pa. Anẽ.

²⁹ Hãmri nhũm mẽ kuma nẽ tee ri hamaxpêr o kãm ma nẽ. Nẽ kãm ma ho hkaga kurê kumrêx. Nhũm mẽ hkrãhtũm nhõ pahija mãănẽn kãm ma nẽ. Kêp Rôm nhõ xwýnh tã nhũm mẽ axtem nẽ kot unênh nẽ kax o hkaxpreja mã hamaxpêr nẽ kãm ma nẽ. Na htem ã Rôm nhõ xwýnhjê nhĩpêx anhỹr kêt nẽ. Na htem tanhmã mẽ hkukjêr to nẽ hprĩ hã mẽ kuma nẽ rĩ kormã tanhmã mẽ hipêx to.

Pawre kot Ijaew xàptàr tũmrejê mã amnhĩ jarẽnh

Matêwre 23.27-28

³⁰ Tã nhũm apkati nhũm pôristi krãhtũmjaja Ijaew kwỳ ho akuprõ. Mẽõ patre maati nẽ patre krãhtũmjaja nẽ mẽ àptàr tũmrejaja nhũm kot mẽ kãm tanhmã Pawre jarẽnh to kaxyw mẽ ho hpikuprõnh pa. Hãmri nẽ Pawre pẽ hkaxpre xà rê nẽ ma mẽ hwỳr o tẽ nẽ mẽ kutã ỹr.

23

¹ Hãmri nhũm mẽ omu nẽ mẽ kãm amnhĩ jarẽ nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Na pa hte Tĩrtũm nom tãm amnhĩ nhĩpêx o ixpa nẽ mẽ pahpê Ijaew mẽ pahte amnhĩ nhĩpêx kwỳm ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ănănĩsti kuma nẽ kamã gryk nẽ. Axtem ănănĩsti hõ na pre. Hãmri nẽ ã Pawre kot amnhĩ jarẽnh anhỹrja ã kuma nẽ kamã gryk nẽ. Hãmri nẽ mẽ kot mar o kuhê xwỳnhjê mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

³ Hãmri nhũm Pawre kuma nẽ hwỳr rĩt nẽ omu nẽ kãm:

—Nà ka koja Tĩrtũm akura kãm ga. Te ate finat Mojes kot ỹ hã kapêr kôt amnhĩ nhĩpêx pyrak tã ri axtem nẽ ri mẽ kot ijakwap ixkuranh kaxyw ri mẽ kãm ixtã amỹnê. Anẽ.

⁴ Hãmri nhũm kuri mẽ kuhê xwỳnhja tee ri ã kãm kapêr anhỹrja ã kuma nẽ kãm:

—Kwa kêp patre maati kênã kot ka kêt ri ã kãm akapêr anẽ. Anẽ.

⁵ Hāmri nhũm amnhĩ jaêr pê ja hã kuma nê kãm:
 —Kwa ixte ja hã omunh kêt jakamã na pa ã
 ixtỳx kãm ixkapêr anê. Ixte kêp patre maati hã
 omunh ronhỹx pa ã kãm ixkapêr anhỹr kêt nê.
 Tĩrtũm kapêr ã kagà htũm kot ja nê mẽ pamã
 kapêr kênã. Mẽ pahte tanhmã mẽ panhõ pahi ho
 pakapêr punuj to nê mẽ pamã kapêr. Tã pa ãm
 ixtỳx ã kãm ixkapêr anê. Anê.

⁶⁻⁸ Hāmri nê hprĩ hã mẽ kot mar o hkrĩ xwỳnhjê
 pumu. Nhũm mẽ kamã Satusew nhõ xwỳnh kwỳ
 nê Parijew nhõ xwỳnh kwỳ. Satusew mẽ Parijew
 nhõ xwỳnhjaja na htem axpẽn kwỳm ri tanhmã mẽ
 htykjê jarênh to. Satusew nhõ xwỳnhjaja na htem
 mẽ htyk nê mẽ hkarõ mẽ ro hã mẽ hapêx o mẽ
 hapêx ã mẽ hkamnhĩx. Nê Tĩrtũm kapêr o mẽ wrỳk
 xwỳnh kêt ã mẽ harênh o pa. No Parijewjaja na
 hte mẽ kurom mẽ htyk nê akupỹm mẽ htĩr ã mẽ
 hkamnhĩx nê Tĩrtũm kapêr o mẽ wrỳk xwỳnh ã
 mẽ hkamnhĩx. Nhũm Pawre kot ja hã mẽ omunh
 jakamã tanhmã hamaxpêr to hāmri nê mẽ kãm
 kapêr. Na pre Parijew nhõ xwỳnhjê pyrã nê mẽ
 htyk nê akupỹm mẽ htĩr kôt hamaxpêr nê Tĩrtũm
 kapêr o mẽ wrỳk xwỳnh kôt hamaxpêr. Jakamã mẽ
 omu nê kàx pê mẽ kãm kapêr nê mẽ kãm:

—Nà ijaxwỳja ixpê Parijew nhõ xwỳnh. Nhũm
 inhĩpêêxà haxwỳja kêp Parijew nhõ xwỳnh.
 Jakamã na pa hte mẽ apê Parijew nhõ xwỳnhjê
 pyrã nê mẽ htyk nê akupỹm mẽ htĩr kôt ijamaxpêr.
 Tã ãm ja pix mỳrapê na ka mẽ ixpynê nê ã inhĩpêx
 anê. Anê.

Hāmri nhũm Parijew mẽ Satusew nhõ xwỳnhjaja
 kuma nê ja hã axpẽn kãm gryk nê. Nê hã axpẽn mã
 akir. ⁹ Hāmri nê ra axpẽn mã àkjêr rax nê. Hāmri

nhũm Parijew kwỳ pê Mojes kapêr o mẽ ahkre ho mẽ pa xwỳnhjaja kànhmã kuhê nê mẽ kãm Pawre hã àprār kãm hihtỳx nê mẽ kãm:

—Kwa pêr tanhmã kot amnhĩ tomnuj tore hã. Mãn âm hpimtir kãm na pre ã ri kaxkwa kamã mẽmoj mar anê. Rỳ apu Tĩrtũm kapêr o wrỳk xwỳnh kãm tanhmã kapêr to nhũm pre Tamas wỳr pry kamã mar o xa rỳ ko. Anê.

¹⁰ Hãmri nhũm Satusew nhõ xwỳnhjaja tee ri Tĩrtũm kapêr o mẽ wrỳk xwỳnh kot kãm kapêr ã harênhja ma nê hã axpên mã àkjêr rax nê. Hãmri nhũm pôristi krãhtũmja tee ri mẽ kot axpên mã àkjêr ã mẽ omu hãmri nê pôristi mã kãm:

—Kwa mẽ Pawre hwỳr tẽ nê mẽ kêp utà nê ma akupỳm o tẽ nê haxà. Kot ka mẽ ho anhỳr kêt nhũm mẽ tanhmã hamaxpêr to nê gryk xà axpên nhĩhkra kamã hkaxôn pa. Anê.

Hãmri nhũm mẽ kuma nê hwỳr tẽ nê mẽ kêp utà nê akupỳm o tẽ nê ixkre hwỳr ho axà.

Jejus kot Pawre jamaxpêr o hihtỳx ã harênh

Atre 18.9-10

¹¹ Tã nhũm kamàt nhũm Jejus tãm Pawre hwỳr kato nê kãm:

—Pa Pawre? Kwa tee ri amnhĩ kukamã ajamaxpêr o amnhĩ kamã akahak kêt nê. Kot kaj te ra ate jar Jerujarê kamã mẽ kãm ijarênhta pyrà nê ma krĩ pê Rõm wỳr mỗ nê krĩ nhõ xwỳnhjê mã ijarê. Anê.

Mẽ kot Pawre hã àmnênh ã mẽ harênh

Sikũn Ximotre 4.18

¹²⁻¹³ Tã nhũm apkati nhũm Ijaew kwỳjaja axpên wỳr akuprõ. Mẽmyjaja kêp 40 nê axte hkôt mẽ hkwỳjaja axpên wỳr akuprõ. Mẽ kot Pawre pĩr

kaxyw hã axpẽn mar kaxyw hã akuprõ nẽ hã axpẽn mã amỹnẽ nẽ axpẽn mã:

—Tõe. Nà kot puj mẽ hpĩr kaxyw amnhĩ jagri htỹx o paxàpkur kêt rãhã kupĩ nẽ rĩ kormã apku nẽ ixkõ. Nà kot puj mẽ ho anẽ. Ra Tĩrtũm noo mã mẽ pahte ja hã amnhĩ jarẽnh kênã. Anẽ.

¹⁴ Hãmri nẽ mẽ ma mẽ õ patre krãhtũmjẽ mẽ mẽ àptàr tũmrejẽ hwỳr mra nẽ mẽ kãm hã amnhĩ jarẽ nẽ mẽ kãm:

—Ot pa mẽ amã amnhĩ jarẽnh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarẽnh xà hkõt. ¹⁵ Jakamã e mẽ inhma. Kêr ka mẽ axêx rom pôristi krãhtũm mã anẽ kê apkati kê man mẽ awỳr Pawre ho tẽ. Te mẽ ate aprĩ hã hkukjêr kaxyw pyrak o kãm axêx. Koja mẽ kormã mẽ awỳr ho hpôx kêt ri pa mẽ unên kupĩ. Anẽ.

¹⁶ Hãmri nhũm Pawre tàmnhwỳ mẽ kot ã hã amnhĩ jarẽnh anhỹrja ma hãmri nẽ ma pôristi xàpênh xà hã ixkrej wỳr Pawre hwỳr hprõt nẽ kãm mẽ harẽ. ¹⁷ Hãmri nhũm kuma nẽ amnhĩ wỳr pôristi krãhtũm nhỹ hã mẽ hamãr xwỳnh ã karõ nẽ kãm:

—Kwa ma mẽ akrãhtũm wỳr ixtàmnhwỳta o tẽ kê kãm mẽmoj jarẽ nà? Anẽ.

¹⁸ Hãmri nhũm kuma nẽ ma hwỳr o tẽ nẽ kãm:

—E Pawre na inhmã anẽ pa awỳr htàmnhwỳ ho tẽ. Kot tanhmã amã ujarẽnh to kaxyw. Anẽ.

¹⁹ Hãmri nhũm omu nẽ hpa hã kupy nẽ o tẽ nẽ ahte mẽ hkàx ã o xa nẽ kãm:

—E mãmri inhmã mẽmoj jarẽ pa ama. Mẽmo na ka te inhmã harẽnh kaxyw? Anẽ.

20-21 Hāmri nhũm kām:

—Nà Ijaew xàptàr tũmrejaja na mẽ kot inhĩgê Pawre pĩr kaxyw hã amnhĩ jarẽ pa amã harẽnh o tẽ. Koja xep mẽ hã awỳ. Xep apkati nhũm ate ma mẽ hwỳr mẽ hkukjêr xà hã ixkre hwỳr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nẽ pry kamã kutêp amũxu nẽ kuhê. Na mẽ ra hã axpẽn mar pa nẽ axpẽn mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỹr o amnhĩ jarẽ pa mẽ kuma. Jakamã na mẽ kormã ate mẽ hwỳr mẽnh kaxyw akãm ama. Kwa mẽ hwỳr ho amõr kêt nẽ. Anẽ.

22 Hāmri nhũm kuma nẽ kām:

—Tõe. Nà na pa ra ama. Mãmri ma akupỹm tẽ. Nom kêr ka inhmar kumrêx. Kêr ka nhãm mẽhõ mã ja jarẽnh kêt kumrêx. ãm kwarĩ ho kwarĩ. Anẽ.

Hāmri nhũm kuma nẽ kato nẽ ma akupỹm tẽ.

Mẽ kot Ijaew pymaj nhỹhỹm Pawre mẽnh ã mẽ harẽnh

23-24 Tã nhũm pôristi krãhtũmja amnhĩ wỳr ỹ hã pôristi jamãr o mẽ pa xwỳnh wa ho hamẽxkrut nẽ wa hã karõ nẽ wa kām:

—E wa inhma. Koja kôt ã kamàt ka wa ma krĩ pẽ Sejarej wỳr Pawre ho mỗ kê hkà hkĩnh pẽ pahihiti Peris wỳr pỏj.

Nẽ amnhĩ kôt pôristi ho 200 nẽ o mỗ.

Nẽ kê mẽ kêp 70 nẽ kawar ã hkrĩ nẽ mẽ akôt mỗ.

Nẽ kê mẽ kêp 200 nẽ wapo jamỳn nẽ mẽ akôt o mỗ.

Kê mẽ ã ohtô rax anẽ.

Nẽ Pawre kot kawar ã ỹr nẽ mỗr kaxyw ka mẽ kãm hõ ho mỗ.

E kêr ka mẽ ã axohtô nê hkôt amôr anê kê hkà hkĩnh pê pahihti Peris wỳr pôj. Anê.

²⁵ Hãmri nê pahihti Peris mã kagà nhĩpêx nê kamã kãm Pawre jarê nê kãm:

²⁶ Pa pahihti Peris? Xà amex? Ixpê Kraw Risas na pa awỳr kagà mẽ.

²⁷ E ot pa awỳr Ijaew pê Pawre mẽ. Na pre hkwỳja kot hpĩr kaxyw unênh tã pa mãănênh kêp Rôm nhô xwỳnh ã harênh ma hãmri nê hwỳr inhô pôristi rê nhũm mẽ hwỳr hprôt nê mẽ kêp utà. ²⁸ Hãmri nê Ijaew xàptàr tũmrejê hwỳr o tẽ. Mẽ kot inhmã tanhmã kot amnhĩ tomnuj to hã harênh kaxyw. ²⁹ Tanhmã kot amnhĩ tomnuj to nhũm mẽ kot haxàr rỳ hpĩr ronhỹx ja mex nê. No xep ãm kot mẽ higêjtê kot amnhĩ nhĩpêx kôt amnhĩ nhĩpêx kêt pix mỳrapê na mẽ kamã gryk.

³⁰ Tã pa mẽ kot hpĩr kaxyw hã mẽ harênh ma nê mẽ umaj awỳr kumẽ. Hãmri nê kamã mẽ gryk xwỳnhjê mã ajarê. Jakamã koja mẽ mẽmo arĩgro hã awỳr pôj nê tanhmã kot amnhĩ nhĩpêx to hã amã harê ka kam ja hã mẽ ama nê tanhmã ho.

Tã ãm ja pix na pa amã harê. Ixpê Kraw Risas na pa awỳr kagàja mẽ. Tã măn ka arĩ ixte amã harênhja ma. Anê.

³¹ Tã nhũm kamàt nhũm mẽ hkrãhtũm kot mẽ kãm karô xà hkôt nhũm pôristijaja ma Pawre o mỗ. Hãmri nê krĩ pê ãxipat wỳr pôj nê kamã amnhĩm hikra.

³² Nhũm apkati nhũm mẽ kot mẽ hkôt pykap mỗr xwỳnhjaja mẽ ô pahi kot mẽ kãm hã karô xà hkôt awjanã nê ma akupỹm mỗ nhũm kawar ã mẽ mỗr xwỳnh pixjaja ma Pawre ho mỗ. ³³ Hãmri nê mỗ nê Sejarej wỳr pôj nê pahihti Peris nhĩhkram Pawre

jaxà nê kãm kagàja gô nê awjanã nê ma akupỹm hapêx. ³⁴ Hãmri nhũm Perisa kagàja py nê omu. Nê omunh pa nê Pawre mã kãm:

—E inhmã amnhĩ jarẽ. Tanhmã na anhõ pyka hixi te? Anẽ.

Nhũm kãm:

—Kêp Siris. Anẽ.

³⁵ Nhũm kãm:

—Tôe. Kê mẽ kot ato kapêr xwýnhjaja pôj pa kormã ixprĩ hã mẽ kot tanhmã ajarênh to ma mãn. Anẽ.

Hãmri nê ô pôristi mã anẽ nhũm mẽ ma Pawre o tẽ. Ma pahi Erox htyk xwýnh nhõrkwy hwỳr o tẽ nê kamã haxà nhũm hkrĩ ho hkrĩ.

24

Ijaew kot tanhmã Pawre ho kapêr punuj to hã mẽ harênh

Rukre 21.12-13; Atre 25.7

¹ Tã nhũm arĩgro kêp 5 nê hapêx nhũm Ijaew kwýjaja Sejarej wỳr pôj. Mẽ ô patre maati ânãnĩsti nê Tetur nê kaxyw mẽ àptâr tũmrejaja nhũm mẽ ma hwỳr mỗ nê pôj. Tetur kêp axiwôkat ã mẽ yr pê kapêr xwýnh jakamã nhũm mẽ kot tanhmã Pawre o kapêr punuj to kaxyw pahi Peris wỳr amnhĩ kôt o mỗ. ² Hãmri nhũm mẽ amnhĩ wỳr Pawre hã karõ nhũm pôristi haprô nê mẽ hwỳr o tẽn ho axà. Hãmri nhũm Teturja pahшти Peris mã Pawre kot tanhmã amnhĩ tomnuj to hã harẽ nê kãm:

—E pahшти inhma. Nà na ka hte tãm mẽ inhĩpêx nê mẽ ixto mex o apa. Jakamã nhũm hte nhãm pika hkwỳ nhõ xwýnhjaja mẽ ixkurê kaxàr kaxyw mẽ ixwỳr hprôt kêt nê. Pa htem ixpiitã akukwak

ri ijamakêtkati nê ixàmnhĩx inhmex nê ixpa. ³ Nê mē ixkĩnh rāhã ho ixpa. Hêxta waa nê. Mē ixpiitã inhmã akĩnh. ⁴ E kot paj amã awjarē ka inhma. Kot paj ixujarēnh o hakotre ka inhma nê tokyx ma akupȳm tē. ⁵ Nà Pawre na hte amnhĩ tomnuj pix o pa. Kêp Jeju pē Najare nhõ xwȳnhhta kôt amnhĩ nhĩpêx o mē pa xwȳnhjê nhõ pahĩ na. Jakamã na hte pyka piitã hkôt mē ixpê Ijaew tanhmã axpēn kaxyw mē ixkryx to ho pa. ⁶ Jãã na pre Tĩrtũm mã amnhĩ jarēnh xà hã ixkre hwȳr amnhĩ kôt mē kêp Ijaew kêt xwȳnh kwȳjê ho agjê nê mē ixpê ixkreja omnu kaxyw mã tã pa mē omu nê unê. ⁷ Tã nhũm pôristi krãhtũm Risasja mē ixpê utã ⁸ nê awȳr mē ixte tanhmã amã harēnh to xwȳnhjê rē. Tã ot pa mē ixkrĩ. Nê ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarēnh to ka ama nê ixte amã harēnh xà hkôt tanhmã mar to. Anê.

⁹ Hãmri nhũm Ijaew hkwȳ haxwȳja kãm:

—Nà ãm hãmri na ã amã harēnh anê pahihiti. Anê.

Pawre kot pahihiti mã amnhĩ jarēnh

Rukre 21.14-19

¹⁰ Hãmri nhũm pahihiti Peris Pawre mã anê nhũm kot kãm amnhĩ tã àprãr kaxyw kànhmã xa nê kãm:

—Nà na ka ra inhõ pyka kamã mē ixto amnhĩptàr mex o atã amgrà xohtô nê pahihiti. Jakamã na pa pre ate ixkapêr mar kaxyw ã ajarēnh ma nê ixkĩnh nê.

¹¹ —E kot paj amã amnhĩ jarē ka inhma. Ham na pa pre Jerujarē hwȳr mō nê pōj. Na pa hwȳr ixpōx ã ixtã arĩgro pē 12 pix. Kam nê ixtã ixkwȳjê

kukja nê mẽ ama. Ixte Tĩrtũm mã amnhĩ jarẽnh xà hã ixkre kamã Tĩrtũm mã mex o mex ã harẽnh kaxyw na pa pre hwỳr mỗ. ¹² No na pa pre nhỹri axpẽn kaxyw tanhmã ri mẽ hkryx to hkêt nê. Nê mẽ ixte Tĩrtũm mã amnhĩ jarẽnh xà hã ixkre kamã rỳ kapêr o mẽ ahkre xà hã ixkre kamã rỳ nhỹri pry kamã tanhmã axpẽn kaxyw ri mẽ hkryx to hkêt nê. ãm amrakati ho amrakati. ¹³ Mẽ kot ã ri ijarẽnh anhỹrja amrakati kumrẽx. Mẽhõ kot ã ixte amnhĩ nhĩpêx anhỹr ã ixpumunh kêt tã na htem amnhĩ krã hkôt amã ijarẽnh o hêx. ¹⁴ Na htem mẽ ixte Jejus kôt amnhĩ nhĩpêx xwỳnhjaja mẽ ixte amnhĩ nhĩpêx mex kêt ã mẽ ijarẽ nom kot anhỹr kêt. ãm mẽ inhĩgêjtê nhõ Tĩrtũm kapêr nywja kôt na pa hte amnhĩ nhĩpêx mex o ri ixpa rãhã nê. Nhũm ixkwỳjaja htỳx axtem kapêr õ hkôt ixte amnhĩ nhĩpêx o ixpa hã ixkamnhĩx no ãm kapêr õ hkêt. Ijaxwỳja na pa hte mẽ uràk nê finat Mojes kapêr ã kagà mar o ixpa. Nê Tĩrtũm nhỹ hã mẽ kapêr o mẽ pa xwỳnh kot kapêr ã kagàja pa hte mẽ uràk nê hkôt amnhĩ nhĩpêx mex o ri ixpa. ¹⁵ Nê mẽ uràk nê Tĩrtũm kot nhỹrmã akupỹm mẽ ho htĩr kôt pa hte ijaxwỳja ijamaxpêr tỳx nê. Mẽ htyk xwỳnh piitãã. Mẽ kot amnhĩ tỗ mex xwỳnhjê mẽ mẽ kot amnhĩ tomnuj xwỳnhjê mẽ mẽ ho hpimràatã akupỹm mẽ ho htĩrja kôt pa hte mẽ uràk nê ijamaxpêr tỳx o ri ixpa. ¹⁶ Jakamã na pa hte tãm amnhĩ nhĩpêx rãhã nê. Tĩrtũm noo mã nê mẽ piitã mẽ noo mã tãm ri amnhĩ nhĩpêx mex rãhã nê.

¹⁷ —Tã na pa pre pyka hkwỳ hkôt ri ixpa hã ixtã amgrà xohtỗ nê. Hãmri nê ma akupỹm Jeru-jarẽ hwỳr ixkwỳjê hwỳr mỗ. Amarĩ ixte mẽ kãm

kàxpore hkwỳ nhõr kaxyw pa akupỹm mẽ hwỳr mỗ. Nẽ mãânẽn Tĩrtũm mã mẽmoj nhõr kaxyw. ¹⁸ Hãmri nẽ mẽ ixte amnhĩ nhĩpêx xà hkôt pa mẽ amnhĩ to mex pa nẽ ma tên Tĩrtũm mã amnhĩ jarẽn h xà hã ixkre hwỳr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nẽ. Rỳ tanhmã ixkapêr punuj to hkêt nẽ. Na pa prem âm inhgrêre nẽ akryk ixkuhê nhũm mẽ ixpumu. ¹⁹ Pika pê As rũm Ijaew kwỳjaja na prem ixkre kamã ixpumu. Nar mẽ tãmjaja măn awỳr mra nẽ tanhmã amã ijarẽn h to.

²⁰ —Nẽ jar mẽ kot ixto kapêr xwỳnhjaja. Na pa pre mẽ àptàr tũmrejê mã amnhĩ jarẽn h pa nhũm mẽ inhma nẽ tanhmã inhmã nẽ hkêt nẽ. Kam nẽ ja hã mẽ hkukja nẽ mẽ ama. ²¹ Rỳ ko. Koja apu mẽ amã âm ja pix ã ijarẽn h japêr. Na pa pre mẽ kãm ixkapêr nẽ mẽ kãm: “Na pa hte mẽ htyk nẽ akupỹm mẽ htĩr kôt ijamaxpêr tỳx nẽ. Tã ja pix mỳrapê na ka prem ixpynê nẽ ã inhĩpêx anẽ.” Anhỹr o mẽ kãm ixujarẽn h jakamã nhũm apu mẽ hkwỳjaja kêp ja omnuj nẽ. Jakamã koja apu mẽ amã ja hã ijarẽn h japêr. Nom ja pix jarẽ. Anẽ.

Ã na pre Pawreja pahi Peris mã amnhĩ jarẽn h anẽ.

Peris mẽ hprõ wa kot Pawre mar ã wa harẽn h

²² Tã nhũm pahihti Peris kot mẽ kot Jejus kôt amnhĩ xunhwỳr xwỳnhjê kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapêr xwỳnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mỗ nẽ pôi pa

wa ixprĩ hã mẽ ate tanhmã harẽnh toja ma nẽ rĩ kormã tanhmã Pawre jarẽnh to. Anẽ.

²³ Hãmri nẽ hpãnhã pôristi pytàr xwýnh mã Pawre jarẽ nẽ kãm:

—E mẽ ma akupỹm ixkre hwýr o tẽ nẽ kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nẽ kê hkràmnhwýjaja mãmrĩ hwýr mẽmoj to mra kê kuku. Anẽ.

Hãmri nhũm mẽ kuma nẽ ma o tẽ nẽ akupỹm ixkre hwýr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwýr tẽ. Prõ haxwýja kêp Ijaew. Hixi pê na pre Turujire. Jakamã nhũm wa ma Pawre nhõrkwý hwýr wa tẽ. Nhũm Peris Pawre hã karõ nhũm kato nẽ wa hwýr tẽ nẽ wa kãm awjarẽ. Tanhmã wa kot amnhĩ to nẽ amnhĩ kaxyw Jejus Kris kôt hamaxpër nẽ hkôt amnhĩ xãm prãm xaj hprĩ hã wa kãm harẽ. ²⁵ Nẽ wa kãm:

—Nà na htem Jejus Kris kôt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhýr kêt nẽ. Nẽ arĩ Jejus kot amnhĩ nhĩpêx kôt amnhĩ nhĩpêx o pa. Koja Tĩrtũm nhỹrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarẽnh to. Mẽ pahte tãm amnhĩ nhĩpêx xwýnh ã mẽ pajarẽ rý mẽ pahte amnhĩ tomnuj xwýnh ã mẽ pajarẽ. Anẽ.

Nhũm pre ã Pawre Peris mẽ Turujire wa kãm kapër anẽ. Hãmri nhũm Peris tee ri ujarẽnhja ma nẽ kãm ma nẽ. Kot amnhĩ tomnuj o pa xwýnh ã amnhĩ pumu nẽ ã kãm kapër anhýrja mar pyma nẽ. Hãmri nẽ Pawre mã kãm:

—E hāmri. Nà na pa wa ra ama. Mamrĩ ma akupỹm tẽn axà. Kot paj mẽmo arĩgro hã mẽmoj to anhyr kêt nẽ axte amnhĩ wỳr atã karõ ka axte tanhmã wa inhmã axujarẽnh to. Anẽ.

²⁶ Nẽ htỳx hamaxpẽr o:

—Nà kot paj mẽmo arĩgro hã axte amnhĩ wỳr hã karõ kê ixwỳr tẽn nẽ ixte kator prãm xàj inhmã amnhĩrer japêr. Anẽ.

Hāmri nẽ xatã amnhĩ wỳr hã karõ htã no nhũm aa kot kator kaxyw tanhmã kãm nẽ hkêt nẽ.

²⁷ Tã nhũm amgrà axkrut nẽ hapêx nhũm Pos Pesti pahi Peristi hpãnhã kêp mẽ õ pahi nẽ mẽ ho amnhĩptà. Jakamã nhũm Peris akupỹm õ krĩ hwỳr nojarêt nẽ Pawre mã ãhkra karo hkêt rãhã ma mỗ. Na pre hamaxpẽr o:

—Nà kot paj Pawre kator nhũm Ijaew ja hã ijarẽnh ma nẽ ixkamã gryk nẽ. Nà kwār mẽ hagjênh xà hã ixkre kamã hkrĩ ho hkrĩ. Kot paj kator kêt nẽ. Anẽ.

Hāmri nẽ kãm ãhkra karo hkêt rãhã ma akupỹm õ krĩ hwỳr mỗ. Jakamã nhũm Pawre arĩ ixkre kamã kêp prês nẽ hkrĩ ho hkrĩ.

25

Pawre Rõm wỳr hkrà ã harẽnh

¹ Tã nhũm pahi nyw Pos Pesti krĩ pẽ Sejarej wỳr mỗn pỏj. Hāmri nẽ kamã ri pa hã apkati axkrunẽpxi pix nẽ ma Jerujarẽ hwỳr mỗ. ² Hāmri nẽ hwỳr pỏj nhũm Ijaew kwỳjaja omu nẽ hwỳr mra nẽ kãm Pawre ho kapêr nẽ hã hwỳr kurê kumrêx. Mỗ patre krãhtũmjê mẽ Ijaew xàptàr tũmrejaja nhũm mẽ hwỳr mra nẽ kãm:

³ —Pa pahшти? E ot pa mẽ awỳr mra. Kwa xà kot ka Pawre hã karõ kê man awỳr mỗ ka jar kot tanhmã amnhĩ tomnuj to hã hkukja nẽ ama? Anẽ.

No ăm hêx rom ã hã kãm kapêr anẽ. Kot hã karõ nhũm mẽ kot pry hã hpĩr kaxyw nhũm mẽ hêx rom ã kãm kapêr anẽ. ⁴ Hãmri nhũm mẽ kuma nẽ mẽ kãm:

—Tk. Kwa ra Sejarej kamã kêp prês nẽ hkrĩ kênã kot pa kêt amnhĩ wỳr hã karõ. Kot pa tokyx ma akupỳm hwỳr mỗ. ⁵ Jakamã kêr ka mẽ axaptàr tũmjaja ma ixkôt mra. Hãmri nẽ Sejarej kamã inhmã tanhmã kot amnhĩ tomnuj to hã harênh to pa mẽ ama nẽ rĩ kormã tanhmã harênh to. Anẽ.

⁶ Hãmri nẽ mẽ kamã pa hã apkati grêre nẽ ma akupỳm Sejarej wỳr mỗ. Hãmri nẽ hwỳr pøj nhũm apkati nhũm mẽ hkukjêr xà hã ixkre hwỳr tẽ nẽ mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karõ. ⁷ Nhũm mẽ hwỳr o tẽ nẽ ỳr nhũm hkwy kot Jerujarê rũm mẽ mỗr xwỳnhjaja kãm hipôk nẽ pahi Pos Pesti mã tanhmã ho kapêr to nẽ ho kapêr punuj tỳx nẽ. Kot tanhmã amnhĩ tomnuj to ho pa hã ho kapêr o kuhê. Nom mẽ kot ã kot amnhĩ nhĩpêx anhỹr ã omunh kêt tã ăm amnhĩ hkrã hkôt ri tanhmã ho hêx to. ⁸ Jakamã nhũm Pawre tee ri amnhĩ tã mẽ kot ho hêxja ma nẽ kànhmã xa nẽ Pos Pesti mã amnhĩ tã aprã nẽ mẽ kãm:

—Nà aa ixte ã amnhĩ nhĩpêx anhỹr kêt. Na pa finat Mojes kot Tĩrtũm nhỹ hã kapêr nhĩrôp ixãm nẽ hkwy m ri tanhmã amnhĩ nhĩpêx to hkêt nẽ. Nẽ mẽ ixte Tĩrtũm mã amnhĩ jarênh xà hã ixkre kamã ri tanhmã ixtỳx ri amnhĩ nhĩpêx to hkêt. Nẽ pahшти Sesti kapêrja pa pre hirôp ixãm nẽ tanhmã amnhĩ

tomnuj to hkêť nê. Aa ixte ã amnhĩ nhĩpêx anhỹr kêt kumrêx. Anê.

⁹ Hãmri nhũm Pos Pesti kuma nê tanhmã hkukamã hamaxpêr to nê hamaxpêr o:

—Kwa nhỹ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mẽõ krĩ pê Jerujarê hwỳr kot paj akupỹm mẽ hwỳr o mỗ nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

—E xà kot puj ma akupỹm Jerujarê hwỳr mỗ pa kamã axte mẽ kot ajarênh ma nê tanhmã ajarênh to nà? Anê.

¹⁰ Hãmri nhũm kãm:

—Nà jar ixte pahĩti Sesti nhỹ hã mẽ kot mẽ hkukjêr xà hã ixkre kamã inhỹr nê amnhĩ jarênh kênã. Jar na htem mẽ hkukja nê tanhmã ri mẽ mar to. Na pa pre tanhmã ixkwỳjê ho hkêť nê. Mẽmo kaxyw kot pa akupỹm mẽ hwỳr mỗ nê axte mẽ kãm amnhĩ jarê? ¹¹ Kop apu pa tanhmã ixte amnhĩ tomnuj to ronhỹx mẽ mãmri ja hã ixpĩ pa mẽ kêp tanhmã ri amnhĩ to hkêť nê. Nom mẽ kot ixto hêx pix o ã ijarênh anhỹr kênã. Jakamã mẽmo mỳrapê kot kaj mẽ ãhkram ijaxà? E Rôm kãm pahĩ maati Sesti hwỳr mãn inhmẽ pa kumã mãn amnhĩ jarê. Anê.

Pahĩ Sesti kêp pyka piitã hkôt mẽ ho amnhĩptàr xwỳnh maati jakamã nhũm Pawre kot mar kaxyw hwỳr hkrà. ¹² Hãmri nhũm Pos Pesti kuma nê ma tẽ nê hã ò kôwenatôjê ma. Hãmri nê hã axpên mar pa nê akupỹm hwỳr tẽ nê kãm:

—Tôe. Nà kot paj pahĩ maati Sesti wỳr amê. Ra hwỳr akrà kênã. Anê.

Pos Pesti kot Akrip mã Pawre jarênh

¹³ Tã nhũm apkati grêre nê hapêx nhũm pahi hõ pê Akripja ma Pos Pesti hwÿr mō. Tōx Perênīs mē wa mō. ¹⁴ Hãmri nê wa hwÿr pōj nê kuri wa pa hã apkati grêre nhũm Pos Pesti wa kãm Pawre jarê nê wa kãm:

—E pa war amã mēhō jarê. Na pre pahi Perisja mē hagjênh xà kamã mēhō jaxà nê kormã kator kêt ri nhũm mē àpênh nê kator pa hpãnã àpênh o amnhĩptã. ¹⁵ Tã ra ma Jerujarê hwÿr mō nhũm Ijaew nhō patre krãhtũmjê mē mē àptâr tũmrejaja inhmã ho kapêr punuj rax nê. Nê ixte mē kãm hpîr kaxyw inhmã hã àmnênh kãm hihtÿx nê. ¹⁶ Nom pa mē kêp ja kaga nê mē kãm: “Nà mē ixpê Rôm nhō xwÿnhjaja na pa htem ã mē hipêx anhÿr kêt nê. Na pa htem mē kot ho kapêr xwÿnh noo mã tanhmã hkukjêr to nhũm tanhmã amnhĩ tã àprâr to pa htem kuma nê rĩ kormã tanhmã mē ho. No na pa htem kormã mē kot tanhmã amnhĩ jarênh to hkêt ri tanhmã mē ho hkêt nê.” Anê.

¹⁷ —Jakamã nhũm prem kaxyw Sejarej wÿr pōj nhũm apkati pa hã mē hkukjêr kurê kumrêx. Nê mē kot mē hkukjêr xà hã mē hkrĩ xà kamã nhÿ nê ixte hkukjêr kaxyw amnhĩ wÿr Pawre hã karō.

¹⁸ Na pa pre ijamaxpêr o: “Mãn pre tanhmã amnhĩ tomnuj tÿx to hã na mē inhmã harênh kaxyw.”

¹⁹ Anhÿr ã hkamnhĩx tã te kot amnhĩ to mex xwÿnh pyræk. ãm kot mē hkôt amnhĩ nhĩpêx kêt pix ã nhũm mē inhmã harê. Nê kaxyw mēhō htyk xwÿnh jarê. Mē kot kãm “Jejus” anhÿr xwÿnhja na xep hte mē kãm akupÿm htîr ã harênh o pa. ãm ja pix na prem inhmã harê. ²⁰ Pa tee ri ixte nhÿri ixprĩ hã tanhmã mē kot harênh to hã mē mar

kaxyw hkukamã ijamaxpêr. Hâmri nê hã Pawre kukja nê kãm: “Xà kot puj ma akupÿm Jerujarê hwÿr mō pa axte akwÿ kot tanhmã ajarênh to ma nê rĩ kormã tanhmã ajarênh to nà?” ²¹ Anhÿr tã no nhũm akupÿm Jerujarê hwÿr mōr kaga kumrêx nê amnhĩm Rôm kãm pahĩ maati Sesti jarê. Ixte ma hwÿr mênh nhũm kot kãm amnhĩ jarênh nhũm kot mar nê tãm tanhmã harênh to kaxyw. Jakamã pa kormã ixte hwÿr mênh kaxyw amnhĩ xa hã akupÿm mē hagjênh xà kamã haxà nhũm arĩ hkrĩ ho hkrĩ. Anê.

²² Hâmri nhũm Akrip kuma nê kãm:

—Xôwehe? Kwa na pa inhmã tanhmã kapêr to mar prãm nê. Anê.

Hâmri nhũm kãm:

—Tôe. Nà kê apkati pa hã karō ka tanhmã kapêr mar to. Anê.

²³ Jakamã nhũm apkati nhũm Akrip mē htōx Perênĩs wa pahĩ hã mē ê mex jagjê nê ma mē hkukjêr xà hã ixkre hwÿr wa tē. Pôristi krãhtũm kwÿjê mē Sejarej kamã mē kot amnhĩ to rũnh xwÿnh kwÿjê mē nhũm mē hwÿr akuprō. Nhũm mē piitã Akrip mē htōx wa kêp pahĩ hã wa ê mex ã wa omu nê wa kamã no pyma nê. Hâmri nhũm Pos Pesti Pawre hã karō nhũm mē haprō nê ma mē hwÿr o tē. ²⁴ Hâmri nhũm Pos Pesti omu nê Akrip mē htōx mē mē kot mar o hkrĩ xwÿnhjê mã kãm:

—E pahĩhti Akrip mē mē apikuprōnh xwÿnhjaja. Ota Pawre xa. Jerujarê kamã nê jar Sejarej kamã na pre hkwyjaja inhmã ho kapêr rax nê. Hâmri nê ixte hpĩr kaxyw inhmã hã àmnênh kãm hihtÿx nê.

²⁵ Nom mēmoj mÿrapê kot pa kêt kupĩ? Tã nhũm amnhĩm pahĩ maati Sesti jarê pa ma hwÿr mênh

kaxyw. ²⁶⁻²⁷ Nom na htem amarĩ pahi maati Sesti hwỳr mẽ rēnh kêt nē. Na htem kām mẽ kot tanhmã amnhĩ tomnuj to hã kagà nē hwỳr kagà mẽ ro hã mẽ kurē. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyrāk. Jakamã na pa mẽ awỳr o tē. Mẽ ate kapēr mar nē kot tanhmã amnhĩ tomnuj to hã inhmã harēnh nhũm ixte hã kagà nē pahi Sesti hwỳr mẽnh kaxyw. Jakamã e mẽ kam nē hkukja nē ama nē tanhmã mar to. Anē.

26

Pawre kot pahihti Akrip mã amnhĩ jarēnh

Atre 8.3, 9.1-19, 22.1-21

¹ Hāmri nhũm Akrip Pos Pesti kot tanhmã Pawre jarēnh toja ma nē Pawre mã kām:

—E māmri mẽ inhmã amnhĩ jarē pa mẽ ama. Anē.

Hāmri nhũm kuma nē kām amnhĩ jarēnh kaxyw kànhmã kām ìhkra pē nē kām:

²⁻³ —Hêxta waa nē. Nà na pa amã amnhĩ jarēnh kaxyw nē ixkĩnh nē pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nē mẽ ixte tanhmã amnhĩ nhĩpêx to hã mẽ ixte axpēn kukjêrta ate hã mẽ ixpumunh mex. Jakamã na pa amã amnhĩ jarēnh kaxyw nē ixkĩnh nē. E tokyx anojarêt kêt nē inhma. Pa amã ixujarēnh jatur xàm kumē ka aprĩ hã inhma. ⁴ Nà ixkwỳjaja ra mẽ kot ixte amnhĩ nhĩpêx ã ixpumunh mex. Ixpĩre rũm ixpapxà kamã nē mãânēn Jerujarē kamã ixte tanhmã amnhĩ nhĩpêx to ho ixpaja mẽ kot hã ixpumunh mex. ⁵ Ixpê mẽ hkwỹ pē Parijew nhõ xwỳnh kwỳjê hã mẽ kot ixpumunh. Koja mẽ apu

ja hã amã ijarênh japêr rỳ ko. Mẽ ixpê Parijew nhõ xwỳnhjaja na pa htem amnepêm finat Mojes kot Tĩrtũm nhỹ hã mẽ inhĩgêjtjê mã mẽmoj tã karõ xà hkôt amnhĩ nhĩpêx mex o ixkwỳjê jakre.

⁶ —Amnepêm na pre Tĩrtũm mẽ inhĩgêjtjê mã tanhmã amnhĩ jarênh to. Kot nhỹrmã mẽ piitã akupỹm mẽ ho htĩr ã amnhĩ jarê. Tã ixte ja kôt ijamaxpêr pix mỳrapê na prem kot hã amã ixto kapêr kaxyw awỳr ixto mỗ. ⁷ Mẽ ixpê Ijaew nhĩgêjtjê piitã na prem Tĩrtũm kapêr kôt hamaxpêr o ri pa. Kot nhỹrmã akupỹm mẽ ho htĩr ã amnhĩ jarênh kôt hamaxpêr tỳx o pa. Amnepêm finat Jako mẽ hkra pê 12jaja na prem hkôt hamaxpêr. Nẽ ixpê mẽ hkanrêhã mẽ htàmnhwỳ na pa hte ijaxwỳja ja kôt ijamaxpêr tỳx rãhã ho ri ixpa. Tã âm mẽmoj pixi mỳrapê na ixkwỳjaja ã amã ixto kapêr punuj anê. ⁸ Mẽ kot ixpyrà nẽ ja kôt hamaxpêr ã amnhĩ jarênh tã nhũm pre Tĩrtũm akupỹm Kra Jejus o htĩr nom nhũm mẽ ixkĩnhã ja kôt hamaxpêr kêt. Nom Tĩrtũm kêp akupỹm mẽ pahto pahtĩr xwỳnh kênã.

⁹ —Amnepêm kormã Jejus kôt ijamaxpêr kêt ri na pa pre ijaxwỳja mẽ uràk nẽ akupỹm htĩr kôt ijamaxpêr kêt nẽ. Nẽ ixtỳx ijamaxpêr o: “Kot paj Jejus pê Najare nhõ xwỳnh kôt mẽ kot amnhĩ xunhwỳr xwỳnhjê nhĩpêx kati ho ixpa nhũm Tĩrtũm ja hã ixpumu nhũm ja kãm mex nẽ.”

¹⁰ —Anhỹr jakamã pa pre hte tanhmã mẽ homnuj tỳx to ho ri ixpa. Jao Jerujarê kamã mẽ inhõ patre krãhtũmjê nhỹ hã mẽ unê nẽ mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhĩ jarê nhũm ja inhmã mex nẽ. Pa mẽ harênh ma nẽ ixkĩnh nẽ. ¹¹ Pa pre

hte xatã tanhmã mẽ hipêx to nẽ mẽ kot Jejus kaga hprãm xàj mẽ hipêx kati rũnh nẽ. Tĩrtũm kapêr o mẽ ahkre xà hã ixkre piitã kamã pa pre hte ã mẽ hipêx anẽ. Nẽ mẽ kamã inhgryk tỳx jakamã ma krĩ hkwỳ hkôt mẽ hapêr o ri ixpa. ã na pa pre mẽ hipêx anhỹr o ri ixpa.

¹² —Tã axte ixte mẽ hkwỳjê pynênh nẽ mẽ hagjênh kaxyw ma Tamas wỳr mỗ. Mẽ inhỗ patre krãhtũmjê nhỹ hã ma mẽ hwỳr mỗ. ¹³ Hãmri nhũm ra kaxkwa nhĩpôk ri myt nhỹ pa kormã pry hã inhmôr ri kaxkwa rũm mẽmo nhĩrãja pumu. Nhũm hirã htỳx o myt jakre nẽ ixtã ajêt pa ixkôt ri mẽ pa xwỳnhjê mẽ hipôk ri ixkuhê. ¹⁴ Hãmri nẽ mẽ inhmã ma xàj pykap ixrôrôk pa nhũm kaxkwa rũm mẽhøj inhmã kapêr. Mẽ ixpê Ijaew kapêr o kapêr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri apa? Nom na ka tee ri ã amnhĩ nhĩpêx anhỹr kaprỳ.” Anẽ. ¹⁵ Hãmri pa tee ri kuma nẽ kãm: “Kwa mẽ atô na ka ã inhmã akapêr anẽ?” Anẽ.

—Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o apa ho te pa ixtomnuj tỳx pyrãk. ¹⁶ E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrĩt. Jarãhã ate ixpumunh xà hkôt ate mẽ kãm ma ijarênh nẽ mẽ kãm ixkapêr jarênh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhỹrmã axte awỳr ixkato nẽ tanhmã amã ixkapêr to ka inhma nẽ ma mẽ kãm ixkapêr jarênh o ri mẽ hkôt apa. Ja kaxyw na pa amnhĩm ata.” Anhỹr o inhmã kapêr. ¹⁷ Hãmri nẽ inhmã: “E kot paj Ijaew mẽ Ijaew kêt xwỳnhjê

hwÿr amê nê anê mē omunh mex nê nhũm mēhō apĩr kêt nê. ¹⁸ Kêr ka ma mē hkôt mē kām ixkapêr jarênh o ri apa kê mēhprĩ hã kuma. Mē kot amnhĩ tomnuj kaga nê amnhĩ kaxyw ixkôt hamaxpêr nê ixkôt amnhĩ xunhwÿr kaxyw. Hãmri nhũm Tĩrtũm ja hã mē omu nê ixkukwak ri amnhĩ katut kôt mē kot amnhĩ tomnuj piitã rênh pa nê axte kām hamaxpêr kêt nê. Hãmri nê mē ho hkra. Kojã mē ã amnhĩ nhĩpêx anê hãmri nê axte Satanasti nhỹ hã tanhmã amnhĩ nhĩpêx to hkêt nê. Pãnhã Tĩrtũm kôt pix mã amnhĩ nhĩpêx o pa.” Anê.

¹⁹ — ã na pre Pahihti Jejus inhmã kapêr anê. Tã kot kaxkwa rũm inhmã ixápênh jarênh ã karōja pa pre mar tÿx nê hkôt amnhĩ nhĩpêx rãhã ho ri ixpa pahi Akrip. ²⁰ Jakamã na pa pre ma mē hkôt mē kām kapêr jarênh o ri ixpa. Tamas kumrêx hwÿr nê hpãnhã Jerujarê hwÿr nê hpãnhã pika pê Jutej piitã hkôt Ijaew mã kapêr jarênh o ri ixpa. Tã hpãnhã Ijaew kêt xwÿnhjê mã harê. Na pa hte mē kām ixkapêr o: “Kwa mē ate amnhĩ tomnuj kaga nê hpãnhã Tĩrtũm kôt amnhĩ xunhwÿ. Hãmri nê hkôt pix mã amnhĩ nhĩpêx o ri apa. Mē piitã mē kot apê hkwÿ hã mē apumunh kaxyw.” Anê.

²¹ — ãm ja pix mÿrapê na pre ixkwÿjaja ixpynê. Tĩrtũm mã amnhĩ jarênh xã hã ixkre kamã ixpynê nê ra mē kot xipĩr kaxyw. ²²⁻²³ Nom na hte Tĩrtũm ixtãnopxa nê ixto ixihitÿx mex rãhã ho pa pa arĩ mē kām harênh o ri ixpa. Mē kot amnhĩ to rũnh xwÿnhjê mã nê mē kêp amrakati xwÿnhjê mã nê mē piitã mē kām harênh o ri ixpa. Finat Mojes mē Tĩrtũm nhỹ hã kapêr jarênh o mē pa xwÿnhjaja kot ra hkukamã tanhmã harênh to xã hkôt pa hte mē

kām harēnh o ri ixpa. Nē mē kām: “Tĩrtũm kot mē pakaxyw ãm xwỳnh̃ta na pre amnhĩ xà htỳx kamã hamak kām ty. Tã nhũm Tĩrtũm akupỹm ho htĩr. Kumrēx na pre akupỹm ho htĩr jakamã kumrēx na pre tanhmã mē kām kapēr to ho ri mē hkôt pa. Mē kot amnhĩ kaxyw hkôt hamaxpēr nē hkôt amnhĩ xunhwỳr xwỳnh̃ piitã uràk nē nhỹrmã Tĩrtũm mē wa õ krĩ kamã htĩr tũm nē pa ho pa hprãm xàj mē harēnh o pa. Mē ixpê Ijaew nē mãânēn mē apê Ijaew kêt xwỳnh̃jaja nhũm pre ã mē pajarēnh anē.” Anhỹr o pa hte mē kām harēnh o ri mē hkôt ixpa pahi Akrip. Anē.

²⁴ Nhũm Pawre kormã kot mē kām amnhĩ jarēnh par kêt ri nhũm Pos Pesti tee ri tanhmã Jejus jarēnh to hã kuma nē kàx pē kām kapēr nē kām:

—Kwa na ka akrã axpã nà? Pēr ate kagà pumunh tỳx kurê akrã pipãnh pyràk o ri atỳx ã ri mē inhmã axujarēnh anē. Anē.

²⁵ Hãmri nhũm kām:

—Nà ixkrã pipãnh kêt. ãm hãmri na pa mē amã awjarē. ²⁶ Jerujarē kamã na prem Jejus pĩ nhũm mē piitã omu. Tã nhũm akupỹm htĩr hãmri nē hpimxur pē ri pa hkêt nē. Na pre mē ohtô nē akupỹm htĩr kām omu. Pahi Akrip ra kot ja mar mex jakamã na pa ixãmnhĩx ã mē amã harēnh anē.

²⁷ Anhỹr o kām kapēr hãmri nē pahi Akrip wỳr rĩt nē kām:

—Kwa pahi Akrip. Xà Tĩrtũm nhỹ hã kapēr jarēnh o mē pa xwỳnh̃jaja kot Jejus kukamã tanhmã harēnh toja kôt na ka hte ajamaxpēr? Nà ra hkôt ajamaxpēr kēnã. Ra ixte ajamaxpēr kôt apumunh mex. Anē.

²⁸ Hãmri nhũm tee ri kuma nē kām:

—Tk. Kwa xà kot kaj ã inhmã akapêr anê pa ama nê apyrà nê amnhĩ kaxyw Jejus kôt ijamaxpêr? Nà na ka ixte ã ate Jejus jarênh anhÿrja kôt ijamaxpêr ã ixkamnhĩx kaprÿ. Anê.

²⁹ Hãmri nhũm Pawre kãm:

—Ko. Kot kaj ixpyrà nê amnhĩ kaxyw hkôt ajamaxpêr pa ixkĩnh nê. Nom kaxipix kêt. Mẽ apiitã mẽ ate inhmar o akrĩ xwÿnhjaja mããnnên. Mẽ ate mẽ ixpyrà nê Jejus kôt amnhĩ xunhwÿr na inhmã hprãm. ãm ixpyrà nê mẽ apê prês pix na inhmã hprãm kêt. Anê.

³⁰ Hãmri nhũm pahi Akrip nê htõx Perênĩs nê pahi Pox Pesti nê mẽ hkôt mẽ mõi xwÿnhjaja kànhmã kuhê nê ma mrar kaxyw. ³¹ Nê nojarêt nê Pawre hã axpên mã:

—Kwa tanhmã kot amnhĩ tomnuj to hkêt kênã kot kêt mẽ haxà rÿ kupĩ. Anê.

³² Hãmri nhũm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwÿr hkrà hkêt ronhÿx pu mẽ ra kator. Anê.

27

Mẽ kot Rõm wÿr Pawre mẽnh ã mẽ harênh

Atre 23.11, 25.12

¹ Tã nhũm mẽ pyka pê Itar wÿr pahi maati Sesti hwÿr Pawre mẽnh kaxyw. Itar kamã mẽ õ krĩ maati na pre kêp Rõm. Jakamã nhũm Pawre mẽ mẽ kot mẽ hagjênh xà kamã mẽ hkrĩ xwÿnh mẽ ho hpimràatã ma mẽ o mra nê pôristi krãhtũm Jurti nhĩhkram mẽ haxàr pa. Kot mã Rõm wÿr mẽ o mõi kaxyw. Jurtija kêp Itar kamã mẽ õ pahi maati hã pôristi krãhtũm nhũm prem ma mẽ kãm mẽ o mõi

kaxyw ïhkram mẽ hagjênh pa. Ixpê Rukre na pa pre inhmã Pawre hkôt inhmôr prãm nê mẽ hã ajêt nê mẽ hkôt mỗ.

² Tã pa mẽ ra inhnojarêt nhũm Aristak haxwỳja ma mẽ ixkôt mỗ. Pyka pê Masetôn nhỗ xwỳnh na pre. Õ krĩ pê na pre Tesarôn. Jakamã nhũm ma wa ixkôt mỗ. Hãmri nhũm pàrja nojarêt. Atamĩx rũm pàr nhũm ra As wỳr nojarêt pa mẽ hwỳr inhgjêx pa nê ma kamã mỗ. ³ Hãmri nhũm apkati pa mẽ krĩ pê Sito hwỳr pôj nê hã pàr xi. Nhũm pôristi krãhtũm Jurtija Pawre ho mex jakamã pa mẽ Sito hwỳr pôj nhũm Pawre mã anê pa mẽ ixkato nê ma ixkrànnhwỳjê hwỳr mra nê mẽ kutã apku nê ma akupỹm pàr wỳr mra.

⁴ Tã pa mẽ axte mỗ. Nom nhũm kôk mẽ ixkutã àpêr tỳx jakamã pa mẽ umaj juk nê gô hipôk kupu ho mỗ. Gô hipôk pê Sipreja pa mẽ upôk rũm ma hkupu ho mỗ nhũm mẽ inhnê kôk pê àmnàr mex nê. ⁵ Hãmri pa mẽ mỗ nê pyka pê Siris mẽ Pãpir wa hakrenh o mỗ nê pyka pê Ris kamã Mira hwỳr pôj nê hã pàr xi nê ijapôx pa. ⁶ Hãmri nhũm pôristi krãhtũmja Aresãnrir rũm pàr pumu nhũm ra Itar wỳr nojarêt. Pa mẽ hwỳr inhgjêx kurê kumrêx hãmri nê ma kamã axte mỗ. ⁷ Hãmri nhũm pàrja kôk kutã tee ri mỗr prêprêk kaxyw nê âm amnhĩm hprĩ nê mỗr ã apkati xohtô nê pa mẽ tokyx ixpôx kêt nê. Tã Sito hwỳr ixàhtêp o mỗ nom nhũm kôk mẽ ixkutã hihtỳx rax kumrêx. Jakamã pa mẽ juk nê gô hipôk pê Kret jatur xà jahpa nê ma kape hã mỗ nhũm mẽ inhnê kôk pê àmnàr mex nê. Hãmri pa mẽ ma Sarmôn jakrenh o mỗ ⁸ nhũm pàr kôk kutã amnhĩm hprĩ nê kape hã mỗ. Pa mẽ mỗ nê jatã

Rasej tã pàr nhĩkwỹ xà mex wỳr pôj nẽ kamã pàr xi.
⁹ Nom pàr kot amnhĩm hprĩ nẽ mỗr jakamã nhũm
 ra kôk xàpêr tỳx nẽ kamã kry htỳx ã mytwrỳ mẽ
 ixtã kato. Mytwrỳja ã mẽ kot kôk xàpêr tỳx pymaj
 nhỹhỹm pàr kãm mrar kêt. Jakamã nhũm Pawre
 tokyx mẽ inhmỗr nẽ pàr nhỗ xwỳnhjê mã kapêr
 kãm hihtỳx nẽ mẽ kãm:

¹⁰ —Kwa pu mẽ jar kôk xàpêr tỳx jamãr o ri papa
 nà. Kê kôk mẽ kry htỳxja hapêx pu mẽ rĩ kormã
 axte mỗ. Kot puj mẽ anhỹr kêt nẽ kôk xàpêr tỳx
 kãm mỗ nhũm nhỹri pàrja mẽ pahpê axà nhũm gô
 mẽ apê mẽ akukrêx o hapêx pa. Pu mẽ pajaxwỳja
 axkaprã.

¹¹ Anhỹr o mẽ kãm kapêr tã no nhũm mẽ kuma
 nẽ ãm kuma. Pàr pãm mẽ pàr o mrar xwỳnh wa
 nojarêr tỳx nẽ kapêr ma nẽ ãm kuma. Nhũm pôristi
 krãhtũm wa nojarêr ã wa kuma nẽ haxwỳja Pawre
 mar kêt nẽ. ¹² Nhũm mẽ kot pàr nhĩkwỹ xà mex
 jarênhja mẽ kot mex ã harênh tã mẽ kêp omnuj
 nẽ. Hã na wrỳk nẽ kôk xàpêr tỳx nhũm mẽ kêp
 omnuj tỳx nẽ. Jakamã nhũm mẽ piitã Pawre rom
 ra nojarêr nẽ. Mẽ kãm tokyx krĩ pê Wẽnĩs wỳr
 hpôx prãm jakamã nojarêr tỳx nẽ. Gô hipôk pê
 Kret kamã na Wẽnĩsja. Nẽ kamã kôk xàpêr tỳx kêt
 jakamã nhũm mẽ hwỳr nojarêr nẽ axpên mã:

—E kwa pu mẽ tokyx Wẽnĩs wỳr mỗ nẽ kamã
 mãn kôk xàpêr tỳx japêx jamãr o papa. Anẽ.

Hãmri nẽ piitã hwỳr nojarêr.

Kôk kot pàr o àpêr tỳx ã harênh

¹³ Tã nhũm kahpa hkôt kôk xàpêrja katàt kôt
 kawax pê apê nhũm mẽ kamã ama nẽ axpên mã:

—E hãmri. Tokyx pu mẽ mỗ. Anẽ.

Jakamã pa mẽ pàr o htỳx xà ho api nẽ axte mỗ. Ma gô hipôk pê Kret jakàr ã mỗ. ¹⁴ Puh nhũm na wrỳ nẽ kôk àpêr tỳx kumrêx. Mẽ kot kãm “kôk xàpêr tỳx maati” anhỹr xwỳnhja gô hipôk rũm mẽ ixto àpêr tỳx kumrêx o mỗ. ¹⁵ Hãmri nẽ mẽ ixkutã àpêr tỳx nhũm pàr tee ri kutã hkarôt. Pa mẽ kormã Wẽnĩs wỳr xipôx kêt ri ra ho awjanã nhũm amnhĩ krã hkôt kôk kôt mỗ. ¹⁶⁻¹⁷ Hãmri nẽ mỗ nẽ gô hipôk pê Krawti jahpa nẽ hakàr ã mỗ nhũm mẽ inhnê kôk pê amỹtã nhũm amnhĩm hprĩ nẽ kawax pê apê. Hãmri pa mẽ pàr krare kot mẽ ixkôt mỗr xwỳnhja pa mẽ kumỳ nẽ pàr rax kãm kumẽ. Ra kamã gô rax tã pa mẽ ixkarôt tỳx nẽ nê hkapĩr pa nẽ ho api nẽ pàr rax kãm kumẽ nẽ ho htỳx. Hãmri nẽ hpãnhã kôk xàpêr tỳx pymaj pàr rax kaxpre hpa. Hãmri nẽ kôk kot pykahti grã maati pê Sirteja wỳr pàr mẽnh nhũm kot amnhĩ to pykahti xãm o htẽm pymaj nhũm mẽ kot ho mrar xà hã kupêxê rax o wrỳ nhũm pàr amnhĩ krã hkôt ma kôk kôt mỗ.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nẽ arĩ na wrỳk rax rãhã nẽ. Jakamã pa mẽ pàr àr pymaj nẽ mẽ hikukrêx kwỳ gôx kãm rẽnh pa. Kaxkritre nẽ àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nẽ hikukrêx kwỳ rê nẽ gôx kãm kurẽ. ²⁰ Nhũm kôk arĩ àpêr tỳx kumrêx ã apkati xohtô nẽ. Nẽ na wrỳk rax rãhã jakamã pa mẽ kanhêti pumunh kêt nẽ myt pumunh kêt o mẽ ixtã apkati xohtô rax kumrêx. Hãmri nẽ tee ri ahkapi nẽ tee ri amnhĩ kukamã ijamaxpêr. Nẽ ixtyk par pix kukamã ijamaxpêr o ixkaprĩ nẽ ixkrĩ.

²¹ Hãmri nẽ mẽ inhmã ma xàp ixàpkur kêt ryy nẽ.

Hāmri nhũm Pawre tee ri ja hã mẽ ixpumu nẽ pàr nhõ xwỳnh wa kãm kapěr nẽ wa kãm:

—Kwa na pa pre tee ri Kret kãm man mẽ pamõr nẽ war amã ixkapěr. Kop apu mũtar măn mẽ kuri arĩ ri mẽ hkõt mẽ papa ronhỹx pu mẽ paja-makêtkati nẽ paxàmnhĩx ri papa. Tã nhỹx pu mẽ ri mẽ hikukrêxja gôx kãm rẽn̄h par kêt nẽ. ²² Nom kwa kêr ka mẽ tee ri amnhĩ kukamã ajamaxpěr kêt nẽ. Kot puj mẽ pahtõ pahtyk kêt nẽ. Ấm pàrja pix koja axà nẽ hapêx. ²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapěr o wrỳk xwỳnhjê hõ mẽ nhũm ixwỳr wrỳ nẽ inhmã awjarê ²⁴ nẽ inhmã: “Pa Pawre? Kwa tee ri amnhĩ kukamã ajamaxpěr o amã ma hkêt nẽ. Kot kaj akà hkĩnh pê ma Itar kamã Rõm wỳr mỗ nẽ pỏj nẽ pahi maati Sesti pumu nẽ kãm amnhĩ jarê. Jakamã koja Tĩrtũm akõt mẽ mỗr xwỳnh piitã omunh mex nẽ ka mẽ atõ tanhmã amnhĩ to hkêt nẽ.” Anẽ.

²⁵ —Ấ kot inhmã kapěr anhyr jakamã kwa mẽ amnhĩ to htỳx nẽ tee ri amnhĩ kukamã ajamaxpěr kêt nẽ. Tĩrtũm kapěr o wrỳk xwỳnh kot inhmã ujarênh xà hkõt koja Tĩrtũm ấ mẽ panhĩpêx anẽ. Ixte ja hã omunh mex kênã. ²⁶ Koja xep kỏkja nhỹri gỏ hipỏk ấ pàr krakrak pa. Nom mẽ papajaja kot puj mẽ pahkà hkĩnh pê hwỳr pahpỏx pa. Anẽ.

²⁷ Tã pa mẽ mỗõ nẽ ấ inhmỗr anhyrja ấ ixtã semãn axkrut nẽ ra gỏ rax pê Ariax kỏt axà. Kamàt kãm hkõt axà nhũm kỏkja arĩ pàr o apêr tỳx rãhã ho mỗ. Hāmri nhũm kỏt ấ kamàt nhũm pàr o mrar xwỳnhja ra pàr kot pykahti grà htêp ấ hkamnhĩx.

²⁸ Jakamã nhũm mẽ gỏ xupỳm pumunh xà ho gỏ

pumu nhũm upỳm kêp 36 met. Hămri nhũm hã ahtũmre nẽ axte omu nhũm ra hpãnhã kêp 27 met pix. Jao ra pàr kot gô kokwe htêp o mõi ã omu.

²⁹ Hămri nẽ kot kẽn kuranh nẽ hã pikrakrak pymaj katẽ rũm ho htỳx xà ho 4 nẽ gôx kãm kurẽ nhũm arĩ ajêt. Hămri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hămri nhũm pàr kãm mẽ àpênh xwỳnhjaja tanhmã hamaxpěr to nẽ hêx rom pàr krare ho wrỳk o tẽ. Mẽ kot mẽ ixrer nẽ ahte xarmã mõi nẽ rêr nẽ tokyx gô hipôk wỳr hpôx kaxyw. No ãm hêx rom te mẽ kot axte pàr krã rũm ho htỳx xà hõ mẽn kaxyw pyrãk o amnhĩ nhĩpêx nẽ kaxyw ho wrỳk o tẽ. ³¹ Nom nhũm Pawre mẽ hamaxpěr ã mẽ omu hămri nẽ pôristi mẽ mẽ hkrãhtũm mã mẽ harẽ nẽ mẽ kãm:

—Kwa koja mũjjaja mẽ pare nẽ ahte pàr krare kamã xarmã mõi rê ka mẽ apikaprãr pa kãm ga. Anẽ.

³² Hămri nhũm mẽ tee ri kuma nẽ mẽ hwỳr hprôt nẽ mẽ kêp pàr krare pê hkaxpre xà jakà nhũm gôx kãm tẽm nẽ ma gô hkôt hkaprỳn mõi.

³³ Tã hămri nhũm ra myt kator o mõi nhũm Pawre akupỳm mẽ piitã mẽ ho mẽ hamaxpěr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpěr o akaprĩ nẽ axàpkur kêt o atã semãn axkrut. ³⁴ E pu mẽ mẽmoj krẽ nẽ ho amnhĩ xihtỳx. Kot puj mẽ pahtõ pahtyk kêt nẽ. ãm hămri na pa mẽ amã ixkapěr. Anẽ.

³⁵ Hămri nẽ mẽmoj py nẽ mẽ noo mã Tĩrtũm mã harẽ nẽ hkur o xa ³⁶ nhũm mẽ ja hã omunh xà hkôt akupỳm tãm hamaxpěr o mõi. Hămri nẽ amnhĩm mẽõ hkwỳ jamỳ nẽ kumẽ kuku. ³⁷ Pàr kãm mẽ

inhmôr xwÿnhjaja na pa prem ixpê 276. ³⁸ Tã pa mẽ ra ixàpkur pa. Hãmri nê pàr kaxkrit kaxyw mẽ apkur xà hã mẽmoj y jakrêxja gôx kãm hkapĩr pa.

Pàr mẽ kêp pikrakrak ã harênh

³⁹ Tã nhũm ra myt kator mex nê nhũm mẽ amnhĩ kukamã gô hipôk pumu nê axpên mã:

—Kwa nhỹ pika na mũj wehe? Anê.

Hãmri nê nhỹri hakàx ã amnhĩm nôr xà mex pumu nê hwÿr pàr o môr kaxyw hã axpên ma.

⁴⁰ Hãmri nê kaxyw pàr o htÿx xà jakà nhũm axrê nê gôx kãm rôrôk pa. Nê pĩ ho pàr o juk xà nhõ xê xàja nhũm mẽ mǎǎnēn krǎhta. Hãmri nê akupÿm mrar xà hã kupêxê nhô nhũm kôk ho hikot nê ma gô jakàx wÿr o mǎ. ⁴¹ Nom nhũm pàr kormã hakàx pê awry hã môr ri amnhĩ to kokwe kura nê pyka nhĩmôk ã nǎ nhũm mẽ tee ri kot hkaxàr nê akupÿm gô xupÿm mã mēnh kaxyw. Nom nhũm gô kot pàr nhĩxô htaç tÿx kurê nhũm mẽ ixpê pikrakrak par o mǎ. ⁴² Jakamã nhũm pōristijaja tee ri omu hãmri nê ra mẽ kêp prēsje nhĩmex kaxyw. Mẽ kot gôx kãm rôrôk nê gô hipôk wÿr hpa ho nana nê mẽ kêp pikunor pymaj kot mẽ himex kaxyw. ⁴³ Nom nhũm mẽ hkrǎhtũmja kãm Pawre pĩr prǎm kêt jakamã ja nê mẽ hkurê nê mẽ inhmǎ:

—E mẽ ate apa ho gô rēnh mex xwÿnhjaja. Akumrêx mra nê mrǎ nê ho nana ho mra nê rê.

⁴⁴ Nǎ mẽ ate apa ho nana punuj xwÿnhjaja kēr ka mẽ tapti rÿ pàr kukrêx ǎ mÿ nê hã ajêt nê hã ma mǎn rê. Anê.

Hãmri pa mẽ ã amnhĩ nhĩpêx anê nê ixpiitǎ ixkà hkĩnh pê ixrêr pa.

28

*Gô hipôk pê Maw kamã mẽ pa hã mẽ harēnh
Makre 16.17-18*

¹ Tã pa mẽ ixpiitã ixkà hkĩnh pê ixrêr pa. Nhũm gô hipôk ã mẽ pa xwýnhjaja mẽ inhmã gô hipôk nhĩxi jarẽ nhũm xep kêp Maw. ² Nhũm Maw nhõ xwýnhjaja mẽ ixto mex nẽ. Nhũm axte na wrỳk rax nẽ nhũm kry htỳx kumrẽx nhũm mẽ ixkamã ukaprĩ nẽ mẽ inhmã kuto nẽ mẽ inhmã kapêr mex nẽ. ³ Hãmri nhũm Pawre kuwy kaxyw ri pĩ kawrà ho mra nẽ kuwy hwỳr o tẽ nẽ hã haxwỳr o xa. Hãmri nhũm kagã xoprê õ wẽnên xihtỳxja kuwy kagro pymaj pĩ rũm kato nẽ ãhkra hã kunha nẽ hã àpêr o ajêt. ⁴⁻⁵ Hãmri nhũm Pawre omu nẽ amnhĩ nẽ ho apê nẽ kuwy kamã kumẽ nhũm kamã tẽm nẽ xêt pa. Hãmri nhũm gô hipôk nhõ xwýnhjaja tee ri ja hã omu nẽ axpẽn mã:

—Kwa ga mẽmyti mũj pumu. Mãn kêp mẽ hpar o pa xwýnh na. Hã na kagã õ wẽnên xihtỳxta kunha. Nà koja ty nẽ rĩ amnhĩ pumu. Ra hkà hkĩnh pê gô rũm mẽ pahwỳr rêr tã koja tã ty kãm ga. Anẽ.

⁶ Hãmri nhũm mẽ tee ri kot tanhmã amnhĩ to hã hkamnhĩx nẽ hamãr o kuhê. à htỳx nẽ ãhkra hikot rỳ htyk kurê kumrẽx ã hkamnhĩx tã nhũm tanhmã amnhĩ kamã hamak to hkêt nẽ. Âm htỳx ri hkĩnh nẽ kapêr nẽ hpikunhar o ri mra. Hãmri nhũm mẽ tee ri omu nẽ axpẽn mã:

—Kwa tanhmã kot amnhĩ tore hã. Kêp mẽ hpar o pa xwýnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nẽ. Anẽ.

⁷ Nhũm gô hipôk ã mẽ õ pahihtĩ pê Puptija. Õrkwỹ hã jawỹ jakamã nhũm amnhĩ kôt mẽ ixwỹ pa mẽ ma hkôt mỗ nẽ kuri hkôt ixpa ho ixtã apkati axkrunẽpxi nhũm mẽ ixtô mex nẽ. ⁸ Nhũm ra Pupti nhĩpêêxà kêp à nẽ nỡ. Kà kagro htỹx nẽ haôk. Hãmri nhũm Pawre hwỹr tẽ nẽ omu nẽ hã ãhkra xi nẽ ho Tĩrtũm wỹ nhũm akupỹm ho mex kurê kumrẽx. ⁹ Hãmri nhũm gô hipôk nhõ xwỹnhja harẽnh ma nẽ Pawre hwỹr mẽ à xwỹnh piitã o mra nhũm mẽ omu nẽ Tĩrtũm nhỹ hã akupỹm mẽ ho mex pa. ¹⁰⁻¹¹ Hãmri nhũm gô hipôk nhõ xwỹnhjaja mẽ ixtô mex rax nẽ.

*Pawre axte Rôm wỹr nojarêt ã harẽnh
Rômãn 1.10-12, 15.30-32*

Tã pa mẽ gô hipôôta kamã ixpa hã mytwrỹ axkrunẽpxi. Hãmri nhũm kôk xàpêr tỹxta hapêx pa mẽ axte inhnojarêt nẽ ma mỗ. Pàr õ kamã hpãnhã mỗ. Aresãnrir rũm pàrja pa mẽ hpãnhã kamã mỗ. Mẽ kot kãm “sãnti pihpo” anhỹr xwỹnhhta kamã. Na pre gô hipôk kamã haxwỹja kôk xàpêr tỹx hapêx jamãr xa hã hikwỹ htã ra axte nojarêt. Hãmri nhũm gô hipôk nhõ xwỹnhja ma mẽ inhmôr xà hã mẽ inhmã mẽ ixàpkur xà hkwỹ nhõr rax nẽ. Hãmri pa mẽ pàr wỹr inhgjêx pa nẽ ma kamã mỗ. ¹² Mỗ nẽ Sirakus wỹr pôj nẽ hã pàr xi. Hãmri nẽ krĩja kamã mẽ ixtã apkati axkrunẽpxi nẽ axte mỗ. ¹³ Mỗ hãmri nẽ Rekre hwỹr pôj nẽ hã pàr xi. Hãmri nẽ kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mỗ. Nẽ mẽ ixtã apkati axkrut nẽ Potew wỹr pôj nẽ hã pàr xi. ¹⁴ Hãmri nẽ pàr rũm ijapôj nẽ krĩ kamã Jejus kôt mẽ ixtô nẽ htõx kwỹjê pumu nhũm

mẽ amnhĩ wỳr mẽ ixwỳ. Pa mẽ ma mẽ hkôt mra nẽ mẽ hkôt ri ixpa hã ixtã ù semăn. Hãmri nẽ ma Rôm wỳr hpãnhã ixpar o mỗ. ¹⁵ Hãmri nẽ kormã amỳm inhmôr ri nhũm Rôm kãm Jejus kôt mẽ ixtô nẽ ixtôxjaja mẽ ijarênh ma nẽ man mẽ ixkutã mra. Ma krĩ pê Prasxi Apja mẽ “Wẽn Pijakrunêpxi” anhỹr xwỳnh jarênhja wa hwỳr mẽ ixkutã mra. Hãmri pa mẽ axpẽn kaxpa nhũm Pawre mẽ omu nẽ hkĩnh nẽ. Nẽ mẽ hã Tĩrtũm mã amnhĩ jarẽ nẽ kãm:

—Pa Tĩrtũm? Nà ãm hãmri na ka mẽ ixkutã jajê rẽ. Na pa mẽ omu nẽ ixkĩnh nẽ. Nà amex o amex Tĩrtũm. Anẽ.

¹⁶ Hãmri pa mẽ ma mẽ hkôt Rôm wỳr mỗ nẽ pôj. Jatã Itar kãm Rôm wỳr pôj. Hãmri nhũm pôristi krãhtũm Pawre mã:

—E kot paj mẽ hagiênh xà kamã ajaxàr kêt nẽ. Kot kaj amã nhỹri ixkre kamã apa hprãm nẽ mamrĩ kamã apa. Nom koja pôristi hõ akôt pa ho pa.

Anhỹr jakamã nhũm nhỹri ixkre kamã pahihtĩ Sesti kot mar kaxyw kamã hamak o pa.

Pawre kot Rôm kamã tanhmã amnhĩ nhĩpêx to hã harênh

Atre 17.5-6

¹⁷ Tã nhũm Pawre Rôm kamã hã apkati axkrunêpxi nẽ amnhĩ wỳr Ijaew xàptâr tũmrejê hwỳ nhũm mẽ hã akuprô nhũm mẽ kãm amnhĩ jarẽ nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Nà na pa pre mẽ panhĩgêjtê kapêr nhĩrôp tanhmã ixãm to hkêt nẽ rỳ ixte tanhmã mẽ pahkwỳjê hõ hto hkêt tã nhũm mẽ pahkwỳjaja amarĩ ixpynê. Jerujarẽ kamã ixpynê nẽ Rôm nhõ

xwỳnhjê nhĩhkram ijaxà. ¹⁸ Hāmri nhũm mẽ ixte amnhĩ nhĩpêx ã ixkukja nê tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mẽ kām ixkator prām nê. ¹⁹ Nom nhũm mẽ pahkwỳjaja kām ja mex kêt jakamã pa pre jar pahi maati Sesti kot ixte kām amnhĩ jarēnh ã inhmar kaxyw amnhĩm harē nê man hwỳr mō. Kot paj tanhmã kām mẽ pahkwỳjê ho ixkapêr punuj to hkêt nê. ãm ixte amnhĩ tã tanhmã mar to hpix kaxyw na pa hwỳr mō.

²⁰ —Tã pa amnhĩ wỳr mẽ awỳ. Ixte mẽ amã amnhĩ jarēnh kaxyw. Mẽ pahkaprĩ xwỳnhhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkôt ijamaxpêr pix mỳrapê na prem ã kàx o ixkaxpre anê. Anê.

²¹ Hāmri nhũm mẽ kuma nê kām:

—Nà jar tanhmã ajarēnh kute hkêt. Na pre Jutej kamã mẽ pahkwỳjaja tanhmã ajarēnh to hã kagà nê mẽ ixwỳr mēnh kêt nê. Nê ham mẽ kurũm mẽ hpôx xwỳnhjaja na prem tanhmã mẽ inhmã ajarēnh to hkêt nê. ²² No na xep hte pyka piitã hkôt mẽ kām mẽ ate Jesus kôt amnhĩ xunhwỳr xwỳnhjê kurê nê. Na pa pre mẽ ajarēnh ma nê mẽ inhmã axujarēnh mar prām nê. Anê.

²³ Hāmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nê nhũm mẽ kām awjarê. Mẽ kām ujarēnh ry nê. Nê ho kamàt. Nê mẽ kām:

—Nà mẽ pahte amnhĩ wỳr kamã pajamak o papa xwỳnh Jesusja. Kot kaj mẽ atō amnhĩ kaxyw hkôt ajamaxpêr nê hkôt amnhĩ xām nhũm Tĩrtũm ja hã apumu nê ato hkra. Anê.

Nhũm pre ã mẽ kãm kapêr anê. Nê finat Mojes kot Tĩrtũm nhỹ hã Jejus kukamã tanhmã hã kagà htoja nhũm mẽ kãm harê. Nê Tĩrtũm nhỹ hã kapêr jarênh o mẽ pa xwỳnhjaja kot tanhmã hã kagà htoja nhũm mẽ kãm harê. ²⁴ Hãmri nhũm mẽ hkwyjaja kuma nê hkôt hamaxpêr nê amnhĩ kaxyw Jejus kôt hamaxpêr nê hkôt amnhĩ xunhwỳ. No nhũm mẽ hkwyjaja kuma nê ãm kuma nê kãm axte mar prãm kêt nê.

²⁵⁻²⁹ Jakamã kànhmã kuhê nê nojarêr nhũm Pawre mẽ kãm:

—Nà amnepêr na pre Tĩrtũm finat Ijaisti mã tanhmã kapêr to. ỹ hã kot mẽ panhĩgêjtê mã tanhmã kapêr jarênh to kaxyw. Tĩrtũm Karô nhỹ hã kot mẽ kãm kapêr nê tanhmã mẽ harênh to kaxyw. Te Tĩrtũm tãm mẽ kãm kapêr pyràk mẽ kãm kapêr. Nê ãm hãmri tanhmã mẽ pahkwỳjê jarênh to. Na pre mẽ kãm:

E Ijaisti. Kêr ka ma akwỳjê hkôt ri mẽ kãm tanhmã ixkapêr jarênh to ho ri apa.

Nê mẽ kãm: “Kot kaj mẽ ajamak o axumar tỳx tã aprĩ hã ixkapêr mar kêt nê.

Nê mẽ ano ho arĩt tỳx tã aprĩ hã ixte amnhĩ nhĩpêx ã ixpumunh kêt nê.

Mẽ amã ixkapêr mar prãm kêt jakamã te mẽ ate mar pymaj amnhĩ jamak pro pyràk o amnhĩ nhĩpêx o ri apa.

Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhôt pyràk o amnhĩ nhĩpêx o ri apa.

Jao amnhĩ kaxyw ixkôt ajamaxpêr kêt nê.

Kop mẽ amã ixkapêr mar prãm ronhỹx ka mẽ aprĩ
hã inhmar tỳx nẽ.

Nẽ aprĩ hã ixte amnhĩ nhĩpêx ã ixpumunh mex nẽ.
Jao amnhĩ tomnuj kaga hpa nẽ ixkôt amnhĩ xun-
hwỳ.

Pa ja hã mẽ apumu nẽ mẽ ato mex nẽ.

Tã ka mẽ ã amnhĩ nhĩpêx anhỹr kêt nẽ.” Anhỹr o
kêr ka mẽ kãm ixkapêr jarênh o ri mẽ hkôt
apa Ijaisti. Anẽ.

Na pre ã Tĩrtũm mẽ panhĩgêjtjê kaxyw Ijaisti mã
kapêr anẽ nhũm ô ri mẽ kãm ujarênh o pa nẽ
mẽ pamã hã kagà. Jakamã kwa mẽ okora. Kêr
ka mẽ jajê pyrà nẽ ã amnhĩ nhĩpêx anhỹr hkêt
nẽ. Kwa mẽ inhma nẽ inhmar tỳx nẽ. Ijaew kêt
xwỳnhjaja kot kapêr marja na ra Tĩrtũm kãm hprãm
nẽ. Jakamã koja mẽ hwỳr mẽ kot kapêr jarênh o mẽ
pa xwỳnh kwỳjê rẽ nhũm mẽ hkôt mẽ kãm ujarênh
o pa nhũm mẽ kuma nẽ mẽ akurom kãm mar prãm
nẽ. Anẽ.

Hãmri nhũm mẽ kuma nẽ hapôx pa nẽ ma
akupỹm axpẽn mã tanhmã kapêr jarênh to ho mra.
³⁰ Hãmri nhũm pahi maati Sesti tokyx amnhĩ wỳr
Pawre hwỳ nẽ tanhmã mar to hkêt nhũm ôrkwỹ
kamã kêp prês nẽ pa ho hã amgrà axkrut. Nẽ
tãm ôrkwỹ pãnhã mẽ kãm amnhĩre. Nhũm pre krĩ
nhõ xwỳnhjaja ohtô nẽ hwỳr mra nhũm amnhĩ wỳr
mẽ omu nẽ hkĩnh nẽ. ³¹ Na pre hte amnhĩ wỳr
mẽ kuwỳ nẽ mẽ kãm Tĩrtũm kapêr jarênh o hkrĩ.
Mẽ kot Tĩrtũm Kra Pahihti Jesus Kris kôt amnhĩ
xunhwỳr nhũm Tĩrtũm kot ja hã mẽ omunh nẽ
amnhĩ katut kôt mẽ kot amnhĩ tomnuj rênh par nẽ
mẽ ho hkra hã mẽ kãm ujarênh o hkrĩ. Nẽ mẽ kot
hkôt amnhĩ xunhwỳr xwỳnhjê jahkre. Tanhmã mẽ

kot Jejus kô amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mẽhõ ja nê tanhmã kãm kapêr to hkêr nê.

Tã ãm ja pix Teopre. Ixpê Rukre na pa awýr kagàja nhĩpêx nê kumẽ. Nê kamã amã tanhmã mẽ pahkwýjê jarẽnh to. Tã ãm ja pix na hapêx.

Tĩrtũm kapër ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f